

This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + Make non-commercial use of the files We designed Google Book Search for use by individuals, and we request that you use these files for personal, non-commercial purposes.
- + Refrain from automated querying Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + Maintain attribution The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + Keep it legal Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at http://books.google.com/



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.


Nous vous demandons également de:

- + Ne pas utiliser les fichiers à des fins commerciales Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + Ne pas procéder à des requêtes automatisées N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + Ne pas supprimer l'attribution Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + Rester dans la légalité Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse http://books.google.com







Mari

		·		
			·	
				•

	• .			
· .				
	·			
				,



M D D K



MÉMOIRES

ET

CORRESPONDANCE DE DUPLESSIS-MORNAY.

TOME III.

ÉCRITS POLITIQUES ET CORRESPONDANCE.

A. 1585-1587.

DE L'IMPRIMERIE DE CRAPELET.

MÉMOIRES

ET

CORRESPONDANCE

DE DUPLESSIS-MORNAY,


POUR SERVIR

A L'HISTOIRE DE LA RÉFORMATION ET DES GUERRES CIVILES ET RELIGIEUSES EN FRANCE, SOUS LES RÈGNES DE CHARLES IX, DE HENRI III, DE HENRI IV ET DE LOUIS XIII, DEPUIS L'AN 1571 JUSQU'EN 1623.

EDITION COMPLETE,

Publiée sur les manuscrits originaux, et précédée des MÉMOIRES DE MADAME DE MORNAY sur la vie de son mari, écrits par elle-même pour l'instruction de son fils.

TOME TROISIÈME.



CHEZ TREUTTEL ET WÜRTZ, LIBRAIRES,

RUE DE BOURBON, Nº 17.

A STRASBOURG ET A LONDRES, même Maison de Commerce.

1824. ~ √

,

MÉMOIRES

ET CORRESPONDANCE

DE

DUPLESSIS-MORNAY.

I. — LETTRE DE M. DUPLESSIS

Au roy de Navarre.

Du 17 janvier 1585.

Sire, j'ai eu ce malheur, comme je vous escrivis par la precedente, d'estre arrivé ici quattre heures apres vostre partement, quelque bonne diligence que j'aie peu faire; à mon arrivee j'ai entendeu le differend qui s'est rencontré sur l'ordre de l'estat de vostre maison entre M. de Turenne et M. de Clervant, auquel j'ai quelque part, à cause de mesme charge. J'estime, à parler proprement, qu'il n'est pas entre les personnes, mais entre les charges. Et pour mon regard, sire, je vous supplie tres humblement de croire que je sçais tres bien ce que je dois de respect à M. de Turenne, et n'ai moins de volonté de le lui rendre, que de cognoissance de mon debvoir. Il est question ici, sire, qu'en tous les estats precedens, les surintendans de vostre maison ont esté couchés premier que le premier gentilhomme de vostre chambre. Et pensons, sire, que vostre majesté ne nous a honorés de ceste charge, pour la posseder moins dignement que ceulx qui nous ont precedé; que la charge aussi est telle, que le bien de vostre service requiert qu'elle soit honoree et auctorisee; et encores, sire, qu'elle nous honore en vostre service, si n'estimons nous que vostre majesté estime que nos personnes en aient ravallé la dignité. Ce nonobstant, sire, desirans l'advancement de vostre service, qui consiste principalement en l'union des bons serviteurs, nous avons tres volontiers soubmis, tant nostre propre consideration, que celle mesmes de la charge, au contentement de M. de Turenne. Et de faict, sire, avons pryé M. de la Marsiliere, comme ayant la charge de dresser l'estat, de lui proposer que nous consentions qu'il prist et choisist tel lieu et rang que bon lui sembleroit, sauf à nous à le prendre tel, apres son choix, qu'il feust sans indignité de la charge et de nous. Et sur ce, vous ressouviendra, sire, que c'est accomplir le desir qu'il avoit eu des l'origine de ce differend, qui par ce moyen debvroit cesser. Mais M. de Turenne ne s'en est voulleu resouldre: seulement a dict qu'il en passeroit par où il plairoit à vostre majesté en ordonner, tant pour lui que pour nous. Sire, nous nous asseurons en la prudence de vostre majesté qui n'ordonnera rien sur ce faict au prejudice de nostre reputation; ains se contentera que le premier desir de M. de Turenne soit satisfaict entierement, lequel nous n'estimerons jamais voulloir se prevaloir de nostre dignité ni indignité. Seulement, sire, qu'en usant nos vies pour vostre service, nostre honneur ne soit exposé aulx sinistres interpretations des hommes : et ne ravallés poinct aussi l'auctorité d'une charge, qui ne peult estre exercee à vostre utilité, qu'aultant qu'elle est auctorisee de vous. Qu'elque chose, sire, que vostre majesté en ordonne, nous ne pouvons lui demeurer que tres humbles et

tres affectionnés serviteurs. Car ce que nous estions, premier que d'avoir ceste charge, nous ne le serons jamais moins, mesmes ne l'ayans plus. Mais, sire, il nous seroit trop plus aisé de ne l'avoir poinct, que de l'avoir indignement. Et nous l'aurions indignement, si nous l'avions moins dignement que paravant : ne pouvant alors l'exercice de nostre charge estre interpreté de la pluspart qu'à nostre blasme, quand ils nous verroient, apres nos assideus travaulx, ravallés si bas au dessous de nous mesmes. Or, sire, le tout soit remis au jugement de vostre majesté qui sçaura bien se servir d'ung chacung en son degré. Et par ce que l'annee 84 est passee, et qu'entrons en une nouvelle, nous avons pensé de vous envoyer, M. de Clervant et moi, en une demie feuille de papier, l'abregé de nostre service l'annee passee, que nous supplions tres humblement vostre majesté de voir attentivement, pour vous servir de lumiere en vos affaires. Et sur ce, pryons Dieu, sire, etc.

II. — LETTRE DE M. DUPLESSIS

A M. de Saincte Aldegonde.

Du 20'janvier 1585.

Monsieur, j'ai receu les vostres avec les copies y joinctes. Je suis marry que messieurs vos deputés n'arriverent en nostre court pendant que j'y estois; j'eusse tasché de leur servir, recognoissant en vostre interest le nostre, et celui de cest estat. M. de Clervant s'en va maintenant par delà, qui porte ceste mesme volonté, et de la part de ce prince, et de la sienne mesmes; ce peu que nous pouvons, vous le pouvés en nous, et n'en

faictes doubte. Le surplus vous sera dict par M. de Calignon, maistre des requestes de ceste maison, personnage qualifié de doctrine, pieté, etc. Aimés le ce premier coup pour l'amour de moi; ci apres que l'aurés cogneu, pour l'amour de lui mesmes. Je suis tout à vous, et plains fort vos travaulx; mais aulx fortes espaules les bonnes charges. Dieu qui les mesure ne les chargera poinct oultre vos forces, j'entends vos forces aidees des siennes. Je salue humblement, monsieur, etc.

De Saincte Foi.

III. — * LETTRE DE M. DUPLESSIS

A M. de Passy.

Du 23 janvier 1585.

Monsieur, votre commission nous est portee par M. de Clervant, qui en conferera plus amplement avec vous; je lui ai aussi discoureu l'advertissement que j'ai proposé par vostre moyen; j'espere qu'il viendra à temps pour y apporter quelque advancement; je vous prye, faisons tout ce qui se pourra pour relever les affaires de ce prince, lequel se promet beaucoup de nostre industrie. Je salue tres affectionnement vos bonnes graces, et prye Dieu, monsieur, vous avoir en sa sainte garde.

Vostre bien affectionné ami à vous servir,

DUPLESSIS.

De Saincte Foi.

IV. — LETTRE DE M. DUPLESSIS

A M. d'Elbene. (1)

Du 29 mars 1585.

Monsieur, M. de Buzanval, nostre commun ami, vous aura dict de nos nouvelles si amplement, que je n'y puis rien adjouster. Nous attendons en patience ce qui sera eclaté depuis, et la volonté de sa majesté sur ce que nous avons à faire. J'estime de ma part qu'en ces maladies, lorsqu'elles naissent, il fault attendre, comme les medecins, quæ futura sit indicatio morbi, quelle forme prendra la maladie, premier que d'ordonner aultre chose que bonne diete. Et peult estre que ceste ci ne sera qu'une ephemere, au lieu qu'on la craint continue. Se contenteroient ils bien d'avoir rompu la negotiation des Pays Bas, sans passer plus oultre? Toutesfois c'est beaucoup que tant de gentilshommes aient demenagé, et que M. le cardinal de Guise ait laissé la court, et emmené le fils de M. de Guise: et trop en somme, pour se jouer, si on ne veult faire à bon escient. De moi, je prends tout en bien: s'ils desistent, ils auront perdeu creance envers beaucoup de gens; s'ils persistent, ils auront reveillé l'esprit du roy, pour penser à ses affaires. Et, si nous sommes sages, se trouveront aussi empeschés que les enfans qui triomphoient et donnoient des nazardes à Hercule endormi, et ne sceurent que devenir, lorsqu'ils le veirent s'eveiller. Faictes tousjours estat que je suis vostre ami et serviteur. Je vous baise bien humblement les mains

⁽¹⁾ Bartholomeo d'Elbene, abbé de Bellozane.

et supplie le Createur, monsieur, vous avoir en sa saincte garde.

De Montauban.

V. — LETTRE DE M. DUPLESSIS

A M. l'abbé Guadagny.

Du 29 mars 1585.

Monsieur, nous avons ici entendeu les remuemens de delà. Je ne m'en suis ebahi, parce que long temps a que je les voyois venir, et nous en avions aultresfois discouru ensemble. Je doubte si on se contenteroit par ces allarmes d'avoir rompeu les affaires des Pays Bas; mais les circonstances m'en font juger aultrement. S'ils desistent, c'est perdre creance envers ceulx qu'on a mis en campagne; s'ils persistent encores, n'est ce que reveiller nostre generosité et puissance à leur ruyne, si nous voullons bien penser à nous. Milo voyant une fente en ung chesne, y mit les doigts pour le fendre et separer en deux; mais le chesne se reserra à sa ruyne. Et contre ces gens, qui se veullent prevaloir de la division de cest estat pour le dissiper, n'y a plus prompt moyen que de rallier soi mesmes; j'entends nos plus proches en nous mesmes; et j'estime que jamais ne se trouveront plus empeschés. Ce prince attend la volonté de leurs majestés, pour, selon icelle, se regler; et sur ce, ne vous dirai aultre chose, sinon que je suis vostre serviteur d'aussi bon cœur que bien humblement; je vous baise les mains, et supplie le Createur, monsieur, vous avoir en sa saincte garde, etc.

De Montauban.

VI. — LETTRE DE M. DUPLESSIS

A M. de Bellievre.

Du 29 mars 1585.

Monsieur, nous avons entendeu ici les remuemens qui se font es quartiers de delà, desquels ceulx de deça ne sont du tout exempts. Il vous soubviendra, s'il vous plaist, du voyage que je feis il y a ung an, vers sa majesté, et des propos que je vous ai teneus à plusieurs fois à Sainct Germain en Laye. Vous en voyés les effects. Je deplore la calamité de ce povre estat, qui ne se peult tant soit peu r'asseoir; les mauvaises humeurs en sont cause, aulxquelles on eust peu donner quelque cours ailleurs. Si fault il s'esvertuer, et qu'il ne soit dict, s'il est possible, que le patient soit mort en vos mains. Car vous sçavés que les derniers medecins en ont tousjours le plus de reproche, encores que les premiers ayent faict les faultes. Je cognois l'affection que vous portés à ce royaume, et sens vos douleurs. Arrestons nous plustost à chercher les remedes, qu'à pleurer les maulx. Ceulx qui remuent ceci, ne sçavent poinct encores que c'est que de patir. Il leur a esté aisé d'estre capitaines, aulx despens du roy et de ceste couronne, où rien ne leur manquoit. Laissés les passer les rivieres sans ponts et sans bateaux, nourrir les armees sans pain, et payer les reistres sans argent; et vous ne vistes jamais gens plus empeschés. Il me souvient de la fable; les enfans faisoient leur profict d'Hercule qui sommeilloit, et lui donnoient des nazardes: des qu'il branla ' le sourcil, ils ne sceurent que devenir; et ainsi en sera il. D'ici, on vous en donnera des allarmes; n'en croyés

rien. Je plains que jè ne suis solvable de si grandes choses; mais aultant ont a perdre les chauves, que les velus. Je vous responds que vous n'avés à attendre d'ici que tout service; que nous ressentons le mal du roy comme lui mesmes, et n'attendons que ses commandemens; mais nous estimons que ceste obeissance nous tient lieu de sacrifice. Il est donc besoing que nous les recevions, et faictes estat que nous n'en abuserons poinct; et sur ce, je vous baiserai bien humblement les mains, et supplierai le Createur, monsieur, vous avoir en sa saincte garde.

De Montauban,

VII. — LETTRE DE M. DUPLESSIS

AM. de Villeroy.

Du 29 mars 1585.

Monsieur, il a pleu au roy advertir le roy de Navarre des remuemens qui se font par delà: il attend ses commandemens pour s'y conformer en tout et par tout. Vous avés tous acquis une grande reputation de prudence; ne laissés perir ce royaume, qui vous est commis entre vos bras; le patient est plus fort que la maladie, quoi qu'on voie, si ses forces et son sang sont bien menagés. Seulement, resouvenons nous ce qu'ils sont et ce que nous sommes; et pensons avoir affaire à personnes qui n'ont jamais sceu passer riviere, que nous ne leur ayons dressé les ponts. Les fiebvres qui ont le moins à durer, ont les commencemens les plus aspres. Vous avés ung advantage en celle ci bien grand, que la peste a paru premier que la fiebvre; et c'est à dire que la nature a desjà à demi chassé le mal; mon-

sieur, je suis vostre serviteur qui vous baise les mains bien humblement, etc.

VIII. - LETTRE DE M. DUPLESSIS

A M. de Cheverny, chancelier de France.

Du 29 mars 1585.

Monseigneur, vous m'avés donné la hardiesse de vous escrire, et en serés peult estre importuné; nous avons entendeu les remuemens de delà, et attendons s'ils s'estendront jusques deça. C'est ung malheur que ce povre estat ne puisse respirer. Mais si fault il monstrer qu'il n'a moins de forces et de courage pour se garantir, qu'aulcungs y en pensent trouver pour le faire perdre. J'imagine ces mouvemens ici conduits par le' roy d'Espaigne; et pourtant, estime qu'ils passeront oultre; au moins, que s'ils se reposent tant soit peu, ce sera pour laisser passer l'allarme, et plus commodement recommencer. Et ainsi en feut il l'an passé en ceste mesme saison, dont il nous souvient. Mais, loué soit Dieu, que, contre ung prince vieil, nous en avons ung d'aage parfait; contre ung, peu guerrier, ung qui ne se trouvera poinct nouveau de se trouver à la teste de ses armees; contre l'or d'Espaigne, et de l'or, si nous en voullons, et du fer. Du roy de Navarre, quoique la calomnie vous puisse dire, je vous supplie de ne croire que beaucoup de volonté et de service pour sa majesté: Et faictes estat que ses mouvemens et ses pas ne dependront que des signes que lui donnera sadicte majesté, comme vous verrés par effect. Et je le vous dis, à cause qu'il y en peult avoir qui aient pensé que le service du roy, et son auctorité en ces pays, n'estoient

choses compatibles. Au lieu que j'oserois dire que la diminution de l'auctorité, qui lui a esté faicte, a porté beaucoup de dommage au service de sa majesté, comme encores fraischement, il n'a receu les lettres qu'il auroit pleu à sa majesté lui escrire de ces remuemens, qu'ung mois apres la datte; lesquelles recevant à temps, il eust peu couper et rompre en plusieurs sortes, les mauvais desseings des ennemis de ceste couronne. Et en somme, monseigneur, les volontés sont plus à considerer que les puissances, d'aultant que les puissances sont regies par les volontés. Au reste, vous me ferés cest honneur de m'estimer tousjours ce que je suis, vostre tres humble serviteur; et sur ce, je supplierai le Createur, monseigneur, vous avoir en sa saincte garde.

De Montauban.

IX. — LETTRE DE M. DUPLESSIS

A monseigneur le duc de Montmorency.

Du 30 mars 1585.

Monseigneur, vous estes assez adverti comme tout est plein de toutes parts de remuement. Nous pensons que le plus seur est de voir quelle forme prendra ceste fiebvre, premier que d'en rien ordonner; et cependant tenir tousjours le malade au pouls. Cela, à mon advis, ne peult tarder; car ces mouvemens qui marchoient ci devant par mois, s'acheminent doresnavant par jours et par heures, à mesure que l'execution s'approchera. J'estime que ceste guerre sera le crible des vrais François; car encores que ceulx qui jouent sur le theatre soient habillés à la françoise, si est il evident que l'aucteur de la tragedie est Espaignol, Si

ces mouvemens dependoient de ceulx qui semblent remuer, on pourroit penser qu'ils pourroient reculer. Mais posant qu'ils dependent de plus hault, il y a apparence qu'ils passeront oultre; et toutes les circonstances que nous en entendons tendent là. Je desire fort voir leurs declarations: car on en sçaura faire son profict. Monseigneur, nul en ces grands affaires ne peult plus assister de conseil ce prince que vous. Les precedens affaires n'ont esté que jeux; François contre François, qui de long temps se sont mesurés et essayés l'ung l'autre; et l'ung aussi impatient et aussi prest à se lasser que l'aultre. Ici les forces françoises sont sur le champ, mais conduictes et amenees par l'esprit d'Espaigne, qui est d'autant plus patient à nous voir patir, que nous seuls patirons, et lui n'en aura que le profict. Dieu se rit le plus souvent de ces desseings, et faict exhaler les tonnerres en sumee. Je le supplie, monseigneur, qu'il vous garde et conserve en toute santé.

De Montauban.

X. — LETTRE DU ROY DE NAVARRE

Au roy.

Monseigneur, depuis que j'ai depesché le baron de Salignac vers vostre majesté sur les lettres qu'il vous pleut m'escrire, les bruicts de ce qui s'est remué en vos provinces de delà sont veneus ici; et en celles mesmes de deçà plusieurs effects ont paru, desquels vostre majesté aura esté advertie, qui ont donné certain tesmoignage que les desseings des perturbateurs de vostre estat s'estendent jusques ici. J'eusse tasché, monseigneur, à y apporter

quelque preservatif ou quelque remede, et, sans doubte, l'eusse peu faire, si j'eusse receu là dessus les commandemens de vostre majesté comme elle me faisoit cest honneur par ses lettres de les me faire esperer d'heure à aultre. Et cependant, ce que j'ai peu faire, c'a esté d'exhorter et contenir les villes en leur debvoir vers vostre majesté, par frequentes lettres, et de parler aulx principaulx gentilshommes de vos pays de deçà, qui presque tous me sont veneus voir, estans en peine de ce qu'ils avoient à faire, et lesquels j'ai trouvé pleins de fidelité et d'affection envers le service de vostre majesté, et tous prests de vous en faire une bonne preuve, quand vostre majesté m'aura commandé son intention pour la leur faire entendre. Croyés, monseigneur, que nul n'y apportera plus de fidelité, diligence et d'affection que moi, en qui toutes les qualites sont nees, au lieu qu'es aultres elles ne peuvent estre qu'acquises ou entees, et ne peuvent pas jamais parvenir à telle perfection que je les sens en moi. Et m'est ung juste regret, monseigneur, d'estre reputé comme inutile en vostre service, lorsqu'il y a si grand subject de vous servir, et qu'il est besoing, si jamais il feust, que soyés bien servi; et permettés moi, monseigneur, de dire plus, lorsque je vois vostre majesté en commander d'aultres pour vostre service, aulxquels je ne ferai poinct de tort pour l'honneur que j'ai de vous estre ce que je suis, de dire qu'ils n'y peuvent apporter tant d'ardeur et d'affection que moi. C'est une naturelle jalousie, que je m'asseure que vostre majesté recevra de pareil cœur qu'elle procede. Et ne celerai aussi à vostre majesté que ceulx de la relligion, qui voient gens de guerre se lever de toutes parts, mesmes par vos commandemens, entrent en defiance, et ne peuvent comme s'asseurer, quand ils

voient que je ne reçois aulcung commandement de vostre majesté pour son service. Comme aussi pas ung. d'eulx n'est appellé à ce qui se presente pour vostre service, ne pouvans la pluspart d'iceulx s'imaginer, quelque chose que je leur puisse dire, que vostre majesté peult m'avoir oublié ou laissé en arriere en la distribution de ses commandemens, lorsqu'il est question, comme il lui a pleu de m'escrire, de son estat et de sa personne propre, en la vie et conservation desquels nul ne se peult dire tant interessé que moi. Or, monseigneur, si puis je respondre à vostre majesté de leur fidelité et affection, et qu'ils sont tous prests au premier mot que vostre majesté me departira, de faire tout ce que doibvent tres loyaux subjects pour vostre service. Et vous supplie, monseigneur, si j'ai eu le bonheur d'estre des premiers à advertir du mal, que je n'aie ce malheur d'estre des derniers soubs vostre auctorité à le detruire. Cependant, monseigneur, je m'advance sur la riviere de Dordoigne, pour estre plus proche du mal, et plus preparé pour le remede, quand vostre majesté me fera cest honneur de me commander ses intentions. Et parce que le sieur de Rebours, qui a veu ce qui s'est passé pres de moi, le vous sçaura mieulx representer de bouche, je remettrai sur lui les particularités, et pryerai Dieu, monseigneur, etc.

XI. — LETTRE DU ROY DE NAVARRE

A M. de Chassincourt, faicte par M. Duplessis.

Monsieur de Chassincourt, je suis en grand' peine de n'avoir aulcune nouvelle de vous, depuis le sieur de Buzanval; car les allarmes croissent, et les effects s'en

voient en divers lieux; et cependant je demeure suspendeu, ne recevant poinct commandement de sa majesté de ce que j'ai à faire. Et pouvés penser quel deplaisir ce me peult estre, de voir passer tous les jours devant mes yeulx des choses contre son service, que je pourrois fort aisement rompre, et aulxquelles je suis contraint de conniver, faulte d'estre instruit de son intention, comme il le m'avoit faict esperer. D'ailleurs j'ai ung aultre grief qui ne me presse gueres moins; c'est qu'il y en a qui prennent plaisir à tenir les villes et la noblesse en defiance de moi, par tous les artifices qu'ils y peuvent employer; et d'autant plus qu'ils les voient enclins à s'approcher de moi, pour l'asseurance qu'ils ont et doibvent raisonnablement avoir, qu'en ce remuement nul ne doibt estre plus affectionné au service de sa majesté et bien de son estat que moi, qui de nature ne puis estre aultre. Je vois clairement à quelle fin cela se faict; et le porterois plus patiemment, s'il se faisoit sans prejudice du service de sa majesté. Mais au contraire le mal croist, et ses ennemis se jouent à leur plaisir; et tout, faulte de s'y opposer. Il se leve plusieurs compagnies par commission et auctorité de M. le mareschal de Matignon en mon gouvernement. J'en oy aussi peu parler que si je n'estois poinct gouverneur. Et, en somme, n'ai de sa part aulcune communication des affaires de la Guyenne. Si m'osé je promettre que je ne serois inutile au service de sa majesté en ces pays; et tout le regret que j'en ai, c'est que je vois perir les occasions qui se pouvoient mettre à profict, et advenir les inconveniens qu'il estoit facile d'eviter. Ceulx de la Ligue qui voient cela s'en accouragent, prennent de là argument de conforter leurs adherens, leur faisant croire que c'est une farce qui se joue, dont tous les

desseings retomberont enfin sur ceulx de la relligion; et les choses passees donnent couleur à ceste invention. Ceulx de la relligion, d'aultre part, quelque chose qu'on leur puisse dire, quand ils considerent qu'en ung tel besoing je suis oublié et laissé derriere, et que je demeure comme eulx, par consequent despouillé pendant que chacung s'arme, au lieu de quitter la defiance, la reprennent; qu'en ce temps toutesfois il seroit necessaire de leur arracher par tous moyens. Parmi tout cela les perturbateurs font leurs affaires, qui aultrement se trouveroient si foibles et si abandonnés en ces quartiers, qu'ils n'auroient de quoi fournir leurs places; et ne fauldroit que les prevosts des mareschaulx pour les chasser. Faictes entendre cela au roy: car il lui importe; et lui dictes que je porte impatiemment de voir à veue d'œil empirer ses affaires, qui en ung moment se pourroient amender. Et ramentevés lui, monsieur de Chassincourt, que sa personne ne peult estre plus sidelement defendeue que par son sang propre, ni son estat que par ceulx qui ne peuvent estre conservés qu'en le conservant. Je ne sçais si, en ceste necessité, je me doibs plaindre que, sur l'estat qui a esté envoyé aux thresoriers generaulx de Guyenne, je me trouve des derniers pour ma pension, et, pour le regard de la composition de Perigueux, presque tout le dernier. Tellement que je me vois hors d'espoir d'en toucher ung denier de ceste annee. Remonstrés le à sa majesté; mais selon vostre discretion: car je ne veulx pas que mes plainctes particulieres obscurcissent les publicques. Et, au reste mandés moi tout au plus tost que pourrés de vos nouvelles. Ceste servira pour M. de Clervant et pour vous. Je ne lui escris poinct, parce que je l'estime absent.

M. le mareschal de Matignon m'a faict dire par quel-

ques ungs de mes serviteurs, et diverses fois, que tous ces remuemens pourroient bien enfin retomber sur moi, et que j'avois à y penser. Dictes le à M. de Bellievre, et prenés advis de lui, si vous le devés dire au roy, monseigneur; car cela me semble importer : mais ne faictes en cest article que ce qu'il trouvera bon.

XII. — LETTRE DE M. DUPLESSIS

A M. Duranti, premier president au parlement dé Thoulouze.

Du 30 mars 1585.

Monsieur, vous avés entendu les remuemens qui se font par tout ce royaume; car je ne doubte poinct que le roy ne vous en ait adverti. Nous avons tous à en deplorer la condition, ne pouvant icelui tant soit peu respirer et se rasseurer. Les pretextes ne manqueront jamais. Mais, contre un prince si adonné à sa relligion, comme est le nostre, comment ceulx de la mesme profession pourront ils pretendre la relligion? Et, quant à l'estat, y aura il aulcung qui ne voie que, s'il y a quelques defaults au gouvernement, ils ne sont pas marrys proprement qu'ils y soient; mais qu'ils y soient par aultres que par eulx? Dieu veuille radoucir toutes choses; mais, si elles continuent, j'estime la guerre qui s'en ensuivra, le vrai crible des vrais subjects et des vrais François. Car bien que les acteurs qui paroissent sur le theatre soient vestus à la françoise, si est il tout clair que l'aucteur de la tragedie est l'Espaignol; et quæ sparguntur missilia, ipsius effigiem præferunt. Sur ceci on vous vouldra faire croire, monsieur, que, de la part du roy de Navarre, se preparent quelques mouve-

mens. Croyés moi (et reprochés le moi si vous voyés le contraire), que le roy de Navarre ne veult dependre que du commandement du roy, lequel il a receu par deux fois, ces jours passés, et qu'il attend de jour en jour plus clairement, et signum expectat ab arce. Que ceste entreveue derniere (1) ne vous y apporte scrupule; car elle n'a tendue qu'à paix, et ne produira aultres effects que de paix; et sa majesté cognoistra qu'elle estoit tres necessaire pour le bien de son service. Le tout est que tout ce qu'il y a de François en nostre France se reveille, se rallie, et ait une parfaicte intelligence ensemble. Qu'on n'oie plus aultres noms entre nous que François ou Espaignol, et que les noms des anciennes passions ou factions cessent et s'abolissent; et qu'il ne soit poinct dict de vous, messieurs, qui avés une notable part au gouvernement de cest estat, qu'il soit peri entre vos bras. Je vous escris, monsieur, de l'abondance d'affection que j'ai envers le royaume, où Dieu m'a faict naistre, duquel je pleure les maulx en mon cœur, et m'enhardis d'eveiller, au moins par ung cri, ceulx que je pense y pouvoir et debvoir apporter quelque remede. Je ne vous veulx celer que le roy de Navarre a trouvé un peu estrange qu'on ait faict courir le bruict entre le peuple qu'il auroit eu desseing sur certaines places de Languedoc, et mesmes qu'il estoit sur le poinct de prendre les armes. Il n'est poinct si mal conseillé, ni par son propre jugement, ni par les siens, que de penser à chose qui ne lui pourroit apporter que ruine et dommage. Monsieur, je suis vostre serviteur;

⁽¹⁾ Scavoir, du roy de Navarre et M. de Montmorency à Sainct Paul de la Miatte, au haut Languedoc.

et sur ce vous baise bien humblement les mains, et supplie le Createur vous avoir en sa saincte garde.

De Montauban.

XIII. — LETTRE DU ROY DE NAVARRE

A la royne d'Angleterre, faicte par M. Duplessis.

MADAME, je crois que vous aurés esté advertie des grands remuemens qui se sont faicts en ce royaume, depuis quelque temps, par ceulx de la maison de Guise et leurs adherens, desquels je n'estime estre besoing vous escrire les particularités, parce que vous les aurés sceues de plus pres. Leurs pretextes sont qu'il n'y ait plus aultre relligion en ce royaume que la romaine; que le roy, monseigneur, pour l'asseurance d'icelle, apres sa mort, nomme et declare ung successeur catholique romain; et y entremeslent quelques aultres articles, pour gratifier le peuple, concernant la reformation de l'estat. En ceste tragedie ils se servent du nom et de l'auctorité de M. le cardinal de Bourbon mon oncle, duquel ils ont abusé la vieillesse, et le font qualifier premier prince du sang et presomptif heritier de ceste couronne, en quoi j'ai l'interest que vostre majesté peut assés juger. En l'aage où il est et où est le roy, monseigneur, vous considererés, madame, quelle apparence il y debvoit avoir pour lui de penser à la succession; mais j'espere que Dieu conservera longuement le roy, mondict seigneur, pour aneantir leurs entreprises et survivre leurs pretentions. Le pis est, madame, que le roy d'Espaigne, qui de long temps s'est imaginé la monarchie de la chrestienté, est aucteur et chef de ceste conspiration, ce qui nous doibt estre tout

manifeste par le secours d'hommes qu'il leur envoie, par les grandes sommes qu'ils ont distribuees en diverses parts en monnoies d'Espaigne, qui ne peuvent sortir de leurs moyens, et par le departement des charges de l'armee qu'ils pretendent mettre aulx champs, en laquelle chacung des plus grands a beaucoup moindre charge qu'il n'eust voulleu pretendre en une armee royale en France. Vostre majesté donc, selon sa prudence, peult juger à quoi tend ce remuement, et si ce n'est pas ung effect de la ligue generale que le pape a practiquee entre les princes et potentats qui lui adherent, de laquelle le roy d'Espaigne soit le chef, s'estant le pape et lui accordés ensemble pour s'aider l'ung l'aultre. Le pape, pour parvenir au recouvrement de son auctorité entre tous les estats chrestiens, par le moyen du roy d'Espaigne; le roy d'Espaigne, pour atteindre au sommet de la grandeur qu'il s'est promise, aulx despens de ses voisins, soubs ombre de restablir le pape et remettre l'Eglise romaine en son entier. J'espere, madame, que le roy monseigneur sçaura bien considerer leurs intentions, et jusques où elles vont, pour y apporter les remedes convenables, tels qu'à la verité ils sont en sa main, quand il les vouldra deployer. Cependant, parce qu'en ceste conspiration, pour abuser du zele qu'il a à sa relligion, et par ce moyen le rendre moins animé contre eulx, et detourner, s'ils peuvent, tout l'orage contre moi, ils m'ont voulleu prendre pour pretexte de leurs armes et pour subject de leurs desseings, vous pouvés juger, madame, si j'ai à regarder à mes affaires, ne pouvant iceulx s'agrandir qu'à mes depens, ni parvenir à leur but que pardessus mes ruynes. En ce besoing donc, madame, j'ai recours à vostre majesté, de laquelle j'ai

receu tant de demonstrations d'amitié et de bonne volonté en mon endroict, que je me promets, sans doubte, d'en toucher les effects si les affaires sont amenés au poinct que plusieurs choses passees nous donnent occasion de craindre. Je sçais, madame, que la conservation de la vraie relligion, qu'il nous fault laisser à nostre posterité, vous touche vivement au cœur. Je sçais que l'accroissement du roy d'Espaigne, et l'auctorité de ceulx qu'il emploie à troubler le royaume, ne vous peult estre que tres suspecte, et je m'ose consier, madame, que, quand ces considerations cesseroient, encores ne voudriés vous pas voir, ni la ruyne, ni la diminution d'ung prince tant dedié à vostre service, que je suis, et qui desire, en partie, me conserver et maintenir pour vous en faire. Au reste, madame, je vous dirai que je ne feus jamais plus resolu de m'opposer aulx pernicieuses intentions de ceulx qui veullent troubler nostre repos, que je suis à present, et n'y vois, graces à Dieu, jamais les gens de bien plus affectionnés de m'y aider et seconder, tellement que j'ai de quoi esperer, avec l'aide de Dieu, qu'ils ne se trouveront jamais plus empeschés ni plus reculés de leurs desseings. La faveur de vostre majesté, survenant à toutes ces bonnes volontés, parferoit le surplus; et parce que j'espere depescher plus amplement à vostre majesté, je me contenterai, pour ceste heure, de vous baiser tres humblement les mains, etc.

XIV. — LETTRE DU ROY DE NAVARRE

Au roy Henry III, dressee par M. Duplessis.

Du mai 1585.

Monseigneur, j'ai receu celle qu'il a pleu à vostre majesté m'escrire du 8 de ce mois. Je vous supplie tres humblement, monseigneur, croire que je n'ai ni n'aurai jamais rien plus proche que l'obeissance de vos commandemens, quand mesmes il iroit de ma propre vie; mais aussi m'asseure je, monseigneur, que vous n'entendés pas que ceulx qui ont entrepris contre vostre estat, attentent tout ce qu'il leur plaira impunement, et moins encores qu'ils abusent de la tres humble obeissance que je vous desire rendre, à ma ruyne, et peult estre aussi à vostre dommage. Ils ne celent poinct en tous leurs discours, tant publics que privés, qu'ils sont armés pour exterminer vos tres humbles subjects de la relligion, et que particulierement ils en veulent à ma personne. Encores que toutes personnes d'entendement ont assés de quoi juger que ce ne leur est qu'ung pretexte pour acheminer leurs desseings contre l'estat de vostre majesté. Tous les jours aussi se decouvrent entreprises sur les villes habitees par lesdicts de la relligion; et plusieurs maisons de gentilshommes, en diverses provinces, ont esté par eulx violemment saisies, et tout fraischement ils ont failli mon chasteau de l'Isle en Jourdain, où les eschelles et quelques armes sont demeurees, pour preuve de l'entreprise. Vostre majesté, monseigneur, peult considerer si ces occasions ont esté suffisantes pour mettre en allarme vosdicts subjects de la relligion, et pour les faire penser à leur conserva-

tion; mesmes quand ils ont veu que les troupes des perturbateurs se levoient et marchoient partout ouvertement, sans contredict, et qu'elles passoient à leurs portes sans qu'il leur feust permis de s'opposer et sans que d'ailleurs on leur donnast auleun empeschement, comme si elles eussent esté sacrées. Ce nonobstant, monseigneur, j'y ai donné tel ordre, preferant, peult estre, l'obeissance de vos commandemens au besoing de vostre service, que jusques ici il n'a bougé personne desdicts de la relligion, sur l'asseurance que je leur ai donnee que vostre majesté sçauroit bien pourvoir à la repression de ses ennemis, et à leur conservation tout ensemble Ce qui les a mis principalement en peine, monseigneur, et qui est une dissiculté que je ne leur puis bonnement souldre, c'est la voix commune, mesmes de vos principaulx officiers, es villes et provinces de deçà, qui ne seignent de dire que ces troubles se pacifieront à leurs depens, et retomberont ensin dessus leur teste. Que les choses en sont desjà si avant, qu'ils les font tenir comme faictes et conclues, ce qui leur est d'aultant plus aisé de croire, qu'ils ne voient aulcune opposition aulx desseings desdicts perturbateurs, et que d'ailleurs ils sçavent que tout ce qui s'est traicté ou pourparlé jusques ici avec lesdicts de la Ligue, je n'en ai aulcune communication ni cognoissance de la part de vostre majesté ni de ses ministres de deçà, desquels je pense, pour ce regard, avoir à me plaindre; moi toutesfois, monseigneur, à l'ombre duquel vos ennemis cherchent la ruyne de vostre estat, et qui plus qu'aulcung aultre doibs ressentir la mienne en la vostre. Et ne vous celerai, monseigneur, que desjà le bruict est partout qu'on leur consent la revocation de vostre edict de pacification, ce que j'ai bien de la peine à les

empescher de croire, leur remonstrant qu'il n'y a pas d'apparence que vestre majesté voulleust contenter des estrangers aula despens des princes qui ont cest honneur de lui toucher de si pres, ni racheter la paix avec ceulx qui troublent vostre estat, au dommage de ceulx qui ne desirent que traisner leur vie soubs l'obeissance de vos edicts; c'est pourquoi, monseigneur, pour retenir et contenir plus aisement vosdicts subjects de la relligion, j'ai pensé de les occuper en leur permettant de reparer et fortifier leurs villes, ce qui se faict en la pluspart des lieux, non seulement sans contrainte, mais mesmes de gré à gré et avec l'allegresse du peuple et des circonvoisins, qui pensent travailler pour la conservation de leurs propres vies, et avec tel ordre, au reste, et si peu de foule d'ung chacung, que je m'asseure que vostre majesté, en estant bien informee, en auroit contentement. A ce propos, j'ai à me plaindre à vostre majesté d'auloungs, auxquels vous aves donné charge de vous mener des forces par delà pour vostre service; qui s'excusent, ou de ne vous aller trouver, ou de né vous mener telles trouppes qu'ils auroient promis, soubs ombre des remuemens qu'ils disent craindre de oeulx de la relligion. Je ne séals, monseigneur, si ce seroient peult estre personnes mal affectionnees à vostre service, telles que vous en avés recogneu assés d'aultres en ces derniers remuemens, qui vous serviront, ou avec moins de fidelité, ou avec moins d'ardeur que vous n'avés attendu d'eulx; mais j'oserai, encores un coup, vous respondre que, de la part de vosdicts subjects de la relligion, il ne s'est faict jusques ici et ne se prepare pour l'advenir remuement quelconque, ni en general, ni en particulier; encores qu'à la verité tous sont en une juste allarine, et de ce qu'ils voient, et de ce qu'ils

oient, si on n'appelle remuemens quelques remuemens de terre qui se font pour leur defense et pour le regret qu'ils auroient de tomber es mains des ennemis de vostre estat. Au reste, monseigneur, me voyant environné de toutes parts des ennemis de vostre majesté, j'ai mandé pres de moi ma compagnie pour estre plus prest à vous faire service quand je recevrai vos commandemens, au payement de laquelle je supplie tres humblement vostre majesté voulloir commander qu'il soit pourveu: comme aussi au payement des garnisons des villes de seureté de ceste province, selon qu'il pleut à vostre majesté le leur accorder des le 10 decembre, lesquelles, depuis tout ce temps, n'ont receu qu'ung mois, et des lors leur en estoit deu presque une annee. J'aurai regret, monseigneur, qu'à faulte de payement elles feissent quelque desordre, desirant au contraire que tout ce que je suis et que je puis soit en exemple d'obeissance et de debvoir en tout ce qui concerne le contentement particulier de vostre majesté et le bien de vostre service. Pour ce, monseigneur, je supplie tres humblement vostre majesté de m'y aider, en commandant les expeditions necessaires à nosdictes fins.

Monseigneur, je finirai en suppliant le Createur qu'il donne à vostre majesté bonne et longue vie, et prosperité en tous ses affaires.

De Bergerac.

XV. — LETTRE DU ROY DE NAVARRE

A la royne d'Angleterre, faicte par M. Duplessis.

MADAME, puisque vous avés faict cest honneur au sieur de Segur de l'avoir voulleu choisir pour truche-

ment de vostre bonne volonté envers moi, je ne pense poinct aussi vous en pouvoir envoyer un plus agreable, pour supplier vostre majesté, en ce besoing qui se presente, de m'en faire sentir les effects. Il vous dira, madame, ce qui se passe en ce royaume, dont vous sçaurés assés cognoistre, selon vostre bon jugement, que c'est la Ligue generale qui opere aujourd'hui, et, sans doubte, pour parvenir à la ruyne universelle de nous tous; que si Dieu a voulleu, madame, comme il semble, que la France soit l'eschafaud où ceste tragedie ait à se jouer, au moins espere je que tous les princes et estats vraiment chrestiens y ressentiront leur interest, et ne vouldront pas estre spectateurs oiseux d'une action de laquelle le succes leur est commun par une consequence inevitable, encores que les premieres peines et les premiers dangers nous semblent en particulier appartenir. J'attends, madame, et me promets de l'amitié et bonne volonté qu'il vous a pleu me promettre, le prompt secours qui m'est necessaire pour soustenir les efforts qui se presentent; car aussi vostre majesté, tenant le premier lieu en ceste cause, je me propose d'estre comme vostre capitaine general contre les ennemis communs, lequel, madame, il importe à vostre grandeur et reputation de ne laisser abandonné de vos moyens en la resistance qu'il nous convient faire aulx desseings pernicieux de ceste Ligue. Mais, madame, toute la chrestienté attend oultre cela, de vostre prudence et auctorité, que vous reveilliés et exhortiés tous les princes et estats chrestiens à leur debvoir, et le leur fassiés vivement sentir et recognoistre; car, pardonnés moi si je vous dis, madame, qu'il n'est raisonnable que les fruicts et effects de vostre vertu demeurent enclos et enfermés es bornes de l'Angleterre, puisque

l'odeur et la reputation en est jà parveneue aulx extremités du monde. Le sieur de Segur vous dira l'estat des affaires de ce royaume et des miennes, les dangers que je puis courir sans vostre appui, et les grands effects que je puis sans doubte faire si je sens vostre faveur en ce besoing, et surtout, combien les choses pressent, n'y ayant retardement d'ung seul jour, qui ne nous puisse apporter interest d'une sepmaine. Madame, estant conservé par vous, je vivrai aussi pour vous, et m'aurés obligé à jamais à vostre service, ce que je desire que vous entendiés plus partioulierement du sieur de Segur, lequel je vous supplie croire comme moi mesmes de tout ce qu'il vous dira, ne lui estant besoing d'aultre recommandation de sa sidelité et affection en mon service, que celle que vous lui donnés vous mesmes. Je vous baiserai donc tres humblement les mains, madame, etc.

XVI. - LETTRE DU ROY DE NAVARRE

A la royne d'Angleterre, escrite de sa main.

Madame, je vous renvoie le sieur de Segur; vous l'avés faict interprete de vostre bonne volonté, je veulx qu'il le vous soit de ma devotion et service. Il m'a redoublé le desir de vous aller voir, et je m'en suis veu resoleu; mais ung malheur general s'oppose tousjours à mon heur particulier, et vous entendrés toutes choses par lui mesmes. Faictes estat qu'il sçait mon interieur, et puisque nous sommes reduicts à ung tiers, que je ne vous en puis envoyer à qui plus je me fie; la raison est telle, que j'ai besoing de mes amis; car il m'y va du tout, et n'ai plus de temps à perdre. Mais je me tiens

tout asseuré de vostre secours, et sens me redoubler le courage. Je me figure que je combats pour vous; avec vostre faveur toutes choses me sont possibles, voire faciles. Conservés moi, madame, comme celui qui ne se reserve que pour vous et pour demeurer à jamais, etc.

XVII. — LETTRE DU ROY DE NAVARRE

Aux seigneurs d'Angleterre (1), faicte par M. Duplessis.

Mon cousin, sur la naissance de ces grands remuemens qui ont paru depuis quelque temps en ce royaume, je feis une depesche à la royne vostre souveraine, par laquelle je lui mandois les'dangers que je pensois estre à craindre; et à mesure que les choses se sont acheminees, j'ai veu croistre tout ensemble les mesmes occasions de juste crainte, tellement que maintenant nous sommes tous asseurés que tous ces preparatifs sont les vrais effects de la ligue generale, qui, sans doubte, ont dans peu de temps à fondre et tomber sur nous. Vous estes si clairvoyant, et la chose aussi claire, qu'il n'est besoing de vous dire ici que la ruyne des ungs est ung degré à la ruyne des aultres; que la Ligue saincte notts a tous designés et destinés à ung mesme sacrifice, ét que l'ambition de l'Espaignol, qui a franchi tant de terres et tant de mers, ne se pense rien au monde inaccessible. Tant y a qu'il est temps desormais de penser aulx remedes, dont le premier est de secourir et soutenir promptement nos affaires de la France, puisqu'il plaist à Dieu que nous en soutenions les premiers efforts; et l'aultre, de rallier tous les princes et estats

⁽¹⁾ Mutatis mutandis.

qui font mesme profession, ensemble pour s'opposer d'ung commun accord à ceste conjuration universelle, qui est faicte contre tous. A ceste fin j'envoye le sieur de Segur vers la royne vostre souveraine, pour la singuliere confiance que j'ai de lui, duquel vous entendrés particulierement tout l'estat de mes affaires; mais surtout, mon cousin, je vous prye de tenir la main que sa majesté prenne une bonne résolution et sans perdre temps, parce que ce qui se peult aisement soutenir avec mediocre secours, ne se peult relever que difficilement et avec un beaucoup plus grand; et que telle est aujourd'hui ma condition, qu'un aide donné à propos, me donneroit moyen d'estourdir et rendre vains les premiers efforts de ceste ligue, dont il leur seroit malaisé de pretendre plus oultre ci apres. En default de ce, au contraire, nous nous mettons en danger de leur laisser prendre pied et gaigner reputation par quelques bons succes; et vous sçavés, mon cousin, combien en toute guerre peult la reputation, et quel prejugé font les premiers exploits, s'ils viennent à prosperer, pour ceulx qui ont à venir apres. Je lairrai au sieur de Segur à vous discourir le surplus, dont je vous prye le croire comme moi mesmes; seulement je vous prie, qu'à ce coup, par vostre moyen, je sente de bons effects. Et sur ce, mon cousin, etc.

XVIII. — LETTRE DU ROY DE NAVARRE

Au roy d'Escosse, faicte par M. Duplessis.

Monsieur mon frere, vous aurés sceu les grands remuemens qui se font en ce royaume; ils protestent ouvertement que c'est contre moi et contre la relligion dont nous faisons profession, de laquelle ils ont conjuré la ruyne. Par là, voyés vous, que ce sont effects de la ligue generale du pape et de quelques princes et estats qui lui adherent, qui commencent par nous pour achever, si Dieu le leur voulloit permettre, sur tout le reste. J'espere que Dieu nous fera la grace de nous en bien defendre, et qu'en ceste commune cause nous serons secoureus de ceulx qui y ont interest, et particulierement de vous, en ce que nos affaires, pour la distance des lieux, peuvent s'entraider. Mais surtout, monsieur mon frere, je vous prie que nous advisions tous de nous unir estroitement ensemble, et que nous monstrions au moins aultant de concorde et de liaison à nostre conservation, qu'ils en apportent à nostre ruyne; mesmes, veu la profession que nous faisons, d'une plus vraie et plus sincere relligion que la leur. Je desire surtout de vous voir parfaictement uni avec la royne d'Angleterre, pour le bien commun des deux estats, et me resjouis en mon cœur quand j'entends que les choses en sont en bon train. Nous sommes en ung temps qu'ils fault ceder les petites considerations aulx grandes, et les particulieres aulx publicques, et nos interests à la gloire de Dieu, par lequel nous regnons, et à la conservation de son Eglise, pour laquelle il nous a mis le glaive en main. Au reste, monsieur mon frere, je vous prie de faire ung entier estat de moi et de tout ce qui en peult dependre, et remettant le surplus sur le sieur de.... je finirai, etc.

XIX. -- INSTRUCTION

A M. de Segur, allant de la part du roy de Navarre vers la royne d'Angleterre, dressee par M. Duplessis.

Le sieur de Segur Pardailhan declarera à la royne d'Angleterre l'extreme mecontentement qu'auroit receu le roi de Navarre, à son retour, entendant l'amitié et bonne volonté de ladicte royne envers lui, de laquelle elle l'avoit voulleu choisir pour interprete, ce qui lui avoit redoublé l'affection qu'il avoit de long temps eue de passer en Angleterre pour avoir cest heur de voir de plus pres ceste vertu qui eclaire de si loing; mais il semble que, par je ne sçais quel destin, le malheur de la France s'interpose tousjours à ceste sienne entreprise, de laquelle il se promet qu'il reussiroit, aidant Dieu, ung grand bien à toute la chrestienté, mais à lui ung particulier bonheur, qui bienheureroit le rește de sa vie, quelques peines et traverses qui semblent renaistre d'heure à aultre pour la lui rendre ennuyeuse, quand il se souviendroit d'avoir esté favorablement veu, et de s'estre acquis la bonne grace de ceste heureuse princesse, soubs qui tant de millions d'ames vivent heureusement et à leur aise, au milieu des malheurs continuels de toute la chrestienté.

Lui dira donc, comme ceulx de la maison de Guise, prenant le pretexte de remettre et entretenir la relligion romaine en son entier, ont pris les armes pour faire nommer monseigneur le cardinal de Bourbon, son oncle, successeur à la couronne de France, et declarer ledict seigneur roi exclus de la succession, comme he-

retique, faisant, des ceste heure, prendre audict seigneur cardinal le tiltre de premier prince du sang et presomptif heritier de la couronne, entreprise suscitee par le pape, lequel, de faict, selon les practiques ordinaires de Rome, assés souvent tentees (et graces à Dieu en vain) contre ladicte dame, auroit proscrit la personne dudict seigneur roy, et exposee aux assassinats de ceulx qu'aujourd'hui ils canonisent martyrs, pour tuer les princes chrestiens; fomentee aussi et soudoyee par le roy d'Espaigne, qui, par les divisions des estats voisins, s'est promis la monarchie de l'Europe, lequel les a aidés de grandes sommes de deniers, qu'ils ont espandues et prodiguees par toute la France, et envoyé des forces à leur secours, tant de celles qu'il tient es Pays Bas, que mesmes de l'Italie et de l'Espaigne

Quant au desseing particulier de ceulx de Guise, il est tout cogneu que, depuis long temps, ils se veullent faire croire descendeus de Charlemaigne; que, soubs ombre de devotion, ils ont allumé les guerres civiles en ce royaume pour en affoiblir les forces, et, par la division, rentrer en possession du vain tiltre qu'ils pretendent; mais n'osant encores si ouvertement se decouvrir, ils prennent le nom d'ung prince plus que sexagenaire, et ne se sentant assés forts pour parvenir à ung but si difficile, s'y rendent associés et partisans d'ung roy d'Espaigne.

Et a ledict sieur de Segur de quoi verisier ce que dessus à la royne d'Angleterre, par leurs memoires, protestations et actions propres, sans qu'il soit besoing de les particulariser ici davantage.

Pour ce, remonstrera à ladicte dame royne qu'il y va du danger de la chestienté tout evident, estant tout certain que ceste entreprise est un vrai effect de la ligue generale contre tous ceulx qui font profession de la vraie relligion, laquelle, faisant leur profict du peu d'union qui se voit entre nous, ils effectuent par parties pour faire degré de la ruyne des ungs à la ruyne des aultres, et enfin de tous.

Qu'il y va pareillement de l'interest de tous les princes, qui ne peuvent ignorer que le pape et le roy d'Espaigne ne s'entreprestent la main, l'ung pour la monarchie spirituelle, et l'aultre pour la temporelle; et qu'on peult assés juger la France, ayant, depuis quelques siecles, teneu nostre Europe en contrepoids et comme entre deux fers; quel sault elle donneroit à la balance si elle venoit finalement, par l'entremise de ces gens, ou à se diviser et partager en elle mesmes, ou à estre adjoustee à la grandeur d'Espaigne, qui, des à present, leur doibt estre redoutable. Comme il n'y a personne, aujourd'hui, qui ne voye que telle est l'ambition de l'Espaignol, pour laquelle ne se trouve plus au monde ne forme ne mesure.

Que, particulierement, il y va aussi de la gloire de ladicte dame royne, premierement, comme princesse vraiment chrestienne, et à bon escient defenderesse de la foi, que Dieu, manifestement, a saulvee tant de fois des conjurations papales, et sans doubte pour lui demonstrer de jour à aultre qu'il est tuteur et defenseur de sa vie contre les practiques du pape et de ses adherens, afin que de plus en plus elle se monstre tutrice et defenderesse de la vraie relligion qu'il lui a empreinte au cœur, en la defense et protection de ceulx, universellement, qui sont travaillés et molestés à cause d'icelle.

Secondement, en ce que ceulx qui aujourd'hui troublent la France pour accroistre leur auctorité et grandeur, sont ceulx mesmes qui de longue main ont brouillé les affaires d'Escosse, et consequemment l'Angleterre mesmes par l'Escosse, et desquels, si les desseings vienment à prosperer en ce royaume, c'est à ladicte dame de considerer ce qu'ils oseront entreprendre contre sa majesté et son estat, veu qu'avec moindres moyens ils n'ont peu jamais se contenir, ni abstenir de la troubler.

Tiercement, parce que le roy d'Espaigne estant celui qui meut et anime principalement, par ses forces et moyens, ceulx qui à present veullent remuer l'estat en France; si, par ung malheur, ou plus tost par la mauvaise inclination de plusieurs à son parti, il obtient quelques succes en ces desseings, peult juger sa majesté combien le courage lui redoubleroit, de pousser avant les entreprises qu'il a de long temps sur l'Angleterre, de laquelle il envie le repos et la tranquillité soubs la sage conduicte de ladicte dame royne, qui a monstré la leçon à tous les princes voisins, de bien et heureusement regner, et contre laquelle ne pouvant, comme duement, armer ses forces, occupees ailleurs en ses guerres domestiques, il arme l'hypocrisie des jesuites et la trahison desesperee d'aulcungs de ses subjects, tesmoignant assés par là la mortelle haine qu'il lui porte.

Lui dira que Dieu, qui ne veult jamais que toutes les parties de son Eglise soient en peine tout à la fois, l'a laissee en paix et retiree en ung coing, hors du combat, comme ung general de son armee, pour pourvoir à toutes les occasions qui naissent, soutenir ceulx qui s'ebranlent, rallier ceulx qui se rompent, recueillir ceulx qui se retirent, secourir à temps ceulx qu'on lui renverseroit aultrement sur les bras. Que c'est donc à elle de veiller sur toutes les parties de la chrestienté, et surtout adviser, par sa providence, qu'elle ne soit

contraincte elle mesmes de venir aulx mains, ce qui adviendroit indubitablement si elle n'appuyoit à temps les aultres; et cela advenant, d'arbitre qu'elle peult estre aujourd'hui des combats de la chrestienté, pour la plupart, elle deviendroit simple partie, tout ainsi qu'ung general depuis qu'il est en la presse, ne faict plus mestier que de soldat. Au contraire que, secourant, comme elle avoit commencé, l'archevesque de Colongne, elle peult revoir toute l'Allemaigne en une paix, soustenant les Pays Bas, entretenir le roy d'Espaigne entre ses bornes, aidant au roy de Navarre en ce besoing, reprimer les ennemis qu'elle a en France, et maintenir la chrestienté en contrepoids, le tout sans entrer en partie, sans tirer la charge sur ses bras, sans hazarder son estat; sans, en somme, se soubmettre à l'incertitude d'une guerre qui dependra quelquessois d'ung seul combat, où la providence humaine a peu de lieu.

Pour le regard dudict seigneur roy de Navarre, fera entendre à ladicte dame royne, qu'à la verité il voit tres bien qu'il pourra avoir ung grand coup à soubtenir, et surtout veu les artifices qu'il prevoit, qu'il laisse à discourir par le meneu; cependant que, graces à Dieu, il se sent plus resoleu qu'il ne feust oncques, quand il considere le soing qu'il a pleu à Dieu avoir de lui au milieu de tant d'extremités, desquelles il ne l'aura poinct retiré que pour sa gloire. Que desjà ces mesmes flots et ces mesmes vagues ont passé souvent dessus sa teste; et particulierement que, comme ils semblent grossir, aussi Dieu lui suscite des amis et serviteurs de toutes parts en ce royaume, mesmes des plus grands, des plus sages, des plus autorisés et des meilleurs capitaines entre les catholiques qui cognoissent la droicture de sa cause, tellement qu'à mesure que ses ennemis lui

brassent des difficultés, Dieu lui prepare les moyens pour en venir à bout.

Cependant que, pour fortisser ses amis et estonner ses ennemis, il a necessairement besoing de deux choses, qu'il attend asseurement de la faveur et bienveil-lance de ladicte dame royne, suivant les gracieux et favorables propos qu'elle a teneus audict sieur de Segur; que, quand il seroit besoing, elle lui feroit tousjours notable preuve de la bonne volonté qu'elle lui porte, et de laquelle il se sent de long temps tres obligé au service de sa majesté.

L'une est une armee estrangere pour laquelle ledict sieur de Segur la suppliera bien humblement voulloir assister ledict seigneur roy de Navarre de la somme de.... pour estre envoyee en Allemaigne ét employee avec les deniers que ledict sieur de Segur y porta l'an passé pour ledict seigneur roy de Navarre.

L'aultre est une armee navale composee de.... grands vaisseaux, et d'aultres.... mediocres, avec les equipages et artilleries necessaires pour incommoder et endommager les ennemis, etc., commandés par capitaines anglois, et tels qu'il plaira à ladicte dame royne ordonner sur iceulx.

Sans ces moyens, que ledict seigneur roy de Navarre declare franchement ne pouvoir esperer d'ailleurs que de ladicte dame, il seroit contrainet, quand la guerre lui viendra sur les bras, de se reduire des incontinent à la defensive, de laquelle toutes personnes d'entendement recognoissent assés les consequences, à sçavoir, pertes de places l'une apres l'aultre, perte de reputation, etonnement de peuples, ehranlement de partisans, et tout ce que l'adversité peut tirer avec elle, dont la playe seroit proprement sienne; mais le dom-

mage commun à tous ceulx qui font mesme profession que lui.

Au lieu que, moyennant iceulx, il s'asseure de pouvoir tenir et la mer et la campagne, reduire ses ennemis à mesmes extremités, qu'aultrement il auroit à souffrir; en somme, establir tellement ses affaires, sa creance et sa reputation, à present, qu'ils ne pourroient pas lui nuire grandement à l'advenir.

Ce qui lui viendroit de mal à faulte d'estre aidé et secoureu à temps, il aura extreme regret de le voir commun par une consequence necessaire à tous les princes et estats qui ont desiré la reformation de l'Eglise, lesquels il appelle à l'aide comme à l'embrasement de la maison commune, encores qu'il ait à commencer par son quartier et par son estage. Ce que Dieu lui donnera de bon succes, tant à present qu'à l'advenir, il le tiendra proprement et particulierement de ladicte dame royne, et se confessera redevable à elle de son estat, de sa condition et de soi mesmes; si tant est, comme il s'en asseure, qu'elle le veuille secourir promptement à ce besoing des moyens susdicts, à sçavoir, pour mettre sus une armee de Reystres et une armee navale.

Par ce moyen, sa majesté aura rompeu les desseings de la ligue generale, qui, sans doubte, s'etendent contre tous les estats chrestiens qui ont desiré une reformation en l'Eglise; aura preservé son propre estat des consequences qui, necessairement, s'ensuivent de la ruyne totale des Eglises de France, et de la mutation de l'estat de ce royaume en main plus dangereuse; et, particulierement, aura conservé ung prince qui recognoistra à jamais sa grandeur, sa dignité et sa conservation, de sa bonne volonté envers lui; pour dependre, à toutes occasions, comme des ceste heure il en est prest, ce

qu'il a de vie, de moyen, de serviteurs et d'amis pour lui faire tres humble service.

A ceste fin, adjoustera, ledict sieur de Segur, tout ce qu'il verra estre à propos, selon sa prudence et discretion; et en somme, lui dira que les affaires de la chrestienté sont aujourd'hui en tel poinct qu'elles vont par heures et par minutes, au lieu que ci devant elles alloient par ans et mois, d'aultant que, par l'union generale qui est entre le pape et ses adherens, et la desunion qui est entre ceulx qui debvroient estre plus unis, ung peu de mauvais succes y peult, pour nostre regard, apporter une grande mutation; pourtant, que sa majesté se soubvienne qu'il fault menager le temps jusques aulx momens, ne laisser gaigner aulcung advantage sur nous, et faire estat que mediocre somme employee à bonne heure, peult plus aider que somme excessive hors heure et hors temps; estant tout certain que peu de choses empesche une maladie, et peu plus aide à la chasser, quand il est baillé à propos; mais le malade estant veneu fort bas, à peine aulcunes drogues le peuvent elles remettre; et, s'il vient à mourir, les amis ne peuvent plus que le pleurer, et regretter le peu de soing qu'ils en ont eu; et ne se peult ressusciter sans miracle.

De tout ce que dessus, et de tout ce qui en depend, donne ledict seigneur roy, audict sieur de Segur, toute auctorité et puissance, et desire qu'il en soit creu de ladicte dame et de tous ceux qu'il appartiendra, comme lui mesme.

Faict, etc.

Feurent baillees au mesme sieur de Segur aultres lettres et instructions sur ce subject, escrites en latin, vers le roy de Dan-nemarck et les princes protestans d'Allemaigne; le tout pareillement faict et dressé par ledict sieur Duplessis.

XX. — LETTRE DE M. DUPLESSIS

A M. Merlin, M. D. S. E.

Du 12 avril 1585.

Monsieur, là où M. de Montmartin parle, je n'ai qu'escrire, soit pour sa suffisance soit pour l'amitié qu'il a avec tous deux. Grands remuemens se presentent, mais qui dependent du premier moteur. Ils ont leurs intentions particulieres; mais la grande roue les ramenera au decret eternel. Sans cette resolution, nous aurions à craindre quelque revolution estrange. A nous, aulxquels Dieu a daigné donner sa crainte, ce doibt estre matiere d'esperer. Jamais l'Eglise ne feut plus proche de salut, que quand elle ne sembloit plus estre; quand le Sauveur mesmes feut crucifié, et ainsi me semble il qu'il sera de tout ceci. A l'entree du port sont les grandes vagues; au sortir du ventre les grands maulx; et nous appellons cela surgir et naistre. Je pense · parler à vous, et vous le voyez; car je rentre en aultres meditations et aultre style. Pryons Dieu qu'il ait pitié de son Eglise; je le prye aussi, monsieur, qu'il vous benisse, garde et conserve; et sur ce, salue liumblement vos bonnes graces.

De Bergerac.

XXI. — INSTRUCTION

A M. de Chastillon, pour le synode national de Nismes.

Monsieur de Chastillon fera entendre, de la part du roy de Navarre, à messieurs les ministres, anciens et diacres assemblés en synode national en la ville de Montpellier, qu'il loue Dieu de bon cœur qu'ung si bon nombre de personnages notables et capables de toutes les provinces de ce royaume se trouve si à propos ensemble, lorsqu'il semble se presenter de si grands et importans affaires pour la generalité de nos Eglises, lesquels, à la verité, semblent meriter et requerir une conference de nous tous, puisqu'on voit que nos ennemis de tous les endroicts de chrestienté se sont rassemblés pour jurer nostre ruyne.

Contre leurs desseings, ne voit ledict seigneur roy plus seur rempart que de recourir à Dieu et nous reconcilier à lui par ung changement de vie; lequel, quand il lui plaira, sçaura dissiper tous ces orages; et il lui plaira quand il verra convenir à nostre bien et salut.

Mais particulierement que ledict seigneur roy ne voit rien plus necessaire en ce temps qu'une bonne union entre nos Eglises, non seulement en ce qui est de la doctrine, mais de la discipline aussi, jusques aulx moindres choses, à fin que le diable, qui est assez subtil d'ailleurs, ne prenne par là occasion de diviser ce qui doibt estre estroictement conjoinct, et qui ne doibt pas estre distrait, mesmes pour plus grandes choses.

Que son but auroit de long temps esté, comme ils auroient esté plusieurs fois advertis de reunir toutes les Eglises qui font profession de la reformation, en tant que faire se pourroit, en une doctrine. Au moins, si cela ne pouvoit s'obtenir si tost, de les reconcilier et reduire en une bonne amitié ensemble. Et à ceste sin, qu'il auroit envoyé l'an 1583 le sieur de Segur, superintendant de sa maison, affaires et sinances, vers la

royne d'Angleterre, les estats des Pays Bas, le roy de Dannemarck, les princes electeurs du sainct empire, M. le duc de Casimir et aultres grands princes, villes et estats du sainct empire, lequel auroit travaillé dixhuict mois entiers, et graces à Dieu, si heureusement que de tous iceulx princes il lui auroit rapporté tres favorable et raisonnable response : lesquels lui auroient tous unanimement escrit qu'ils approuvoient universellement son desseing, et recognoissoient que Dieu le lui avoit mis au cœur, et qu'ils etoient tous resoleus de l'acheminer et advancer chacung en son endroict. Dont seroit advenu que les aigreurs es terres de la pluspart d'iceulx avoient commencé à s'adoulcir; mesmes les ministres protestans auroient, en quelques lieux, changé de façon et de style. Cependant, qu'on n'avoit encores peu parvenir à remettre nos differends à ung synode universel des Eglises reformees, obstant la multitude et distraction desdicts princes de l'empire, les troubles des Pays Bas, et l'ordinaire agitation des affaires de France; leur ayant à tous semblé que ce n'estoit peu pour la premiere fois de s'estre apprivoisés l'ung avec l'aultre; et que le synode debvoit estre remis en ung temps plus paisible pour les ungs et les aultres, attendant lequel, les humeurs s'adoulcissoient et se rendoient plus capables de recevoir ung synode ci apres.

A ceste cause desireroit ledict seigneur roy de Navarre, que nos Eglises et circonvoisines, et ceulx principalement qui font en icelles profession d'escrire, feussent advertis de s'abstenir de toute intemperance en leurs livres ou responses, pour monstrer l'exemple de loulceur et moderation, comme nous les avons preveneus es propos de reconciliation de nostre part. Que si leurs docteurs et ministres continuent en leurs invec-

tives, serabien aise, ledict seigneur roy, d'en estre adverti par les Eglises de nostre confession; et que les livres injurieux fraischement composés, lui soient envoyés pour s'en pouvoir plaindre aulxdicts princes et estats de l'empire, et les leur faire representer de sa part.

Requerra ledict seigneur de Chastillon, lesdicts seigneurs du synode national, au nom dudict seigneur roy de Navarre, d'adviser tous ensemble de la voye qu'il debvra et pourra tenir ci apres, pour l'acheminement de ceste negotiation, à laquelle, comme jusques à present, il n'est deliberé d'espargner aulcungs moyens.

Leur remonstrera aussi le grand debvoir et diligence que font aujourd'hui les jesuites, tant par leurs leçons que par leurs presches, d'estançonner cest edifice ruyneux de la papauté qui, sans eulx, humainement ne pourroit consister long temps. Que si leur diligence le soubstient, il fault confesser aussi que la nostre, depuis quelque temps, ne l'ebranle gueres, nous estant, depuis quelque temps, je ne sais comment, laissés aller ou à la nonchalance, ou à aultres occupations non si necessaires.

Pourtant les exhortera au nom dudict seigneur roy de Navarre, d'adviser à tous saincts et legitimes moyens d'advancer le regne de Dieu en nos jours, par la predication de la parole, par la dispersion des livres plus propres à l'instruction des ignorans, par l'institution de la jeunesse, et aultres qu'ils pourront mieulx particulariser ensemble. Estant tout certain que nous avons esté ce laboureur qui a semé le bon grain quelques jours durant; mais le diable, plus diligent que nous, se leve toutes les nuicts pour semer sa zizanie, et nous gaster nos moissons.

XXIII. - LETTRE DU ROY DE NAVARRE

A MM. les députés des Pays Bas.

Du mai 1585.

Messieurs, j'ai esté tres marri que vos deputés ayent trouvé l'estat de ce royaume tel que le roy mon seigneur n'ait peu embrasser vos affaires, comme il eust esté à desirer. Ces grands remuemens qui ont paru en divers endroicts, en ont esté cause, au commencement desquels les meilleurs ingenieurs demeurent en suspens; et les plus sages, ne sçachant quelle forme ils ont à prendre, estiment ne pouvoir rien faire plus à propos que de ne rien faire. Mais je ne fais poinct de doubte que, comme le roy mondict seigneur aura cogneu où ils tendent et d'où ils procedent, il recognoistra, selon sa prudence, son interest au nostre, et sçaura bien choisir les moyens de nous conserver, lesquels vous sçavez humainement estre en sa main. Le sieur Caluart vous dira qu'à ceste fin je lui ai faict une depesche bien expresse par le baron de Salignac, auquel aussi j'ai commandé de vous tenir adverti du progres de sa negotiation. Et vous dirai, messieurs, que ce m'a esté ung regret de n'avoir receu vos lettres par lesquelles vous me requerriez d'interceder vers le roy mon seigneur, pour vos affaires, qu'apres qu'ils ont eu une response finale sur icelles, parce que le moyen m'a esté osté de vous faire paroistre en cest endroict ma bonne volonté, et peult estre aussi de vous en faire toucher les effects, par le moyen de diverses ouvertures que j'eusse peu faire à sa majesté, pour vostre secours, desquelles je ne fais poinct de doubte que l'une ou l'aultre lui

eust esté agreable. Pour mon regard, ce m'est ung singulier contentement de cognoistre par vos lettres la correspondance que vous desirez que nous ayons ensemble, qui nous est et sera doresnavant plus necessaire que jamais. Et quant au conseil et à l'aide que vos deputés ont requis de moi par le sieur Caluart, le conseil, messieurs, que je vous puis donner, c'est que vous vous resolviez et remettiez en Dieu qui a en sa main l'issue de vos affaires, et duquel vous avez par ci devant tant de fois esprouvé le secours et l'assistance. Que pareillement vous demeuriez de plus en plus unis et liés ensemble contre les practiques et menees de vos ennemis qui ne tascheront qu'à vous diviser les ungs des aultres, pour avoir meilleur marché, comme desjà avez veu d'ung chacung à part. Et cependant que vous patientiez constamment en la defense de la vraie relligion et de vostre patrie, que Dieu semble desjà secourir en quelque façon, quand il met au cœur de vostre ennemi d'entreprendre contre cest estat, ce qu'il ne peult sans une grande distraction.

Et, quant à l'aide, messieurs, je pense que vous ne doubtez pas que ces remuemens ne m'aient apporté plusieurs nouveaulx affaires qui distraient mon esprit et mes moyens en diverses parts, et me retranchent d'autant le pouvoir de vous assister, encores que la volonté m'en demeure toute entiere; neantmoins le sieur de Rebours, comme vous dira le sieur Caluart, au plus tost qu'il lui sera possible, vous menera deux mille hommes de pied pour l'acheminement desquels lui ferai delivrer l'argent qui lui sera necessaire. Et l'ai d'autant plus volontiers choisi, que le sieur Caluart m'a asseuré que vous aviez bonne opinion de lui, et qu'il vous estoit agreable. Et quand le temps nous aura faict

voir ung peu plus clair es affaires de ce royaume, qui ne peuvent longuement demeurer en ceste obscurité, je vous ferai cognoistre, messieurs, que j'estime vos affaires les miens propres, tant en me rendant solliciteur envers le roy mon seigneur, qu'en vous departant de mon particulier ce que Dieu m'aura donné d'amis et de moyens. Je remettrai le surplus sur le sieur Caluart, qui vous pourra discourir de l'estat des pays de decà, etc.

XXIV. — LETTRE DE M. DUPLESSIS

A M. le president Duranti.

Du 25 juin 1585.

Monsieur, j'ai receu celle qu'il vous a pleu-m'escrire. Je suis marri des desordres que me mandés se faire en Rouergue et aultres lieux de part et d'aultre. J'estime que vous avez aussi entendeu comme Marvejolz a esté failli, apres avoir taillé en pieces neuf hommes à la porte. C'est tousjours pour aider à renouveller nos malheurs. En Gascogne aussi on n'oit parler de aultre chose; et c'est ce qui rend la patience à laquelle le roy de Navarre s'est resoleu, plus difficile. Fraischement vous aurez sceu comme, avant hier, feut pris, à une lieue d'ici, ung bourgeois de ceste ville, par une embuscade de quelques gens de cheval masqués, qui toutesfois sont assez cogneus d'ung chacung, et recogneus de la justice pour leurs anciens forfaicts. Et hier matin feut transporté de sa maison, par gens de pareille qualité, ung riche paysan de la relligion, pres de la Françoise, dont les habitans de ceste ville et tous les circonvoisins sont allarmés, voyant par là le commerce rompeu et les

franchises des champs en ceste saison violees, en danger, quelque persuasion que nous y puissions apporter, de perdre patience, puisqu'on leur faict tout mal impunement, cependant que nous la leur preschons. Croyés, monsieur, que je condamne de bon cœur ces brouillons que me nommés en vos lettres, et qu'ils ne peuvent avoir ung plus fascheux juge que moi, si Dieu m'avoit donné de l'estre. Mais je pense qu'il fault aussi poursuivre et enquerir ceulx qui ont attenté en Guyenne tant de places, l'Isle, la Sauvetat, Selomiac, Leirac, Sainct Mezard, Montant, etc., sur ceulx de la relligion, lesquels toutesfois n'avoient et n'ont encores hougé. Aultrement, c'est les jetter au desespoir et les abandonner en proie, soubs ombre de patienter. Monsieur, je sçais que vous aimez la justice de toute part, et pourtant vous en escris je si librement. Ceulx de ceste ville vous sçauront escrire les particularités qui les concernent, et d'aultant plus que vous leur avez faict ce bien de vous soubvenir d'eulx. De moi je saluerai pour la fin bien humblement vos bonnes graces, et pryerai Dieu, monsieur, vous avoir en sa saincte garde.

De Montauban.

XXV. — LETTRE DE M. DUPLESSIS

A M. le president Duranti.

Du 31 juin 1585.

Monsieur, estant veneu ici en ceste ville, avec congé du roy de Navarre, pour voir ma famille, j'ai pensé, estant si pres de vous, qu'il estoit de mon debvoir de me ramentevoir en vos bonnes graces par la presente. Et quant aulx affaires publicques, monsieur, en ce qui concerne le roy de Navarre, je vous dirai que je l'ai laissé en la mesme resolution en laquelle il a continué depuis ces remuemens; à sçavoir, de se contenir doulcement, sans prendre les armes, tant qu'il ait receu les commandemens de sa majesté, qui lui a promis par la derniere depesche, de lui faire entendre sa volonté dans peu de jours. Ne laisse cependant, ledict seigneur roy de Navarre, suivant le commandement expres qu'il en a de sa majesté, de veiller et travailler à la conservation des places de son gouvernement; comme aussi à empescher les desseings des perturbateurs, par toutes voyes sans foulee du peuple; lesquels, à la verité, on ne doibt laisser impunement tenter et executer tout ce que bon leur semblera, sans y rencontrer empeschement. Des moyens qui sont convenables à ceste fin, ledict seigneur roy de Navarre a conferé et communiqué avec M. le mareschal de Matignon, ces jours passés, avec lequel il a une tres bonne correspondance, et la desire avoir telle avec tous les bons serviteurs de sa majesté, pour le bien et advancement de son service. Particulierement je vous puis asseurer, avec verité, que ledict seigneur roy de Navarre loue fort vos deportemens et actions à contenir et entretenir toutes choses en deu estat, pour le service de sa majesté; et que là, où il vous pourra correspondre et assister en ceste volonté et affection, vous l'y trouverez tres enclin et disposé. De moi, monsieur, en ce que je puis, vous sçavez que je suis vostre serviteur, et est en vous d'en tirer les preuves en me commandant ce qu'il vous plaira; et sur ce, etc.

XXVI. — REMONSTRANCE

A la France sur la protestation des chefs de la Ligue, faicte l'an 1585.

Jamais aulx mauvais subjects ne manqua pretexte de s'armer contre leurs princes, et jamais aussi aulx princes ne manquerent les moyens d'avoir la raison de tels subjects. Dieu qui faict les roys, Dieu qui les a ordonnés dessus les peuples, prend leur cause en main, et se tient blessé en leurs personnes. Dieu qui voit les cœurs, cognoist les couleurs et les pretextes, les sçait distinguer, les sçait demesler d'entre les causes. Rien plus ne l'emeut que l'abus de son nom allegué en vain, ou à faulx tiltre; rien plus il ne venge que l'hypocrisie, la deloyauté et la confusion deguisees en foi, en relligion et en justice.

Aujourd'hui que tous ces remuemens se voient en ce royaume, c'est à tous François de tenir les yeux ouverts pour n'estre menés à mal, soubs quelque couleur, soubs quelque apparence que ce soit. Pensons au passé, comparons y le present; nous verrons d'où ils procedent; prevoyrons à quoi ils tendent, et jugerons aisement ce qu'il nous en fault attendre à l'advenir.

C'est une chose toute cogneue et commune en ce royautoe, que ceulx de la maison de Guise se disent estre descendeus de la race de Charlesmaigne, et pretendent, comme tels, ce royaume leur appartenir. Les genealogies, qu'ils ont il y a long temps falsifiees, les memoires qu'ils en ont semés de main en main, et plusieurs semblables practiques nous en pourroient faire foi. Mais particulierement, pour ne reprendre les choses

de plus hault, le volume qu'ils feirent imprimer à Paris, il y a quattre ou cinq ans, composé par ung des Rosieres, archidiacre de Thoul, auquel, par passages faulx et supposés, et tirés oultre, et contre leur sens, ledict des Rosieres tasche de prouver que ceulx de ceste maison sont descendeus de Pharamond, et de ligne en ligne continués jusques à éulx, c'est à dire que ceste couronne leur appartenoit devant que Capet, Charles, Mérouee et leurs races feussent jamais appellees à la couronne. Ce livre feut lors publié par toute la France; et estant veneu à la cognoissance du roy, pour faire le proces à l'aucteur, feut commis et envoyé à Thoul M. Brulart, à présent président aulx enquestes, lequel le sui seit et parseit. Mais par la benignité du roy il obteint grace, sauf à faire amende honorable de sa faulte, se recognoîstre criminel de leze majesté, et revoquer, par contraire escrit, le livre qu'il avoit faict.

Or, ont tres bien cogneu de tout temps ceulx de 'ceste maison, que, tandis que ce royaume demesseroit -paisible, il seroit malaise de parvenir à leurs intentions; et pourtant ont tousjours fasché de le 'mettre et entretenir en trouble, tandis qu'ils ont peu gaigher de poinct. Et duclque misere que la guerre ait peu apporter au povre peuple, quelque confusion qu'elle ait peu introduire en cest estat, jamais he s'en sont en tien emeus; jamais n'ont donné auleune marque de la ressentir. Et la raison estoit que le sang de France s'espandont par ce möyen, et ils vöulidient faire leur profitt de safoiblesse; qu'ils estoient 'alors les principatifx instrumens des misères du peuple, et plus grandes elles pouvoient estre, plus auroient ils de pretexte de les prendre ung jour pour subject de leurs esmotions; qu'ils avoient les armes et l'auctorité en main pour gaigner créance entre

les hommes; et par ce moyen jettoient peu à peu les fondemens de leur grandeur pretendeue sur nos ruynes; et que la guerre petit à petit alloit corrompant les cœurs des hommes, pour estre delà en avant plus capables de tous partis et de tous remuemens, quand le temps leur sembleroit estre à propos.

La relligion leur servoit de subject à entretenir ces guerres civiles, et ne s'appercevoit on du premier coup qu'ils abusoient, soubs ce beau tiltre, de la devotion de nos princes, et du zele de nostre nation, à leurs desseings. Et que ce feust ung pretexte, et non une vraie cause, qui aura bien cogneu le feu cardinal de Lorraine, oncle de ceulx ci, n'en doubtera poinct. Car cependant qu'il mettoit le feu aulx quattre coings de ce royaume, en l'ardeur de ce zele pretendeu de relligion, il declaroit aulx princes d'Allemaigne qu'il estoit de leur confession, et qu'il la voulloit introduire en France; faisoit instituer ses nepveux en la confession d'Augsbourg pour les gratifier, et ne feignoit entre ses familiers de dire que, si ceulx de la relligion pretendeue reformee n'eussent comme pris à partie ceulx de sa maison, il y avoit bon moyen de s'accorder, et accommoder ensemble en ce qui estoit de la relligion.

Enfin, seut cogneu par la prudence de nos roys, apres avoir tenté toutes extremités, que la relligion ne voulloit estre preschee par armes; que la force pouvoit bien engendrer des hypocrites, mais non des chrestiens; que les guerres, meres de corruption, au lieu de chasser la relligion contraire, introduisoient l'atheisme : mais particulierement que pes gens qui conseilloient tant la guerre pour la relligion, n'estoient plus relligieux que les aultres; que c'estoient de fins barbiers, qui voulloient entretenir la playe pour leur profict, et qu'il y

avoit danger qu'à la longue ils ne verifiassent la prophetie du grand roy François en ces mots:

> Que ceulx de la maison de Guise Mettroient ses enfans en pourpoint, Et son povre peuple en chemise.

Et de faict feut par aulcungs zelateurs catholiques remarqué qu'à la Sainct Barthelemy, apres avoir induit le feu roy Charles à se defaire de ceulx de la relligion, ils se contenterent de se depescher soubs ceste ombre des ennemis particuliers de leur maison, et venger leurs querelles propres, et feirent les doulx et les pitoyables en tous les lieux de leur auctorité, faisant profict par ce moyen en toutes sortes de la rigueur et severité de ce prince, qui, selon la vigueur de son esprit, s'en sceut tres bien appercevoir.

On sçait aussi que le roy à present regnant avoit employé ses jeunes ans, avec tous les heureux succes qui se pouvoient, à l'extermination de ceulx de la relligion contraire; et depuis, venant à la couronne, continua ung temps les rigueurs precedentes, tant qu'il cogneut que les consciences ne se domptoient, ni appaisoient par la force des armes, et que, pour exterminer une partie de son peuple, il ruynoit son royaume et son peuple tout entier. Il se resoleut donc, à l'exemple de plusieurs grands princes et estats voisins, qu'il avoit veus, de composer les troubles de son royaume par une bonne paix, laissant ung chacung vivre selon sa conscience; attendant que par ung bon Concile il y peust estre mis quelque ordre. Gependant se delibera de travailler à mettre les ecclesiastiques à leur ancien debvoir, pourvoir aulx dignités de l'Eglise de personnes capables et soigneuses de leurs charges, en tant qu'il pouvoit; et scachant combien peult

l'exemple d'ung prince en toutes choses, se forma lui mesmes pour exemple de devotion à sa court, à ses princes, et à sa noblesse, estimant que c'estoient les vrais et legitimes moyens ordonnés de Dieu, et practiqués des plus sages princes pour la reunion de l'Eglise, et reduction des consciences.

Mais à peine eut il faict la paix, qui feut sur la fin de l'an 1577, et faict paroistre quelque desir de l'entretenir delà en avant, sans plus employer inutilement ses armes contre les ames de ses subjects, que ces gens se voyans par là les moyens retranchés de s'auctoriser dedans les armes, penserent à nouveaulx desseings, et feirent evidemment cognoistre que la guerre civile leur estoit utile, c'est à dire, que nostre ruyne leur estoit edification. Et pour ce, la relligion leur venant à faillir, adviserent de troubler l'estat soubs ung aultre pretexte.

Alors donc, ils font solliciter diverses provinces de ce royaume à rebellion par leurs partisans; leur remonstrent les foullees du clergé, et ne leur disent pas que les guerres, qu'ils avoient allumees et fomentees, en estoient cause, et que le feu cardinal de Lorraine, leur oncle, avoit esté celui qui premier avoit proposé et procuré la creue des decimes, et la vente de partie du temporel, dont il avoit remporté à Rome mesmes le tiltre de fleau de l'Eglise gallicane; alleguent la diminution et avilissement de la noblesse, et ne leur disent pas que ceulx de leur maison, tant qu'ils avoient peu estre en auctorité, avoient ravalé, en tant qu'ils avoient peu, les princes mesmes du sang (qui ne se desdaignent pas estre dicts les premiers de la noblesse), que la diminution de la noblesse en debvoit estre imputee aulx aucteurs des guerres civiles, comme aussi l'avilissement des charges, et dignités à elle affectees; d'aultant que qui introduit la guerre civile en ung estat, introduict par la mesme porte la confusion en tous estats, qu'il n'est pas possible de purger puis apres, et ramener tout en ung coup. Mettoient en avant aussi les creues des tailles, les inventions des nouveaulx subsides, et imposts sur le povre peuple, et n'adjoustoient pas que la guerre engendre aula princes nouvelles charges, et par consequent au peuple; que le moyen unique de l'alleger estoit de laisser continuer la paix; que le peuple ne se pouvoit encores ressentir de la benignité de son prince, parce qu'il ne faisoit que sortir de la guerre; que entrer en nouveaulx troubles pour avoir soulagement du prince estoit ung remede pire que le mal, et mesmes contraire, estoit, dis je, retrancher au prince le moyen de descharger son peuple, et (ce qui est le principal) que dix ans d'imposts ne coustent pas tant au peuple, qu'ung seul an de guerre, et dix ans de guerre bien ordonnee ne lui font tant de dommage, qu'ung an de sedition civile, telle qu'ils voulloient susciter soubs ce pretexte.

Lors en leurs memoires ils ne parloient poinct de la relligion. Ce zele, dont ils faisoient bouelier devant, et dont ils l'ont faict depuis, ne venoit poinct en avant. Au contraire ils traictoient avec ceulx de la relligion contraire, comme chacung scait, pour les faire entrer en ce parti; ils les asseuroient de leur exercice selon les edicts, et oultre les edicts, si besoing leur estoit; ils negotioient en Allemaigne, nommeement avec le duc Casimir, tant pour entrer en ceste association, que pour induire ceulx de la relligion contraire, et estre envers eulx garant de leur foi et promesse, qu'ils leur donnoient de ne faire rien à leur prejudice; mesmes lui

offrojent des villes en leurs, gouvernemens pour contrepleige, de la foi, qu'il interposeroit en leur nom; et les choses feussent, peult estre, des lors passees plus avant, si ceulx de la relligion y enssent voulleu entendre.

Le roy aussi par sa prudence sceut bien divertir et detourner ce coup. Il veit où le mal leur tenoit, et, ne voullant permettre que leurs mecontentemens particuliers meissent son peuple en peine, se soubmit jusques là de tascher à les contenter. Il les appella donc pres de soi, leur feit de l'honneur, leur donna occasion de hien esperer de lui, mesmes leur feit des dons; et leur ordonna des assignations de ce qui leur estoit deu, lesquelles ils prirent; et demanderent sur quelques edicts de nouvelles impositions, qui feurent lors mises en avant, tellement que les mesmes vents, qui avoient assemblé la nuee, la dissiperent. Il leur feut aisé d'oublier le clergé, la noblesse et le peuple. Et quand les deputés des provinces, qu'ils avoient voulleu soulever, veinrent en court, à peine seirent ils semblant de les voir ou recognoistre. Mesmes ils assisterent à la resolution et homologation de plusieurs edicts, que le roy a depuis esteins et abolis, sur les remonstrances qui lui ont esté faictes de la charge qu'ils apportoient à son peuple. Et jamais ne leur soubveint de dire ung seul mot au roy, ou priveement, ou en son conseil, pour le soulagement de ses subjects. Et de là adveint aussi que les plus sages remarquerent, esdictes provinces, qu'ils n'estoient pas proprement marrys du mauvais gouvernement, s'il y en avoit; mais bien de n'y avoir telle part, qu'ils pensoient leur appartenir, plus prests sans doubte d'en abuser, quand ils l'aurojent, que ceulx contre lesquels ils pretendoient former les plainctes soubs le nom du peuple.

Ce qui leur a principalement rongé le cœur depuis, c'est qu'ils ont veu contineuer la paix; c'est qu'ils ont veu le roy resoleu de l'establir de plus en plus, et par le moyen d'icelle reformer les abus, qui se seroient coulés es charges de l'Eglise; de remettre la noblesse en sa premiere splendeur, et soulager son povre peuple des imposts et subventions qui le ruynent; maulx introduicts pour la pluspart par la continuation des guerres; maulx incurables par consequent que par la continuation de la paix.

Or Dieu ayant retiré de ce monde monseigneur, frere du roy, ils penserent que la saison estoit veneue, qu'ils debvoient penser à l'effect de leurs anciens desseings, et pour ce commencerent aussi tost à renouveller leurs practiques tant dedans que dehors le royaume, avec les voisins plus suspects et plus dangereux à ceste couronne; concluans ensemble, qu'il leur estoit necessaire d'estre armés à quelque prix que ce feust pour faciliter la mutation qu'ils pretendoient faire en cest estat. Et c'est la cause pour laquelle nous les voyons maintenant se jetter en campagne, quelque beau pretexte qu'ils ayent voulleu prendre, pour envelopper gens de toutes qualités en mesme crime, que certes il n'est naturel, ne raisonnable de croire avoir mesme but et intention qu'ils ont.

Veult on voir une marque, qu'ils ne sçavent bonnement de quoi couvrir leur entreprise sur cet estat? Ils ont faict des protestations à l'entree de leurs armes, desquelles la seule diversité peult decouvrir la fausseté à ung chacung. Es unes, ils jurent l'extirpation de la relligion contraire; es aultres, n'en sonnent mot. Si le zele les emeut, comment ce zele s'est il peu oublier en cest endroict? Es unes, ils veullent que le roy nomme ung successeur en son estat; es aultres, ils laissent cest article en arriere. S'ils ont tant de soing de l'Eglise catholique, s'ils craignent tant qu'il n'en mesavienne apres la mort du roy, comment leur est elle demeuree au bout de la plume? Es unes ils se rendent de protecteurs de l'Eglise et du peuple, procureurs du roy d'Espaigne, pour faire remettre Cambray en l'estat qu'il estoit, avant que seu monseigneur y entrast, c'est à dire, es mains du roy d'Espaigne; et en aultres, ils en ont eu honte, et on bien jugé que cest article, en quelque langue qu'on l'eust peu coucher, ne pouvoit estre teneu que pour pur castillan, et non pour françois. Ne voit on pas en ces diversités, qu'ils ne sçavent sur quel pied se mettre? en l'incertitude de ces protestations, une incertitude de conscience? ung langage, en somme, de gens qui ne sçavent de quoi parer leur mauvaise intention? qu'ils pensent couvrir une fausseté de deux, et deux de trois, et toutes ensemble ne servent. qu'à les dementir, qu'à les decouvrir tels qu'ils sont?

Ils veullent qu'il n'y ait qu'une relligion en France; et c'est le souhait commun de tous gens de bien, et de tous chrestiens. Mais quelles voies proposent ils pour y parvenir? S'il est question de forces, ce grand empereur Charles le Quint, en Allemaigne, en a recogneu et la debilité, et l'inutilité au faict des consciences. Le roy d'Espaigne, quelque catholique qu'il veuille sembler, apres avoir reduict ses subjects de Hollande et Zeelande à toutes extremités par le succes de ses armes, feut contrainct, l'an 1576, leur accorder la paix, et par la paix leur laisser leur relligion entiere, sans mesmes remettre la catholique romaine esdicts pays, ni les ecclesiastiques en leurs biens; et mesmes, il y a deux ans, leur offrit derechef pareilles conditions par le duc de

Terrenove, et non seulement pour lesdicis pays, mais pour quelques aultres. Nos roys, plus que tous ceulx là, ont bruslé, ont noyé, ont vainceu en plusieurs hatailles, ont surpris en plusieurs manieres, ont tenté toutes voies par l'espace de cinquante ans, n'ont espargné aulcungs moyens pour venir à bout de ceste relligion en ce royaume. Ce qui a esté chrestien à Charles le Quint, ce qui a esté catholique au roy d'Espaigne; à l'ung pour saulver des subjects plustost escheus par election que naturels; à l'aultre, pour garder des pays qui ne lui sont rien, au regard de tant de grands qu'il tient, pourquoi le sera il moins au roy, pour espargner ceulx que nature a mis soubs sa protection? pour garantir de ruyne inevitable son estat entier? son estat jadis si florissant; son estat, par la resolution qu'ils veullent mettre sus, reduict en l'extremité, en laquelle nous l'avons veu? S'ils dient que les guerres n'ant esté bien conduictes, à qui s'en pourront ils prendre qu'à eulx mesmes? Et leurs peres, et eulx, n'y ont ils pas commandé pour la plus part? N'ont ils pas esté arbitres et de la paix et de la guerre? Ont ils pas sonné, selon qu'il leur est veneu à propos, et selon l'humeur où ils estoient, tantost la charge et tantost la retraicte? Que, s'ils veullent ici obliger le roy par serment à une guerre immortelle, c'est à dire, ce povre estat et ce povre peuple qui pastit depuis tant d'annees, à une ruype finale, à une misere perpetuelle; certes, c'est une loi trop insupportable du subject sur le prince; certes, c'est ung indice manifeste qu'ils ont grande devotion à nostre ruyne, de nous y voulloir astreindre par devotion. Disons plus; certes, c'est ung argument tout certain, que ces gens veullent estre armés, qu'ils ne veullent poinct se desarmer, qu'ils veullent enterrer le roy

ou entre leurs armes, ou, s'ils peuvent, par leurs armes. Et miserables nous qui aurions à vivre soubs cesté insolence; miserables, qui aurions à survivre, si leurs intentions avoient lieu, nostre prince, et le sang de nostre prince, nostre desolee patrie, et les loix de nostre estat.

Mais seroit ce pas pitié, dient ils, de voir apres la mort du roy ce royaume entre les mains d'ung heretique? Bons tuteurs! et voyons l'ordre qu'ils y mettent. Nostre roy est jeune, et graces à Dieu, se porte bien. Ils veullent qu'il nomme ung successeur, ainçois eulx mesmes le nomment. Car ils nomment monseigneur le cardinal de Bourbon, bon prince, qui n'apperçoit pas le jeu qu'ils jouent; et lui font prendre la qualité de premier prince du sang, et presomptif heritier de la couronne. Quelle chimere, ou plustost quelle grotesque est ceci? s'il y va de tant, et s'il y a tant à craindre pour l'Eglise catholique, à qui plus tost s'en deussent ils addresser, qu'à nostre roy, prince tres chrestien, prince tres devotieux, prince, s'il en est au monde, zelateur de sa relligion? A qui moins penser, s'ils le font à bon escient, qu'à monseigneur le cardinal, prince jà caduc, jà pres de la fosse? et, que dirai je encores? prince qui ne peult esperer pouvoir naturellement survivre le roy, s'ils n'ont limité le terme de sa vie, s'ils n'ont complotté, et s'ils n'ont capitulé sa mort? Gens qui en toute leur vie se sont joués de la relligion, monstreront à nostre roy le chemin de conscience! les Lorrains enseigneront aulx François le zele de leur patrie! princes estrangers interpreteront nos loix, reglerons nos differens, voudront estre arbitres, voudront estre juges des princes du sang, des degrés de nostre sang! Qui ne voit ici (Dieu ouvre les yeux à monsieur le cardinal) qu'ils pensent l'avoir loué,

l'avoir emprunté pour jouer le roy sur l'eschafaud, peult estre six mois, tant que leur partie soit bien dressee? et qui ne voit qu'ils ne pensent pas à lui, quand ils parlent de lui, mais à eulx mesmes? Quand ils nomment au roy aagé seulement de trente et trois ans, ung sucesseur plus que sexagenaire; quand ils veullent suppleer le default d'hoirs qu'ils alleguent contre nostre roy, par la vigueur de monseigneur le cardinal, qui a jà passé son an climaterique. Mais, pour faire nommer ung successeur au roy, prendre les armes, et lui voulloir mettre le pied sur la gorge, se saisir de ses places, et abuser de l'auctorité qu'ils ont de lui contre lui, qui plus est; recevoir et distribuer deniers du roy d'Espaigne, appeller et introduire les forces d'Espaigne en ce royaume, certes, me pardonne monseigneur le cardinal si je lui dis, s'il ne voit encores, c'est ne voir goutte. Car ce n'est plus estre François; c'est avoir vendeu ce royaume au roy d'Espaigne, et avoir jetté le sort sur nostré robbe, laquelle sans doubte eulx se sentans trop foibles, et ne la pouvans avoir tous seuls, en veullent faire part à l'Espaignol, nous vendent à lui, et, soubs ombre de liberté, nous exposent en pillage.

Jugeons ceste conspiration, si elle peult proceder d'ailleurs que d'Espaigne. On sçait que M. de Guise est endebté jusqu'au bout; et cependant a distribué de grandes sommes, toutes en pistoles, par ce royaume. Il en a mesmes envoyé à qui n'en demandoit poinct. D'où peuvent estre veneus ces grands deniers, veu le coing qu'ils portent? et d'où donc estre meus ces desseings que du conseil d'Espaigne? Il est assisté du comte Charles de Mansfeld, qui lui amene des lansquenets, et quelques compagnies de cavalerie; du prince de

Parme (Dieu y a remedié depuis, mais oultre leur espoir); qui est le prince de Parme, sinon le chef et directeur es pays de deçà de tous les desseings d'Espaigne? Il a envoyé ses enfans en Savoye; et le duc de Savoye a fraischement espousé une fille d'Espaigne. A quelle fin, sinon pour les tenir en ostages des sommes qu'il a receues, et pour les avoir pour gages des promesses qu'il a faictes? Il a demandé aussi que la ville de Cambray feust remise, comme avant qu'elle eust receu feu monseigneur; Cambray, ville imperiale, mais opprimee violemment par le roy d'Espaigne; Cambray, le seul reste des si chers et precieux labeurs d'ung fils de France; Cambray au surplus le rempart de France du costé plus desarmé contre les efforts d'Espaigne. Qui peult plus doubter ici que, soubs ces habits françois, ne logent des cœurs d'Espaigne? Adjoutés les communications secrettes de M. de Guise et du prince de Parme, ses intrinseques conferences avec les ambassadeurs d'Espaigne, les allees et veneues de D. Juan Bardachin vers l'evesque de Comminges, bastard de Lansac, et infinies practiques de ceste nature. Et qui doubtera que l'armee de ces conjurateurs ne soit au service d'Espaigne? et qui doubtera donc que bien tost on ne voie esclaircir les escadrons, et ployer les enseignes? et que ce qu'il y a de genereux, que ce qu'il y a de François entre eulx, desquels les ungs ont esté poussés d'ung despit, les aultres attirés soubs ung faulx tiltre, se resouviendront d'estre François, se proposeront quel monstre seroit ung François armé contre la France? et contre la France pour l'Espaigne?

Mais ils ne veullent poinct tomber soubs ung prince heretique; et là dessus adjoustent que les François ne font poinct serment au roy qu'à condition de main-

tenir l'eglisé catholique, apostolique et romaine. Dangereuse proposition, et qui ne sent rien moins que la deposition de Chilperic, pour mettre Pepin en sa place soubs ombre de n'avoir bien desendeu l'Eglise contre les Sarrasins; mais Dieu fera la grace à nostre roy de defendre bien et longuement sa place. Quoi donc? s'il vient à mourir, disons mieulx, s'ils le font mourir, comme ils esperent, ils veullent dire qu'ils n'endureront jamais que le roy de Navarre, qu'ils tiennent pour heretique, vienne à la succession de cest estat? qu'en leur conscience, quelque palliation qu'on y puisse apporter, ils cognoissent bien lui appartenir de droict. Le roy de Navarre a assés de jugement, quand le naturel n'y seroit poinct, pour cognoistre combien, en ce temps, la vie du roy lui est utile et necessaire ; et : c'est à lui sur ce poinct à s'en desendre. Le roy de Navarre leur pourra respondre là dessus, qu'il est né et nourri en la relligion, de laquelle il faict profession; et qu'en conscience il ne s'en peult departir sans estre instruit; qu'il est prest et sera tousjours de recevoir instruction d'ung Concile libre et legitime, et de laisser l'erreur, quand il lui sera monstré. S'ils demandent que, sans aultre instruction, pour l'espoir ou desespoir d'une couronne, il passe tout à coup d'une profession à l'aultre, que requierent ils de lui? que inconstance, qu'infidelité, qu'hypocrisie, non pour le rendre capable d'estre roy, ains indigne plustest de l'estre. Sil se presente à estre mieulx enseigné, et s'il est prest d'acquiescer, quand il l'aura esté, où trouveront ils es anciens canons que ceste obeissance, ceste soubmission soit appellee heresie? Toute erreur, dict le canon, n'est pas pourtant heresie; heresie est une erreur importante; une erreur où il y va du fondement

de la foi, des articles de salut. Or, le roi de Navarre leur dira qu'il est chrestien, qu'il croft son salut en ing seul Jesus Christ, qu'il tient et reçoit sa parole, comme la regle infaillible de verité; qu'il croit les symboles de l'Eglise; qu'il reçoit les quattre Conciles Universels, 'qui vuit 'esté téneus en la sleur d'icelle, qu'il condamne toutes les heresies condamnees par iceulx, qu'ils se soubmet encores aujourd'hui à ung Concile aniversel deuement convoqué, et legitimement teneu. Il n'y a done poinci d'heresie à proprement parler; car il croit ides éeste fleure ce que les premiers se sont contentés de croire. Il n'y a poinct aussi de schisme; car le schisme présuppose une résolution en separation. Or, tenés ung bon Concile, et le voilà tout prest de se reunir. Il y a plus; car tout homme (dict le canon) qui tient une hérèsie, n'est pas pourtant heretique; liere-'tique presuppose une ambition de nouveauté, une opiniastfeté contre la raison enseignée et demonstrée. Or, peult juger ung chacung si le roy de Navarre est poussé d'ambition en cest affaire; car, disoit le jurisconsulte, cui bono? quel profict lui en peult il revenir? Telle ambition tombe en ung docteur en theologie, mais mon en ung prince; telle opiniastreté tombe en ung sophiste, mais mon en la simplicité d'ung qui est enseigne par aultrui. S'il estoit meu d'ambition, estre ambhlieux de la bonne grace du roy, de la faveur de tous les catholiques de ce l'ayaume, des vœux et suffrages des plus grands princes de le chrestiente, en changeant tout soubliain de telligion, fui serbit beaucoup plus profitable. Bt, si l'ambition faict l'heretique, certes les aucteurs de ceste conspiration le sont bien plus que lui. Mais il est meu de conscience; la conscience lui faict passer par dessus les considérations,

qui les emportent, et s'asseure qu'il n'a poinct affaire à ung peuple qui desire ung prince perfide, et deloyal à Dieu et à sa conscience; ains qui se contente de l'avoir paisible, capable de raison, prest à mieulx apprendre, et à mieulx faire, quand on le vouldra mieulx enseigner. La loi de cest estat ne prive poinct ung fils à cause de la relligion, d'une succession directe, ni collaterale; pourquoi ung prince? La loi reçoit en administration de tous estats indifferemment les ungs et les aultres; pourquoi moins de l'estat? La loi permet à ung chacung l'exercice de sa relligion, et n'en exclut personne; pourquoi le prince seul sera, il exclus de ce privilege? Le prince, qui le donne? Pourquoi sera seul esclave en sa conscience, au plus precieux qu'il ait, celui qui affranchit les aultres? Je dis la loi de cest estat, car c'est la loi par laquelle seule nous vivons, et pouvons vivre en paix, c'est à dire, remettre cest estat en son premier estat, et le retirer de la misere; loi deliberee aulx estats d'Orleans; estats non forcés, non brigués, non ligués par les menees et practiques de ceulx qui aujourd'hui nous troublent. Je dis plus: estats convoqués par eulx au plus fort de leur credit, et mesmes à leur instance; loi que jamais, depuis, nous n'avons voulleu enfreindre, que nous ne soyons entrés en guerre civile; et quand je dis guerre civile, je pense comprendre soubs ce mot toutes sortes de calamités et confusions. Loi donc juste, car elle est tres necessaire; loi non revocable en la condition de l'estat present; car, sa revocation nous met en ruyne; loi jugee, loi jurce par tous les princes, gouverneurs, lieutenans generaulx, conseillers d'estat, cours du parlement, sieges presidiaulx, villes et communautés, de ce royaume; par ceulx mesmes qui, aujourd'hui, temerairement, en veullent contester; et toutesfois qui remet la decision du faict de la relligion à ung Concile libre, attendant lequel, nul ne peult estre dict heretique en cest estat, et auquel aussi quiconque se soubmet ne peult estre, à bon droict, teneu pour pertinax, ne schismatique. Quelques empereurs, et Constantin mesmes sur sa fin, quelques roys d'Espaigne aussi, et longues annees, ont eu des opinions erronees, erronees aulx poincts plus importans (et, graces à Dieu, le roy de Navarre n'en est pas là). Lit on toutesfois que jamais on ait pensé à les deposer, que jamais on ait proposé de les exclure? Quelques papes mesmes, les docteurs des aultres, aulxquels le nom d'heretique et d'heresiarque eust peu, à bon droict, appartenir, ont mal creu de Christ, ont mal enseigné de sa divinité, le fond du salut, le seul fondement de la relligion chrestienne. La chrestienté toute entiere y avoit interest; la source publicque, où chacung puisoit, s'en alloit gastee, s'en alloit empoisonnee. Voyons qu'on a faict? on a eu patience d'assembler ung Concile solemnel, on les a ouïs, on les a instruits, on les a receus à amendement et à resipiscence. Jamais n'ont esté prononcés heretiques qu'en ung plein Concile; jamais on n'a attenté sur leur dignité par presomption, jamais par prevention, jamais par force. On y a tousjours observé toutes formalités; on a tousjours attendeu la condamnation, mesmes apres icelle prononcee, on leur a donné temps pour y penser; on leur a donné respit pour se convertir.

Mais il y a danger, disent ils, si le roy de Navarre vient à la couronne, qu'il ne renverse la relligion catholique en ce royaume. Je respons, qu'il y a bon terme; et ce grand soing, de si loing, et hors de saison, Mém. DE DUPLESSIS-MORNAY. Tome III.

monstre une passion fort violente, qui n'est poussee de relligion aulcune. Je respons que, graces à Dieu, nostre roy estant en la fleur de son aage, s'ils n'y entendent quelque finesse qui nous soit cachee (et Dieu l'en garde), il n'est hors d'espoir d'avoir enfans; et que lui et la royne sa femme, selon leur aage, en peuvent avoir une douzaine sans miracle. Je respons qu'à ce mal pretendeu, ils apportent ung foible remede; ung cardinal, qui a deux fois autant d'aage que le roy; ung cardinal, qui n'est poinct marié, en danger de mourir premier que l'estre; asseuré de n'avoir poinct d'enfans, quand il le sera.

Et quant à ce qu'ils alleguent du changement de relligion, qui seroit à craindre, le roy de Navarre leur dira qu'en sa relligion, il a esté tousjours instruit à ne forcer poinct les consciences; qu'en l'ardeur mesmes des guerres civiles, lorsque tout exercice estoit defendeu par toute la France à ceulx de sa relligion, il a tousjours laissé la relligion catholique en son entier en toutes les villes esquelles il avoit puissance. Et de ce ne veult pour tesmoings que le clergé et les presbtres et moines d'Agen, où il faisoit sa residence; qu'en paix et en guerre il est tousjours servi indifferemment, tant aupres de sa personne, qu'en tous les estats et offices qui sont à sa disposition, des ungs et des aultres; mesmes en sa chambre, en son conseil, et en ses gardes, et n'en a jamais reculé aulcung pour le faict de conscience; et ceulx qui ont tant soit peu approché de sa maison, le sçavent bien. Qu'en ce que Dieu lui a laissé de son royaume de Navarre, qui est beaucoup plus grand que son pays de Bearn, il a laissé la relligion catholique romaine en son entier, sans y avoir alteré ni innové, selon qu'à son advenement il l'avoit trouvé.

Ce que malicieusement on cele, se contentant de le calomnier sur le faict de Bearn; car, quant à sondict pays de Bearn, l'ayant trouvé reduict par la feue royne de Navarre sa mere, par une convocation generale des estats à la relligion, de laquelle il faict profession, il l'a à la verité laissé en ce mesme estat, auquel il le trouvoit, ayant esté tant occupé es travaulx qu'on lui a brassés, qu'il ne lui estoit pas à propos de rien changer. Cependant, on sçait qu'il en a levé les rigueurs, et y a moderé les ordonnances, et faict payer aulx ecclesiastiques leurs pensions, et mesmes quelquesfois de ses propres deniers. Ce que les evesques et ecclesiastiques qui ont du bien audict pays, ne peuvent nier. Au reste a tousjours offert d'ouvrir les estats à son peuple, afin qu'ils y peussent franchement ouvrir la bouche, et lui declarer en iceulx ce qu'ils auroient à requerir pour la paix de leurs ames et consciences. Si donc on tire une mauvaise consequence de ce qu'il ne remet la relligion catholique romaine en Bearn, que n'en tire on une bonne de ce qu'il ne l'a ostee en la basse Navarre, où il a pareille puissance? Mais toutes personnes non passionnees la debvront tirer bonne de l'ung et de l'aultre, en ce qu'en l'ung et en l'aultre, il n'a rien remué, ni innové, sauf qu'il a moderé les ordonnances de Bearn, attendant mieulx; partant qu'il n'est pas prince qui se plaise en nouveaultés, qui procede legerement aulx changemens par une violente passion, contre une relligion ou contre l'aultre; ains qu'il laisse volontiers les choses au poinct où il les trouve, s'il n'y voit une utilité bien evidente. En ce faict, qui estimera le roy de Navarre si depourveu de jugement, si ennemi de sa grandeur et de son bien, si Dieu et nature l'appelloient en ung estat, de le voulloir

perdre et mettre au hazard par une violence sans raison, et, qui plus est, par une violence sans effect, et qui ne pourroit lui attirer que sa ruyne? Et qui croira que celui qui n'aura voulleu forcer tant soit peu ung pays de basse Navarre, qu'il pouvoit sans contradiction, veuille forcer ung royaume de France, qu'il ne peult sans le perdre, et sans se perdre soi mesmes? Ces doubtes peuvent tomber au cœur des idiots, mais non des sages. Ceulx mesmes qui les protestent, ne les croyent pas, encores qu'ils taschent par desseing de les faire croire aulx aultres; et puis, quand les choses seroient reduictes à ce poinct, on peult prendre asseurance contre les doubtes qu'on a. Le peuple la requiert, et le prince la baille; et en ce prince, graces à Dieu, on ne peult remarquer jusques ici, ni violence, ni perfidie. Mais de s'armer des ceste heure, pour une chose naturellement si loingtaine, de parer ung coup qui vient de si loing, qui, peult estre, de vingt ou trente ans ne nous peult arriver; et, soubs ce pretexte, mettre cest estat en feu, l'Espaignol dedans pour nous ruyner, en tant qu'en eulx seroit, et plus, et plus tost que le mal qu'ils alleguent, ne pourroit pas faire; c'est nous ordonner la ciguë pour nous empescher ung acces de fiebvre; c'est une mort asseuree pour remede d'une maladie incertaine. C'est donc ung dol manifeste; car l'ignorance en seroit trop grossiere. C'est ung empoisonnement au patient; c'est une trahison en cest estat; c'est une conjuration contre le roy. Et quand il aura nommé ce successeur, successeur qui ne pourra esperer de le survivre, successeur toutesfois nommé à ceste intention, empli de cest espoir, quelle asseurance pourroit prendre le roy d'eulx, qu'ils ne s'en veuillent defaire?

Laissons le roy de Navarre; il sçaura, quand il en sera besoing, plaider sa cause (et Dieu veuille que jamais il n'en soit besoing). Voyons si le reste de leurs protestations a plus de verité, ou de couleur. Ils se plaignent de quelques jeunes gens, qu'ils dient posseder le roy, tirer de grands biens de lui, et en reculer les princes, les vieulx serviteurs, et les principaulx de la noblesse; sans rien deviner, chacung voit assés qui ils designent. Ce sont les ducs de Joyeuse et d'Espernon; si le roy les aime, ce n'est chose si estrange. Personnes privees en leurs amitiés desirent bien estre libres; combien plus les princes? Et en nos histoires, veit on jamais prince qui n'aimast quelqu'ung? s'il leur faict du bien, c'est la volonté qui produit son effect. Aimer proprement, c'est voulloir du bien, c'est faire du bien; et le vrai voulloir s'etend aussi tost à la proportion de sa puissance. Mais s'ils disent trop, et que leur censure ait lieu ici; bons reformateurs! et leur exemple vauldroit, s'ils voulloient commencer par eulx mesmes. Qu'il nous dient donc d'où il s'est peu faire que leur feu grand pere, quand il veint premierement en France, n'eust, pour tout, que quinze mille livres de rente, et que, maintenant, ils en ayent en leur maison plus d'ung million, si ce n'est par la liberalité et bonté de nos roys. Je dis de nos roys, qui leur ont donné de belles charges, de grands eveschés, de grosses abbayes, des plus riches heritieres de ce royaume; de nos roys, en la bourse desquels, tant qu'elle leur a esté ouverte, ils ont si bien sceu fouiller, qu'ils se trouveront avoir tiré six ou sept millions d'or, dont sont procedees leurs plus belles acquisitions. Et de faict, à l'advenement du roy Charles à la couronne, avoit esté concleu, par les estats d'Orleans, qu'ils seroient appellés à reddition de compte, et recherchés des dons immenses qu'ils avoient receus des predecesseurs roys, et tout fraischement du roy François II, duquel ils avoient emparé la personne, et la bourse tout ensemble. Mais, au lieu de penser à rendre compte, ces bons reformateurs adviserent au moyen de n'en poinct rendre; commençans, sans commandement du roy, et contre les estats de ce royaume, à tuer ceulx de la relligion contraire, en la ville de Vassi, c'est à dire, allumer le feu par ung des coings, qui, depuis, embrasa pour ung long temps toute la France. Le pere, pour ne rendre compte, nous meit en combustion; et, aujourd'hui, le fils nous met à la guerre pour faire compter les aultres. Voyons donc comment : respondent ici s'ils le font à bon escient; s'ils ne se jouent poinct; s'ils n'abusent poinct le peuple. Tous sçavent ils pas que Sainct Luc, et d'O, leurs principaulx parfisans, et quelques aultres, sont riches des dons du roy, ont trempé en ses finances, ont teneu en somme ci devant le mesme lieu, que ceulx qu'ils taxent, et qu'ils font semblant d'amener ici à compte? Comptent les premiers, qui premiers ont faict recepte; eulx donc les premiers. Ainçois, disons mieulx; ces gens sont marrys que les faveurs de la court ne pleuvent tousjours sur eulx; et, si elles degouttent sur aultrui, crevent d'envie. Ces gens vont briguer les malcontens, comme eulx, de toutes parts. Et ces malcontens, qui veult regarder leur condition sans passion, sont si à leur aise, ont tant receu de bienfaicts, que l'aise seul les desvoie; et, sans les bienfaicts, ils n'auroient puissance de mal faire. Le vrai malcontent, celui qu'il fault plaindre, et celui duquel la condition est miserable, certes c'est le roy, d'avoir faict du bien à race si ingrate,

donné du pouvoir, donné du moyen, donné de l'auctorité, pour estre tout aussi tost employés contre lui.

Ils plaignent le peuple; et que donc ne le laissent ils vivre en repos? Et pourquoi traversent ils le roy en la volonté qu'il a de lui bien faire, dont desjà il faisoit voir de bons effects? On sçait qu'il l'avoit soulagé pour ceste année de 700,000 livres, et cassé en ung jour 80 ou 100 edicts, que l'on lui avoit remonstré estre à la charge de son peuple; et se preparoit à une reformation generale de son royaume. C'estoit commencer; en une aultre annee il eust faict dadvantage; et, en telles choses, la volonté y estant, le progres va loing en peu de temps. Aujourd'hui qui doubte que nouvelle guerre ne lui cree nouveaulx despens, nouveaulx maulx au peuple? Et puis, quel mesnage pensons nous que fassent ces bons mesnagers, qui, desjà, commencent à lever de grands deniers sur les villes, qu'ils detiennent? Mesmes ont taxé la ville de Bourg, en Bourdelois, à 10,000 escus, qu'ils n'eussent payé en dix ans au roy, prests d'envoyer le maire et jurats de la ville prisonniers en Brouage. Pensons puis apres aulx armees, tant françoises qu'estrangeres, qu'il fauldra nourrir et soudoyer de part et d'aultre. Pensons aulx deniers du roy, que jà ils usurpent et saisissent, qu'il fauldra remplacer d'ailleurs pour s'opposer à leurs rebellions, aulx estappes, aulx munitions, aulx contributions, aulx passages de gens de guerre. Toute guerre est ung monstre devorant; combien plus la domestique? Toute guerre une vraie confusion; combien plus celle qui est conduite par gens de confusion, comme ceulx ci? Certes je dirai, et je l'ai dit : trois jours de sedition civile cousteront au povre peuple une année de taille et plus; et trois de guerre bien juste, quand ils auroient

bonne intention (ce qu'ils n'ont pas), ne vauldront jamais au povre peuple ung jour de paix.

Mais le roy a tort; c'est ce qu'ils alleguent, car il ne faict pas assés de cas de sa noblesse. Voyons qui les suit, et voyons qui proteste avec eulx. Des princes du sang, je n'en vois aulcung en ce parti, si ce n'est ce bon prince qu'ils abusent, qu'ils ont enchanté, duquel ils se font donner le bien pour l'oster à ses nepveux. Si sont ils les chefs et les protecteurs de la noblesse. Des vieulx officiers, des vieulx chevalliers, des vieulx capitaines de la France, à peine ung tout seul les suit. Je ne vois pour tout que des Lorrains, quelques malcontens (que n'eussent ils plus qu'ils ne meritent!), quelques gens perdeus, gens de tout parti, gens (disoit Cæsar) à qui la combustion, à qui la guerre civile duit, tels que ceulx que Catilina eut à sa suite. Pensés que Lorrains se soucient beaucoup si nostre noblesse est bien; pensés que Lorrains, qui, tant qu'ils ont peu, ont de tout temps ravalé la dignité de nos princes, prennent bien à cœur que chacung tiennent son rang. Qu'ils n'alleguent poinct qu'on leur ait pris leurs estats, ils les ont vendus; ils en sont payés, et cherement. N'alleguent aussi qu'on ait contrainets aulcung de s'en defaire; il leur tient au cœur. C'estoient gens pour la pluspart à leur devotion, ou de leur ligue, et leur faict grand mal qu'on les en faict sortir. Mais qu'il leur soubvienne, que ce sont eulx qui ont rendeu les estats venaulx, alors qu'ils ont eu le maniement; et, je dirai plus, les simples commissions, comme sont la pluspart de celles qui sont pour la guerre. Car, à leur sollicitation et importunité tres instante, on sçait assés qu'ung maistre de camp, des plus favoris du sieur de Guise (qu'il n'est besoing de nommer), feut admis à

Le clergé, la cause duquel ils veullent sembler entreprendre, je demande quelle reformation ils y apporteront meilleure que nostre roy? Le roy, s'il est question de sa personne, monstre à toute sa court le chemin de l'avoir en reverence. Il a pour conseil les plus apparens

et les plus notables d'icelui. Aulx charges et dignités de l'Eglise, par les bonnes ordonnances qu'il a faictes conformes aulx anciens canons, et desquelles nul de ses predecesseurs ne seut jamais si severe observateur que lui, il choisit les plus excellens, soit en vie, soit en doctrine, qu'il cognoisse en son royaume. Il forclost toutes personnes indignes, incapables, sans acception et exception de qualités; n'y admet que ceulx qui actuellement peuvent exercer les charges; contrainct les evesques de resider en leurs dioceses, plus severement et plus exactement que ne faict le pape mesme; monstre au reste à tous le chemin de zele et devotion. Que se peult il adjouster à ce bel ordre, sinon le loisir d'en recueillir le fruict, et de le voir proficter? Mais ce n'est pas la predication de la parole de Dieu qu'ils demandent; ils ne se soulcient pas que ce royaume soit peuplé de bons predicateurs, que le peuple soit instruit en son salut, que la brebis desvoyee y soit ramenee. Ils veullent des jesuites qui inspirent le venin de leur conspiration, soubs ombre de saincteté, en ce royaume; qui, soubs couleur de confession (quelle horrible hypocrisie!), abusent de la devotion de ceulx qui les croient, et les obligent par serment à ceste ligue et à leur parti; qui exhortent les subjects à tuer et assassiner leurs princes, leur promettent pardon de leurs pechés, leur font croire que par actes execrables ils meritent le paradis. Vraies colonies d'Espaignols, ains disons plustost, vrai levain d'Espaigne en ce royaume, qui, depuis quélques annees, a enaigri nostre paste, a espaignolisé soubs un sourcil pharisaïque les villes de nostre France; desquels les couvens sont plus dangereux que citadelles; desquels les synodes ne sont rien que conspirations. Tels sont ils cogneus; tels nous sont les fruicts de l'as-

semblee generale, qu'ils tenoient à Paris n'agueres en septembre, et y presidoit certain jesuite du Pontamousson, directeur de ces conseils. Aultres y en a qui blasment le roy en pleine chaire, suscitent le peuple, l'arment de fureur contre les magistrats, preschent les louanges, recommandent les vertus de ces pretendus rejettons de Charlemaigne. C'est ce zele ardent, c'est ceste relligion qui les anime. Et le voullés vous voir? Quand ils sont en Allemaigne, ils sont lutheriens. Sont ils mutinés? Qui leur eust presté la main, ils remettoient sus les calvinistes. Soigneux du clergé, soigneux du service, soigneux de tenir leurs residences; qui possedent nombre d'eveschés, nombre d'abbayes, contre les canons, contre le concile, qu'ils nous vont preschant en France, et en vendent les bois, en dissipent le domaine, laissent les eglises, laissent les maisons aller par terre, vendent les reliques, retirent à eulx tout ce qu'il y a de precieux; d'aumosnes, fort peu; les povres tous nuds, et les presbtres mesmes y meurent de faim. Vrais heritiers, non de Charlemaigne certes, mais de Charles de Lorraine, qui sceut fort devotement vendre à son profict la grande croix, et les plus riches joyaulx de Mets; feit vendre au clergé de ce royaume partie de son temporel, et augmenter les decimes; et n'eut poinct de honte, pour le bon service qu'il pretendoit avoir faict en cest endroict, de s'en faire donner une partie en recompense.

Reste la justice. Ces justes censeurs la nous veullent restablir en son integrité. Qui jamais a veu qu'une guerre domestique ait esté propre pour reformer la justice? Qui ne voit assés qu'ung seul an de guerre lasche plus les nerfs des loix, et leur oste plus d'auctorité, que dix ans de paix ne lui en peuvent rendre?

laschent plus la bride au mal, que dix ans de paix ne la lui peuvent retenir? Ces gens, pour exemple, quand ils auront faict leur rage, viendront à s'en repentir. Il leur fauldra des pardons, des remissions, des abolitions. Il fauldra que les loix dorment. Il fauldra que les juges connivent, qui commençoient à reprendre leur auctorité. Mal tousjours sur mal. Là les desiances des parties commençoient à se lever par la prudence du roy. Ceulx de la relligion contraire recognoissoient peu à peu que, par la voie ordinaire, ils pouvoient avoir justice, sans qu'il leur feust besoing d'ung conflict de jurisdictions. Ces perturbateurs, protecteurs des parlemens, qui leur promettent ici plenitude de puissance, donnent nouveaulx argumens de desiance, ostent les moyens de reunir à ce poinct les volontés. Quoi plus? On s'est plainct souvent de la venalité des offices de judicature, introduicte premierement pour aider à supporter les guerres estrangeres, et depuis continuee pour subvenir aulx civiles. Or sçait ung chacung que le roy n'a eu tant soit peu de relasche, qu'il n'ait aussitost aboli ceste venalité, et tous les moyens par lesquels indirectement on la pouvoit couvrir. Et si ceste saincte ordonnance est par lui sainctement observee, tous les parlemens et sieges de France en sont tesmoings, qui se peuvent souvenir que le roy n'a voulleu admettre quelques resignations tres favorables, desquelles la consequence eust peu faire fraude à son ordonnance à l'advenir. Quel soing il a eu de pourvoir aulx dignités principales en ses parlemens, quand elles sont veneues à vaquer, on le voit en ceulx qui aujourd'hui les tiennent, nommés de son propre mouvement, et choisis par son bon jugement; gens d'integrité, de capacité et de doctrine, desquels la vie est une censure, la doctrine une

lumiere entre les hommes. Quel soing il avoit mesmes sur le poinct que ce trouble est adveneu d'abreger les proces d'entre son peuple, et d'oster les mangeries qui le consument, sçavent ceulx aussi qu'il a appellés en conference, par lesquels il en a voulleu estre informé par le meneu. Ces gens ci le sçavent; ces gens n'en peuvent doubter, y ayant partie d'eulx esté mesmes appellés. Tout nostre mal est qu'ils vouldroient gouverner ou gourmander la court, pour y mettre, comme ils faisoient aultresfois, gens à leur poste. Et s'ils eussent peu continuer de mesmes, les estats feussent venaulx, la justice à leur gré en son entier, et ne parleroient de reformation à present ni d'abus.

Par là voyons nous que ces protections et protestations ne sont que vains pretextes. La cause est l'ambition de gouverner et de regner; c'est la dissipation de nostre estat, pour en emporter une piece, et y introduire l'estranger; c'est une continuation du desseing qu'ils ont eu des long temps, et duquel les Memoires feurent decouverts des l'an 1576; lequel se manifeste aujourd'hui plus clairement selon qu'ils s'approchent plus de l'execution, et nous du danger. Cependant ils pryent le roy de ne poinct mal penser d'eulx, que c'est pour son bien; qu'ils n'ont tous juré que son service. Ainsi feit Pepin, et ceulx ci se disent de la race, employant contre son roy Chilperic la force et l'auctorité qu'il lui avoit donnee, et la saincteté du pape Zacharie. Le roy est prudent, le François loyal, le jeu decouvert, et avons appris que la saincteté condamne les parjures, que la saincteté ne condamne jamais de faulser la foi, forcer sa patrie, et se rebeller contre son roy. A ce beau desseing ils n'ont poinct de honte de convier la royne, mere du roy, de les assister de son

actorité; la royne, qu'ils confessent avoir conservé cest estat par tant de fois, à la ruyne et dissipation totale du royaume, à la conjuration qu'ils font contre le roy son fils. Convient les princes du sang à transporter leur honneur en aultre nation et en aultre race; tous les pairs de France à trahir l'estat, duquel leur estat les faict comme curateurs soubs l'auctorité de nostre roy; les courts souveraines à souscrire à leurs desseings, que Dieu a assises en jugement pour la condamnation de tels perturbateurs; les Catons je dis à estre Catilinaires. Et n'ont poinct' de honte d'invoquer Dieu là dessus, de prendre son nom en vain, de l'appeller à tesmoing de leur sincerité et droicture en ceste cause; Dieu, jaloux de son sainct nom, scrutateur des cœurs des hommes, qui ne peult tenir pour innocent celui qui employe son nom à vanité, combien plus à desseings si execrables? desseings execrables, qui, soubs nom de pieté, de justice et d'ordre, confondent tout ung estat, le remplissent de vengeance, de meurtres et brigandages, font ung million de veufves et d'orphelins reduiets à la faim et au bissac, tout pour contenter leur seule ambition. Dieu voit tout cela, Dieu penetre jusques au fond; Dieu duquel ils vont se mocquant en l'invoquant, et duquel ils sentiront le juste courroux, et la malediction, et la vengeance; Dieu garde des roys; Dieu tuteur des loix, conservateur des polices, protecteur du povre peuple, qui les destruira, qui les confondra, qui les fouldroyera, destruisans son peuple, confondans tout ordre, renversans les loix, conjurans contre le roy et son estat, abusans surtout de son nom sacré, du zele de Christ et de l'Eglise, pour, soubs ce beau voile, attenter à leur superieur, voler sa couronne, et exposer en proye tous ses subjects.

Peuples, qu'on veult mutiner soubs ombre du bien public, ressouvenés vous de ces pretendus rejettons de Charlemaigne, et pour interpretes de leur dire lisés moi leurs precedens Memoires. Là verrés qu'ils veullent estre roys aulx despens de nostre roy. Là verrés quel arrest ils ont conceu contre nous et nostre prince. François, restes de la France, considerés moi ces gens soubdoyés du roy d'Espaigne. C'est donc la guerre d'Espaigne, le crible des vrais François. Ils parlent d'ung successeur, et vous avés veu pourquoi. Ils vouldroient morts tous nos princes. Ils parlent d'unir la foi, d'unir les relligions; mais pour diviser l'estat, pour partager nos provinces. Ici n'est poinct question de la relligion; nous avons ung roy chrestien, trop plus zelateur de Dieu qu'eulx tous ensemble, qui sçaura pourvoir, et par moyens legitimes et convenables, à la seureté de la vraie relligion pour la posterité. Ceste saincteté n'est que pure hypocrisie. Ceste Ligue, qu'ils appellent saincte, n'est qu'une seinte devotion, n'est qu'une vraie conjuration contre l'estat. Ici aussi peu est il question de la reformation de ce royaume. Ces gens, quand ils n'y ont veu leur interest, ne s'en sont jamais esmeus. Ces gens, au contraire, en ce peu que Dieu leur a donné d'auctorité et de subjects, n'ont monstré qu'eschantillons evidens de violence et tyrannie. Et puis pensés, je vous prye, quel remede à tous nos maulx de nous jetter à la guerre civile, c'est à dire reformer le clergé par l'insolence du soldat; espargner le sang de la noblesse par une suitte de cruautés et de vengeances; soulager le povre peuple par les contributions, les foulles, les rançonnemens, les pillages; redresser la justice par l'aneantissement de toutes bonnes loix; remettre sus l'ordre et la police, par la chose qui seule a tousjours introduict la confusion en toutes choses? Mais, qui pis est, pensés que c'est de restaurer la France en l'ouvrant de toutes parts, et aulx deniers et aulx forces d'Espaigne, c'est à dire, vendre à l'Espaignol nostre pays, et chasser la France hors de la France, pour y faire les logis de la Lorraine et de l'Espaigne? N'alleguent ici le roy de Navarre pour nous abuser. Il est prince courageux, prince tout françois. Et l'ont pour suspect, et le redoubtent, et taschent par tous moyens de le rendre odieux; eulx confederés, eulx amis et serviteurs de l'Espaignol; lui vrai sang de France, lui né ennemi, et à tres grand droict, de la nation d'Espaigne.

Reste donc, que ce qu'il y a de reste de là France en France se rallie, et se rejoigne contre ceste conjuration maudite; qu'on n'oie plus entre nous les noms de papiste et huguenot, noms ensevelis par les edicts de la paix, noms bien plus à ensevelir maintenant en ceste guerre, qui n'a fondement qu'en nos divisions; que pour tout il ne soit plus parlé entre nous, sinon d'Espaignols et de François; que nous nous voyons à ceste occasion reunis dessoubs la croix, je dis contre la croix rouge dessous la croix blanche, marque antique de nos roys; qu'il soit dict à la posterité que ceste division, comme aultresfois les Romains, nous ait reunis ensemble; que la rebellion de ces gens nous ait ramenés à la vraie obeissance, je dis de nos loix et de nos roys. C'est la contre ligue que nous debvons faire tous; ligue nee en nous, ligue naturelle du chef avec tous ses membres. Pour y parvenir n'est besoing de brigues, n'est besoing de monopoles. Le sang court au cœur, et le bras pare la teste sans deliberer, des qu'il ressent le danger, des qu'il apperçoit le coup venir. Soyons tous

unis; rangeons nous au roy; chaque membre se dispose à faire son office. Je vois ces ligueurs, balais desliés, pieces rapportees, fondre dessoubs nous, fondre devant nous, fondre et se confondre par eulx mesmes. Je les vois defaicts; je les vois rompeus, et par les prevosts, sans aultres armes. Et pour leur dicton, au lieu du tombeau qu'ils se promettent, ce sont les premiers Espaignols françois.

XXVII. — INSTRUCTION

A MM. de Clervant et de Chassincourt.

Les sieurs de Clervant et de Chassincourt remonstreront au roy la peine où est le roy de Navarre, n'entendant depuis tant de temps, et veu l'estat present des choses, les volontés et intentions de sa majesté, comme elle lui avoit faict esperer; encores qu'il n'y a aulcung qui ait tel interest d'en estre informé que lui, soit en la qualité de prince de son sang, ayant cest honneur d'estre ce qu'il lui est, soit pour le regard de la relligion, de laquelle il faict profession; attendeu que ceulx qui sont en armes contre sa majesté, l'attaquent evidemment en ces deux qualités, en ce qu'ils le pretendent declarer indigne et incapable du lieu qu'il tient, et requierent l'extermination tant de lui que de tous ceulx de mesme relligion.

Que cela lui seroit plus supportable, si, à l'endroit de tous ceulx qui ont mesme charge au service de sa majesté, on se gouvernoit de mesme sorte : encores qu'il ne peult dissimuler que, leur estant semblable en ce qui concerne les charges, il a une qualité, selon laquelle il ne peult ni doibt estre mesuré à eulx. Ce

nonobstant, qu'il a ce malheur de n'entendre sa volonté en chose qui lui touche de si pres, que par le bruict commun, ou par moyens obliques, et nommeement par ce qui vient à sa cognoissance des lettres que sa majesté escrit aulx aultres gouverneurs; esquelles nommeement on ne dissimule poinct que la paix se traicte, et est en train de se conclure, pourveu que les ligueurs se departent des seuretés qu'ils demandent pour leur particulier; c'est à dire, pourveu qu'il n'y aille que de l'abolition de l'edict de paix et de la ruine, en tant qu'en eulx sera, de lui et de tous ceulx de la relligion.

Que ces choses sont audict seigneur roy de Navarre d'aultant plus vraisemblables que, depuis tous ces remuemens, il n'a eu cest honneur d'avoir communication particuliere de l'intention de sa majesté par aulcung de sa part. Mesmes qu'ayant dernierement veu M. le mareschal de Matignon à Tonneins, en intention de fonder une bonne intelligence ensemble pour le service de sa majesté, il auroit veu en ses actions, depuis, tout le contraire; en ce que ledict seigneur mareschal n'auroit rien faict de ce qui avoit esté lors concleu et arresté entre eulx; et que, depuis, ayant envoyé vers lui pour avoir son advis de ce qu'ils avoient à faire, pour s'opposer de commune main aulx ennemis de sa majesté, il n'en a peu tirer aulcune response; encores que, sans avoir respect à ce qui convient à sa qualité, pour le desir qu'il a de voir sa majesté bien servie, il se soubmit jusques là que d'entendre l'intention de sa majesté par la bouche dudict seigneur mareschal.

Ainsi que n'entendant sa volonté, ni par sa majesté ni par ses principaulx ministres, ne restant audict seigneur roy de Navarre aultre moyen que de la deviner,

A MM. DE CLERVANT ET DE CHASSINCOURT. il est contrainct d'adviser de soi mesmes, selon la fidelité naturelle qu'il a envers son service, de pourvoir aulx occurrences ainsi qu'il juge estre expedient et necessaire pour son service, attendant qu'il plaise à sa majesté lui faire cest honneur de lui faire entendre ses intentions, au moins par quelqu'ung de ceulx qu'il a par de là, lesquelles ne peuvent estre departies à personne qui ait plus d'obligation ni plus de volonté de les faire reussir à quelque bon effect.

Qu'il auroit pleu à sa majesté escrire audict seigneur roy de Navarre qu'es choses qui se presenteroient, il seroit aidé et secoureu des forces qu'il avoit commandé audict seigneur mareschal de mettre ensemble, encores qu'à la verité sa majesté lui permettant, il penseroit plustost que son aide ne viendroit poinct mal à propos audict seigneur mareschal, pour son service. Au contraire, qu'il ne voit encores ensemble forces capables de resister aulx desseings de la ligue, faulte de se servir de ceulx qui ont la volonté et l'affection, et par se voulloir aider de ceulx seulement desquels ledict seigneur mareschal mesmes ne sçait comment s'asseurer, ainsi qu'il lui a dict. Estant toutesfois bien evident que, se servant indifferemment des bons subjects de sa majesté d'une et d'aultre relligion, ceulx de la ligue seroient pieça ou exterminés de Guyenne, ou resserrés en leurs places, de telle sorte qu'elles leur seroient converties en prisons.

Que plusieurs compagnies d'infanterie se sont levees en son gouvernement soubs les commissions de sa majesté et de M. le mareschal de Matignon mesmes : quelques unes aussi soubs les copies et vidimus d'icelles; et n'a toutesfois esté, ledict seigneur roy, adverti d'aulcune, ni par sa majesté, ni mesmes par ledict sieur mareschal, estant toutesfois chose usitee d'advertir les gouverneurs des provinces quand telles choses se font, et mesmes estant seigneur des terres où les-dictes levees se font, et ne pouvant s'imaginer, ledict seigneur roy de Navarre, qu'aultre ait esté la volonté de sa majesté, et dont le contraire ne peult amener que desordre à son service.

Que de là aussi seroit adveneu que plusieurs compaignies auroient esté levees par ceulx de la ligue, soubs ombre de son service, lesquelles on n'auroit empesché de passer pour ne les pouvoir discerner d'avec les aultres. Encores que, pour eviter cest inconvient, il eust requis plusieurs fois, et dernierement encores, à Tonneins, ledict sieur mareschal de lui envoyer une liste des compagnies qui se dressoient par commission de sa majesté en son gouvernement; ce qu'il lui auroit promis, et n'auroit encores satisfaict.

Le mesme aussi se seroit faict pour le regard des compagnies de gendarmes, en quoy la fidelité dudict seigneur roy de Navarre; et le merite d'icelle, reçoivent ung notable dommage.

Qu'aussi de toutes ces levees ne seroit encores sorti aultre effect qu'ung ravage et pillage des subjects de sa majesté, sans que ses ennemis s'en soient ressentis en aulcune sorte; et particulierement a à se plaindre, ledict seigneur roy de Navarre, que, pour le traicter avec toute espece de mespris, depuis deux mois toutes lesdictes compagnies mangent et rançonnent toutes ses terres, passant de l'une en l'aultre, et les espluchant paroisse par paroisse, ne faisant qu'une lieue au plus par jour, pillans et rançonnans, en sorte qu'il se trouvera plus de vingt mille escus levés au pays des Landes, dont les quatorze ont esté pris sur les terres dudict seigneur roy de Navarre; tellement, que tous ses subjects sont ruynés, et tous ses fermiers crians apres ung rabais ou une quittance; chose insupportable au plus simple gentilhomme de ce royaume, et qu'il ne peult plus longuement porter, et que toutesfois il eut supportee patiemment, s'il en eust veu reussir quelque advancement au service de sa majesté.

Au contraire, que les terres et personnes des ligueurs et ennemis de sa majesté sont soulagees, comme si elles estoient sacrees, ne se pouvant encores dire en Guyenne qu'on ait touché à chose qui leur touche, soit à la personne, soit aulx biens.

Que, jusques ici, ledict seigneur roy de Navarre a patienté tant qu'il a peu, encores que les ligueurs s'adressassent directement à luy, esperant que sa majesté auroit soing de sa conservation et des siens. Maintenant qu'il ne peult dissimuler que sa patience ne soit diversement combatteue et presque vaincue, s'il fault qu'il ait aultant à endurer des ministres et serviteurs de sa majesté qu'il estimoit ses amis, que de ses ennemis propres. Sur quoi, il supplie tres humblement sa majesté ne trouver mauvais qu'il lui die qu'il lui est trop plus aisé de porter la haine de ses ennemis, que le mespris de ceulx qu'il auroit estimé lui estre amis, pour le moins en lui faisant service.

Feront entendre, lesdicts sieurs de Clervant et de Chassincourt, les susdictes choses à sa majesté, desquelles la somme est qu'en lui preschant la patience de paroles, on la lui arrache en tant qu'on peult en toutes sortes. Le tout de bouche et non par escrit, et sans bailler copie de la presente instruction, de laquelle on pourroit faire profit envers les ligueurs, en leur faisant cognoistre le mauvais traictement qu'on

lui faict pour les ployer plustost à une paix; concluans à faire sentir que ledict seigneur roy de Navarre, ne sentant la protection de sa majesté contre ses ennemis, n'est deliberé de perir au gré de personne; et avec termes toutesfois tels qu'ils sçauront bien choisir, qui retiennent toujours le respect qu'il desire rendre à sa majesté.

Que si on leur allegue les levees que faict ledict seigneur roy de Navarre en quelques lieux, ils remonstreront les justes occasions qu'il en a, veu ce que dessus, nommeement en ce qui concerne celle du sieur de la Maurie, que le roy de Navarre a mis aulx champs pour n'estre du tout desnué de forces, pendant que ses ennemis ravagent tout impunement, et duquel toutesfois il ne s'est ensuivi attentat aulcung, au prejudice du service de sa majesté, l'ayant expres choisi catholique, pour lever les souspçons et desiances qu'aultrement on eust peu ou voulleu concevoir d'ung qui eust faict aultre profession.

Comme aussi, si on leur parle de certaine levee faicte par le sieur de Rens en Quercy, diront à sa majesté que les ligueurs de Quercy, voullans empescher la recolte à ceulx de Figeac, et à ceste fin pris et occupé la pluspart des chasteaux voisins de ladicte ville, ledict seigneur roy de Navarre n'auroit peu moins faire pour empecher leur intention, que de lever quattre ou cinq cens arquebusiers, pour asseurer et affranchir ladicte recolte, laquelle faicte, il est resoleu de les rompre incontinent; mesmes estant, ladicte place, baillee en garde audict seigneur roy de Navarre par sa majesté, de laquelle il a à rendre compte, et la garnison d'icelle, reduicte à extremité, à faulte d'avoir esté payee depuis quinze mois.

A MM. DE CLERVANT ET DE CHASSINCOURT. 87

Laquelle esperoit toucher maintenant ung mois, selon qu'il avoit esté conveneu entre ledict seigneur roy de Navarre et ledict sieur mareschal à Tonneins, dont il n'a eu depuis aulcunes nouvelles. Et supplie tres humblement sa majesté de ne trouver mauvais s'il proteste des desordres et inconveniens qui pourront advenir par le desespoir, auquel ceulx de ladicte garnison, et semblables de villes de seureté de Guyenne sont reduictes.

Remonstreront aussi la foulle et oppression que portent ceulx de la relligion es villes esquelles ledict sèigneur mareschal a mis garnison, specialement à Florence, où presque tous les soldats sont logés chés eulx et vivent à discretion, en sorte que le capitaine Caillouet est y a plus de six sepmaines chés ung archer de la compagnie dudict seigneur roy, sans aulcung respect, tellement qu'il en est ruyné; et les soldats de ladicte ville qui sont de la Ligue, qui ont pris parti à Agen, vont et viennent chacung jour librement, n'ayans aucung logé chés eulx.

XXVIII. - LETTRE DU ROY DE NAVARRE

Au roy Henry III, dressee par M. Duplessis.

Juin 1585.

Monseigneur, vostre majesté aura veu comme ceulx qui se sont n'agueres eslevés en ce royaume m'ont pris à partie en leurs protestations, et par toutés sortes de calomnies ont tasché en icelles de me rendre suspect à vostre majesté; odieux à tous les ordres et estats de ce royaume, et en mauvaise odeur envers tous les princes, estats et nations de la chrestienté. C'est pourquoi, monseigneur, j'ai pensé de vous envoyer la declaration si joincte, escrite et signee de ma main, qui vous sera presentee par les sieurs de Clervant et de Chassincourt; laquelle je supplye tres humblement vostre majesté voulloir lire de poinct en poinct, et en icelle se representer devant les yeulx mes actions et deportemens passés, esquels je m'asseure que l'œil equitable de vostre majesté ne remarquera que fidelité et integrité. Nul, monseigneur, n'a veu plus profondement, ni plus clairement, soit aulx causes, soit aulx effects, que vostre majesté mesmes. Et pourtant encores que je desire surtout satisfaire à vostre jugement, si me confie je d'aultre part que ce m'est chose fort aisee à l'endroict de vostre majesté. Mais parce, monseigneur, que le venin de ces calomnies se va respandant par toutes les veines de ce royaume, et mesmes de la chrestienté, en tant qu'ils peuvent, en quoi mon honneur et reputation souffre ung interest notable, j'ai à supplier tres humblement vostre majesté de me faire tant de faveur que de trouver bon que j'envoye la susdicte declaration à toutes vos courts de parlemens, et aultres corps notables de ce royaume, vers lesquels principalement ils ont tasché de me denigrer et diffamer. Aussi que vostre majesté me fasse cest honneur de commander à ses ambassadeurs de la presenter à tous les princes chrestiens, ses amis et alliés, avec les lettres que, soubs le congé de vostre majesté, je me delibere leur escrire, m'asseurant que vostre majesté ne pourroit trouver que tres estrange, lui estant ce que je suis, et avec le courage que j'ai, que je passasse soubs silence les enormes blasmes dont ils chargent mon honneur, que j'oserai dire ne pouvoir estre taché sans quelque interest de vostre majesté. J'en supplie donc tres humblement, et de toute mon affection, vostre majesté. Et remettant le surplus sur les sieurs de Cler-vant et de Chassincourt, que je supplie vostre majesté croire de ma part sur tout ce faict, comme elle me feroit cest honneur de me croire moi mesmes, je finirai, etc.

XXIX. - DECLARATION

Du roy de Navarre contre les calomnies publiees contre lui es protestations de ceulx de la Ligue, faicte par M. Duplessis.

Le roy de Navarre, ayant veu les protestations et declarations de ceulx qui troublent aujourd'hui l'estat de ce royaume, soubs le nom de Ligue saincte, esquelles ils veullent couvrir leurs mauvaises intentions, partie d'ung zele de relligion, et partie d'une affection de bien public; mais particulierement le prennent directement à partie, comme heretique, relaps, persecuteur de l'Eglise, perturbateur de l'estat, ennemi juré de tous les catholiques, etc.; a estimé estre de son debvoir d'eclaircir tous roys, princes, estats, et nations de la chrestienté contre ces calomnies, mais specialement le roy, son souverain seigneur, et le peuple de ce royaume, de tous estats et qualités, puisqu'ainsi est qu'à l'ombre de lui, ils ne font poinct de conscience d'attenter à la couronne de son prince, et confondre miserablement tout son estat.

Declare donc premierement en ce qui concerne sa relligion, ledict seigneur roy de Navarre, devant Dieu, qui voit le fond de son cœur, devant le roy son souverain seigneur, auquel il desire principalement approu-

ver ses actions, devant tous les susdicts princes et nations, qu'il en fera volontiers tesmoings et juges, qu'il n'espere son salut qu'en la foi et relligion chrestienne, qu'il embrasse de toute son affection, et pour regle infaillible de laquelle il reçoit la parole conteneue au Vieil et Nouveau Testament, qu'il a pleu à Dieu laisser en ces tenebres pour lumiere et direction de son Eglise; qu'il croit une Eglise catholique, apostolique, pour la conservation et augmentation de laquelle, en toutes sortes de graces, il prye Dieu journellement, et s'estimeroit heureux d'espandre son sang en la defendant contre les infideles; qu'il croit et reçoit les symboles ou abregés de la foi chrestienne, qui ont esté dressés par icelle Eglise catholique, apostolique, pour servir de marques, par lesquelles les chrestiens et orthodoxes feussent discernés de tous mal sentans de la foi ét heretiques; comme aussi il embrasse les plus anciens, celebres et legitimes conciles qui ont esté teneus contre eulx; anathematize de bon cœur toutes les doctrines par eulx condamnees; et est prest, et sera tousjours, pour la reverence qu'il rend à l'Eglise, de subir son jugement, et acquiescer à son arrest, quand elle sera bien assemblee en ung legitime et sainct concile.

Quant aulx differends dont est aujourd'hui question en l'Eglise, desire ledict seigneur roy de Navarre, qu'il soit consideré qu'il n'est ni le seul, ni le premier qui se soit plainct des abus introduicts en icelle, et qui en a requis la reformation; et pourtant qu'il seroit trop dur que ce desir vraiement chrestien de voir l'Eglise repurgee lui feust imputé ou à heresie ou à inimitié contre l'Eglise; que c'est une plaincte commune depuis cinq cens ans, et plus, de tous les princes, de tous les doctes, de tous les saincts personnages; que l'Eglise

par ce long espace de temps auroit beaucoup perdeu de ceste premiere pureté et sincerité, estant icelle composee d'hommes qui, sans doubte, y apportent tousjours de l'homme quant à eulx; que c'est la voix de tous les conciles, sans nul excepter, qui ont esté teneus depuis les susdicts temps, que l'Eglise avoit besoing de reformation, depuis la teste jusqu'aulx pieds, tant au chef qu'aulx membres; qu'apres ceste reformation avoient aspiré et souspiré les plus gens de bien en chaque siecle, de la bouche desquels ne seroit jamais sortie ceste sentence, que qui dict que l'Eglise a besoing de repurgation deust estre teneu pour heretique, ou ennemi d'icelle; que les roys tres chrestiens recognoissans tres bien cela, auroient souvent pour cest effect estimé estre de leur charge, et de l'acquit de leurs consciences, d'exhorter le pape et les princes chrestiens à ung concile general; lequel, au default, et en cas de connivence d'icelui, ils auroient bien sceu convoquer de leur auctorité, dont seroient sortis, soubs leurs noms mesmes, plusieurs tres louables ordonnances pour la reformation de l'Eglise gallicane; qu'enfin, apres une longue querimonie de plusieurs siecles, n'y mettans la main ceulx aulxquels il sembloit appartenir, ains s'occupans plustost, comme chacung sçait, aulx negotiations du monde, seroit adveneu que plusieurs princes, peuples et estats, pesans avec ung grand soing les raisons qui leur estoient alleguees, et les voyans soubsteneues par la constance d'infinies personnes de toutes qualités es plus grands tourmens jusqu'à la mort, auroient requis la susdicte reformation en ung concile legitime, et au refus d'icelle, auroient protesté des abus qu'ils pretendoient en l'Eglise, et y auroient eulx mesmes mis la main, dont seroit sorti le schisme que ledict seigneur

Dict pour son regard ledict seigneur roy de Navarre, qu'il seroit non seulement né pendant ce schisme adveneu en l'Eglise chrestienne, duquel il estime la continuation debvoir estre imputee à ceulx qui n'ont poinct cherché les moyens de reunir l'Eglise, comme ils debvoient; mais mesmes auroit esté elevé en France, pendant l'exercice des deux relligions, permis par le roy es estats generaulx de son royaume, et depuis confirmé par plusieurs edicts de sa majesté; qu'il auroit esté nourri et instruict, des ses premiers ans, en ceste creance, qu'il y avoit des abus en la doctrine de l'Eglise romaine, qui avoient besoing de reformation; et s'est depuis en icelle fortisié, tant par la conversation de plusieurs personnes doctes, que par la lecture des sainctes Escritures; qu'il croit en son cœur, et confesse franchement de bouche, et est tres persuadé que la verité est de sa part; qui auroit esté cause qu'il auroit encoureu beaucoup de perils et de ruynes, plustost que s'en departir; mesmes à ceste occasion, et à son grand regret, n'auroit eu moyen de faire tant de service, ni aussi tant participer à la bonne grace de son prince souverain, que, sans doubte, il eust peu faire si, en bonne conscience il eust peu s'accommoder à mesme profession que lui. Ce nonobstant, pour faire cognoistre à tous que ce qu'il en a faict n'a esté par obstination, ains par constance, et non par ambition, mais par le seul desir de son salut, qu'il supplie tres humblement sa majesté de faire tenir ung concile libre et legitime, selon qu'il

auroit tousjours esté promis par ses edicts, estant ledict seigneur roy de Navarre tout prest et resoleu de recevoir instruction par icelui, et regler sa creance par ce qui y sera decidé sur les differends de la relligon.

Que si on dict que le concile de Trente a jà ordonné desdicts differends sans que plus il soit besoing d'y revenir, appelle ledict seigneur roy de Navarre la conscience, mesmes des plus zelés catholiques à tesmoing, si le susdict concile a esté de libre acces ou non; veult que les ambassadeurs du roy son souverain seigneur, qui y assistoient, en soient creus, les prelats mesmes, qui s'y trouverent, de l'Eglise gallicane; joint que la guerre civile brusloit par tous les coings de la France, ayans les predecesseurs de ceulx qui troublent à present l'estat, violemment rompeu la paix publicque, et l'ordonnance de sa majesté es estats generaulx de son royaume sur l'exercice des deux relligions, sans attendre ni la decision, ni la convocation du concile. Mais, qui plus est, adjouste ledict seigneur roy de Navarre, qu'encores que la continuation d'icelui concile eust esté. longuement poursuivie par le feu roy Charles, et enfin obteneue du pape Paul III, et, apres la publication d'icelle, envoyés ambassadeurs par sa majesté à Trente, avec instructions chrestiennes, catholiques, conformes aulx saincts decrets de l'Eglise romaine, et approuvees par la Sorbonne et par les docteurs d'icelle, envoyés aussi audict concile avec lesdicts ambassadeurs; toutesfois, quelque diligence qu'ils peussent faire envers les cardinaulx, legats, presidens audict concile, l'espace de dix huict mois et plus, ne feut possible de rien obtenir, conforme aulxdictes instructions, pour la reformation de l'ordre ecclesiastique suivant icelles; dont advertie sa majesté, et cognoissant tres bien le mal

qui en pourroit advenir, commanda à sesdicts ambassadeurs de protester contre ledict concile, et, la protestation faicte, s'en revenir. Ce qu'ils feirent incontinent, et quelque poursuite et requisition qui leur feut depuis faicte par le pape et le feu cardinal de Lorraine, pour retourner audict concile, et y demeurer jusques à la fin d'icelui, ils ne le voulleurent jamais faire; tellement que ledict concile feut continué, fini et concleu sans eulx, et sans estre par eulx signé, suivant la coustume de tout temps observee. Dont est aussi adveneu que, quelque instance qui ait esté faicte pour recevoir et publier ledict concile en la court de parlement à Paris, ladicte court, chambres assemblees, l'a tousjours empesché, mesmes l'an 72, apres la Sainct Bartheleny, lors que le temps sembloit grandement favoriser ladicte poursuite.

Ne pense donc ledict seigneur roy de Navarre qu'il puisse estre teneu par gens de jugement pour heretique et pertinax, puisque la matiere est indecise, et qu'il s'en soubsmet à ung concile; aussi peu que pour plaideur, ou pour injuste, qui attend l'arrest d'ung parlement, quoi que puisse caviller l'advocat d'une partie: ni pareillement pour schismatique, ou contumax, puisqu'il rend ceste obeissance et reverence à l'assemblee de l'Eglise d'estre prest d'y comparoistre, d'y rendre raison et d'y apprendre; mesmes d'y changer en mieulx, quand le mieulx lui sera enseigné. Se plainct, au contraire, que jusques ici il a veu, longues annees, tous ces zelateurs assemblés pour le destruire, mais nul pour l'instruire: se plainct d'ung proces commencé par l'execution, d'une remonstrance commencee par anathesmes, sans aulcune des formalités requises et prealables, protestant devant tous princes et estats, et surtout devant le roy son souverain, auquel il s'addresse pour justice, et devant l'estat de ce royaume, auquel il veult presenter ses actions contre les aucteurs et faulteurs de ceste Ligue, de si manifeste violence, precipitation et injustice.

Dict ledict seigneur roy de Navarre qu'aussi peu, et moins encores lui peult convenir le nom et blasme de relaps, en vertu duquel, ores mesmes que par ung concile il acquiesçast à changer d'opinion, ils pretendent le priver de la succession de la couronne, à laquelle pleust à Dieu qu'ils pensassent aussi peu que lui. Ét par là il laisse à penser à ung chacung en quelle charité ils y procedent, et quel doibt estre leur desseing, de lui retrancher, en tant qu'ils peuvent, le desir de se faire instruire en ung concile, sans entrer au fond, qui se pourroit renverser, et par les canons, et par exemples. Relaps nomment ils en leur langage, ceulx qui, ayans esté heretiques, et abjuré leur heresie, y sont recheus apres. Ainsi donc, n'ayant par les anciens canons, comme ci dessus a esté veu, ledict seigneur roy de Navarre esté heretique, il se faict tout clair aussi qu'il ne peult estre relaps. Dict plus, que quand il auroit esté ou seroit heretique, aussi peu pourroit il estre relaps, veu qu'il n'a jamais esté converti de la pretendeue heresie; veu mesmes que nul n'a jamais pensé à prendre la peine, ou chercher les moyens de le reunir, ou convertir, ains ces zelateurs n'ont eu aultre but par tous leurs effects et leurs efforts, que de le subvertir et ruyner.

N'alleguent ici que ledict seigneur roy de Navarre, apres la Sainct Barthelemy, envoya devers le pape, et se rangea à la messe. Laissant l'aage à part, chacung sçait assés quelle espece de conversion ce feut, et s'il avoit

subject de juste crainte; et plus longue refutation seroit frivole. Tant y a que si nos actions par toutes les loix sont estimees nulles, quant elles ont procedé ou de crainte, ou de force, il est tout certain que jamais action n'eut moins de volonté, jamais action n'eut plus de force. Tant y a aussi qu'il n'eut pas si tost recouvré sa volonté, qu'il feit apparoir quelle elle estoit par profession publicque; mesmes au milieu des catholiques, qui l'accompagnoient, et sembloient posseder alors, sans dissimuler, sans tergiverser, dont peult apparoir son cœur du tout esloigné d'hypocrisie.

Supplie tres humblement ledict seigneur roy de Navarre, le roy son seigneur, qu'il lui plaise trouver bon qu'en toute modestie il responde aussi au blasme qu'on lui impose de persecuteur de l'Eglise catholique. Et sur ce poinct, il somme les consciences de ses plus grands ennemis de respondre devant Dieu, si ce tiltre lui pourroit en rien appartenir. Chacung considere ici que les guerres civiles sont tombees sur les plus tendres ans dudict seigneur roy de Navarre, et s'il y a apparence aulcune qu'il eust entrepris une guerre de gaieté de cœur, pour persecuter les catholiques, desquels chacung sçait et le nombre, et l'auctorité, et la force en ce royaume totalement hors, et à couvert de persecutions; lesquels mesmes, couverts du seul nom du roy, estoient à l'abri pour son regard, et de tout ce qui depend de lui, de tous attentats, entreprises et injures. Et de faict on a bien oui parler en France de rigueurs et persecutions es ans passés; mais nul ne l'a jamais interpreté que passivement au regard de ceulx de la relligion, et activement au regard des aultres. Et user aultrement du mot seroit si improprement parlé, qu'il ne seroit entendeu d'aulcung. Il pleut au roy Charles

le faire venir en court, et l'honorer du mariage de sa sœur. Il y veint en la relligion en laquelle il estoit né et nourri; et ce qui suivit, vault mieulx oublié que ramenteu. Comme il sort de là, il se retire en ses terres. La paix se faict avec feu monseigneur. Il ne feit instance d'ung seul mot pour soi, et ne s'y lit poinct ung article qui le touche, quoi qu'il eust plus d'occasion sans doubte, que nul aultre, ou d'estre animé des traitemens passés, ou d'estre recompensé des pertes souffertes, ne voullant ledict seigneur roy de Navarre retarder le repos de ce royaume, et le soulagement du peuple, d'ung seul jour à son occasion. Si sçait on que, s'il eust voulleu, il estoit en sa main de se servir de l'armeé des reystres, qui s'esbranloit à toute heure, à faulte d'estre payee du roy, selon les articles de la paix, pour retourner teste vers Paris.

Au contraire, ce feut des lors que les chefs de ceste Ligue, abusans de sa bonté, tramerent ceste Ligue pretendeue saincte, contre l'edict du roy fraischement publié, par laquelle ils juroient en termes expres l'extermination totale de ceulx de la relligion sans exception, ni acception de personne, sans respect, ni esgard d'alliance, affinité, proximité, consanguinité, fraternité; dont la pluspart des catholiques eurent horreur, et plusieurs, qui y estoient entrés sans sçavoir le fond, s'en retirerent aussitost qu'ils le cogneurent. Et, pour son particulier, feurent alors decouverts les memoires, qui s'effectuent aujourd'hui, concluans sa mort, et de monseigneur le prince son cousin, et de tout leur sang, pour se faire voie plus aisement, comme il est porté expressement, à l'invasion de ce royaume. Jugent ici tous hommes de jugement, qui estoit alors l'agent ou le patient, le persecuteur ou le persecuté.

De là donc veint à renaistre la guerre civile de l'an 1577, eulx ayans induict l'assemblee de Blois à l'execution de leur desseing; auquel c'eust esté contre nature, si ledict seigneur roy de Navarre, ou ceulx qui faisoient mesme profession n'eussent faict debvoir de resister. Il alloit de sa personne et de sa vie; il alloit de la conscience et de l'honneur; il alloit, comme on voit aujourd'hui, du royaume et de l'estat. Le mal que le roy n'a recogneu qu'en sa fleur, ne se le pouvant imaginer de la part de ceulx qui tenoient leur bien de lui, le roy de Navarre l'avoit recogneu mesmes en graine. C'eust esté se trahir soi mesmes, estre deserteur de cest estat, de se rendre à leurs desirs, au lieu de s'y opposer.

Cependant, quoique les cruelles clauses de la conjuration susdicte fussent assés suffisantes pour tourner à coup en fureur sa patience, en vengeance la doulceur et debonnaireté, qui est naturelle à ceulx de sa maison, quoique mesmes il veist accourir à lui, de toutes parts, ceulx de la relligion poursuivis à la rigueur, et remis au choix, ou de sortir du royaume, ou de renoncer à leur relligion, si ne voulleut toutesfois ledict seigneur roy de Navarre, es villes où il eut de la puissance, user de mesme façon envers les catholiques, ni mesmes envers les moines et le clergé, qui pouvoient raisonnablement estre suspects de favoriser ces executions. Au contraire, sçavent ceulx d'Agen (et il allegue cest exemple, parce que c'estoit sa residence, et que ceste ville episcopale a quelque nom) que les catholiques ne souffrirent jamais, ni mauvais traictement en leurs personnes et biens, ni innovation au faict de la relligion; que le clergé vacquoit au service accoustumé; que les moines preschoient librement en la plus forte ardeur

desdicts troubles; qu'il se contenta que ceulx de la relligion, pour ne les troubler en rien, eussent leurs presches en maisons d'emprunt; que, pour subvenir aulx necessités de sa defense, il prenoit sans plus les decimes que le roy souloit lever sur le clergé, tous ses patrimoines lui estans saisis de toutes parts. Et de ce, eust peu tesmoigner feu monseigneur le duc de Montpensier, prince tres affectionné à la relligion romaine, comme chacung sçait; comme aussi en tesmoigneront M. le mareschal de Byron, M. l'archevesque de Vienne, M. de Villeroy, secretaire d'estat de sa majesté, et plusieurs aultres, qui l'ont veu sur les lieux.

Et ne feut sitost accordee la liberté de conscience, bien qu'avec tres grandes restrictions au regard de l'edict precedent, qu'il ne feust tout prest de poser les armes sans delai, qu'il pouvoit continuer, comme sçait tres bien sa majesté, avec plus de forces et de moyens par le notable secours qu'il avoit negotié et obteneu des princes de mesme relligion, si avant qu'une forte armee estrangere estoit sur le poinct d'entrer en' ce royaume. Mais il s'estima heureux d'en pouvoir sortir, sans qu'à ceste occasion le povre peuple eust à souffrir dadvantage, aimant mieulx empirer sa condition en le soulageant du mal prochain, que de l'amender à son dommage. Prye donc ledict seigneur roy de Navarre, ung chacung de prononcer librement, si par ses deportemens il a en rien merité le nom qu'ils lui donnent de persecuteur de l'Eglise catholique; s'ils ne veullent appeller persecuteur celui qui ne s'est pas peu resouldre à leur laisser executer leurs barbares persecutions et sanglans desseings contre lui de prime face, mais en consequence contre le roy mesmes et son estat.

Es pays esquels, par la grace de Dieu, ledict seigneur roy de Navarre a puissance souveraine, il pense aussi peu avoir acquis ce blasme, vers qui aura bien cogneu et la nature des choses et la suite de tous ses deportemens. Et de faict, en ce qui lui reste du royaume de Navarre, ayant trouvé l'exercice de la relligion catholique romaine à son advenement, il n'y a rien innové ni alteré, tellement que le service d'icelle y est partout, au lieu qu'en deux lieux seulement y a exercice de la relligion reformee. Et, quant au pays' de Bearn, qui n'est pas si grand, la royne sa mere, en une assemblee generale des estats, y ayant establi ladicte relligion, de laquelle elle faisoit profession, sans que, sur le changement, feust ensuivie plaincte aulx dicts estats plusieurs ans depuis, il declare librement qu'il y a continué ce mesme estat, ayant tousjours estimé qu'ung prince bien conseillé ne doibt sans necessité, ou evidente utilité, introduire ung changement en son estat. Et là où l'utilité, et la necessité mesmes y est, que le changement doibt estre faict par la mesme voie par laquelle l'ordonnance a esté faicte. Or, avoit il veu qu'apres la Sainct Barthelemy, comme il eust ployé soubs la force au faict de la relligion, et envoyé aulx susdicts pays de Bearn, pour gouverneur et lieutenant general, le seigneur de Miossens, que chacung cognoist pour catholique, avec charge expresse d'y remettre la relligion catholique romaine, nonobstant le desespoir des affaires de la relligion en France, nonobstant la profession contraire de lui mesmes, qui pouvoit servir d'exemple, nonobstant l'auctorité d'ung gouverneur par lui expres envoyé, ils s'estoient tous resoleus à perseverer en leur relligion, et à maintenir la forme de leur estat, sans y recevoir ce chatiment. Pensa donc

CONTRE LES CALOMNIES DE LA LIGUE. ledict seigneur (et juge chacung si à bon droict) que c'estoit à ses estats une resolution fixe et formee, puisque la necessité, et mesmes telle necessité, qui donne la loi à toutes loix, ne les en avoit peu demouvoir aulcunement. Comme aussi de faict en toutes les assemblees d'estats, qui se tiennent d'an en an en sondict pays de Bearn, n'est jamais compareu personne qui ait requis ce changement, encores que la liberté y soit telle qu'on cognoist, de proposer jusqu'aulx moindres griefs qu'on pretend recevoir du prince, et en requerir la reparation. Dont appert que ce n'est qu'une practique de dehors, de ceulx qui envient le repos de ses subjects, et non ung desir interieur d'iceulx. Et n'a laissé pourtant ledict seigneur roy de Navarre, de faire tousjours payer les pensions des prelats et aultres ecclesiastiques de sondict pays, dont il ne prend aultres à tesmoings qu'eulx mesmes, et le plus souvent de ses propres deniers, comme sçavent les evesques d'Ax et d'Olleron, et aultres. Qui plus est, de son propre mouvement, pour contenter ceulx de ses subjects qui pouvoient continuer en la relligion catholique romaine, modera les ordonnances de la feue royne sa mere, pour le faict de la relligion, qui n'estoient qu'amendes pecuniaires fort legeres, tant s'en fault que jamais on y ait procedé contre les catholiques par bannissemens, punitions corporelles, morts, bruslemens, tourmens recherchés, tels qu'ont conseillé, practiqué et introduict ceulx qui aujourd'hui se disent protecteurs de la relligion catholique romaine, contre ceulx de la relligion contraire. Et de ce, soient tesmoings les catholiques de Bearn, qui vivent en toute paix et tranquillité, et desquels plusieurs exercent offices notables, ou audict pays, ou pres de la personne dudict seigneur roy de Navarre,

et qui mesmes ont les premieres charges à ses gardes, et les capitaineries de ses meilleures maisons. Ce que, certes, il n'est apparent qu'il voulleust faire, s'il les avoit mal traictés, ou s'il leur gardoit ung mauvais cœur à l'advenir.

Or, par ce que dessus seroit assés repondeu à ce qu'ils dient qu'il est ennemi juré des catholiques. Mais ledict seigneur roy de Navarre, qui vouldroit ouvrir son cœur à tout le monde, ne s'ennuiera poinct de leur decouvrir ses affections et actions. Declare donc ledict seigneur roy de Navarre, qu'il cognoist et croit, et a tousjours creu et recogneu, que, pourveu que le fond de bonne conscience y soit, la diversité de relligion n'empesche poinct qu'ung bon prince ne puisse tirer tres bon service indifferemment de ses subjects, et que les subjects ne rendent reciproquement le debvoir qu'ils doibvent, soit à leurs superieurs, soit à leurs princes, estant evident que les deux relligions recommandent egalement, selon la parole de Dieu, le debvoir du subject envers son prince, et de l'inferieur vers son superieur, et pourtant s'est tousjours attendeu, ledict seigneur roy de Navarre, de n'estre moins fidelement servi des ungs que des aultres. Comme aussi de faict, en la distribution des charges de sa maison, chacung sçait assés qu'il les y en a tousjours indifferemment pourveus. Sçait aussi ledict seigneur roy de Navarre, qu'il est bien aimé et bien servi des gentilshommes catholiques, et aultres personnes de toutes qualités, qu'il a retirés à son service, comme de leur part ils recognoissent tous volontiers qu'il les a aimés sans acception de leur relligion, et, selon la proportion de ses moyens, leur a departi des biens et honneurs aussi largement, et plus mesmes au temps de la guerre, qu'à ceulx qui faisoient mesme

CONTRE'LES CALOMNIES DE LA LIGUE. profession que lui. Et scavent aussi les seigneurs et gentilshommes, et tous aultres catholiques, que, durant les troubles, il les a espargnés tant qu'il a peu en leurs biens et maisons, sans jamais avoir souffert que contre eulx ait esté exercé aulcune rigueur de guerre, mesmes contre ses vassaulx armés contre lui, et qui se trouvoient à la ruyne et demolition de ses propres maisons; lesquels, la guerre finie; le venans trouver lui ont esté tous les bienveneus, sans jamais leur en avoir, ou teneu propos fascheux, ou faict ung mauvais visage; tant s'en fault que, selon les divers moyens que le seigneur a sur son vassal, il ait practiqué contre eulx ou directement ou indirectement, une seule espece d'animosité ou de vengeance. Comme aussi s'ose promettre de ses actions ledict seigneur roy de Navarre, que les catholiques qui ont voulleu s'approcher de lui, en seront partis contens, et n'auront rien remarqué, dont ils puissent presumer, qu'une naturelle affection d'embrasser tous les serviteurs et subjects du roy, de quelque relligion qu'ils soient, de mesme sorte, se promettant de leur part ceste mesme bienveillance qu'ils ont tousjours demonstree envers les siens.

Les susdicts effects, qu'il a de tout temps et jusqu'à present continués, pense ledict seigneur roy de Navarre avoir prou de poids, pour emporter les paroles que ses ennemis publient contre lui; or ont ils dit neantmoins que ledict seigneur roy de Navarre avoit envoyé, en Angleterre et Allemaigne, brasser une ligue à la ruyne et confusion de tous les catholiques, prevoyant la mort du roy, advenant laquelle il se preparoit à la mutation de la relligion, etc., vouloit envahir les biens du clergé, vouloit confisquer ceulx de la noblesse qui n'adhereroient à son intention, etc.; et sur

ce subject ont semé partout, mesmes faict lire es sermons en pleine chaire certain concordat de l'an 1584, en date du 14 de decembre, resulté d'une assemblee qu'ils disent tenue à l'instance dudict seigneur roy de Navarre à Magdebourg; que pareillement en l'assemblee teneue à Montauban, il auroit concleu et juré d'abolir, advenant la mort du roy, la relligion catholique romaine, la despouillant de ses biens, et privant ceulx qui en feroient profession, de tous estats et dignités, et ici se verra evidemment comme toute calomnie de sa nature se decouvre et refute d'elle mesmes.

Proteste donc premierement ledict seigneur roy de Navarre, devant Dieu et en sa conscience, qu'il desire et souhaite de tout son cœur longue et heureuse vie au roy son souverain seigneur, ne lui estant jamais entré en l'opinion de bastir desseings, ni sur sa mort, ni apres sa mort, lesquels il estimeroit non seulement crimes de leze majesté, ne pouvant iceulx proceder que d'ung desir miserable de la mort de son prince, qui seroit suivi de prompt effect si la puissance y estoit; mais mesmes seroient crimes en quelque façon contre nature et contre le sens commun, estant sa majesté, graces à Dieu, en la force de son aage et plein de santé, et leur aage, au demeurant si peu different, qu'il seroit ridicule, pour la difference de deux ans ou environ, de prendre tel advantage l'ung sur l'aultre; tant s'en fault que, comme ont faict les chefs de la Ligue, il lui soit jamais monté au cœur de condamner le roy à mort prochaine, en prevoyant les consequences de sa mort, trente ou quarante ans pour le moins (comme il espere), premier qu'il en soit besoing, et soubs le pretexte de pourvoir aux affaires du royaume, et cepen-

CONTRE LES CALOMNIES DE LA LIGUE. 105 dant le mettre des à present en une confusion tres deplorable. Tant s'en fault aussi que par publicque declaration il ait prononcé et prejugé steriles et le roy et la royne sa femme, en la fleur et force de leurs ans, comme ils ont faict, chose qui ne feut jamais pratiquee en estat de chrestienté, chose que les estats d'Angleterre n'ont pas voulleu requerir de la royne d'Angleterre, non encore mariee, se reposant tant sur sa prudence, que celle qui les a regis en paix durant sa vie, la vouldra laisser en heritage à leur posterité. Bref, qu'il ait requis le roy son seigneur de le declarer, ce que naturellement et legitimement il est, ou d'en donner quelque marque, soit par ung tiltre nouveau, soit par quelque accroissement ou advantage, comme les susdicts ont entrepris, qui lui ont armé monseigneur le cardinal de Bourbon, prince aagé de soixante et six ans, prince hors d'espoir et de mariage et de posterité pour estre son heritier, comme si le roy n'avoit plus qu'ung an ou deux à vivre, pour lui susciter semence; comme si d'ung vieil estoc de celibat nous devoit plus tost sortir lignee, que d'ung mariage vigoureux et florissant de sa majesté; comme ainsi feut toutesfois que ledict seigneur roy de Navarre ne peut ignorer les desseings que les susdicts projettoient des long temps contre lui, les pratiques qu'ils faisoient dedans les villes, les menees qu'ils tramoient en Italie et en Espaigne, de l'exclure, advenant la mort du roy, du droict de succession en ce royaume, lequel il espere que Dieu lui fera la grace, donnant longue vie au roy, de n'avoir subject de contester, s'asseurant aussi que ce que le droict et la nature lui vouldroient donner ailleurs, par toutes leurs ligues et leurs brigues, ils ne pourroient l'empescher de l'obtenir.

Recognoist franchement ledict seigneur roy de Navarre que, long temps y a, il se seroit tres bien apperceu des desseings des dessusdicts contre le roy et son estat, et supplie tres humblement sa majesté de se ressouvenir des advertissemens qu'il lui en auroit donnés des l'an 1576, lui ayant envoyé certains memoires par ung gentilhomme expres, qui aujourd'hui s'effectuent de poinct en poinct, et des lors commençoient à se fonder soubs le nom de confrairie et Ligue saincte; que tost apres la paix de l'an 1577, il en avoit aussi veu hausser le bastiment par les remuemens qu'ils firent entre les estats, suscités en diverses provinces contre le service de sa majesté, si avant qu'ils y avoient voulleu attirer ceulx mesmes de la relligion, en avoient traicté avec le tres illustre prince Casimir, comte Palatin du Rhin, etc., lequel, ayant veu au fond de leurs desseings (comme il le recognoistra tousjours), qu'ils pretendoient à l'estat, pour l'honneur et amitié que les siens et lui auroient de tout temps porté à la maison de France, n'y auroit voulleu entendre plus avant; que depuis, comme leurs affaires s'acheminoient pas à pas, auroit aussi decouvert les traictés qu'ils avoient en Italie et en Espaigne, les deniers qu'ils en tiroient, les propositions qu'ils y faisoient, les responses qui leur estoient faictes sur icelles, lesquelles sa majesté ne pouvant, en son esprit, concevoir d'aultrui si grande ingratitude et persidie, auroit faiet difficulté de croire, et desquelles toutesfois ledict seigneur roy de Navarre, comme d'une mine à lui toute cogneue, attendoit l'esclat de jour en jour; qu'il se souvenoit de la prise et execution de Salsede, qui auroit deposé grande partie de ce qu'on voit aujourd'hui, qu'on auroit tasché d'obscurcir pour lors par artifices, mais dont estoit demeuré certain

CONTRE LES CALOMNIES DE LA LIGUE. au cœur de tous vrais François, que seu monseigneur n'en avoit pas adverti le roy sans fondement; que le roy, s'il n'eust esté criminel que des crimes ordinaires, n'eust pas pris la peine de l'envoyer querir aux Pays Bas par deux personnages des premiers de son conseil d'estat, et n'eust pas aussi voulleu estre present à ses interrogatoires et recolemens, etc., dont s'en ensuivit que, par arrest de la court de parlement de Paris, il feut tiré à quattre chevaux, comme traistre au roy et à la France; que par leurs memoires precedens et par les confrairies, qu'ils redressoient de nouveau en la pluspart des bonnes villes de ce royaume, apparoissoit assés de leur pretexte, qui seroit d'exterminer la relligion de laquelle il faict profession, et lui mesmes particulierement, si en eulx estoit, tellement que le premier coup de leur tonnerre auroit à fondre sur lui, si tant estoit qu'entre ci et là sa majesté ne recogneust la fin de leurs pratiques. Et que, pour ceste occasion, voyant que sa majesté n'y auroit donné aultre ordre, prevoyant ledict pretexte qu'ils prendroient d'extirper tous ceulx de la relligion, il auroit esté induit de penser à ses affaires; et, pour ce, auroit, sur la fin de l'an 1584, depesché vers la royne d'Angleterre, le roy de Dannemark, les princes electeurs d'Allemaigne, le landgrave de Hesse, et aultres princes et estats, le sieur de Segur Pardailhan, superintendant de sa maison; premierement, pour les exhorter à chercher les moyens de composer tous les differends en la relligion, qui restoient entre les eglises reformees, desquels on abusoit à leur ruyne commune; secondement, pour renouveller et asseurer une bonne amitié avec eulx, et sans toutesfois les requerir ni employer plus avant; tiercement, pour deposer en Allemaigne une bonne somme de deniers, la-

quelle au besoing lui peust ramener ung bon secours contre ses ennemis; tous les susdicts roys, princes et estats, alliés estroictement de la couronne de France, vers lesquels le roy a ses ambassadeurs, et avec lesquels ledict sieur de Segur avoit charge de communiquer et communiquoit de fois à aultre; qu'il prend pour tesmoings de ses faicts et dicts, de ses propositions, negotiations, conclusions, comme depuis son retour il a supplié tres humblement sa majesté de lui faire cest honneur de leur commander de s'informer diligentement de toute sa legation, s'asseurant que plus clair ils verroient, et plus ils recognoistroient de cœurs françois, de sincere affection et de vraie fidelité envers sa personne et son estat.

Requiert donc ici, ledict seigneur roy de Navarre, tous les dessusdicts serenissimes et illustrissimes roys et princes, d'attester au roy, par leur seing propre, et à ce royaume, et à la chrestienté, si donc de sa part leur ont esté baillees lettres ou memoires, ou teneus propos, ou contre la dignité du roy, ou contre le bien de son estat, ou contre le debvoir en somme de tres humble et devotieux serviteur et subject; si jamais leur a esté parlé de faire la guerre au roy, de renouveller les troubles ou de ruyner les catholiques; si oncques ouverture, ou directement, ou indirectement leur a esté faicte sur la mort ou en consequence de la mort du roy. Et aulx susdicts princes supplie tres humblement ledict seigneur roy de Navarre, sa majesté qu'il lui soit permis d'envoyer ceste sienne declaration contre les susdictes calomnies, et la faire presenter par les ambassadeurs mesmes de sa majesté chacung en droict soi, à tous les princes chrestiens, amis et confederés de ce royaume, asin que, s'il a traicté chose semblable,

le voyant protester le contraire, ils l'estiment prince feint, de peu de foi, non veritable et indigne au reste de leur amitié, que les dessusdicts veullent rendre si suspecte, et que de sa part il declare franchement desirer soigneusement entretenir, comme il pense l'avoir recherchee tres raisonnablement.

Quant au concordat, ils le datent du 14 decembre 1584, et y font present le sieur de Segur en qualité d'ambassadeur du roy de Navarre, lequel estoit parti d'Allemaigne, repassé es Pays Bas, et des Pays Bas en Angleterre, où il avoit sejourné deux mois et plus, et, nonobstant tout ce temps, estoit r'embarqué pour revenir en France avant le quatorziesme jour de decembre. Audict concordat introduisent les ambassadeurs de l'electeur Palatin et du prince d'Orange, l'ung mort plus d'ung an auparavant, n'ayant laissé qu'ung mineur, pendant la minorité duquel le duc Casimir gouverne l'electorat; l'aultre assassiné quattre mois devant par ung jesuite surborné par leurs semblables, et tous ces deux toutesfois s'obligent à se trouver encores à ce mois de mai, en la ville de Basle, pour la composition des differends de la relligion. Adjoustent que le roy de Navarre, le 18 avril lors prochain, promettoit prendre les armes, à sçavoir parce qu'en ce mesme temps ils s'estoient resoleus de les prendre, et en veullent deriver la haine sur ce prince, qui, tout environné qu'il est de leurs menees, ne bouge poinct. La dattent de Magdebourg, ville appartenante au fils de monseigneur l'electeur de Brandebourg, et du pere ni du fils, en ce concordat, ne se soubviennent poinct. Et c'est aussi une assemblee imaginaire; car ni en ce lieu ni en aultre ne se trouvera qu'il en ait esté teneu aulcunement. Les tiltres, au reste, et les qualités des

princes y sont si mal observés, les cottes aussi, et les contributions de deniers et d'hommes, si mal proportionnees; tant d'absurdités, en somme, et de chimeres, que c'est trop de honte ou trop d'impudence d'abuser la France de chose si lourde, mais chose profane et digne du banc d'ung charlatan, et non de la chaire d'ung prescheur, si ce n'est d'ung jesuite, de remplir de contes, mesmes si mal digerés, l'oreille d'ung povre peuple ententif à ses devotions; car que peuvent ils gaigner sur oreilles plus accortes?

L'assemblee de Montauban ne merite plus de blasme pour ce qui en est, ni plus de creance pour ce qu'en ont publié ceulx de la Ligue. La verité est que le roy, faisant la paix l'an 1577, en intention qu'elle feust exactement et diligentement executee, auroit delaissé en garde au roy de Navarre, et à ceulx de la relligion, huict villes pour l'espace de six ans, pendant que les animosités et defiances s'esteindroient et amortiroient en ce royaume. Que, nonobstant ceste bonne intention, plusieurs qui ne demandoient qu'à ressusciter les troubles, qui depuis ont pris les armes avec les aucteurs de ceste ligue, traversoient, par tous moyens, l'execution dudict edict de paix, et donnoient à toutes heures, par entreprises nouvelles, nouvelles occasions de desiance, tellement que les playes, que le temps debvoit cicatriser, s'enaigrissoient, et l'edict de paix, que le temps debvoit effectuer, s'en alloit reculant pas à pas, et leur estoit retranché poinct apres poinct. Que, par la continuation de ces pratiques, seroit adveneu que, durant lesdicts six ans, la paix auroit esté interrompeue diversement par surprises, attentats; et mesmes par guerre ouverte, qui auroit duré ung an entier, dont seroient sorties les conferences de Nerac et Fleix, telle-

relligion avoient de grandes plainctes à lui faire con-

cernant l'execution de ses edicts, lesquelles ouïes et

satisfaictes, seroit plus aisé de parvenir à la remise des-

dictes places, ledict seigneur roy consentit, par la bou-

che du sieur de Bellievre, l'ung des principaulx de son

conseil d'estat, à la requisition dudict seigneur roy de Navarre, l'assemblee de Montauban, composee de princes, seigneurs, gentilshommes et personnes qualifiees de ladicte relligion; et feut ledict sieur de Bellievre, au nom du roy, en ladicte ville de Montauban, tant que l'assemblee dura, lequel ledict seigneur roy de Navarre requiert pour tesmoing de ses actions, et desire estre ouï et creu en tout ce qu'il a cogneu de ladicte assemblee. Ainsi ce n'a poinct esté, comme la leur, une convocation au desceu ou contre le gré du roy; mais par le consentement et commandement de sa majesté mesmes, qui, l'ayant bien meurement deliberee, l'a jugee utile et necessaire au bien et repos de son estat.

En ceste assemblee feut dressé ung cahier general des inexecutions et contraventions de l'edict de paix, qui feut presenté au roy, à Sainct Germain en Laye, par M. le comte de Laval et aultres deputés, avec tres humble requeste de pourvoir aulx doleances de sesdicts subjects de la relligion. Feut aussi promis par tous et chacung, pour quelque attentat particulier, qui se feit contre eulx, de n'en rechercher poinct la reparation par attentats reciproques, de peur que la temerité de quelques particuliers ne rejettast ce royaume aulx troubles, comme quelquesois on l'avoit jà cuidé voir; mais d'en faire plaincte au roy de Navarre, lequel la feroit entendre au roy, qui, selon son inclination assez cogneue au repos de ses subjects, y sçauroit pourvoir de remedes convenables. Comme reciproquement lè roy de Navarre leur promettoit d'embrasser leur cause envers sa majesté, et la lui representer soigneusement, lorsqu'il en seroit besoing, comme il auroit tousjours fait par le passé, afin que, voyant qu'il entreprenoit leur

cause envers le roy, ils feussent plus reteneus dans les voies de la raison, sans penser aulx extraordinaires qu'ils auroient tentees par le passé, faulte de recours et de support ailleurs. C'est tout ce qui se trouvera avoir esté faict en ladicte assemblee; rien plus que cela. Et le but en est tres evident, d'empescher que, des attentats particuliers ne provinst ung mal public qui troublast la paix de ce royaume, conformement à la conference de Nerac, teneue avec la royne, mere du roy, où il en feut faict article expres. Et ce qu'ils sement de plus est tout aussi vrai que le concordat de Magdebourg, où les jesuites se sont oubliés d'avoir faict tuer le prince d'Orange qu'ils font revenir en jeu cinq mois apres.

Et de faict, le roy qui feut tres bien adverti de ce qui s'est traicté en ladicte assemblee, trouva leurs raisons si raisonnables, que, de son plein gré, il leur accorda encores les villes de seureté pour quelques ans, voyant bien que son edict n'estoit pas executé comme il cuidoit. Et c'est ung des griefs dont lesdicts de la ligue vont s'escarmouchant contre le roy de Navarre, et protestent aujourd'hui contre sa majesté mesmes.

Certes, pense le roy de Navarre, que quiconque se vouldra ressouvenir de tout ce qui s'est passé en ce royaume depuis treize ou quatorze ans, ne trouvera poinct estrange qu'on ait demandé en paix faisant quelques villes de retraitre et seureté, et qu'on ait requis sa majesté, le terme venant à expirer; mais l'edict n'estant encores executé, ni les defiances amorties, que ces seuretés eussent à durer encores pour quelque temps, puisque le danger ne leur estoit levé, et puisque l'edict de paix duquel dependoit leur vie et leur repos, ne se voyoit poinct encores en bon estat.

Dira toutessois fort franchement, ledict seigneur roy de Navarre, que la cause principale pour laquelle (oultre la necessité commune de ceulx de la relligion) il eust ung desir particulier de supplier tres humblement sa majesté de les laisser encores pour quelque temps, seut la conspiration des dessusdicts, de laquelle il attendoit l'effect à tous momens, et contre laquelle ceulx de la relligion, desquels ils ont conjuré la mort, avoient besoing d'ung abri, tant que Dieu leur feist la grace que le roy cogneust leurs fins à bon escient. Et de faict la pluspart de ceulx qui ont attenté, durant la paix, sur les dictes villes de seureté que le roy desavouoit tousjours, nous decouvrent aujourd'hui suffisamment à l'adveu de qui ils osoient troubler la paix et entreprendre sur lesdictes places et aultres de la relligion, ayant pris les armes à la suite de la ligue; et ledict seigneur roy de Navarre supplie tres humblement le roy de se ressouvenir des advertissemens qu'il lui donna, peu de mois devant ladicte assemblee de Montauban, qui estoient bien suffisans pour faire penser des lors sa majesté à ses affaires; et à ce default, pour l'admonester à bon escient, de chercher ou retenir quelque seureté pour soi, auquel manisestement ils en voulloient.

Que s'ils disent qu'aujourd'hui ils aient pris les armes et saisi les villes de sa majesté, pour avoir aussi des villes de seureté, à l'exemple de ceulx de la relligion contraire, comme aulcungs ont voulleu dire, les prye donc tout ensemble, ledict seigneur roy de Navarre, de declarer à la France quelles desiances les y meuvent. Car, certes, malaisement pourroit elle deviner quelles causes ils en ont; d'avoir à se desier du roy, d'avoir à se desier des catholiques, d'avoir à se plaindre ou de haine, ou d'injure, ou de querelle de leur part. Certes,

CONTRE LES CALOMNIES DE LA LIGUE. 115 on scait trop que le roy leur a commis ses forces et son royaume; et, s'il leur eust voulleu mal, ils n'auroient tant de moyens de faire du mal qu'ils ont; qu'ils ont comme partagé ce royaume, entre leurs freres et entre ceulx de leur maison, par le moyen des grandes charges et des grands gouvernemens qu'ils ont, mesmes quelques ungs aulx despens des princes de son sang; qu'ils ont commandé aux armes, assailli les villes, donné les batailles, departi les charges, et distribué en somme la faveur du roy quelques années, ainsi comme ils ont voulleu; que, jusqu'à ce jour, pendant qu'ils ont faict semblant d'adherer à ses commandemens, ils ont esté honorés de bonnes villes, et suivis de la noblesse, y ont eu auctorité, y ont asseuré qui leur a pleu, tant s'en fault que par aultrui ou contre aultrui ils ayent eu besoing d'y estre gardés ou asseurés. Ont, au reste, et on le sçait, vuidé leurs querelles propres, par les propres bras du roy, executé leur vengeances aulx depens de son royaume. Si toutes ces asseurances ne les rendent asseurés, c'est la conscience qui a peur, qui leur ramentoit qu'ils ont abusé de la bonté du roy, de l'auctorité qu'ils ont de lui, contre lui mesmes. Et, me pouvant s'asseurer contre lui, que de kui mesmes, attentent sur sa personne et envahissent son estat. Que s'ils dient qu'il leur fault des asseurances contre oeulx de la relligion en France, certes, chacung soait que, pour huict places qu'ils retienment, ceulx oi ont aultant de gouvernemens entiers en ce royaume. Et qui cognoistra ceste megalité (et n'y a si ignorant qui ne la voie), ne croira jamais que, contre eulx, ils aient pourchassé des seuretés; ne croira jamais qu'il ayent crainct d'estre attaqués de ceulzqui jusques ici ont eu bien affaire à se

defendre; qui ne les pouvoient blesser, que couverts du roy, remparés de son auctorité et armés de sa puissance.

Afin donc que chacung cognoisse et la sincerité dudict seigneur roy de Navarre et leur fantaisie, et qu'à l'ombre de quelques seuretés qui lui ont esté donnees, apres tant de justes defiances, ils n'alleguent avoir eu besoing d'en demander contre lui, eulx qui n'eurent oncques que des faveurs, qui ne font aujourd'hui mal que par la trop grande confiance qu'on a prise d'eulx, et la trop grande creance qu'on leur a donnee : offre pour le bien de ce royaume, nonobstant l'inegalité de leurs conditions en toutes sortes, ledict seigneur roy de Navarre, qu'il est prest de remettre es mains du roy les villes de seureté qu'il a en garde, et qui sont en sa puissance, sans attendre les deux ans de prolongation qu'il lui a pleu accorder, moyennant que les susdicts posent les armes, remettant es mains du roy les places qu'ils ont saisies, pour en ordonner à son bon plaisir. Offre d'abondant, nonobstant les susdictes inegalités, tant de sa part, que de monseigneur le prince, son cousin, pour leur lever les scrupules, s'ils en ont, et pour faciliter la paix, de remettre es mains du roy les gouvernemens qu'il lui a pleu leur donner en ce royaume, pour en ordonner à sa volonté, pourveu que les dessusdicts cedent par mesme moyen entre ses mains les gouvernemens qu'ils tiennent; tant s'en fault que, pour l'asseurance que chacung cognoist leur estre trop mieulx deue, ils importunent le roy de nouvelles seuretés et nouveaulx gouvernemens, comme eulx qui n'ont honte de capituler en leurs articles, que les gouvernemens de Normandie, Picardie, Lionnois, Saluces, Metz, Thoul et Vercontre les calomnies de la ligue. 117 dun, etc., soient distribués entre ceulx de leur maison, c'est à dire, à bien parler, veu ce que jà ils en ont, la plus grande partie de ce royaume.

Par ce que dessus, pretend le roy de Navarre, qu'il se voit à clair, qui d'eulx ou de lui cherche plus le bien du povre peuple, le contentement du roy, le repos et la tranquillité de cest etat. Et de faict aussi seroit ce chose trop absurde que le serviteur de la maison voulleust estre creu plus zelateur du bien d'icelle que l'enfant de la famille; que ces estrangers nous voulleussent faire entendre qu'ils eussent plus de souci de la conservation de cest estat, que ceulx en qui ce souci est né avec l'interest; ces estrangers, dis-je, desquels la grandeur ne peult s'accroistre que par sa ruyne et dissipation, et qui toutesfois n'ont poinct faict de conscience de le publier ennemi de cest estat.

Prye à ce propos ledict seigneur roy de Navarre, tous les ordres et estats de ce royaume, comparer ici, choses toutesfois non comparables, les deportemens de ses predecesseurs en ce royaume, qui, de pere en fils, ont gardé ce nom, de n'avoir jamais été aucteurs ni de foule au peuple, ni d'injure à la noblesse, avec les deportemens des predecesseurs des chefs de ceste ligue, qui se trouveront avoir mis sus, depuis qu'ils ont mis le pied en France, la venalité des offices de justice, les nouveaulx subsides sur le povre peuple, dont ils ont tiré le suc et la substance soubs les roys Henri et François II; la confusion es charges et dignités qu'ils ont les premiers transferees à leur plaisir, et vendues de main à aultre. Brief, avoir accreu la simonie en l'Eglise, et introduict la vente du temporel à leur profit, pour se venger de leurs ennemis, soubs pretexte d'heresie.

Quant à sa personne, prye aussi tous les estats de ce royaume se souhvenir, ou s'enquerir s'il a jamais esté cause, quelques charges qu'il ait eu à soubstenir, d'une charge sur le peuple; au contraire, comment il gouverne ce peu de subjects que Dieu lui a donnés, qui se trouveront n'avoir esté surchargés d'aulcungs imposts, tailles ni subsides, nonobstant les grands affaires qu'il a eues ung si long temps; si done il a faict outrage ou de faict, ou de parole, ou es biens, ou en la personne à gentilhomme quelconque, quoique de plusieurs il ait esté offensé estrangement; si jamais aussi il en a traicté aulcung indignement, pour quelconque occasion que se puisse estre, soit en sa maison, soit en ses pays propres, si jamais il a faict tort, pour rigueur qu'il ait reçue de ceulx de la relligion romaine à prelat, curé, moine ou aulcung du clergé; au contraire, s'ils n'ont pas tousjours esté bien veneus et bien receus aupres de lui, plus prest d'oublier les offenses qu'on lui a faict, que ceulx qui lui en cet faict à lui en faire; s'il n'a pas tousjours renden l'honneur et le respect aux courts souveraines et aulx officiers d'icelles, à tous ceulx en somme qui portent la marque de justice, et si jamais on l'a veu, ou violenter la justice par la force, ou bien desnier la force necessaire, si elle a esté en lui, à la justice : c'est quant aulx parties de cest estat. Et qui, à toutes parties, n'a monstré qu'honneur, amitié et bienveillance, n'a jamais faict deplaisir, n'a desiré que plaisir, ne sera aisement creu mi estimé ennemi de tout l'estat.

Pour le regard de l'estat en general, il ne veult nier que les guerres civiles n'ayent apporté en ce royaume une grande confusion en toutes choses, povreté au peuple, diminution en la noblesse, ruyne au clergé,

CONTRE LES CALOMNIES DE LA LIGUE. mespris de justice, engeances de guerre, et surtout d'une guerre civile; qu'il pleure en son cœur, et aulxquelles il vouldroit remedier, si possible estoit, mesmes par son propre sang; mais atteste Dieu, atteste sa conscience, atteste la France mesmes, qui a les yeux assés clairs, et la memoire assés fraische pour avoir veu, et pour bien se soubvenir de tout ce temps, si jamais il est veneu aulx armes, que par conseil d'extreme necessité, encores que de longue main il la peust avoir preveue, et preveneue par la raison; tesmoing l'assemblee de Blois suscitee par la presente Ligue, qui le declaroit banni de ce royaume; et tous ceulx qui font mesme profession, en cas qu'ils ne changeassent de relligion tout aussi tost; changement à lui peult estre non difficile, s'il en avoit aussi peu, comme eulx. Si jamais aussi il a dilayé à recevoir la paix pour occasion particuliere que ce soit (quoi que son degré soit tel, que ce qui lui est particulier puisse estre à bon droict estimé comme public), quand sa conscience a peu estre satisfaite, quand il a peu voir que ceulx de la relligion, dont il faict profession, pouvoient servir Dieu selon leur foi en tranquillité et en repos. S'il a jamais demandé rien d'advantageux pour soi, creue d'auctorité, creue de pensions, ou creue de charges. S'il n'a au contraire mieulx aimé se voir, comme il est encore, sans auctorité en son gouvernement, qui lui debvoit estre rendeue toute entiere par la paix, que de prolonger la guerre tant soit peu, que de dilayer d'une heure le soulagement du peuple par la paix, ou que de troubler la paix, depuis qu'elle a esté faicte, faulte de jouir en plein effect de ce qui estoit promis pour son regard es articles de la paix. En soit pour tesmoing la conference de Fleix, en laquelle il se pouvoit servir

pour amender ses conditions du desir extreme de seu monseigneur de passer es Pays Bas, où il estoit appellé par une ambassade generale des estats desdicts pays, qui l'en requeroient, et sollicitoient tres instamment. Cependant il aima mieulx ceder lors son interest à l'accroissement de ce royaume, que de differer, ou marchander ung tant soit peu, pour notable bien qui en peust venir à son parti. Il feit donc la paix, l'accepta à telles conditions qu'il pleut à sa majesté lui accorder, pour faciliter la conqueste desdicts pays, et pour y aller lui mesmes, si sa majesté l'eust eu pour agreable. Ceulx ci, bons François, pour empescher que la Flandres ne soit conjoincte à la France, lorsque les ambassadeurs des Pays Bas l'apportent au roy à telles conditions qu'il veult, prests à recevoir la loi de lui, prests à mettre dans leurs villes telles garnisons et tels gouverneurs qu'il lui plaira, pour l'en empescher, troublent son royaume, mutinent son peuple, commencent la guerre en pleine paix.

Quelle patience a eu le roi de Navarre, durant tout ce temps, quelques mescontentemens qu'il peust concevoir du traitement qui, à la suggestion de leurs semblables, lui a esté faict, il le laisse à la consideration de tout le monde; reculé du roy, sans auctorité en son gouvernement, non payé de ce qui lui estoit deu, trop moins respecté en ses affaires que le moindre capitaine du royaume (soit dict sans reproche et pour la simple verité de ses deportemens); s'il n'eust non plus ressenti le mal du peuple, que font aujourd'hui ceulx de la Ligue, estant ce qu'il est, c'estoit pour la perdre entierement. Mais il est François, et prince françois, membre de la France, qui sent ses douleurs, et se deult de ses plaies. Diminution d'auctorité, faulte

de faveur, interest particulier, n'aura jamais le pouvoir de le faire despiter contre soi mesmes; chose propre à ceulx qui n'y sont qu'entés legerement, aulx jambes de bois, et aulx bras postiches, qui ne sentent quand le corps se brusle, aulxquels on peult bien donner l'exterieur, non l'interieur; non le mouvement, non le sentiment de vrais François.

Sur ces remuemens, qu'ils declarent et protestent estre directement contre lui, s'attaquans à sa personne, à sa vie, à son honneur, à sa conscience propre, les voyant, armés, se saisir des villes au milieu de son gouvernement, enveloppé d'eulx, irritant sa patience incessamment; s'il n'eust respecté le roy plus que son propre danger; s'il n'eust affecté le bien de ce royaume, l'espoir d'une paix publicque (si paix il y peult avoir avec ces gens) plus que sa conservation mesmes, y avoit il apparence, ou y avoit il raison aulcune de se contenir, comme il a faict? Mais tout lui est bon, pourveu que le peuple ait du repos; tout lui est utile, pourveu que l'estat demeure en paix, le roy obei, le roy honoré, comme il doit estre, feust ce à son peril tout evident, feust ce à son dommage irreparable.

Et c'est en somme à quel tiltre le roy de Navarre a peu estre blasonné de ces beaulx tiltres, d'heretique, relaps, persecuteur de l'Eglise, ennemi des catholiques, et perturbateur de cest estat. Quant à la conclusion qu'ils en retirent, par laquelle ils le declarent incapable de succeder au royaume, et font prendre à monseigneur le cardinal son oncle le nom de premier prince du sang et presomptif heritier, c'est certes le poinct qui plus les touche au cœur, mais auquel jusques ici il a pensé le moins, et qui lui est aussi veneu tout le dernier. Se contente sur ce poinct, ledict seigneur roy

de Navarre, de l'espoir qu'il a que Dieu gardera long temps sa majesté pour le bien de ce povre royaume, et lui donnera lignee à temps au regret de tous ses ennemis. Se confie aussi qu'il a affaire à François, quelque soing qu'on ait rendeu à les corrompre, qui sçavent les droicts, qui n'ignorent les descentes, qui lui garderont le rang qu'il doibt tenir; se console en Dieu, protecteur du droict, vengeur de la violence, qui voit les ungs et les aultres, duquel le droict jugement n'est, comme des hommes, corruptible; duquel l'arrest est certain, l'execution invariable sans qu'ils y puissent contrevenir.

Pour conclusion, en ce qui concerne la relligion, declare ledict seigneur roy de Navarre au roy son souverain seigneur, à tous ordres et estats de ce royaume, à tous princes et estats de la chrestienté, temporels ou ecclesiastiques, qu'il est et sera tousjours tout prest de se soubmettre à la determination d'ung legitime Concile general ou national, comme il est porté par les edicts de pacification de sadicte majesté. En ce qui concerne cest estat, et l'administration d'icelui, qu'il acquiesce aussi tres volontiers à ce qui en sera ordonné en une legitime assemblee generale des estats de ce royaume, quand sa majesté aura agreable de la convoquer. Cependant qu'il ne desire aultre chose, que de vivre doulcement soubs le benefice des edicts, prest à employer sa vie, ses moyens, et ses amis, pour la defense du roy et de son estat, et de tous les bons sujects de ce royaume.

Et d'aultant que ceulx de la Ligue l'ont pris pour subject, et pour pretexte de leurs armes, et veullent faire penser qu'ils n'en ont et n'en veullent qu'à lui, semans en leurs susdictes protestations diverses calomnies, et le publiant nommeement en icelles desireux

Et d'abondant, pour dementir leurs calomnies par ses actions, supplie aussi tres humblement ledict seigneur roy de Navarre, ledict seigneur roy son souverain, de voulloir avoir pour agreable sa tres humble sidelité et devotion en l'offre qu'il lui faict. C'est que pour le repos et soulagement de sa majesté et de son peuple, il lui plaise trouver bon de laisser demesler ceste querelle entre les susdicts et lui, sans y hasarder sa vie, qui seroit trop chere à ce royaume; et sans que sa majesté s'en mette en aultre peine; esperant que Dieu lui fera la grace de trouver assés d'amis, tant en ce royanme, entre les serviteurs de sa majesté, que, hors le royaume, entre les amis et alliés de sa couronne, pour les lui ranger à la raison, leur faire recognoistre la tres humble obeissance qu'ils doibvent audict seigneur roy son souverain, et le respect et honneur qui lui doibt appartenir soubs lui.

Mais particulierement parce qu'il ne peult penser, sans sompirs et larmes, à la grande effusion du sang de la noblesse, qui pourra sortir de ceste guerre, et l'extreme povreté et desolation qu'aura à souffrir le

povre peuple, au desordre et à la confusion qui, par là, s'introduira en tous estats; au lieu que la pieté, debonnaireté, et prudence de sa majesté, sans les remuemens, se preparoit, comme on sçait, à restablir cest estat en sa premiere splendeur, prosperité, dignité, integrité en toutes sortes; et sur tout aulx blasphemes execrables, que produict la guerre, contre Dieu, et au debordement des vices, qui accroist par la licence des armes; pour abreger ces miseres, que ledict seigneur roy de Navarre vouldroit racheter de son sang propre, il supplie tres humblement, et de toute son affection, sa majesté qu'il lui plaise ne trouver estrange l'offre que presentement il faict à monsieur de Guise, puisqu'ils l'ont pris à partie en leurs pretextes, et que ledict sieur de Guise commande à leurs armes, que ceste querelle (sans que, plus avant, tous les ordres et estat de ce royaume ayent à en souffrir, et sans y entremettre armee domestique, ni estrangere, qui ne pourroit estre qu'à la ruyne du povre peuple) soit vuidee et demeslee de sa personne à la sienne, ung à ung, deux à deux, dix à dix, vingt à vingt, plus ou moins, en tel nombre que ledict sieur de Guise vouldra, avec armes usitees entre chevalliers d'honneur. Et pour le regard du lieu, s'il le desire en ce royaume, supplie tres humblement sa majesté de lui faire cest honneur le voulloir nommer. Et, où il auroit ce royaume pour suspect, lui offre de se trouver en tel aultre lieu hors de ce royaume, que ledict sieur de Guise vouldra choisir, et qui soit de leur acces, non suspect ni aulx ungs, ni aulx aultres. Honneur certes, veu la disproportion et l'inegalité de leurs personnes et degrés, telle que chacung cognoist, que ledict sieur de Guise devra embrasser et racheter par tous moyens. Heur aussi que ledict seigneur roy de

CONTRE LES CALOMNIES DE LA LIGUE. Navarre, et monseigneur le prince, son cousin, acheteront de leur sang, tres volontiers, pour racheter le roy, leur souverain seigneur, des travaulx et peines qu'ils lui brassent, son estat de trouble et de confusion, sa noblesse de ruyne, tout son peuple de calamité et de misere extreme; protestant ledict seigneur roy de Navarre, devant Dieu et en sa conscience, qu'il n'est meu à choisir ceste voie, ni d'ambition qui soit en lui, ni de haine qu'il lui porte, ni de vengeance, qu'il desire'de celle que de gaieté de cœur ils espousent contre lui. Le seul desir de voir Dieu servi et honoré, son roi hors de peine, cest estat en paix, le peuple en repos, lui faict volontairement prendre le sort des armes; le seul deplaisir, et le seul malheur qu'il se represente à tous momens, de revoir Dieu blasphemé, et cest estat aulx vagues, et au peril d'ung naufrage; de revoir ce povre peuple es extremités, et es miseres, desquelles à peine a il peu encores respirer, desquelles, sans doubte, à peine, s'il retombe une fois, pourra il jamais se relever.

S'asseure aussi, et confie entierement ledict seigneur roy de Navarre, que le Tout Puissant, qui voit au dedans des cœurs, et qui preside au sort des armes, monstrera par le succes, à tout le monde, la sincerité et la justice de sa cause, pour estre en exemple à la posterité et à tous aages; Dieu, duquel il appelle l'ire, la vengeance, et la malediction sur soi, s'il proteste à faulx, s'il a jamais rien conceu de mal contre la personne de son roy, contre son estat, contre ses subjects de toutes qualités, de quelque relligion qu'ils soyent, si jamais il a basti ses desseings sur son tombeau, si jamais il a minuté en son esprit violence aulcune contre la relligion romaine, ou contre les catholiques; Dieu

aussi, duquel il attend la benediction, la bienveillance et la faveur contre ceulx qui, sans occasion, lui pourchassent sa ruyne, et, soubs ombre de son nom, remuent ce royaume, renversent tout ordre, ruynent le peuple, veullent despouiller le roy de son estat.

Faict à Bergerac le 10e jour du mois de juin 1585.

XXX. — INSTRUCTION

A M. de Clervant sur la declaration ci dessus, dressee par M. Duplessis.

It est besoing de presenter la declaration du roy de Navarre au roy, signee et escrite de sa main. Mais premier que s'en desaisir en fault retenir une copie bien nette et bien orthographiee, sans aultre esgard à l'orthographe dudict seigneur roy de Navarre; et, s'il est possible, signee de notaires attestans l'avoir prise sur l'original, escrit et signé de la main du roy de Navarre. Puis sur icelle prendre les copies, qui seront distribuees, tant dedans que dehors le royaume.

Supplier le roy de la garder en tesmoing de la sidelité et innocence du roy de Navarre:

Item, de trouver bon qu'il la fasse presenter à toutes les courts souveraines de ce royaume, avec les lettres que ledict seigneur roy de Navarre leur escrira.

Item, qu'elle soit imprimee avec privilege de sa majesté, puisque le venin de ses ennemis s'est coulé par tout, et ensemble la lettre qu'il en escrit à sa majesté en teste.

Item, que ledict seigneur roy de Navarre l'envoye à tous les princes et estats de la chrestienté; et qu'à ceulx qui sont amis et alliés de ceste couronne, elle soit presentee par ses ambassadeurs mesmes. Si le roy consent ces articles, il fauldra la presenter à messieurs de la court de parlement à Paris, et à Rouen, avec les lettres à eule addressantes.

Aussi trouver quelque moyen de la faire tenir au parlement de Dijon.

Pour Rennes en ce cas, fauldra fairé tenir les lettres à M. de Laval pour les presenter avec copie de ladicte declaration. Et est bon qu'elles soient signees, et collationnees, et bien correctes.

Quant aulx aultres parlemens, sur ce qui nous sera escrit par M. de Clervant, nous y pourvoyrons.

Aussi la fauldra faire imprimer avec privilege, et veiller qu'elle soit bien correcte. M. de Buzanval prendra ceste peine, s'il lui plaist.

Hors le royaume, en ce cas la fauldra faire distribuer par les ambassadeurs de sa majesté, et que sa majesté leur en escrive, comme aussi le roy de Navarre.

M. de Segur en estant adverti par M. de Clervant, pourra faire cela par la main des ambassadeurs en Angleterre, en Dannemarck, en Suede et en Escosse, et par sa main propre, s'il n'a longuement à tarder, à tous les princes d'Allemaigne. Sinon, et qu'il ne puisse si tost partir, il advisera d'y pourvoir par l'envoy de quelque honneste homme avec une bonne despesche, et n'oubliera d'en faire presenter une aulx estats des Pays Bas.

M. de Clervant aussi pourvoira qu'elle soit envoyee aulx ambassadeurs du pape, du roy d'Espaigne, des Venitiens, du duc de Savoye, du duc de Florence, du duc de Ferrare, etc., à l'agent vers l'empereur, aulx Suisses et Grisons.

Mais en cas que le roy ne consentist qu'elle feust envoyee aulx parlemens, ni presentee par ses ambassa-

128 INSTRUCTION A M. DE CLERVANT.

deurs, la fauldra neantmoins faire imprimer, et la distribuer par tout de main en main entre les personnes d'auctorité en ce royaume et hors le royaume, tant par M. de Segur, accompagnee des lettres du roy de Navarre; lequel sieur de Segur il conviendra particulierement advertir de la procedure qu'il aura à tenir; comme aussi par aultres voies d'amis aulx lieux où il ne pourra, ou n'a charge d'aller. J'envoye ung modele de la lettre pour les princes estrangers, soubs le nom de la royne d'Angleterre, qu'il fauldra changer selon la response que fera le roy.

Aussi lettres pour les courts de parlement.

XXXI. — LETTRE DU ROY DE NAVARRE

A MM. de la court de parlement, faicte par M. Duplessis.

MESSIEURS, j'ai tousjours fort desiré d'approuver mes actions à vos bons jugemens, aulxquels je defere tant, que je m'estimerai heureux de vous en avoir pour juges, et me sens beaucoup dechargé quand je me propose que je vous ai pour la plus grande partie pour tesmoings. C'est pourquoi aussi me voyant calomnié diversement es protestations de ceulx qui, depuis quelques mois, se sont elevés contre le service du roy monseigneur, et le repos de cest estat, j'ai pensé de vous envoyer avec son bon plaisir une declaration que je lui ai faict presenter escrite, et signee de ma main; en laquelle j'ai tasché de representer de tous mes deportemens, et laquelle, messieurs, je vous prye voulloir lire de poinct en poinct, et garder en vos registres, attachee à la presente, en tesmoing de ma fidelité en-

vers le roy mon seigneur, et de mon affection à la tranquillité de cest estat, et en condamnation à ceulx qui me calomnient. Les vous approuvant, messieurs, je les tiens pour approuvees au surplus de ce royaume, duquel vous estes et les yeux et les juges; et ne pense avoir besoing d'aultre approbation, encores que mes ennemis ayent pris la peine de faire glisser le venin de leurs blasmes contre moi, jusques aulx moindres veines et fibres de ce royaume. Et pour ce, messieurs, je vous prye de toute mon affection de les voulloir considerer exactement. Au reste, croyés que ce que j'offre de racheter au prix de mon sang propre la calamité de cest estat, et la misere que, par ceste guerre, souffriront tous les estats de ce royaume, je le fais d'une abondance d'affection, et d'ung vif sentiment que j'ai de tous leurs maulx. Dieu le sçait, messieurs, qui voit le fond de mon cœur, auquel ils ne peuvent pas aussi cacher le leur, qui me sçaura bien garder de leurs complots. Et je le supplie en cest endroict vous avoir en sa seure garde, etc.

XXXII. — LETTRE DU ROY DE NAVARRE

A la royne d'Angleterre, faicte par M. Duplessis.

Madame, je ne doubte poinct que les protestations de ceulx qui se sont eslevés n'agueres en ce royaume contre le service du roy mon seigneur, ne soient veneues en vos mains; esquelles ils me calomnient diversement, et ont tasché de faire glisser leur venin contre moi par tous les endroicts, non de ce royaume seulement, mais mesmes de la chrestienté. C'est pourquoi j'ai pensé estre de mon debvoir d'envoyer une declaration contre

leurs calomnies, au roy mondict seigneur, escrite et signee de ma main, laquelle avec son bon plaisir j'ai faict aussi presenter à toutes les courts de parlement de ce royaume, et par mesme moyen, parce que je vis en la lumiere du monde, et desire approuver mes actions à ung chacung, me suis resoleu de l'envoyer à tous les princes de la chrestienté, que je prye de toute mon affection la voulloir exactement considerer de poinct en poinct. Et parce que, particulierement, ils m'avoient taxé d'avoir negotié ces dernieres annees par la legation du sieur de Segur, superintendant de ma maison, avec partie des susdicts princes faisans profession de mesme relligion, choses prejudiciables au roy mon seigneur, à l'estat de ce royaume, et au repos de ceulx qui font profession de la relligion catholique romaine en icelui, je les prye tous de se resoubvenir si oncque je leur ai proposé ou faict proposer chose semblable, et de ce qu'ils en cognoissent veritablement en requiers une attestation escrite et signee de leur main, pour icelle representer au roy mondict seigneur, et en l'assemblee des estats de ce royaume, en tant que besoing seroit. Je m'addresse à vous particulierement, madame, comme à celle au jugement de laquelle je justisierai volontiers tous mes deportemens, et qui sçait aussi, aultant qu'aulcung aultre, quels ont esté mes desseings et mes intentions, non en la susdicte legation seulement, mais en tout le cours des affaires que j'ai eu à manier, suppliant tres humblement vostre majesté de garder ma susdicte declaration, et en auctoriser la verité et droicture, ainsi que plus amplement vous fera entendre le sieur de Segur, etc.

XXXIII. — LES DANGERS

Et inconveniens que la paix faicte avec ceulx de la Ligue apporte au roy et à son estat.

La paix est tres desirable, mais une vraie paix, et non qui enveloppe en une nouvelle guerre, et plus dangereuse que celle dont on veult sortir. Or est il que par ceste paix la guerre se concleut contre le roy de Navarre, premier prince du sang, et ceulx de la relligion pretendeue reformee. Ceulx de la Ligue en sont constitués chefs, qui useront, aultant qu'ils pourront, des armes pour ruyner la maison de France; ceulx en oultre que le roi a declaré rebelles, qu'il a recogneu tres manifestement attenter à son estat, auront les armes en main pour en abuser contre le roi et son auctorité. Si les affaires leur viennent à succeder, chacung doibt juger quelle des deux est plus dangereuse, celle qu'on veult eviter par ceste paix, ou celle qu'on introduict. Celle là bien consideree en elle mesmes estoit si aisee à esteindre par la force, que, si le roy cust esté bien servi, elle se rendoit dedans trois mois. Plusieurs y avoient esté amenés soubs le nom du roy, qui voyans qu'ils avoient esté trompés, estoient prests à s'en dedire. Les partisans n'y estoient reteneus d'aulcune necessité; car ils avoient en ce royaume tout le bon traictement qu'ils voulloient; et la moindre incommodité qu'ils eussent soufferte, contrepesee avec leurs fantaisies, ou pretendeus mescontentemens, les eust ramenés à leur debvoir. Le seul temps suffisoit pour la pluspart à les ruyner et dissiper. Leurs effects avoient esté fort petits, veu l'auctorité qu'ils avoient si longuement possedee en ce royaume, ayant eu les chefs mesmes bien de la peine à se saisir de quelques villes en leurs
propres gouvernemens, et n'ayans rien faict ailleurs de
remarquable. Au reste, partout où ils ont compareus, ils
ont esté batteus, tellement qu'ils perdoient et la force, et
la reputation des armes tout ensemble. D'argent, leur
pretendeue source du costé d'Espaigne estoit tarie, et
ne pouvoient plus lever que sur le peuple, c'est à dire,
attirer sur eulx sa haine et sa malediction. Qui les
eust poursuivis avec telle rigueur et aigreur, qu'on
faisoit ceulx de la relligion contraire, ils eussent abjuré
la ligue en peu de temps, et n'eust peu fournir le roy,
ni son sceau, aulx lettres de pardons qu'on lui eust
demandees.

La guerre au contraire, en laquelle on faict entrer le roy, est bien d'aultre nature. On a assés esprouvé qu'il y va du faict de conscience. Car ceulx de ladicte relligion ont souffert toutes calamités plustost que d'y renoncer; ont abandonné aussi tous les advantages qu'ils pouvoient avoir acquis, toutes les fois qu'il a pleu au roy contenter leurs consciences. Et cela se voit nommeement es premiers et seconds troubles; quand, soubs la parole de sa majesté leur accordant l'exercice de leur relligion, ils laisserent ung bon nombre de villes, qu'ils tenoient des plus grandes, fortes, riches et renommees de ce royaume. Or, sçait on ce que peult la conscience en l'homme, et à quelles extremités elle le faict resouldre. Et n'ont sans doubte tant pasti jusques ici ceulx de ladicte relligion pour se rendre maintenant au nom de la Ligue; ains seront d'aultant plus resoleus, qu'ils voyent qu'on s'est resoleu à leur ruyne, et ont recogneu evidemment que le roy n'a condescendeu à ce traicté, que par la force imaginaire de ceulx de ladicte ligue, qui lui a esté representee par la malice ou lascheté de quelques mauvais conseillers.

Ils sçavent tres bien considerer que le roy n'apportera jamais tant d'affection au desseing d'aultrui, comme au sien propre; et pourtant quelque animés que puissent estre les instrumens de la guerre, que leurs coups seront tousjours plus mols, leurs effects plus lents; retenans quoi qu'il en soit de la disposition de l'humeur du roy, qui evidemment a esté forcé à ceste guerre, et, avant ces remuemens, ne travailloit qu'à la paix.

Scavent qu'il est impossible que la conspiration de ceulx de Guise soit effacee de son cœur, veu les biens qu'ils ont receus de lui, veu les maulx qu'ils lui ont procurés, veu les propos effrenés qui sont sortis de leur bouche, tels que l'insolence et la jeunesse jettent, qui sont parveneus à ses oreilles, et veu leurs pretentions hautaines, et leurs practiques enormes, qu'il a penetrees jusques au fonds. Concluent donc que ceste playe ne peult se fermer sans cicatrice, qu'il demeurera tousjours ung sac au fonds, qui ne se pourra bien parcurer, que la defiance, le souspçon, la jalousie y resteront de part et d'aultre, en telle sorte que leurs actions et leurs affections, ou s'entrenuyront, ou n'advanceront pas au moins les unes les aultres; le roy d'une part ayant juste occasion d'estre jaloux de leurs. forces, quand il considerera que, sans necessité, sans relligion qui les esmeust, ils ont pris les armes contre lui, qui ne pouvoient avoir but que son estat; eulx se proposans les remedes practiqués par le roy Charles contre ceulx de la relligion, et sentans en leur conscience qu'ils seroient à meilleur droict practiquables contre eux mesmes, se proposent que le roy est si prudent, qu'il ne laschera pas la bride si longue à ceulx de Guise, qu'il ne la leur puisse retirer, quand il vouldra; qu'il ne se despouillera de ses meilleures forces, ne se desaisira pas aussi de ses deniers pour regner apres à leur discretion, et comme il leur plaira; au contraire qu'à toutes leurs volontés il leur donnera ung contrepoids, en toutes leurs charges ung controlleur, qui les surveille. Delà naissent les inimitiés entre les chefs, les disputes es conseils, les factions es armees; et le moindre inconvenient qu'elles puissent apporter, c'est de retarder les affaires de la guerre, et de refroidir les volontés des personnes qui la menent; tres grand inconvenient en une action qui, plus que toute aultre, depend de l'affection, qui engendre la celerité.

Disent que, s'il advient qu'il succede mal à ceulx de la Ligue en ceste guerre, le roy leur reprochera le mauvais conseil auquel ils l'auront forcé, leur imputera sa perte et celle de ses subjects à bien meilleur droict que l'empereur Auguste ne redemandoit ses legions à Quintilius Varus, qui n'estoit aucteur, ains executeur de l'entreprise; et ne temera, peult estre, pour se demesler du labyrinthe où ils l'ont mis, que de leur y faire recevoir escorne. Au contraire, s'il advient qu'ung siege ou ung combat leur succede, qu'il estimera pour son regard leurs victoires des defaictes, . et leurs triomphes des funerailles, les voyant croistre par là d'auctorité, et reputation à ses despens; et pourtant leur retranchera, en tant qu'en lui sera, tous moyeas de continuer leurs coups, leur coupant les vivres, et les nerfs lui mesmes, sans qu'il soit besoing d'aultre ennemi que lui pour les defaire.

Ne pensent que la noblesse et les gens de guerre, pour la pluspart, marchent de fort bon courage en leur armee, ne pouvans doubter qu'il n'y a que trois mois que le roy les a declarés rebelles, et mandé de courre sus à tous ceulx qui les accompagnoient; que la confiance et l'amitié n'y peuvent estre rentree sitost: par ainsi que le roy n'aura pas fort agreable le service qu'ils feront soubs la charge des chefs de la Ligue; qu'ils auront aussi peu de credit pour leur faire donner recompense, ou de leurs merites, ou de leurs pertes; et qu'il leur sera plus à propos, ou de se reposer chés eulx, ou de se tenir pres de la personne de sa majesté.

Se ramentoivent là dessus lesdicts de la relligion (et ce leur est une leçon commune), qu'il ont survescu les feux, les eaulx et les glaives; les guerres, les defaictes, et le jour Sainct Barthelemy, plus dangereux que tout cela; qu'ils ont porté, et longues annees, dessus leur dos, les forces de ce royaume et de ses alliés, bien unies et animees à leur ruyne; que les plus grands capitaines et les meilleurs conseillers auroient enfin recogneu que ceste ruyne ne se pouvoit acquerir à meilleur marché que par la ruyne entiere de l'estat. Considerent que la Ligue n'a poinct creé nouveaulx hommes, ni nouveaulx soldats, ni nouveaulx capitaines; au contraire, divisé et affoibli les vieulx qui restoient. Concluent donc que ceulx qu'ils ont portés entiers, ils les peuvent porter divisés. Bien plus, le roy retirant sa main, comme ils s'asseurent qu'il n'y apporte poinct sa volonté, s'estiment forts et suffisans assés pour les desfaire.

Ce sont les considerations et resolutions de ceulx de ladicte relligion, aulxquelles sa majesté doibt penser, pour ne tomber d'ung gouffre en ung aultre, sans s'arrester à la facilité de les ruyner, qui peult estre proposee par ceulx de la Ligue, et qui ne la croyent pas

telle, et ne veullent qu'estre armés soubs pretexte d'exterminer l'heresie; mais partie pour lui donner la loi tant qu'il vivra, et partie pour tirer apres sa mort partie de l'estat vers eulx, estans tous persuadés et asseurés de le survivre.

Le roy de Navarre, qui faict profession de la susdicte relligion, comme il a mesmes considerations, aussi s'emeut il fort peu des desseings de ceulx qui promettent sa ruyne. Mais, en oultre, il en a quelques particulieres, qui lui semblent affoiblir à bon escient ses ennemis, et le renforcer d'amis.

Ne doubte ledict seigneur roy de Navarre que tous les bons subjects du roy n'ayent evidemment cogneu le but et pretention des chefs de la Ligue en ceste guerre, à sçavoir la dissipation totale de l'estat pour en tirer à eulx quelque piece; que ce qu'ils l'ont maintenant convertie contre ceulx de ladicte relligion, n'a poinct aussi esté changement de desseing, mais changement de façon pour y parvenir, à sçavoir en demeurant armés pour donner la loi au roy, la mort duquel ils attendent, et exterminant, ou affoiblissant, soubs ombre de relligion, la maison de France en la race de Bourbon, de laquelle ayant abbateu le chef, ils feroient estat d'avoir bientost la raison des aultres membres; et pourtant s'asseure qu'ils recognoistront qu'en ceste guerre il s'agit de la liberté et auctorité du roy, de la conservation de l'estat et de toute la maison de France, qu'il importe à l'honneur de tous bons François de defendre, et conserver contre l'usurpation et invasion des estrangers.

S'asseure donc ledict seigneur roy de Navarre qu'il ne peult avoir contre lui les princes du sang et maison de France, ni les vrais officiers de ceste couronne, ni les courts de parlemens, et aultres membres principaulx, ni les forces des amis et alliés de cest estat; mesmes ayant veu comme il s'est demis au dessous de la raison et de son degré, pour racheter la paix et repos de cest estat, au prix de son sang ainsi qu'il leur est appareu par la declaration qu'il a envoyee au roy, escrite et signee de sa main.

Se confie au contraire que le roy, forcé par ses ennemis, lui imputera les travaulx et traverses qu'il aura à supporter, à services tres necessaires et tres agreables; que les princes du sang recognoistront leurs interests au sien; les principaulx officiers de ceste couronne leur debvoir par le sien, et que tous aultres bons subjects du roy, et zelateurs du public, favoriseront ses justes armes de leurs vœux et de leurs larmes pour la manutention de cest estat.

Le roy de Navarre en somme, et ceulx de mesme relligion, ne pretendent poinct estre ruynés par ceste guerre; ne veirent oncques au contraire plus d'occasions de bien esperer de leurs affaires, et de craindre peu leurs ennemis. Adjoustés qu'on peult prendre quattre places en ung jour, qui vauldront la guerre d'une annee et plus, comme encores il s'est veu en l'an 80. Adjoustés encores qu'au bout de six mois, ou plus, armee estrangere ne manquera poinct, qui derogera, si besoing est, à toutes les clauses, et derogatoires des derogatoires de ceulx de la Ligue. Et qu'entre ci et là on gaigne beaucoup sur eulx, l'hyver qui s'approche, et leurs recoltes jà faictes ne permettent de le croire.

Le danger et l'inconvenient de ceste paix, ou plustost de ceste miserable guerre, enfantee par une bastarde paix, n'appartient en particulier audict seigneur roy de Navarre, qui ne semble pouvoir estre ruyné qu'en la ruyne du roy et du royaume. Il est propre au roy; il appartient proprement à son estat.

- 1°. En ce que, de ceste paix, s'ensuit une guerre infaillible, estant tout certain que ceulx de ladicte relligion ne peuvent durer sans exercice d'icelle, ni estre opprimés sans la ruyne du peuple, et sans la subversion de tout l'estat.
- 2°. En ce que le roy arme les mauvais subjects contre les bons, soi mesmes contre soi mesmes, et donne moyen à ceulx qui se sont eslevés contre lui de croistre de forces, et de reputation, et de creance, pour lui faire puis apres la loi, si Dieu ne destrempe leur insolence, et ambition en traverses et adversités.
- 3°. Parce qu'il reduit les meilleurs en desespoir, quand ils voyent que les rebelles sont recompensés, et eulx reculés; que les princes estrangers obtiennent les gouvernemens à vive force, qui ne sont qu'aulx enfans de la maison ou à ceulx qui ont bien merité de l'estat; que les biens et dignités se donnent à ceulx qui font mal, et qui pis faict en a le plus, au lieu qu'anciennement ils estoient gardés, comme en reserve, non pour ceulx simplement qui ne faisoient poinct de mal, mais pour ceulx particulierement qui faisoient mieulx que les aultres.
- 4°. En ce que le roy de Navarre, et ceulx de ladicte relligion, en particulier, y sont enseignés à n'esperer plus, ni de la bonne grace du roy, ni de leurs bons comportemens; estans d'une part la bonne grace du roy subjecte à la force, ou à la discretion d'ung mauvais subject; estans aussi leurs meilleurs comportemens, leur obeissance et patience, remunerés d'une revocation d'edict, d'une infraction de foi publicque, d'ung exil, d'ung bannissement, d'une extermination totale, si en

eulx estoit. Tellement que contre ce mal ils ne trouveront aultre remede que de demeurer en armes tout le reste de leur vie, et tant qu'ils ayent pleinement asseuré leurs affaires, puisque nuls contracts ne leur peuvent servir; puis qu'on faict serment de ne leur garder serment à l'advenir; puis mesmes que leurs ennemis demeurent armés, affermis en leurs gouvernemens, et renforcés de seuretés; contre lesquels, puis qu'il ont forcé ung roy contre sa foi et la loi du royaume, ils ne peuvent s'asseurer qu'aulx armes et par les armes. Par ainsi le roy s'oblige à une guerre perpetuelle, et son estat sans doubte, s'il n'y remedie promptement, à une mortelle.

- 5°. Il est tout certain que ceulx de la Ligue (et ils ne le nient poinct) ont esté aidés en ceste guerre des deniers d'Espaigne, et que le roy d'Espaigne n'a eu aultre but que la confusion de cest estat, qui lui empesche la monarchie, pour en tirer profict. Or, est il que contre ses desseings n'y avoit plus seurs amis et alliés, que les estats d'Angleterre, d'Allemaigne et de Suisse, que le roy irrite, et desquels il perd l'amitié en se declarant ennemi formel de la relligion pretendeue reformee; tellement qu'estant delaissé d'iceulx, il se trouvera sans alliés es nations estrangeres, ne lui demeurant presques que ceulx qui ont comploté avec ceulx de la ligue, desquels l'amitié lui doibt estre suspecte, ou plustost l'inimitié certaine.
- 6°. Adjoustons qu'à ung prince tres chrestien, qui mesmes entre les tres chrestiens a monstré ung zele special de sa relligion, c'est ung contre cœur et ung reproche de se voir reduict à la devotion par une force, de se voir forcé à forcer aultrui en sa relligion, et certes par ceulx qui ne forceroient personne, s'ils n'avoient

desseing que la relligion, et qui n'attendroient la force pour abandonner la leur, s'ils en pouvoient esperer quelque meilleure resource.

XXXIV. — * LETTRE

A M. le duc de Montmorency.

Du 6 juillet 1585.

Monseigneur, vous entendrés par ceste depesche la resolution qui semble prise à la court, et celle que icelle le roy de Navarre se propose, sauf à la conclure sur l'advis que lui en donnerés: est toutesfois d'advis ledict seigneur, si vostre opinion est conforme à la sienne, qui vous sera exposee par le sieur Constans, qu'on vienne aulx effects par delà, sans temporiser comme là; il y ordonne les choses par de çà. Les forces de nos ennemis sont grandes, mais sans doubte divisees, et le roy n'apportera jamais tant de volonté ni d'effect au desseing d'aultrui qu'au sien propre : et puis Dieu, la justice et la necessité qui chacung à part sont suffisans de gaigner une bataille, combattant tout ensemble pour nous. Aidés ce prince, monseigneur, et le conservés à la France, et la France par lui; il vous aime, vous estime, vous honore, se remet et commet à vous, et à la fidele amitié qu'il sçait que vous lui portés; tous ses serviteurs aussi le vous sont; moi tres intime, comme j'ai cest honneur de le lui estre, ne sentant rien à partir, ni entre vos affaires, ni entre vos personnes. Monseigneur, je prye Dieu qu'il vous ait en sa garde.

De l'Estoure.

XXXV. — LETTRE DU ROY DE NAVARRE

Au roy Henry III, faicte par M. Duplessis.

Juillet 1585.

Monseigneur, des que les aucteurs de ces nouveaulx remuemens eurent faict paroistre les effects de leur mauvaise volonté envers vostre majesté et vostre estat, il vous pleut m'escrire le jugement que vous faisiés à tres bon droict de leurs intentions; que vous cognoissiés, quelque pretexte qu'ils prissent, qu'ils entreprenoient sur vostre personne et sur vostre couronne, qu'ils voulloient s'accroistre, et agrandir à vos despens et à vostre dommage, et ne pretendoient que la totale ruyne et dissipation de vostre estat. C'estoient les mots de vos lettres, monseigneur, et me faisiés cest honneur, en recognoissant la conjonction de ma fortune avec celle de vostre majesté, d'adjouster expressement qu'ils pourchassoient ma ruyne avec la vostre; et la mienne certes, monseigneur, à laquelle il leur estoit malaisé, despendant de vostre grandeur, comme je fais, de parvenir que par la vostre. En ceste qualité donc, monseigneur, il vous avoit pleu commander à vos gouverneurs, lieutenans generaulx, baillifs, seneschaulx, et aultres vos officiers, de leur courre sus, comme à rebelles et perturbateurs du repos public. A toutes vos courts de parlement aussi feurent envoyees vos declarations, verifiees en icelles, par lesquelles ils sont declarés crimineux de leze majesté; et de là sont ensuivis plusieurs arrests solemnels, et, en consequence desdits arrests, quelques executions tres importantes en divers endroicts de ce royaume, pour marque exem-

n'ont certes pas subject de demander; j'offrois de quitter et mon gouvernement, et toutes les places que je tiens, à condition qu'ils feissent le semblable, pour ne retarder la paix de cest estat. Si c'est moi qu'ils cherchent, ou si, soubs mon ombre, ils troublent ce royaume; sans que vostre majesté en soit en peine, j'ai requis que ceste querelle soit debateue d'eulx à moi, et, pour abreger la misere publicque, de leur personne à la mienne. Je me suis en somme, oultre l'apparence de raison, et tout sentiment de nature, accommodé à tous les commandemens de vostre majesté. J'ai voulleu, outre le debvoir, et nonobstant la disproportion de nos degrés et qualités, m'esgaler à mes inferieurs, pour racheter de mon sang tant de malheurs, m'esgaler à ceulx que vostre majesté mesmes avoit prononcés rebelles. Si j'ai ce malheur, et je ne le veulx encores croire, que vostre majesté passe oultre en la conclusion de ce traicté, nonobstant telles conditions et soubmissions, rompant son edict, armant ses rebelles contre son estat, contre son sang et contre soi mesmes, je deplorerai de tout mon cœur la condition de vostre majesté, vous voyant forcé (pour ne vous voulloir servir de ma fidelité) à la totale ruyne de vostre estat; les calamités aussi de ce royaume, aulxquelles en vain pourra on esperer sin, qu'en sa sin propre, estant tout cogneu à ung chacung par la preuve de vingt ans et plus, que ce qu'ils pretendent est ung vain effort, et leur bastiment une ruyne; me consolerai cependant en mon innocence, en mon integrité, en mon affection envers vostre majesté et son estat, qu'il n'aura teneu à moi que je n'aye sauvé par mon peril de ce naufrage, mais surtout en Dieu protecteur de ma justice et loyauté, qui ne m'abandonnera en ce besoing; ains me

doublera le cœur et les moyens contre tous mes ennemis qui sont les vostres. Et je le supplie, monseigneur, qu'il vous doint ung bon conseil, vous assiste de sa force en ces affaires, et me doint la grace de vous rendre le service que je vous doibs et desire toute ma vie; et à vostre majesté, monseigneur, longue et tres heureuse vie en tres parfaicte santé, etc.

XXXVI. — LETTRE DU ROY DE NAVARRE

A MM. des Ligues de Suisse; faicte par M. Duplessis, et envoyee par M. de Calignon.

Magnifiques seigneurs, vous aurés entendu les remuemens n'agueres suscités en ce royaume par ceulx de la maison de Guise, pretendant l'extirpation de la relligion reformee, et tendant par icelle à la subversion de l'estat, ce qui avoit aussi esté tres bien recogneu par le roy mon seigneur, lequel les auroit declarés rebelles et crimineux de leze majesté, auroit commandé à tous gouverneurs, lieutenans generaulx, etc., de leur courre sus par armes, et à ceulx de ses courts de parlement de les poursuivre en leurs vies, biens et honneurs par toutes rigueurs de justice. Ce nonobstant, magnifiques seigneurs, partie l'apprehension de leurs forces, qu'on lui faict concevoir malicieusement plus grandes qu'elles ne sont, partie la haine inveteree de la vraie relligion, en laquelle les mauvais conseillers de sa majesté se sont trouvés d'accord avec eulx, ont reduict le roy à ce poinct de faire des conditions tres prejudiciables, et à son estat, et à tous ses plus fideles subjects, à sçavoir que son edict de pacification demeure cassé et rompeu, et ceulx de la relligion reformee, non

seulement privés de tout exercice d'icelle, mais mesmes bannis du royaume en cas qu'ils ne la veuillent abjurer. C'est, magnifiques seigneurs, une paix que je m'asseure que vous trouverés bien dure, puisqu'elle m'est convertie en guerre ouverte, mesmes quand vous considererez quel lieu je tiens en ce royaume, et quels ils y sont, à sçavoir, oulx isseus d'une maison estrangere, moi premier prince du sang et premier pair de France. Quels aussi ont esté leurs deportemens et quels les miens; eulx et leurs partisans de gaieté de cœur ayant voulleu forcer le roy contre son serment, sa foi et ses edicts à forcer les consciences de ses bons et loyaulx subjects; moi et ceulx de la relligion n'ayant rien plus desiré que de vivre en toute obeissance, selon la relligion que Dieu nous a inspiree, soubs le benefice de sa foi et des edicts de paix. Or sont les choses, magnifiques seigneurs, reduictes à tel poinct, que malaisement se peuvent elles demesler sans guerre, ni ceste guerre finir si les bons voisins n'y apportent la main, sans la dissipation de cest estat; car, oultre que c'est nature à chacung de se defendre, ce m'est à moi ung debvoir et une necessité de defendre cest estat, à la ruyne duquel ils aspirent de tout leur pouvoir. Je m'adresse donc à vous, magnifiques seigneurs, comme à bons voisins pour y apporter le remede, pour vous advertir à ce que, soubs ombre de bonne foi, ne soyés frustrés en vostre but, en ce que vous auriés eu intention de secourir le roy et son estat contre les conspirateurs, ce qu'on vouldroit aujourd'hui, soubs l'auctorité d'iceulx, employer contre la relligion, le service du roy et le repos de l'estat. Et desjà, magnifiques seigneurs, pouvés vous remarquer la mutation survenue par ce traicté de paix, au grand prejudice de vostre

alliance avec la France, en ce qu'ayant secoureu indifferemment le roy, comme vous avés faict, tant d'une que d'aultre relligion, ce nonobstant, ceulx de la relligion sont licentiés et les aultres reteneus, comme si vous n'estiés pas egalement bons alliés de ceste couronne, ou plustost pour monstrer evidemment qu'on en cherche la ruyne (à laquelle on sçait que ne voulés servir), et non le bien; et en ce pareillement qu'ayant le roy receu en son alliance et protection la ville de Geneve, et partie en vostre contemplation, comme l'on sçait, ils l'obligent à s'en departir soubs ombre d'erreur ou heresie. Geneve, toutesfois de laquelle on cognoist l'importance pour la conservation de tout vostre pays, qu'il est apparent qu'ils n'ont voulleu accepter de l'alliance pour occasion de la relligion, qui vous est à tous commune, mais pour l'exposer à l'ennemi commun, que cognoissés, et pour lui ouvrir la porte de vos pays par ce moyen. C'est à vous, magnifiques seigneurs, pour l'affection que vous portez au roy, à cest estat, à la maison de France et à la vraie relligion, qui vous a esté tousjours chere et precieuse par sur tout, de penser, selon vos prudences, aulx moyens de detourner ces malheurs, desquels j'ai aussi donné charge au sieur de Calignon, present porteur, de vous discourir au long. Et sur ce, magnifiques seigneurs, que je desire approuver mes actions à ung chacung, à vous singulierement, que je tiens pour meilleurs et plus asseurés amis de cest estat, je vous envoye par lui une copie de la declaration qu'ai faict presenter au roy, escrite et signee de ma main, par laquelle vous pourrés juger, et du tort qu'on me faict, et de l'equité de mes intentions. Et, pour ce, me remettant, tant sur ladicte declaration, que sur ce qu'il vous dira pour

148 LETTRE DU ROY DE NAVARRE, etc.

vous eclaircir plus amplement, je vous prierai, magnifiques seigneurs, de le voulloir croire en tout ce qu'il proposera et traictera de ma part, et supplierai Dieu, etc.

Feut escrit sur mesme subject à divers princes, tant dedans que dehors le royaume, en mesme substance.

XXXVII. — LETTRE DE M. DUPLESSIS

A M. d'Elbene.

Du 8 juillet 1585.

Monsieur, j'ai receu les vostres, je suis marri d'avoir bien deviné; mais patience, Dieu doint qu'ayons aussi bien pourveu que preveu. La resolution est de nous ruyner, on en faict les moyens faciles; et si ne puis je croire qu'il y ait homme de jugement qui ne voye que nostre ruyne coustera la ruyne de ce royaume Cependant on appelle cela le salut de l'estat : je ne vis jamais ce prince, et croyés m'en, plus resolleu d'avoir la raison de ses ennemis. Et pleust à Dieu qu'il pleust au roy nous laisser ceste cause à debattre! Je ne pense pas aussi qu'il soit denué d'amis, et dedans et dehors le royaume, qui sçauront bien lever le masque de relligion à l'entreprise faicte contre cest estat. On s'attend peut estre d'avoir le remede aussi prompt que le mal; mais jugés s'il vous est plus permis de le vous promettre ni à nous de le croire, recevant tel traictement apres les promesses à nous faictes. On nous a presché la patience, et nous l'avons eue; l'obeissance, et nous l'avons rendeue; et la retribution, c'est d'armer nos ennemis d'auctorité et de forces contre nous. Qu'aurons nous plus à dire, sinon que messieurs les aucteurs de

ce salutaire conseil n'auront de tout l'Evangile reteneu que ce seul mot: Faictes bien à ceulx qui vous font mal? Et ne gaignant rien par vous complaire, quel respect nous retiendra plus de vous deplaire? Je ris des belles conclusions que nous ne pouvons durer que quattre mois. Pensés si la ligue a creé nouveaulx hommes ou nouveaulx capitaines, si elle a forgé nouveaulx thresors. Certes, soubs quelques noms qu'ils nous combattent, ce sont tousjours ceulx que nous avons veus; et quand on les me dira accreus de quelque chose, pensés aussi que nostre constance et nostre experience est augmentee. In summa qui vitulum sustulerit, bovem feret. Ce qui plus me fasche, c'est que le roy avoit tousjours dict que Dieu lui avoit appris que la relligion ne se plantoit ni extirpoit par armes; qu'il avoit faict · ceste paix volontairement, et la voulloit garder de mesmes, sans souffrir jamais qu'elle feust enfreinte; que les aultres n'avoient esté faictes de ceste façon, mais que celle ci estoit proprement la sienne, et c'estoient encores ses propos n'agueres à Sainct Germain en Laye. Si elle est rompeue, l'edict suspendeu ou aboli, comme l'on dict, en faveur de nos ennemis, tant qu'ils dureront restera que nous soyons en armes, sans pouvoir prendre fiance des paroles de sa majesté, qu'ils auront eu puissance de forcer. Et par là je vois une guerre en ce royaume, sans fin et sans borne, Incendium restinguendum ruinâ. J'adjouste, et l'oserai je dire? qu'il semble qu'il y ait eu, mesmes en ceste action ou transaction, de la volonté propre de sa majesté, estant certes leurs forces petites et les siennes grandes, leurs entreprises foibles et mal appuyees, leurs moyens defectueux des le commencement, et leurs cœurs jà demi saillis, et vous dirai avec verité que si on nous eust

lasché la bride en Guyenne, en moins de trois mois toutes leurs garnisons leur estoient converties en prisons; excusés ma haste. Vous n'ignorés point les affaires qu'on me donne; mais Dieu nous mesurera plus de constance que de travail, plus d'amis que d'ennemis. De moi, je me vois pour le service que j'ai pensé faire à sa majesté mesmes (et elle m'en est tesmoing) chargé de haine et des menaces de ces hommes; mais impavidum ferient ruinæ. Je vous escris comme à personne que je sçais qui aime cest estat. Si quid superest remedii, recherchés le, pratiqués le; sinon, et qu'il soit concleu au ciel et en la terre, et par le roi mesmes, que ce royaume perisse en nos jours, aidons donc tous à ceste ruyne, et que, pour moins opprimer de personnes dessoubs soi, il tombe plustost par desseing que par inconvenient. J'espere mieulx de sa majesté, mieulx de ses bons conseillers; mais les choses s'en vont si avant, que vix datur regressus. C'est retenir, ce semble, le chariot de Phaëton au declin de sa course; Dieu y mettra la main, s'il lui plaist, lequel je supplie, monsieur, vous avoir en sa saincte garde. Et sur ce vous baise bien humblement les mains avec offre de mon service, que je vous voue et dedie, long temps a, comme vostre plus humble et tres fidele ami à vostre service.

De Nerac.

XXXVIII. — INSTRUCTION

Au sieur Constant, allant de la part du roy de 'Navarre vers M. de Montmorency; dressee par M. Duplessis.

Juillet 1585.

Le roy de Navarre a eu nouvelles de la court par deux gentilshommes depeschés par les siens l'ung apres l'aultre; que la royne a concleu la paix avec ceulx de la Ligue, à condition d'employer les deux arixees contre lui, et qu'elle y a faict condescendre le roy en l'entreveue qu'ils ont faicte à Lagny.

Les sieurs de Clervant et de Chassincourt se sont plaincts à ladicte dame de ceste negotiation, alleguant sa promesse plusieurs fois reiteree de ne faire rien en ce traicté au prejudice du roy de Navarre; mais elle n'en a teneu grand compte : se sont aussi retirés vers sa majesté, qui leur a faict response telle, qu'il leur a faict cognoistre qu'il voulloit persister en l'accord par lui faict avec lesdicts de la Ligue.

Là dessus surveint la declaration que le roy de Navarre envoyoit au roy, escrite et signee de sa main, de laquelle ledict sieur duc de Montmorency a eu copie par ledict sieur Constant, et qui avoit esté arrestee par la prise du sieur de Serillac, qui l'avoit laissee es mains du postillon, icelle lue devant sa majesté en son conseil, presens les princes et plus grands de la court, feut trouvee pleine de si grandes raisons et de si equitables offres, que le roy manda à la royne sa mere, attendeu icelle, de suspendre pour un peu la finale conclusion, declarant, la plus part de la noblesse, ne pouvoir honnestement porter les armes contre le roy de Navarre,

152 INSTRUCTION AU SIEUR CONSTANT

soi sousmettant à la raison et mesmes pour le faict de la relligion à ung Concile; et c'est la derniere nouvelle qu'a receue ledict seigneur roy de Navarre.

Mais il voit les choses passees si avant, qu'il n'y a apparence qu'ung si foible remede arreste ung si grand mal; et pour ce, se resout ledict seigneur roy de Navarre de pourvoir à ses affaires, prye tous ses amis de faire de mesmes, et particulierement demande advis audict sieur de Montmorency de ce qu'il a à faire, comme à celui de qui il faict, pour plusieurs causes, ung tres singulier estat, dont ledict sieur Constant le requerra tres instamment.

Aura entendeu ledict seigneur duc, par ledict sieur Constant, les depesches qu'auroit ci devant faict en Angleterre ledict seigneur roy de Navarre, en Allemaigne, Suisse et ailleurs; or est il que depuis peu de mois il a eu lettres du sieur de Segur, lequel lui mande avoir eu sa premiere audience de la royne d'Angleterre pour estre assisté promptement de deniers, de vaisseaux, et de deux mille corselets payés.

A aussi ledict seigneur roy de Navarre nouvelles d'Allemaigne, que les princes protestans, sur les erres de la negotiation precedente du sieur de Segur, ont teneu une assemblee en la ville de Magdebourg en Saxe, en laquelle ils ont concleu d'envoyer deputés vers lui pour le pryer de signer leur confession, ou en cas qu'il y trouve des scrupules, les leur remarquer et convenir ensemble d'ung temps et d'ung lieu, pour les terminer par ung Concile, avec declaration, nonobstant les differends qui pourroient estre en eulx; que cela n'empeschera en rien l'amitié, la correspondance et le mutuel secours qu'ils doibvent l'ung à l'aultre; et ledict sieur de Segur ayant faict en Angleterre, a charge de

passer en Allemaigne, tant pour les visiter que pour traicter et arrester du secours necessaire avec eulx, attendeu que le temps presse.

Particulierement n'avoit oublié ledict seigneur roy de Navarre, des le commencement de ces troubles, de depescher à M. le duc Casimir et à messieurs des ligues de Suisse, auxquels presentement il faict aussi une recharge; à sçavoir, à M. le duc Casimir, pour l'advertir de l'estat des choses, entendre sa volonté et intention sur icelles, attendeu l'administration de l'electorat, qui le pourroit retenir ou occuper; et à messieurs des ligues de Suisse, pour leur remonstrer le tort qu'on lui faict, et à la maison de France et à eulx aussi, lesquels ont envoyé leur secours contre la ligue pour le maintien de la couronné; qu'on employe maintenant à la ruyne d'icelle soubs l'auctorité de la ligue; et particulierement à ceulx qui font profession de mesme relligion, pour leur representer le tort qui est faict à leur alliance, ayant reteneu les Suisses catholiques et renvoyé ceulx de la relligion, les pryant au surplus d'assister la France et les vrais François contre les invasions et attentats de ladicte ligue, qui ouvertement a forcé le roy à choses si iniques.

Pour le dedans, a depesché ledict seigneur roy de Navarre, à leurs majestés, pour se plaindre vivement du tort qui lui est faict en ce traicté, veu la patience et l'obeissance qu'il a rendeue, dont on veult maintenant abuser à sa ruyne. Et n'a oublié d'escrire bien particulierement à M. d'Espernon, lequel, sur la lecture de sa protestation, dit tout hault qu'il seroit volontiers l'ung de ceulx qui entreroient en duel avec le roy de Navarre contre le sieur de Guise et les siens, s'il lui faisoit tant d'honneur de le choisir, et n'a point celé au

154 INSTRUCTION AU SIEUR CONSTANT roy qu'il ne marcheroit poinct contre le roy de Navarre ni ceulx qui dependoient de lui, si sa majesté n'y alloit en personne.

A aussi depesché personnage d'entendement vers M. de Montpensier pour lui faire sentir son interest propre en ceste querelle, et lui bien representer la ruyne commune, afin qu'ils joignent leurs moyens et volontés ensemble. Le semblable a il faict vers madame la duchesse de Longueville et MM. ses enfans, vers madame de Bouillon, M. son fils et aultres.

A toutes les susdictes depesches, à sçavoir, à leurs majestés, à M. d'Espernon, à M. de Montpensier, à madame et MM. de Longueville, à M. et madame de Bouillon, desire le roy de Navarre que M. de Montmorency lui fasse ce bien de conjoindre et conformer les siennes, leur faisant cognoistre, comme principal officier de ceste couronne, la ruyne qu'il en prevoit infaillible, si sa majesté se resoult d'accorder à ceulx de la Ligue telles injustes demandes par ceste paix, l'interest notable qu'y ont ceulx qui ont l'honneur, ou d'estre de la maison de France, ou d'y appartenir de si pres, comme font partie des susdicts, ce que le debvoir et la nature requierent d'eulx tous en cest endroict, ce que ledict seigneur roy de Navarre le prye de faire selon l'affection qu'il lui porte, en telle sorte qu'ils puissent juger qu'il se sent blessé en l'offense qui est faicte audict seigneur roy de Navarre, et n'est pour endurer qu'il soit opprimé, en tant qu'en lui sera, par la faction de ceulx de Guise, ni aultres ses ennemis.

A aussi ledict seigneur roy de Navarre escrit au sieur de la Tremouille, auquel il prye ledict sieur duc voulloir escrire selon qu'il verra convenir, et selon le genre du temps; comme aussi à tous aultres vers lesquels il jugera ses lettres pouvoir faire quelque bon effect pour le bien des affaires dudict seigneur roy, desquels ledict sieur Constant se pourra de soi mesmes soubvenir, comme madame d'Angoulesme, M. le grand prieur, auquel presentement il escrit, et aultres.

Dira pareillement ledict sieur Constant audict sieur duc de Montmorency, que ledict seigneur roy de Navarre a depesché par toutes les provinces pour reveiller la noblesse qui lui adhere, l'exhorter à pourvoir à sa retraicte et à sa seureté, sans plus temporiser, chacung en son endroict, selon le moyen qu'ils en auront en main; et ceulx qui n'en auront poinct, de rechercher les moyens de se joindre à lui, au mieulx et au plus tost qu'ils pourront, pour lesquels plus aisement recueillir est en deliberation de s'avancer sur la riviere de Dordogne, et de là en Xaintonge et en Poictou, et plus oultre s'il y a moyen et si besoing est; et d'aultant plus que desjà M. de Mercœur a passé Loire, et est bien avant en Poictou avec ses troupes, desirant toutesfois ledict seigneur roy de Navarre, premier que de s'advancer si loing, avoir le prudent advis dudict sieur de Montmorency, auquel il defere aultant qu'à seigneur du monde.

Semble audict seigneur roy de Navarre que les choses sont passees si avant, qu'il n'y a plus de danger; ains qu'il est requis de tenter l'execution des desseings et entreprises qu'on peult avoir, et qu'on tient les plus certaines en tous les endroicts de ce royaume, n'y ayant rien qui plus tost ramene le roy à nous laisser en paix que tels effects, s'ils viennent à reussir, puisque, par semblable, il s'est laissé conduire à nous faire la guerre en donnant la paix à ses ennemis et aulx nostres;

156 INSTRUCTION AU SIEUR CONSTANT, etc.

à ceste fin, qu'il est d'advis que ledict sieur duc fasse esclater quelque chose de son costé, et l'en prye, comme de sa part il l'a jà commandé à plusieurs de ses serviteurs à ce que chacung cognoisse qu'ils marchent d'ung pied, et qu'ils soient respectés et redoutés l'ung en l'aultre et l'ung par l'aultre.

L'asseurerà ledict Constant de sa resolution et constance, et particulierement de sa fermeté en l'amitié qu'il lui a promise et juree; et sur tout se ressouviendra de tirer tous les bons advis et conseils qu'il pourra par le menu dudict sieur duc de Montmorency, sur ce que ledict seigneur roy doibt faire pour la bonne conduicte de ceste guerre, pour l'en advertir soigneusement et bien souvent.

Lui recommande, au reste, ledict seigneur roy de veiller et travailler surtout à ce que toute division cesse, et que toutes desiances et jalousies soient levees; n'y ayant rien plus prejudiciable en la condition des affaires presentes, que la mauvaise intelligence entre ceulx qui ont ung si grand faix à porter et soubstenir ensemble.

XXXIX. — LETTRE DE M. DUPLESSIS

A M. le duc de Montmorency.

Du 11 juillet 1585.

Monseigneur, vous entendrés, par ceste depesche, la resolution qui semble prise à la court, et celle que, sur icelle, le roy de Navarre se propose, sauf à la conclurre sur l'advis que vous lui en donnerés. Est toutesfois d'advis ledict seigneur, si vostre opinion est conforme à la sienne, qui vous sera exposee par le

sieur Constant, qu'on vienne aux effects par de là, sans temporiser, comme jà il y ordonne les choses par deçà. Les forces de nos ennemis sont grandes, mais sans doubte divisces, et le roy n'apportera jamais tant de volonté ni d'effect au desseing d'aultrui qu'au sien propre; et puis Dieu, la justice et la necessité, qui chacung à part sont suffisans de gaigner une bataille, combatteut tous ensemble pour nous. Aidés ce prince, monsieur, et le conservés à la France, et la France par lui. Il vous aime, vous estime, vous honore, se remet et commet à vous, et à la fidele amitié qu'il sçait que vous lui portés. Tous ses serviteurs aussi le vous sont, moi tres intime, comme j'ai cest honneur de le lui estre, ne sentant rien à partir, ni entre vos affaires, ni entre vos personnes; monseigneur, je prye Dieu qu'il vous ait en sa garde, etc.

De Leytoure.

XL. — LETTRE DE M. DUPLESSIS

A M. de Walsingham, par M. de Merle.

Du 8 juillet 1585.

Monsieur, les affaires ont enfin tourné comme nous avions deviné; on a faict la paix à nos depens, et sans nous et contre nous. Si ne perdons nous poinct courage; ains jamais ne feusmes si resoleus, Dieu nous mesurant le travail et la constance à mesme mesure. Ce prince est plein de courage, les tenfations grandes; mais c'est à vous à l'assister. Qu'il cognoisse qu'il y a du zele de relligion ailleurs, et cela lui redoublera le sien. Le gentilhomme qui vous porte ceste est homme d'honneur et de pieté et de vertu; il merite d'estre aimé

de vous, et vous dira particulierement de nostre estat. Efforçons nous comme nos ennemis; nous avons Dieu et justice de plus, et ne pouvons faillir à vaincre. Monsieur, je suis vostre serviteur; et sur ce vous baise tres humblement les mains, et supplie le Createur vous avoir en sa saincte garde.

De Nerac.

XLI. - LETTRE DE M. DUPLESSIS

A M. Sidney.

Du 8 juillet 1585.

Monsieur, enfin nous avons deviné; le mal est retombé sur nous, væcordià dicam, an fraude, an utroque? mais en somme il est sur nous. Ce prince est resoleu, et Dieu lui mesure la constance selon les tentations. Mesurés lui aussi vostre aide selon son besoing, et surtout vostre diligence selon la necessité qui le presse : c'est assés à vous. Au reste le gentilhomme present porteur vous dira ung mot de ma part. Utinam, et rursum, utinam! Je suis vostre serviteur, amateur de vostre vertu, desireux de vostre reputation; je vous baise bien humblement les mains, et supplie le Createur, monsieur, qu'il vous ait en sa saincte garde.

De Nerac.

XLII. — DECLARATION

Et protestation du roy de Navarre, de monseigneur le prince de Condé, de M. le duc de Montmorency, etc., sur la paix faicte avec ceulx de la maison de Lorraine, chefs et principaulx aucteurs de la Ligue, au prejudice de la maison de France; dressee par M. Duplessis.

CHACUNG sçait assés et se peult representer devant les yeulx quel estoit l'estat de ce royaume, quelle aussi la volonté du roy, lorsque ceulx de la maison de Lorraine, soubs le nom de Ligue saincte, ont commencé à s'armer contre sa majesté et à troubler le repos de son estat.

Car la paix par la grace de Dieu jettoit ses racines au profond des cœurs, et en arrachoit les animosités et desiances; la justice, soubs son ombre, reprenoit vigueur par l'exercice des loix; la relligion, tant de part que d'aultre, regaignoit l'auctorité qu'elle avoit perdeuc par la licence des armes sur les consciences; la noblesse se r'apprivoisoit ensemble, et se despouilloit des partialités; le peuple, apres tant de maulx, jouissoit de son labeur, et, par le bon ordre que le roy y avoit mis, estoit delivré de la mangerie et insolence du soldat; les maulx de la guerre en somme s'en alloient ensevelis et oubliés dans peu de temps soubs le benefice de la paix, cultivee assiduellement par la prudence du roy, qui n'avoit rien plus à cœur que de l'entretenir.

Et si encores il restoit de part et d'aultre quelques traces des anciennes miseres, que la paix, qui n'avoit duré, ni eu tant de force que la guerre, n'eust peu

460 DECLARATION DU ROY DE NAVARRE

effacer entierement, le roy, certes, qui avoit bien recogneu et les maulx et les remedes, prenoit ung chemin par le soing assiduel qu'il rendoit au bien de ses affaires, non seulement de mettre une fin aulx calamités de ce royaume, mais mesmes de le remettre en peu de temps en son ancienne dignité, prosperité et splendeur.

Or, ce bon acheminement de toutes choses au bien, repos et soulagement, tant de tous en general que de chacung en particulier, a esté interrompeu par ceulx de la maison de Lorraine, impatiens de la paix et tranquillité de ce royaume, qu'ils sentent contraire à leurs desseings, et aulxquels aussi ils sçavent tres bien ne pouvoir parvenir par la prosperité, ains par la confusion, ruyne et dissipation de cest estat.

Il n'est besoing de repeter ici quels sont ces desseings, qui sont assés decouverts par leurs effects; car chacung doibt estre prou instruict des intentions et pretentions de ceulx de ceste maison, et des moyens qu'ils ont teneus principalement depuis le regne du roy François II, jusqu'à present pour y atteindre. C'est en somme d'esteindre la maison de France, et s'y loger en sa place; c'est aussi pour faciliter ceste entreprise de diviser ce royaume, y nourrir les troubles, y affoiblir la noblesse par l'effusion et perte de son sang, r'abbaisser la grandeur et l'auctorité des princes soubs divers pretextes, d'avoir cependant les armes en main pour gaigner les partisans et abbattre œulx qui les empeschent, et tirer à soi la force et l'auctorité de cer royaume tant qu'ils peuvent.

C'est le chemin qu'ils ont teneu depuis le regne du roy François II, gaignans pied à pied, et de temps en temps en y employant toutes occasions; et chacung s'en peult resouvenir. Ils feirent accroire aulx premiers

princes du sang qu'ils avoient faict entreprise contre la personne de ce jeune prince; et, soubs ceste couleur, feirent ou emprisonner, ou retenir les premiers du sang, esloignerent tous les aultres d'aupres de sa majesté, defavoriserent les plus vieulx et plus fideles officiers de la couronne, et tenoient des lors, si Dieu n'y eust pourveu, le pied sur la gorge à cest estat. C'est chose cogneue, et qui ne pouvoit estre attribuee qu'au desseing de leur ambition. Car lors y avoit il prince en France, qui ne feist profession de la relligion catholique romaine? Lors estoit il question des differends de la relligion, de laquelle il se parloit encores fort peu en ce royaume? C'estoit la querelle, et ce l'est encores, de la maison de Lorraine sur celle de France. A l'ombre du roy ils voulloient regner, attendans meilleure occasion; et soubs son auctorité, et par son bras, se defaire des premiers princes du sang, qui leur eust faict obstacle, et des officiers de la couronne, qui n'eussent pas peu souffrir leur usurpation.

C'est selon ceste origine, qu'il convient juger de leurs actions suivantes : selon ceste cause, qu'il fault estimer tous leurs effects, que depuis ils ont voulleu deguiser pour les rendre plus favorables en diverses sortes, comme ils feirent peu apres, et font encores aujourd'hui. Mais la nature de l'eau ne se cognoist jamais mieulx qu'à la source, où elle est encores simple, et non meslee; la nature aussi des actions humaines, qu'à leurs origines et commencemens, premier que les inconveniens, que nous appercevons, nous aient reveillé les artifices, et nous aient appris de les couvrir.

Et c'est pourquoi aussi le roy François estant mort, soubs couleur duquel ils avoient gouverné, à cause qu'il avoit espousé la royne d'Escosse, leur niepce, se

162 DECLARATION DU ROY DE NAVARRE

voyans frustrés de ce moyen de dominer, la cause demeurant toutessois tousjours de mesmes, ils changent aussitost de pretexte. Car alors se voyans, par les estats generaulx de ce royaume, legitimement teneus et convoqués, appellés à compte de leurs actions et administrations, ils commencerent à vestir leur ambition d'ung manteau de zele de la relligion catholique romaine; eulx qui, quatre jours devant, donnoient esperance aulx princes d'Allemaigne de se ranger à la confession d'Augsbourg, rompirent violemment (commençans par le massacre de Vassy de plusieurs personnes de tous sexes, aages et qualités) la paix et tranquillité publicque, pour laquelle entretenir l'exercice des deux relligions avoit esté trouvé necessaire esdicts estats generaulx, dont s'estoit ensuivi ung edict solemnel, verifié en toutes les courts de parlement, qui ne pouvoit estre attribué ni à force, ni à crainte, ni à brigue aulcune, ains à la seule consideration du bien et repos de cest estat; s'emparerent à main armee de la personne du roy lors en bas aage, et de la royne sa mere, qui par sa prudence avoit consenti ledict edict; et par juste crainte de leur force, non sans reclamer souvent l'aide des princes du sang contre la tyrannie, feut contraincte de se rendre, et d'auctoriser enfin leurs passions; le tout pour engager, comme ils feirent, la jeunesse de ce prince en guerre et en haine contre son sang propre pour affoiblir ce royaume, et le rendre plus ouvert à leurs invasions, et pour attirer à eulx l'auctorité et la force, vivans et regnans parmi les armes pour en abuser ung jour à leurs pretentions.

Ce que certes ils auroient sceu faire si avant, que ce royaume en avoit esté embrasé de guerres civiles depuis vingt ét cinq ans, à la faveur desquelles ils auroient exercé leurs inimitiés, assouvi leurs vengeances, acheminé leur ambition, aulx despens du roy et de l'estat, aulx despens aussi, par leurs malheureux et execrables conseils, de l'honneur et reputation de la nation françoise, à laquelle on attribuoit le mal, qu'elle faisoit par le conseil de ceste maison fatale de Lorraine. Tant que le roy, qui regne à present, recogneut par sa prudence que ce zele de relligion, dont ils faisoient boùclier, ne leur estoit que pretexte; que le vrai esprit de la relligion, qui le touche trop plus qu'eulx, ne conseilloit poinct de violenter les loix publicques, rompre les sermens, emplir ung estat de meurtre et de sang; que c'estoit sans doubte en eulx ung desseing de parvenir plus hault, pour à quoi coupper chemin falloit composer les troubles du royaume par une equitable paix, qui feust convenable à la disposition presente, reservant à Dieu, qui seul regne sur les consciences, d'operer es cœurs de ses subjects pour les reunir et ramener en une relligion.

Mais comme ceste paix auroit esté faicte, non par force, mais par la bonne volonté du roy, qui, pour ceste occasion, auroit voulleu qu'elle s'appellast sa paix, n'auroient ceulx de ceste maison jamais peu imaginer de paix en la paix; l'auroient, au contrairé, traversee par tous les artifices qu'ils auroient peu; auroient aposté leurs partisans pour reduire à desespoir par toutes sortes d'injures, de torts et d'attentats ceulx de la relligion pour leur faire perdre patience et leur faire prendre les armes, afin que ce feust subject au roy de les armer contre eulx. D'aultre part aussi les auroient sollicités d'entrer en parti avec eulx soubs ombre de bien public, leur promettant toute liberté de leur relligion, et telles cautions et asseurances d'icelle qu'ils

164 DECLARATION DU ROY DE NAVARRE

eussent sceu desirer, n'omettant practique ou artifice quelconque pour remettre en trouble cest estat, duquel ils sçavent tres bien que le repos et la tranquillité combat et abbat tous leurs desseings.

Enfin, voyans d'une part le roy resoleu de plus en plus à maintenir la paix, ceulx de la relligion aussi ne desirans que repos soubs le benefice des edicts, mais surtout que feu monseigneur le duc d'Anjou seroit decedé, le roy sans enfans, lequel, par une opinion qui ne peult naistre que d'ung desir, ils se promettent survivre, et auquel, comme chacung sçait, ils ne donnent pas long temps à vivre, ils se seroient resoleus de se mettre tous aulx armes, se saisir des personnes de leurs majestés (comme ils eussent faict s'ils n'eussent esté decouverts) et de la plus grande partie de ce royaume, qu'ils pourroient, pour estre plus preparé à la mutation qu'ils s'imaginent; et pour attirer à ceste conjuration nombre de partisans, auroient pris et publié divers subjects et pretextes, aussi veritables l'ung que l'aultre, pour s'accommoder à la diversité des hommes, cachans le venin qu'ils portent d'ung beau tiltre d'antidote pour jouir et abuser de leurs affections.

Ces pretextes ont esté le bien public, la decharge du tiers estat, la reintegration de la noblesse en son ancienne dignité, le restablissement de l'Eglise en ses libertés et auctorités, le r'abbaissement de certaines personnes elevees en grandeur par le roy, la restitution de ceulx qu'ils pretendent qu'ils auroient traictés indignement, la nomination d'ung successeur catholique romain à la couronne pour la manutention de l'Eglise romaine; l'extirpation de l'heresie et extermination des heretiques par eulx pretendeus. Toutes lesquelles choses ils auroient promis effectuer premier que poser les

armes, et aulxquelles toutesfois chacung sçait comme ils ont satisfaict puis apres. La vraie cause demeuroit tousjours de mesmes, et c'est celle aussi qui seule a produict quelques effects; c'est d'avoir les armes en la main pour faire la loi au roy soubs ombre de l'extermination des heretiques, et se defaire des premiers princes du sang, et de ceulx qui principalement leur font empeschement, à sçavoir, qui font profession de la relligion, y estans nés et nourris, pour plus aisement venir à bout du reste.

Et de faict ceci auroit esté tres bien recogneu du roy depuis le commencement de leurs remuemens jusques à la fin. Car il a escrit par plusieurs lettres au roy de Navarre, qu'il cognoissoit bien que ce zele de relligion ne leur estoit que couverture; que leur propre but estoit contre sa personne, contre sa maison et son estat; cependant, parce que, soubs ce pretexte, ils auroient abusé plusieurs de ses subjects, qu'il le pryoit de voulloir patienter, tant qu'il leur eust faict discerner les couleurs d'avec les vraies causes; et qu'il s'asseurast qu'il recognoissoit l'entreprise faicte contre soi directement, et l'offense proprement sienne. Selon ceste mesme cognoissance et ce mesme jugement, auroit aussi sa majesté commandé, par lettres tres ex-. presses, à tous gouverneurs et lieutenans generaulx en ses provinces de courre sus à leurs troupes; les auroit aussi declarés et publiés rebelles, crimineux de leze majesté, perturbateurs du repos, et ennemis de l'estat, dont les lettres auroient esté verifiees en toutes les courts de parlement de ce royaume; seroient ensuivis plusieurs arrests, et partie auroient esté executés. Comme aussi vers les princes alliés de ceste couronne auroient esté faictes pareilles depesches, et commandé

166 DECLARATION DU ROY DE NAVARRE

aulx ambassadeurs de sa majesté de leur tenir propos à ce conformes; à sçavoir, cognoissant tres bien sa majesté par leurs effects passés et presens, et recognoissant aussi par les actes et tesmoignages susdicts que la souslevation de ceulx de ceste maison, quelque pretexte qu'ils prissent, estoit ung effect de leur premier desseing, c'est à dire, de la conjuration qu'ils ont de ruyner la maison de France; ce que nul n'ignorera, qui se pourra bien representer, et rapporter devant les yeulx leurs deportemens depuis vingt et cinq ans, et plus, pour les contempler tous d'une veue.

Pareillement auroit sa majesté, en ce mesme temps qu'elle les declaroit rebelles, faict republier son edict de pacification en tous les endroicts de son royaume, pour testifier à tous, et particulierement à ceulx de la relligion, qu'elle n'entendoit aulcunement encliner à leurs demandes; ains les condamnoit en ce qu'ils voulloient abolir ladicte relligion par armes, ayant bien cogneu que ce moyen n'estoit ni expedient, ni legitime; comme aussi sadicte majesté, par plusieurs lettres, auroit asseuré le roy de Navarre de ne faire rien au prejudice de son edict, ni de lui mesmes, duquel il recognoissoit la cause sienne.

Nonobstant, seroit adveneu que tout à coup auroit esté concleue une paix avec ceulx de ladicte maison et Ligue, de laquelle seroit procedé ung edict, par lequel ledict edict de pacification faict si meurement, et juré si solennellement par leurs dictes majestés, par les princes de leur sang, par toutes les courts de parlement, par les principaulx seigneurs et officiers de ce royaume, et tout fraischement reiteré et confirmé, seroit revoqué entierement, l'exercice de la relligion defendeu sur peine de la vie, ceulx qui en feroient

profession, dans le terme de six mois condamnés à sortir du royaume; les villes de seureté pareillement, que de son plein gré, et pour plusieurs considerations, concernans le bien et repos de son estat, il avoit prorogees aulxdicts de la relligion, delaissees tout promptement. Tout cela pour racheter la paix avec les susdicts rebelles et conspirateurs, declarés et recogneus pour tels par sa majesté, aulx despens de ses plus proches; aulxquels, qui pis est, on met les armes en main pour en faire l'execution. Chose repugnante à toutes loix, qui ne permettent jamais que d'ung arrest prononcé l'execution soit commise à la partie, ni mesmes qu'elle y assiste, feust ce pour prester la main à la justice.

Prye ici le roy de Navarre, tout ce qu'il y a de bons François en France, de considerer quelle occasion il a de se douloir. En leurs protestations publicques les conspirateurs s'adressoient directement à lui. Toutesfois, pour donner contentement au roy, et pour n'estre occasion de foule au peuple, il s'est conteneu en paix, et ne s'est jamais voulleu armer, quoique les voyant armés autour de lui. Il a veu que la volonté du roy estoit de venir à une paix; et le mal et la ruyne, qu'ils lui procuroient ouvertement, lui pouvoient donner occasion de la traverser par tous moyens. Nonobstant, pour le bien de ce royaume, il en a faict au roy les ouvertures par sa declaration expresse, qui s'est veue, et telles comme il espere, que toute la chrestienté approuvera, et qui ne seroient pas rejettees entre les plus barbares. Ils avoient parlé d'exterminer l'heresie; et les anciens chrestiens lui faisoient la guerre par conciles. Or, il se soumet à ung concile, et declare qu'il est prest d'estre instruit par icelui, et d'y acquiescer. Desiroient aussi quelque reformation ou changement en

ce qui touche l'estat; et tels differends, par les anciens statuts de ce royaume, se decident es estats. Or, declaroit-il qu'il s'en remettoit à une assemblee de trois estats, prest de la subir, quand sa majesté la vouldroit convoquer. Pretendoient en oultre que ledict seigneur roy de Navarre, et ceulx de la relligion se departissent incontinent des villes de seureté, nonobstant la prorogation que le roy leur en avoit donnee. Pour leur lever tout scrupule, il offroit de les remettre sans aulcung delai; qui plus est, de se dessaisir entre les mains du roy, lui et monseigneur le prince de Condé, des gouvernemens qu'ils ont en ce royaume, moyennant que les susdicts feissent de mesmes. Si est il notoire à ung chacung que c'est une espece d'inegalité inique d'egaler les enfans de la maison aulx estrangers. S'ils avoient au reste aultre differend à vuider avec lui, afin que le roy n'en eust la peine, duquel la personne cousteroit trop cher à ce royaume, supplioit ledict seigneur roy de Navarre, sa majesté de trouver bon que ceste querelle se demeslast, ou de ses forces aulx leurs, ou, pour abreger la misere publicque, de sa personne à celle de M. de Guise, ou de plus à plus, comme il vouldroit, soit dedans, soit dehors le royaume, en ung lieu de libre acces. Adjoustant que, s'il se pouvoit aviser d'aultres expediens plus propres pour pacifier l'estat de ce royaume, volontiers il les embrasseroit, et n'y espargneroit sa vie. Et supplioit tres humblement sa majesté de lui faire cest honneur de les lui ouvrir, s'il en voyoit. Cependant, sans avoir esgard à ces conditions si raisonnables, a esté passé oultre audict traicté de paix, au grand prejudice de l'estat et de la maison de France et du roy mesmes. Paix, à la verité, indigne de ce nom; car on juge assez que c'est la veille d'une guerre, et

SUR LA PAIX FAICTE AVEC LA LIGUE. 169 ceste guerre peult estre (Dieu y peult pourvoir par sa clemence) la veille de la ruyne et dissipation de cest estat; paix faicte avec les estrangers pour exterminer les domestiques, avec les rebelles pour ruyner les obeissans, avec les conjurateurs pour leur mettre l'espee en la main contre soi mesmes, pour en abuser à leur discretion; paix aussi qui n'a rien eu, certes, de l'air d'une paix, mais toute funebre, toute noire, et de mauvais augure, que le roy n'a signee qu'à main tremblante, que les catholiques ont refusé de jurer, comme l'arrest de leur mort, de la finale ruyne de l'estat qui, au reste, n'a apporté joie, ni aulx champs ni aulx villes, a rempli d'horreur tous les bons François de ce royaume, a seuls resjoui ceulx qui se nourrissent de sa mort.

Mais paix, à la verité, que ledict seigneur roy de Navarre cognoist tres bien ne debvoir estre imputee au roy, prince debonnaire et equitable, de la nature duquel elle est trop esloignee; ni à la royne sa mere, qui n'a eu desseing en ses travaulx, que de rendre la tranquillité à ce royaume; ains partie à la lascheté, et partie à la perfidie de quelques ungs du conseil du roy; les ungs serviteurs, les aultres parens ou alliés de ceulx de ceste ligue, qu'on sçait au commencement lui avoir extenué et amoindri le mal, le lui proposant facile à appaiser, afin qu'il ne se pourveust des remedes necessaires; et puis tout à coup l'ont representé si grand, quand les forces de la ligue ont esté bien avancees, qu'il s'est aisement persuadé qu'il pouvoit estre opprimé par eulx, s'il ne leur satisfaisoit bien promptement. Et de gens de ceste sorte on sçait qu'ung bon nombre avoit acccompagné la royne soubs ombre de la servir, qui advertissoient ceulx de la ligue de ce qu'elle avoit de plus secret, qui tenoient conseil ensemble, soubdain

qu'il estoient hors de sa chambre, des conseils qu'ils leur debvoient donner; qui, pour l'estonner en somme, lui figuroient des armees pour le secours de la ligue, qui n'ont jamais compareu, et n'avoient subsistance qu'en l'air. C'est par ce conseil que le roy a esté detourné de se servir de ses plus proches, qui n'eussent pas epargné leur sang pour le tirer de peine, et qui en avoient et la volonté et les moyens en main. Et pour recompense on les vend à l'estranger; on paye de leur sang et de leur vie, en tant qu'on peult. C'est par ce mesme conseil qu'on a refusé les offres des princes voisins, loyaux alliés de la couronne, pendant que l'argent d'Espaigne s'epandoit dedans la France pour la Ligue, et trouvoit entree dedans les villes, dedans les conseils, jusques aulx plus estroicts. En somme, le roy, et chacung le sçait, a esté livré par ceulx aulxquels il avoit autant d'occasion de se fier, si les biens receus pouvoient amender l'ame des hommes. Et s'asseure entierement, ledict seigneur roy de Navarre, que s'ils ont eu la puissance, par leur artifice et violence, d'armer ses bras contre lui, qu'au moins ses soupirs, ses souhaits et ses vœux, combattront pour sa querelle, qu'il a tres bien recogneu (et n'est pas possible qu'il l'ait oublié) estre la sienne.

Espere ledict seigneur roy de Navarre, que la pluspart des gens de quelque jugement de ce royaume, et ceulx surtout qui auront de plus pres approché leursdictes actions, et y auront mesmes esté meslés, auront bien sceu decouvrir le fonds des intentions de ceste ligue. Et pourtant se veult promettre d'eulx qu'ils ne feront tant de tort à leur honneur que de porter les armes contre la maison de France, soubs ombre de cest edict, comme ils en feroient aussi trop, et à leur jugesur la Paix faicte avec la Ligue. 171 ment, s'ils les pensoient avoir prises pour lesdicts pretextes, mesmes pour la seureté de leur relligion.

Ceulx de ceste ligue avoient pris divers pretextes; comme ils auront faict es ungs, ainsi est il apparent qu'ils font et feront de tout le reste. De ce bien public, qu'ils vantoient tant, et qui avoit animé plusieurs de la noblesse, mesmes la plus esloignee d'ambition, et la moins participante des corruptions du temps, il ne s'en est dit ung mot en cest edict. Des le premier jour ils s'en sont departis.

De la decharge du tiers estat qu'ils promettoient, ne s'est faicte aulcune instance en ce traicté. Au contraire, ils l'ont mis en train par ceste paix d'estre surchargé, et ruyné de plus en plus. Car, quant à ce qu'ils avoient promis en leurs declarations, que leurs gens de guerre vivroient de regle et payeroient tout, chacung sçait assez que jamais ne s'en est veu en ce royaume parmi les troubles, de plus dereglés et desordonnés en toutes sortes. Comme aussi ce qu'ils auroient protesté de n'attenter poinct sur les villes du roy, et de n'y mettre poinct de garnisons contre leur gré et consentement, n'a esté mieulx observé par eulx, qui en ont saisi les unes par la force; es aultres, qui les avoient receus de bon gré, soubs ombre de bonne foi, ont basti des citadelles et introduict des garnisons.

La noblesse n'en a pas receu plus de contentement. Car, en ce traicté, pour qui ont ils faict, que pour eulx mesmes et pour ceulx de leur maison? Et quels ont ils restabli es dignités, qu'ils pretendoient leur avoir esté ostees indignement? Tout ce qu'ils ont faict en somme, ça esté de faire partager la France à tous ceulx de leur maison, selon le desseing qu'ils ont de s'en saisir un jour, leur faisant accorder par la paix le gouvernement de

172 DECLARATION DU ROY DE NAVARRE

plusieurs villes d'importance, et de quelques provinces, tant sur les frontieres que dedans le cœur de ce royaume. Et, sur ce poinct, doibt considerer la noblesse de ce royaume, quel advancement elle pourroit esperer par leur moyen, quand il fault que vingt et quatre princes de Lorraine soient contens et assouvis, premier qu'aulcung d'eulx puisse atteindre à quelque dignité par leur moyen.

De la deue promotion aulx charges et dignités ecclesiastiques, ils n'ont pas eu plus de soing en cest edict; tesmoing l'evesché d'Autun, où M. de Mayenne a faict nommer son beau fils par force; non plus que de ses prerogatives, franchises et libertés, encores que voulant prendre le pretexte de relligion, c'estoit cest article qu'ils debvoient avoir principalement en recommandation. Au contraire, qu'on s'informe de leur vie, ils ont rançonné les presbtres, profané les monasteres, pillé les calices et les croix, et tous aultres meubles de l'Eglise. Tout leur a esté de guerre. Mesmes en faisant la paix pour se payer de leurs frais, en suivant les traces du feu cardinal de Lorraine, leur oncle, qui premier meit en avant la vente du temporel du clergé, ils ont proposé et tiré promesse d'en aliener pour cent mille escus de rente, et d'en poursuivre le consentement du pape, pourveu que tous ces deniers feussent affectés à leur remboursement. Et aussi sçait on en somme que de tout ce qui touchoit les trois estats, sans en faire instance, ni poursuite, ils se retrancherent des l'entree du pourparler de paix.

Quant à la faveur trop grande de quelques gentilshommes du roy, qu'ils appellent en leurs declarations sangsues du peuple, et qu'ils disoient voulloir rabattre, et ramener à leur poinct, il est tout commun qu'ils ont sur la paix faicte avec la ligue. 173 recherché vilainement leur amitié en toutes sortes; qu'ils l'ont voulleu racheter en leur remettant entre les mains les villes de leurs gouvernemens, qu'ils avoient soubstraictes par la guerre. Mais à leur grande honte, ils leur ont monstré le chemin de generosité et de courage, leur faisant cognoistre qu'ils ne desiroient leur amitié qu'en tant qu'elle pourroit estre utile à ce royaume.

De monsieur le cardinal de Bourbon qu'ils avoient mis en campagne, soubs promesse de lui faire liquider le droict, qu'ils lui ont faict accroire, qu'il peult pretendre à la couronne, ils se sont joués de mesmes, selon leur façon accoustumee, de ployer l'interest d'ung chacung au leur particulier. Car, depuis qu'ils l'ont veu engagé, ils ont teneu peu de compte de ce droict imate ginaire, mesmes ont eu honte d'en ouvrir la bouche, venant à traicter avec la royne. Si au reste il a esté question de quelque aigreur, de quelque poinct espineux, ils l'en ont faict instrument; ça esté monsieur le cardinal de Bourbon qui en a faict l'ouverture; eulx se reservant tousjours d'adoulcir les choses, de rappointer les personnes et tirer de la negotiation tout le gré et le profit à eulx.

Cependant c'estoit ung poinct principal, et dont ils faisoient grand fondement pour la seureté de la relligion catholique romaine, de pourvoir que le roy nommast ung successeur qui en feist profession: Et, soubs ce pretexte, comme soubs les aultres precedens concernant le bien public, ils avoient tiré à leur partiplusieurs de la noblesse, pensant que ce feust à bon, escient. Mais ils pretendoient gaigner seulement ce poinct qu'ils ont obteneu par ceste paix, et c'est celui seul duquel ils ont faict instance, d'estre saisis des fron-

174 DECLARATION DU ROY DE NAVARRE

tieres et des cless de ce royaume, qu'on avoit mesmes voulleu bailler à seu monseigneur; d'avoir aussi les armes en main, soubs ombre de la relligion, pour se rendre arbitres des conseils, pour donner la loi au roy tant qu'il vivra, ruyner les princes de son sang, et les loyaux serviteurs de la maison de France, et apres sa mort, qu'ils s'imaginent prochaine, usurper ce povre estat.

Car de croire, ou qu'ils puissent, ou que mesmes ils pensent venir à bout de l'extermination de la relligion, la preuve qu'ils en ont faicte en l'espace de vingt et cinq ans et plus, faict trop au contraire. Nos roys n'y ont espargné ni les artifices de la paix, ni les rigueurs de la guerre. Les aucteurs de ceste ligue y ont aussi deployé, et leurs bras et leurs finesses. Le nom de la Ligue n'a rien adjousté à leurs moyens, n'a poinct creé de nouveaulx soldats en ce royaume, et ne les a pas aussi rendus plus grands capitaines qu'ils estoient. C'est tousjours la France, partie de laquelle et la meilleure ne vouldra aider à ruyner la France. Et c'est d'abondant la maison de France assaillie par celle de Lorraine (car tous les pretextes sont prou decouverts à ung chacung), qui renforcera le roy de Navarre de vieulx officiers de la couronne, des princes du sang, des souhaits du roy, des soupirs de tous les bons François, sans acception quelconque de relligion, et diminuera d'autant ses ennemis. Joint qu'il n'est plus à propos, comme contre les vieulx Albigeois, de s'imaginer ici la publication d'une croisade. Car ce n'est poinct ung coing de France qui consent à ce parti. Il n'y a partie, il n'y a endroict du corps, il n'y a fibre quasi qui ne s'en sente. Et n'est poinct aussi la France qui ait seule poursuivi une reformation en la relligion. Ca esté ung mouvement

sur la Paix faicte avec la ligue. 175 commun aux estats et nations de nostre Europe. Les royaumes tout entiers se sont sequestrés du pape; les empires en ont esté entamés plus qu'à moitié; et tous ces estats, comme chacung sçait, consentent et compatissent, et sçavent tres bien cognoistre et eviter leur ruyne propre en celle de leur voisin.

Comme d'aultre part il n'y a prince en l'Europe, de quelque relligion qu'il soit, qui ne trouve tres estrange que, soubs couleur de relligion, on pretende exclurre ung prince non oui et non instruict, sans aultre formalité, contre les loix du pays, d'ung estat ou d'une succession, qui lui soit deue; car on sçait assés, par les histoires, quels sont les effects de la passion, de l'ambition et de l'envie. Sur le moindre poinct on pourra former une heresie. Heretique feut Philippes le Bel, quand il ne voulleut tenir ce royaume en hommage du pape, et pour tel feut retranché de l'Eglise. Les papes plus moderés, qui estoient devant et qui feurent depuis, n'estant meus de mesme passion, en ont opiné et decidé tout aultrement. Ung Concile fera la raison de tout; et qui le refuit, refuit la lumiere, refuit la raison, monstre ne chercher que les tenebres, et ne prendre la relligion qu'en vain.

Cependant, puisque le malheur est tel que le roy son souverain seigneur, partie par la violence et conspiration de ses ennemis, partie par la malice et collusion d'aulcungs de ses conseillers, ait esté forcé et induict à une paix de laquelle s'ensuit infailliblement, si tost n'y est pourveu, sa ruyne propre, la destruction de la maison de France et la dissipation de cest estat, proteste et declare le roy de Navarre, premier prince de son sang et premier pair de ce royaume; protestent aussi monseigneur le prince son cousin, prince et pair

176 DECLARATION DU ROY DE NAVARRE

de France, M. le duc de Montmorency, pair de France et premier officier de la couronne, avec les seigneurs, chevaliers, gentilshommes, provinces, villes et communautés, tant d'une que d'aultre relligion, associés à la conservation de cest estat, ce qui s'ensuit:

Premierement, que leur but n'est et n'a oncques esté que de voir le roy bien servi et obei de tous, et selon le rang qu'ils tiennent chacung endroict soi d'en donner l'exemple à ung chacung, comme il peult estre appareu par effects tous recens; qu'ils ne desirent aussi que de voir l'estat de ce royaume paisible et tranquille, comme il en estoit en train avant ces remuemens, et à ceste fin s'emploieront de tout leur cœur contre ceulx qui veullent troubler la prosperité du roy et de l'estat, et y deploieront volontiers ce qu'ils ont de vie et de moyens.

Et par ce que ci devant en auroient esté proposés quelques expediens au roy, soit pour decider les differends de la relligion ou de l'estat, que ses ennemis prenoient pour couverture, soit pour vuider les debats qu'ils pretendoient en particulier contre les princes de France, entre lesquels le roy de Navarre tient le premier lieu; il supplie tres humblement sa majesté se voulloir ressouvenir des offres sus mentionnees, conteneues en sa declaration, en date du 10 juin 1585, qui lui feut envoyee, escrite et signee de sa main; et, si aultres ouvertures lui sont faictes pour le contentement de sa majesté et le bien de ce royaume, sera tres aise de les entendre, et s'estimera heureux si elles sont telles que, devant Dieu et les hommes, il s'y puisse accommoder.

Mais particulierement, parce que ceulx de la Ligue, pour le pouvoir attaquer des à present, ont pris pour

SUR LA PAIX FAICTE AVEC LA LIGUE. subject de demander les villes de seureté, et y employer la force ouverte, s'il ne les remet incontinent; il supplie tres humblement sa majesté de se ressouvenir, comme au mois de decembre dernier passé 1584, il lui pleut en accorder la prorogation volontairement en pleine paix, sur les tres humbles requestes qui lui furent faictes pour le bien de ses subjects, qu'il jugea tres convenables à la paix de ce royaume; que depuis, par une force et main armee, il en auroit accordé de plus grandes, et avec moins de subject, à ceulx de la Ligue, s'estant eslevés contre sa personne, contre sa maison et son estat, mesmes, non content de leur laisser celles qu'ils avoient saisies, leur en auroit baillé quelques aultres d'abondant qui leur eussent deu couster à prendre deux ans de guerre et plus, dont auroit occasion ledict seigneur roy de Navarre, comme aussi tous les bons subjects et serviteurs de cest estat, de requerir le roy de leur accorder nouvelles seuretés contre ceulx de ceste Ligue, et ce, d'aultant plus qu'ils ont en leurs mains les principales frontieres, tant du costé de la mer que de la terre; pour attirer l'estranger dans le royaume; offre ledict seigneur roy de Navarre, derechef, de se desaisir de toutes lesdictes villes de seureté à lui prorogees par le bon voulloir de sa majesté, moyennant que les dicts de la maison de Lorraine et aultres de la Ligue, leurs adherens, se departent en effect de celles qu'ils ont, que les armes soient posees, les estrangers renvoyés, et eulx retirés en leurs maisons.

Que si, nonobstant offres si raisonnables, les forces s'advancent contre le roy de Navarre, monseigneur le prince de Condé et M. le duc de Montmorency, ou aulcung d'eulx ou de leurs adherens, ils supplient tres humblement sa majesté, de ne trouver mauvais s'ils

178 DECLARATION DU ROY DE NAVARRE

prennent conseil de la nature et de la necessité, qui apprennent de chasser la force par la force, et s'ils y emploient tous leurs amis et leurs moyens, et ce d'autant plus qu'il ne se combattra pas en Guyenne de la Guyenne, ni en Languedoc du Languedoc, ni en Dauphiné, Provence et aultres lieux, de la condition du roy de Navarre, ou dudict seigneur prince, ou dudict sieur duc de Montmorency; mais, sans doubte, de la condition et liberté du roy et de la royne sa mere, de la conservation des loix et de la tuition de tout l'estat; comme ils s'asseurent aussi (et cela leur double le courage), que, si leurs enuemis ont tant faict que de saisir ses armes, au moins il leur a gardé et reservé son cœur.

Pryent la royne mere du roy de se ressouvenir quel traictement elle a receu de ceulx de ceste maison lors qu'ils dominoient soubs le roy François II son fils, et de temps en temps quelle ambition demesuree elle a remarquee en eulx; elle qui premiere les a faicts recognoistre aulx roys ses enfans pour tels qu'ils sont, mais surtout qui auroit gagné le nom de mere du royaume, ne laisse opinion vers la posterité de l'avoir acheminé à sa ruyne et baillé en proie à l'estranger, rompant une paix publieque pour contenter les desirs particuliers des ennemis publics, et saisant porter à ses plus proches et aulx plus obeissans la peine qui estoit deue aulx perturbateurs et aulx rebelles, au lieu, tout au moins, qu'il se pouvoit faire une paix generale, si tant est que, pat sa prudence, elle jugeast qu'il feust necessaire d'abolir leur crime pour la paix de cest estat.

Adjurent ledict seigneur roy de Navarre, ledict seigneur prince et ledict sieur due de Montmorency, MM. les princes du sang, de ressentir ici à bon escient qu'il y va de leur maison et de leur sang; les pairs et

officiers principaulx de ce royaume, qu'il y va du serment et debvoir qu'ils portent et doibvent rendre à la couronne; tous les parlemens, qu'il y va des loix fondamentales de l'estat, desquelles ils sont conservateurs et gardiens; tous les ordres et estats de ce royaume, qu'il y va de leur ruyne et de la confusion de leurs familles; car qui onc se peult asseurer d'ung repos particulier en ung mouvement public, d'une tranquillité en une mer esmeue, d'ung estat certain en une mutation d'estat, d'une seureté privee en ung brigandage universel? tous les princes et estats estrangers, pareillement alliés et confederés de cest estat, de les assister en la defense qu'ils en entreprennent, ne permettant pas qu'une telle conjuration vienne à sa fin, pour la consequence qu'elle apporteroit à tous les estats de chrestienté.

Declarent devant Dieu, qui voit leurs cœurs, et devant tous hommes qu'ils font juges de leurs actions, qu'ils deplorent la condition du roy, assiegé dehors et enveloppé dedans les intelligences de ses ennemis; que leurs armes ne sont que pour lui, pour sa liberté, pour son service; et que pleust à Dieu qu'il eust voulleu mettre leurs affections en œuvre! car bientost ils l'eussent mis hors de toutes ces perplexités.

Quant au faict de la relligion, declarent de tout leur cœur, et sur leur foi et honneur lesdicts seigneurs roy de Navarre et prince de Condé, que leur intention n'est aulcunement de nuire aulx catholiques, ni de prejudicier à la relligion de laquelle ils font profession, ayant tousjours esté d'opinion que les consciences debvoient estre libres, et pour le faict de la leur estant prests de s'en soubsmettre à ung Concile; qu'ils embrassent tous les bons et vrais François, tant seculiers qu'ecclesias-

tiques et de toutes qualités, sans acception ni exception de la relligion, egalement les prennent en leur protection et sauvegarde, leurs consciences, honneurs et dignités, biens, vies et familles, pour les garantir, en tant qu'en eulx sera, contre toute oppression et violence.

Les exhortent tous, chacung endroict soi, selon son moyen et qualité, pour rendre preuve de ce qu'ils sont, de se ranger aupres d'eulx pour les secourir et assister contre ceulx de ceste ligue que le roy a declaré ouvertement avoir attenté à sa personne, à sa couronne, à son estat. Pour leur lever tout scrupule, M. de Montmorency, duquel la relligion n'est poinct en doubte, et duquel aussi la prudence est prou cogneue, pour sçavoir bien remarquer l'intention dudict seigneur roy de Navarre et seigneur prince de Condé, leur en monstrera l'exemple et leur y servira de guide, lui pair de France et premier officier de la couronne, auquel appartient le premier lieu en la conduicte des armes; et desjà, par la grace de Dieu, ils sont assistés et accompagnés d'ung bon nombre de seigneurs, chevaliers, capitaines et gentilshommes catholiques, qui ont recogneu le bon droict et la necessité de leur defense.

Quant aulx chefs de la Ligue, et ceulx qui leur adhereront à mesme intention, les recognoissent et declarent lesdicts seigneurs roy de Navarre et prince de Condé, et ledict sieur duc de Montmorency, ennemis du roy, de la maison de France et du bien de cest estat, tel que ci devant le roy les a declarés, tels aussi que ses courts de parlement, en verifiant ses lettres, les ont recogneus; et, suivant la teneur desdictes lettres et les commandemens du roy y conteneus, leur feront la guerre à toute oultrance, et les extermineront par tous moyens. Nonobstant, parce qu'aulcungs y en a qui auroient esté trompés et abusés par les pretextes de la Ligue, venant à s'en departir dedans deux mois de la date des presentes, et à se retirer chez eulx ou aupres d'eulx, ils les reçoivent en leur protection et sauvegarde comme dessus, n'entendant, en conformité des ordonnances precedentes de sa majesté, qu'ils soient recherchés ni molestés pour avoir esté seduits par les persuasions de la susdicte Ligue.

Pryent à mesme fin lesdicts seigneurs roy, prince et duc, à tous ceulx qui n'adherent à l'intention desdicts Ligueurs, qu'ils doibvent avoir prou recogneue, et qui toutesfois se retrouveroient dedans leurs places, troupes et armees, de s'en retirer et demesler au plus tost, pour le regret qu'ils auroient de ne les pouvoir bien discerner, n'estant leur intention de rendre participans à mesmes peines ceulx qui ne seroient compris en mesme crime.

Et parce que ledict seigneur roy de Navarre, ledict seigneur prince et ledict sieur duc sçavent bien considerer que toute guerre est ung fleau de Dieu, et surtout la guerre domestique en laquelle le povre peuple innocent souffre le plus, duquel des ceste heure ils deplorent en leurs cœurs les calamités et les miseres; ils supplient le Tout Puissant, de tout leur cœur, qu'il lui plaise deployer sa providence sur le miserable estat de ce royaume et de ce peuple, à ce que ce mal puisse estre detourné par quelque voie ou preveneu par quelque bonne paix; qu'il lui plaise aussi toucher les cœurs et ouvrir les yeux du roy et de la royne sa mere, pour s'appercevoir des expediens pius salutaires, amollir aussi la dureté et obstination, et reprimer l'ambition de ceulx de ceste maison et de ceste ligue, les rendant

182 DECLARATION DU ROY DE NAVARRE, etc. capables de meilleurs conseils, et plus convenables au repos de cest estat.

Sinon, et que leurs pryeres ne puissent tant obtenir de bien, pryent ung chacung de juger si jamais il y eut defense plus naturelle, plus necessaire, plus juste; de donner aussi le tort et verser la malediction sur ceulx qui les ont reduits à ceste extremité, ne leur laissant à choisir que, ou l'extermination de la maison de France avec la ruyne de l'estat, ou une defense legitime et necessaire; s'asseurent consequemment que Dieu benira leurs justes armes, et fera tomber sur les aucteurs de ceste Ligue, vrais aucteurs de nos miseres, la ruyne qu'ils pretendent du roy, et de toute sa maison et de son estat.

Faict à Sainct Pol de Cadejoux, le 10° jour d'août 1585.

XLIII. — LETTRE DU ROY DE NAVARRE

A divers princes, mutatis mutandis, par M. de Clervant, sur la fin d'aoust 1585.

Monsieur, je pense que vous aurés esté suffisamment informé de ces nouveaulx remuemens, que ceulx de la maison de Lorraine ont suscités depuis quelques mois en ce royaume, pretendant, sans doubte, par iceulx la ruyne et dissipation de cest estat; sans laquelle ils sçavent tres bien qu'ils ne peuvent parvenir à leurs imaginations. Ce sont choses elles mesmes que j'estime vous estre cogneues; car il n'a pas teneu à eulx qu'ils n'en aient abreuvé toute la chrestienté; et pour ce ne m'est besoing de les vous declarer plus specialement. Tant y a, qu'à l'occasion des susdicts remuemens, de quelques pretextes qu'ils se soient voulleu couvrir, ils

ont esté recogneus et declarés par le roy mon seigneur criminels de leze majesté et perturbateurs de son estat. Et en ceste qualité, a ordonné à tous ses lieutenans generaulx, courts de parlement et officiers, de leur courre sus, tant par force ouverte que par rigueur de justice, dont sont ensuivis quelques exploits d'armes, et plusieurs arrests en ses courts souveraines, et partie d'iceulx ont esté mesmes executés. Vous avés aussi esté bien adverti, monsieur, comme, entre leurs pretextes, ils m'avoient directement pris à partie à divers tiltres. Chose non nouvelle de leur part, ayans de long temps ceulx de ceste maison travaillé à la ruyne des princes du sang de ce royaume, entre lesquels je tiens aujourd'hui le premier lieu. Et aussi espere je que vous aurés entendeu les protestations que j'ai faictes au roy mondict seigneur, par certaine declaration que je lui ai envoyee escrite et signee de ma main, pour leur oster toute occasion de le troubler. Ils objectoient la relligion dont je fais profession: y ayant esté nourri et instruict des ma jeunesse, j'estime, monsieur, que nul ne doibt requerir de moi, qu'à leur appetit je force ma conscience. Mais je me suis soubmis à ung Concile, que j'ai pryé sa majesté de moyenner, promettant d'acquiescer à ce qui y sera dict. Ils proposoient aussi quelques griefs concernans l'administration de cest estat; je m'en suis remis à une assemblee des trois estats selon les statuts de ce royaume, quand il plaira au roy mon seigneur la convoquer. Au reste, monsieur, de ce qu'ils pretendoient contre mon particulier pour oster sa majesté de peine, je l'ai requise tres instamment de nous laisser demesler ceste guerelle, ou de leurs forces aulx miennes, ou, pour abbreger la misere du peuple, de ma personne à celle du sieur de Guise, ou de plus à plus

comme il vouldra, soit dedans, soit dehors ce royaume, en lieu de libre acces, nonobstant l'inegalité et disproportion qui est trop maniseste entre nous. Je pense, monsieur, que vous jugerés toutes ces offres equitables, ne pouvant, à mon advis, faire plus chrestiennement que de me soubmettre au jugement de l'Eglise en ce qui concerne ma relligion; ni plus raisonnablement que de me ranger aulx loix et statuts de ce royaume, encores que ce n'est aulx estrangers d'en chercher la reformation; ni plus honorablement, que de descendre au dessoubs de moi pour m'egaler à eulx, estans mesmes declarés ennemis de cest estat, et se declarans les miens, comme ils ont faict de gaieté de cœur. Nonobstant, monsieur, pendant que, pour contenter le roy, je supporte tout en patience, sans prendre les armes, lors toutesfois que les armes se remuent de toutes parts autour de moi, ils ont tant gaigné, partie par l'ostentation de leurs forces et partie par la collusion d'aulcungs leurs adherens, qui estoient demeurés pres du roy, qu'ils ont forcé et contrainct sa majesté à une paix avec eulx, qui m'est convertie à guerre ouverte, et sans doubte, si Dieu n'y pourvoit par sa clemence, en ruyne inevitable à cest estat. Une paix faicte avec les estrangers au dommage des princes du sang; avec la maison de Lorraine, aulx despens de la maison de France; avec les rebelles, aulx despens des plus obeissans; avec les perturbateurs, aulx despens de ceulx qui ont racheté la paix publicque par toutes les offres qu'ils ont peu, comme dessus. Et par là jugés, monsieur, combien elle m'est insupportable, voyant aujourd'hui les armes mises en la main des ennemis de cest estat et les miens, soubs le nom du roy, duquel toutesfois je sçais que les vœux et les soupirs combattent pour moi

contre eulx, encores que j'en voie les bras avec eulx et contre moi.

Or, monsieur, à une telle violence faicte au roy mon souverain seigneur, faicte à sa maison, à cest estat et à moi mesmes, je me suis deliberé de m'opposer de tout mon cœur; et, à ceste fin, rallier aupres de moi, selon le lieu que je tiens en ce royaume, tous les bons et vrais François, sans acception ni exception de la relligion, n'estant aujourd'hui question ici que de la defense de l'estat contre l'usurpation de l'estranger. Me confie aussi que tous les bons alliés et fidelles amis de ceste couronne considereront le droîct et la necessité de la juste cause que je prends, et ne m'abandonneront en cest endroict. Mais particulierement, monsieur, je m'addresse à vous, duquel je cognois l'affection envers le roy et son estat, m'asseurant que vous deployerés et employerés volontiers vostre pouvoir, auctorité et moyens pour reprimer les perturbateurs et leurs desseings; sçachant bien aussi combien il importe à tous princes et estats de ne laisser tels exemples d'usurpation à la posterité, et combien surtout à tous les estats et princes de la chrestienté, de ne permettre la mutation qu'ils entreprennent en ung tel royaume, qui depuis tant d'annees et de siecles tient en contrepoids (1) toute l'Europe. Or, ceci me suffira. Seulement, par ce que je desire fort que mes actions vous soient cogneues et approuvees, je vous prye, monsieur, de prendre la peine de voir ma declaration susmentionnée, et celle que depuis j'ai faicte sur la paix particuliere concleue avec les perturbateurs, au prejudice de la paix et foy publicque. Et sur ce, monsieur, etc.

⁽¹⁾ Ce mot n'est pas pour tous.

XLIV. — PROTESTATION

De M. le duc de Montmorency.

CHACUNG sçait de quel zele et affection nous nous sommes tousjours portés, en suivant la trace de nos predecesseurs, nommeement de feu de tres louable memoire Anne de Montmorency, connestable de France, nostre seigneur et pere, à la defense, manutention et advancement de l'Eglise catholique, apostolique et romaine; ayans assisté de tout ce qui a esté en nous les feus roys et le roy present regnant, à rechercher et practiquer tous moyens et toutes voies de la ramener à sa premiere splendeur, y ayans en toutes les occasions employé fort liberalement nos vies, et ayans signé la profession que nous faisons de la relligion catholique, apostolique et romaine, mesmes de nostre propre sang.

Mais ne voullons aussi dissimuler, comme aulx maladies nouvelles les premiers remedes ne succedent pas tousjours, que nous aurions de long temps apperceu que les moyens sanglans et rigoureux, dont on avoit usé quelques annees, pour parvenir au restablissement de ladicte Eglise catholique, n'estoient pas les plus salutaires, ni pour le regard des personnes en particulier qu'on pretendoit y ramener, ni mesmes pour le regard de l'estat de ce royaume, qu'il estoit question de pacifier et reunir.

Au contraire, que lesdictes personnes particulieres prenoient de là occasion de se roidir contre la violence du remede, qui naturellement eussent plustost cede aulx admonitions, à la bonne conversation et à la de-

termination d'ung concile; et que cependant les differends se changeoient en querelles, les querelles en divisions formees, dont ne pouvoit sortir enfin que la ruyne et desolation de cest estat.

Qui avoit esté cause qu'en conformité des derniers propos de feu de tres heureuse memoire nostre seigneur et pere, qui conseilla tres bien à leurs majestés, au lict mesmes de la mort, et mourant toutesfois des fruicts de ceste guerre, de composer ces troubles par une paix des deux relligions, attendant ung Concile; en ces mots, que les plus courtes folies estoient les meilleures, et qu'il estoit necessaire d'y mettre tost une fin; nous aurions tousjours teneu la main de tout nostre pouvoir à une paix, et à l'entretenement des edicts du roy, contenans et concluans l'exercice des deux relligions; estimant que, pour la restauration de cest estat, rien n'estoit si necessaire que la paix, et appercevans aussi tres bien que, pour avoir une paix durable, attendant la reunion des opinions par ung Concile, cest article seroit totalement necessaire.

Ce qu'auroient aussi tres bien recogneu leurs majestés, desquelles quelquesfois, ou par importunité, ou par presentation de nouveaulx moyens, ou par ostentation de nouvelles esperances, on auroit obteneu la rupture ou interruption des edicts de pacification; mais aulxquels tost apres ils se seroient veus contraincts de revenir, tant par l'imbecillité des susdicts moyens et vanité des susdictes esperances, que par avoir evidemment cogneu que la prosperité mesmes de telles guerres estoit une adversité à cest estat, et en attiroit la ruyne totale.

Comme aussi l'auroient tres bien apperceu tous les princes et seigneurs de ce royaume, pairs et officiers

de la couronne, courts de parlemens et aultres corps notables; ceulx en somme, qui, en general ou en particulier, sont interessés et obligés à la conservation, bien et salut de cest estat. Les estrangers seuls, qui se sont insinués depuis quelques annees au gouvernement de ce royaume, n'auroient pris plaisir à ce salutaire conseil, qui seul nous pouvoit rendre la paix, l'ayans toutesfois solemnellement juré et esprouvé, comme le remede unique aulx maulx de ce royaume, tous aultres en vain employés auparavant et essayés; desquels les desirs ne peuvent estre que suspects à ce royaume, sur lequel ils n'ont poinct de honte d'alleguer leurs droicts et leurs pretentions; en la paix duquel leurs desseings sont confondeus et ruynés, comme en sa ruyne et dissipation il leur semble bien qu'ils seront facilement establis et fondés.

Tels sont ceulx de la maison de Lorraine, aucteurs de ces derniers remuemens, desquels qui aura bien remarqué les actions depuis vingt et cinq ans et plus cognoistra evidemment le but, à sçavoir de nourrir la guerre domestique en ce royaume, croistre leur auctorité parmi les armes, rabbaisser ou extirper les premien princes du sang, lever du milieu les vieulx officiers de la couronne qui nuisent à leurs desseings, prenant tantost ung pretexte et tantost l'aultre, pour s'acheminer à la grandeur qu'ils s'imaginent.

Ce que leurs predecesseurs auroient commencé des le regne du roy François II, ayans esloigné de sa personne, soubs ombre de conspiration, les premiers princes du sang, defavorisé et renvoyé en leurs maisons les vieulx serviteurs de cest estat, nommeement seu M. le connestable premier officier de la couronne; reduict en captivité la royne mere du roy, prenans toute domination à l'ombre de la royne lors regnante, leur niepce; et que ceulx ci maintenant, suivant leurs erres, pretendent continuer, prenant le manteau de la relligion, pour saisir la personne du roy et regner en son ombre; attendant, comme bientost ils esperent, qu'il leur fasse place, ruyner les premiers princes du sang qu'ils pretendent heretiques, extirper en somme toute la maison de France, et tirer à eulx les dissipations de cest estat.

A quoi de faict ils auroient si bien travaillé, que, sans que Dieu, par sa grace, descouvrit au roy leurs conspirations, ils estoient saisis de sa personne; et, à faulte de ce, se seroient emparés de plusieurs bonnes places, auroient introduict des forces estrangeres dedans le royaume, soldoyees des deniers du roy d'Espaigne, et auroient reduict leurs majesté en telle perplexité, partie par la force, et partie par la collusion de leurs partisans, qui demeuroient pres du roy et de la royne, qu'ils en auroient obteneu une paix, deplorable à tous bons subjects de ce royaume; par laquelle l'edict de paix, et en somme la vraie et necessaire paix, est rompeue, et la guerre civile de nouveau rallumee en ce royaume, par laquelle la guerre seroit convertie et divertie des rebelles sur les obeissans, et des estrangers sur les domestiques et sur les proches de leurs majestés; et, qui pis est, par laquelle les armes sont laissees, ou, à mieulx dire, mises en la main de ceulx qui ont troublé l'estat, c'est à dire, l'estat mesmes abandonné à la dissipation des usurpateurs.

Paix toutesfois notoirement forcee; car, avant ces remuemens, le roy ne pensoit qu'à l'entretenement de ses edicts, et le recommandoit surtout à tous ses officiers et gouverneurs de ses provinces. Et, depuis ces remue-

mens, a declaré les aucteurs rebelles et criminels de leze majesté, ennemis de sa personne et de son estat; et comme tels a voulleu leur estre courreu sus, tant par la force des armes que par les rigueurs de la justice, et en sont ses declarations verifiees en toutes ses courts de parlemens.

Comme aussi telle a esté recogneue ceste fatale paix par tous les princes du sang, pairs et principaulx officiers de la couronne, qui ont faict difficulté de la jurer, comme prejudiciable à la maison de France, contraire au bien de l'estat, et par consequent repugante à leur naissance et à leur premier serment, et au deu de leurs dignités et charges.

Et pour ce est il que nous Henry, etc., ayans bien consideré le cours des affaires susdicts, et penetré les pretentions et intentions de ceulx de la maison susdicte de Lorraine contre la maison de France et cest estat; nous sentant à ce tacitement convié et appellé par les secrets vœux et souspirs du roy et de la royne sa mere, desquels nous recognoissons tenir toute nostre dignité en ce royaume, adjourné et adjuré par tous les princes du sang, pairs, principaulx officiers de la couronne, courts de parlemens, tous ordres et estats, qui deplorent avec nous telle violence faicte au roy, et preparee ouvertement contre sa maison et son estat; mais particulierement esmeu et pressé par la representation de nos debvoir et charge, estant et François et principal officier de la couronne, mesmes en ceste qualité tenant aujourd'hui le premier lieu es armes, disons, declarons et protestons ce qui en suit:

Premierement, que nous desirons la reunion et restauration de l'Eglise catholique, apostolique et romaine, de tout nostre cœur et pouvoir, plus sincerement que ceulx de la susdicte maison et Ligue, qui la prennent pour pretexte de leurs passions; n'approuvons pas toutesfois, veu l'experience des choses passees, ces remedes rigoureux, plus capables d'empirer que d'amender les playes; mais bien nous tenons à ceulx qui ont esté practiqués par les anciens chrestiens et les sages empereurs, qui ont decidé des controverses en la relligion, plus grandes beaucoup que celles ci, par bons Conciles. Pourtant supplions tres humblement sa majesté, pour la pacification de cest estat et reunion de l'Eglise en icelui, voulloir au plustost moyenner un bon et sainct Concile.

Par ce qu'il nous est notoire, que l'edict precedent faict en 77 est procedé du propre mouvement et de la pleine volonté du roy, comme il seroit appareu par la continuation d'icelui depuis huict ans, et par le soing qu'il avoit rendeu à l'execution dudict edict : et par la recommandation, tant de fois reiteree, qu'il en avoit faicte à ses courts souveraines, et à ses lieutenans, et generaulx, et gouverneurs en ses provinces; mesmes par la publication qui s'en seroit reiteree pendant et depuis ces nouveaulx remuemens; au contraire, qu'il nous appert que ce dernier edict, faict en juin dernier passé, par lequel le susdict est revoqué, est procedé de vive force, contre le gré de sa majesté, partie par l'extorsion des perturbateurs susdicts, et partie par la collusion des mauvais conseillers qui evidemment tenoient leur parti; declarons que, suivant la volonté de sa majesté à nous assés recogneue, nous sommes deliberés et resoleus de maintenir et entretenir le susdict eclict de pacification de septembre 1577, partout où nostre pouvoir pourra s'estendre; tenans pour forcé, et par consequent pour nul, le susdict edict de juin

dernier passé, sans que pour l'invalider il nous soit besoing d'aultre revocation.

En consequence de ce, declarons que nous tenons pour ennemis du bien et du repos de cest estat, ceulx qui ont esté, aucteurs de la revocation du susdict edict de paix, sans lequel nous recognoissons qu'en vain on travaille à pacifier ce royaume; ceulx nommeement qui adherent, et ont adheré, et adhereront à la susdicte maison et Ligue, tant à la poursuite de ladicte revocation qu'en l'execution d'icelle, n'ayans iceulx aultre but que de rallumer et fomenter la guerre, soubs divers pretextes, pour s'auctoriser dedans les armes. Tenans, au contraire, pour loyaulx subjects du roy et vrais amateurs de sa couronne, tous ceulx, de quelque relligion qu'ils soient, qui se contiendront es bornes de son edict, et qui le feront entretenir et maintenir, selon la part de l'administration qui leur sera echeue en ce royaume.

Mais par ce que nous jugeons assés que l'intention de ceulx qui ont extorqué cest edict revocatoire de la paix publicque, pretendent l'executer par armes et force ouverte, n'est pas proprement, ni de restaurer l'Eglise catholique romaine, chose en laquelle tant de bons et naturels François ne leur vouldroient en rien ceder, ains plustost les prevenir; ni mesmes de ruyner et extirper la relligion qu'ils pretendent contraire; entreprise qu'ils ont recogneue trop difficile, tant de fois tentee en vain, et par toutes sortes d'effects et d'artifices; mais bien, à la verité, souls ce pretexte, d'estre armés et assistés des forces de caroyaume, pour exterminer les premiers princes du sang, nommeement le roy de Navarre et monseigneur de prince de Condé, nourris et instruicts en la susdicta relligion, pour tant

plus facilement venir à bout par apres des aultres princes du sang, croistre cependant d'auctorité et de forces, et poursuivre la totale extermination de la maison de France, des bons et loyaulx serviteurs de la couronne, qui ne pourroient supporter leur usurpation et la finale subversion de cest estat. Pour ce, nous, recognoissans bien comme dessus nostre serment et debvoir envers le roy, sa maison et sa couronne, et considerans la force et violence dont ils ont contrainct sa majesté à s'obliger à sa ruyne propre, avons eu recours au roy de Navarre, premier prince du sang et premier pair de France, pour nous joindre à lui avec tous nos moyens, comme à celui auquel appartient surtout d'employer sa vie et ses moyens pour la liberté du roy, l'affranchissement de son voulloir et la conservation de son estat; protestant devant Dieu, et devant toute la chrèstienté, n'avoir aultre intention que celle que declarons presentement. Comme aussi nous declarons et protestons n'avoir recogneu audict seigneur roy de Navarre rien qui tende à aultre fin qu'à la defense du roy, conservation de la maison royale et manutention de cest estat.

En ceste confiance donc exhortons et conjurons tous les bons François, vrais catholiques, de s'unir et joindre à leur parti à ceste intention, se depouillans de toute defiance, faisans paroistre par là, qu'ils n'adherent poinct à la maison de Lorraine, et ne participent poinct aulx desseings de la Ligue; qu'il n'est question ici de discerner les relligions, mais de demesler les Lorrains et les François, les conspirateurs ligués et les bons catholiques. Estant ledict seigneur roy de Navarre comme nous qui lui sommes joincts, bien resoleus, comme ils sont directement contraires, de les traictér aussi de contraire maniere, à sçavoir prenans en pro-

tection les ungs, en leurs biens, vies, honneurs, consciences, comme nous faisons par ceste; poursuivant les aultres au contraire avec toute espece de rigueur, comme ils meritent. Toutesfois, d'autant que nous ne doubtons poinct que plusieurs n'ayent esté circonveneus par les perturbateurs de cest estat en leurs pretextes, les pryons pour n'estre compris soubs pareille rigueur, de se demesler au plustot de leurs troupes, afin que puissions aussi exercer en leurs personnes la difference de traictement telle que desirons.

Supplions tres humblement sa majesté de favoriser de ses souhaits nos justes armes; les princes du sang d'y bien resentir leur interest, et ne se frustrer du secours qu'ils se doibvent; tous les pairs de ce royaume et officiers de la couronne, de se ramentevoir leur serment, duquel, comme le plus ancien, nous debvons l'interpretation à tous, et y serions indignes et incapables si nous defaillions en cest endroit; tous les parlemens de ce royaume, de considerer que nous combattons ceulx que tout fraischement ils ont declarés conjurateurs et rebelles, qui n'ont rien faict depuis qui les amende; rien qui les excuse et justifie; qu'ils nous ont mesmes armés et animés pour leur courre sus et les exterminer; et particulierement se souviennent messieurs de la court des pairs, que nous leur avons presté les sermens de pair et mareschal de France, et qu'en nous investissant, nous sommes ceints d'une espee pour la defense du roy et de l'estat. Pryons tous les princes et estats alliés et confederés de la couronne de l'aider à ce besoing, et à ceste fin assister et appuyer la defense necessaire qu'en a entreprise le roy de Navarre, auquel nous nous sommes joincts, comme à celui seul, le roy estant possedé ou violenté des enneSupplions pour la fin le Tout Puissant, que nous prenons pour tesmoing de nos intentions, qu'il ne nous impute poinct les calamités et miseres qui accompagnent les guerres, mesmes les plus necessaires et plus justes; mais qu'il les renverse et convertisse sur ceulx qui, de gayeté de cœur, ont troublé la paix publicque, qui nous ont reduict à la necessité, ou de voir tout en ruyne, ou d'y opposer nos justes armes; faisant voir par le succes, et par la grandeur de la punition, que c'est que de rompre le repos d'ung peuple, et de mettre en confusion tout ung estat.

XLV. — INSTRUCTION

A M. de la Vieuville, gouverneur de Mezieres.

Octobre 1585,

Le roy de Navarre faict juge toute la France, des justes conditions aulxquelles il s'est soubmis, pour empescher la ruyne de l'estat.

Ne doubte aussi ledict seigneur roy, que chacung ne recognoisse le tort qui lui a esté faict, quant, au lieu d'accepter conditions si sainctes et raisonnables, tendantes à la vraie reunion du royaume et de l'Eglise, et par les plus legitimes voies, on a mieulx aimé prendre ung chemin qui divisera de plus en plus l'Eglise, et dissipera enfin et confondra tout l'estat de ce royaume.

Persistera neantmoins tousjours tres volontiers ledict seigneur roy de Navarre: en sesdictes conditions, voullant croire (et ne se pouvant persuader aultrement) que le roy a esté induict à ce mauvais conseil, partie par la force de ceulx de la Ligue, et partie par la collusion d'aulcungs de son conseil, qui la lui font croire trop plus grande qu'elle n'est.

Le roy de Navarre donc, tant pour le desir qu'il a de la reunion de la relligion en general, que pour le soing particulier qu'il a de son salut, est content d'estre instruict et enseigné en ung Concile libre, general ou national, et s'asseure que tous ceulx qui font mesme profession que lui ont mesme desir, n'ayant aultre but que la cognoissance de la verité pour le salut de leurs ames.

Et à fin que ses adversaires ayent à cognoistre que la proposition qu'il faict d'ung Concile est à bon escient et pour sortir effect, espere ledict seigneur roy de Navarre, quand il plaira au roy entrer en ceste volonté, lui faire telles ouvertures et si recevables d'une part et d'aultre que chacung sera contrainct de confesser qu'il ne tiendra poinct à lui, ni que le Concile ne se tienne, ni qu'il n'en reussisse ung bon effect.

Cependant, parce qu'il n'est ni selon raison, ni selon conscience, qu'attendant la convocation d'ung Concile libre, general ou national, tant de milliers d'ames demeurent sans pasture et sans moyen de servir Dieu en leur relligion, trouve du tout necessaire ledict seigneur roy, que l'edict dernier, extorqué par la force de la Ligue, cede à la raison et au bien de cest estat; à sçavoir, qu'il soit revoqué, l'execution d'icelui defendeue, et les choses remises en l'estat qu'elles estoient auparavant icelui, tant qu'aultrement par le susdict Concile y soit pourveu; estant tout certain qu'au default de ce, tous les estats de ce royaume souffriront des inconveniens et des miseres, qu'il n'est pas en la puissance des aucteurs de ces desordres d'empescher ni prevenir.

Le roy aura juste occasion de defendre l'execution dudict edict, attendeu que par icelui il pretendoit reunir la relligion par la rigueur des proscriptions, ou la force des armes, à laquellle on lui presente ung plus seur moyen de parvenir par la doulceur. Et n'y a personne de raison, qui ne juge l'ung trop plus digne de la prudence du roy que l'aultre; estant evident que de l'ung s'ensuivent infinis desordres et dangers tout evidens; au lieu que le moyen qu'à present on lui presente, est l'ordre ancien de l'Eglise chrestienne, agreable à Dieu, et dont par consequent on ne peult attendre par sa benediction que bon succes.

Et sur ce, se pourra representer à sa majesté qu'aultresfois il est veneu aulx essais de forcer les consciences par les armes; et tousjours enfin, apres infinis desordres et ruynes, est reveneu à une paix, par laquelle il a contenté et affranchi les ames et consciences de son peuple. Puis donc que la force n'a esté tentee qu'en vain, et qui pis est, non sans danger et dommaige et de son estat, et de son peuple, nul ne trouvera estrange qu'il essaye la voie de la doulceur, la voie practiquee par l'ancienne Eglise pour sa reunion propre. Et que pleust à Dieu qu'elle eust esté tentee la premiere; sans doubte, il n'eust poinct esté besoing d'aultres moyens.

Ceulx qui la refuseront, verifieront qu'ils n'ont rien moins que la pitié et la relligion à cœur; qu'ils abusent de ce nom sacré pour leurs desseings execrables; et sera aisé de les faire recognoistre à ung chacung pour tels qu'ils sont.

Et quand à ung si sainct desseing de sa majesté ils se vouldroient opposer par force, oultre qu'ils se trouveront sans doubte abandonnés de tous bons François et de tous bons chrestiens, le roy, se voullant servir de sa maison, et rallier son sang ensemble pres de lui, leur pourra fort aisement faire recevoir raison par force.

Le sieur de la Vieuville fera donc entendre à messieurs les princes qui l'ont depesché, la sincere intention qu'a le roy de Navarre de servir à bon escient à la reunion de tout l'estat, et leur fera bien considerer, et à tous qu'il appartiendra, combien les moyens par lui proposés sont dignes et raisonnables; et combien deraisonnables et indignes ceulx qui, soubs divers pretextes, les vouldroient ou empescher ou reculer.

Revoquant sa majesté l'edict dernier, pour parvenir à ung Concile, elle faict poser les armes à ses ennemis; elle donne aussi occasion au roy de Navarre de posèr les siennes, qu'il a prises pour se garantir contre leurs entreprises; elle rend enfin la paix et le repos à son royaume.

Que si ceulx de la maison de Guise, comme jà ils s'ebranloient, ont repris les armes, ont donné subject au roy de croire qu'ils soient sur le poinct de les reprendre, oultre les raisons susdictes, ce sera encores aultre subject au roy d'accorder ladicte revocation, attendeu qu'eulx mesmes auront violé l'edict et attenté contre la paix.

Mais surtout se resouviendra lediet sieur de la Vieuville, que les choses demeurant comme elles sont, il ne fault s'attendre à suspension d'armes; au contraire que le roy de Navarre, et ceulx de la relligion sont resoleus d'employer tous leurs moyens, et mesmes toutes extremités, n'estant raisonnable, ni selon Dieu, ni selon les hommes, qu'ils demeurent interdicts, attendant le Concile, de servir Dieu selon leur relligion et conscience.

XLVI. — LETTRE DE M. DUPLESSIS

Au roy Henry III, envoyee par M. de la Vieuville, gouverneur de Mezieres, veneu de la part de sadicte majesté vers le roy de Navarre.

Octobre 1585.

Sire, les grands capitaines, roys et empereurs, voulloient anciennement estre surnommés des pays par eulx conquis; et délà sont ces surnoms d'Africains, Asiatiques, et semblables. Vos predecesseurs, qui n'avoient pas faulte de grands tiltres de conquestes pour se remarquer à la posterité, ont choisi pour eulx, et vous ont laissé en heritage le surnom de tres chrestien, voullans declarer à tous que le vrai honneur des hommes estoit d'estre vrais chrestiens; le vrai triomphe des princes, que Dieu a establis sur les hommes, de defendre et advancer la relligion chrestienne.

Je suis donc d'accord, sire, avec ceulx qui vous dient que le but de vostre majesté doibt estre de reunir l'Eglise; œuvre propre à vous, œuvre qui est attaché à vostre diadesme, et dont vous devés estre jaloux, non moins que vostre estat. Es moyens, il se pourra faire que nous differerons de quelque chose; et le jugement de vostre majesté est par dessus pour choisir les plus expediens.

On propose de mettre en son entier l'Eglise par les armes. Qui peult mieulx juger de l'inutilité des armes, en ce qui concerne la relligion, que vostre majesté, qui les ayant employees si heureusement en toutes sortes contre ceulx qu'on pretend ruyner, n'en a eu enfin aultre profict, que de recognoistre que les plus heureux succes ne succedent poinct contre les consciences;

qu'aussi peu ont de puissance les armes sur les ames, que le rasoir d'ung chirurgien sur l'entendement de l'homme, et sur les affections qui lui commandent? Les remedes, sire, doibvent avoir une analogie avec les maulx et les malades. La force de sa nature gaigne sur le corps, le son sur l'oreille, la raison sur l'ame. Appliqués la force sur les ames, elle ne peult faire aulcung effect; aussi peu qu'ou la raison dessus l'oreille, ou le son sur la masse d'ung corps.

C'est donc ung moyen, non de reunir l'Eglise, mais de ruyner l'estat de ce royaume; non d'instruire et de convertir, mais de subvertir et destruire. Et comme rien au monde ne peult faire mal, qu'il n'en souffre sa part, la ruyne d'ung parti couste celle de l'aultre; la ruyne ou extermination de ceulx de la relligion, quelque bon marché qu'on en espere, la confusion et la desolation de tout l'estat.

Ces grands catholiques, sire, qui vous ont voulleu forcer à forcer vos subjects, qui ont requis vostre majesté à force ouverte de reduire ses subjects par force à l'Eglise romaine, peuvent ils esperer, je les prye, plus de forces ou plus de succes, que vostre majesté? Ils ont commandé à vos armees, animés de vostre volonté, appuyés de vostre auctorité, guidés de vostre bonheur, et favorisés de vostre presence propre, et vostre presence, je la compte bien pour la meilleure partie d'une bien forte armee. Ceste volonté n'y estant poinct, comme certes elle n'y peult estre, qui ne voit l'auctorité bien racourcie? qui ne voit les volontés qui en dependent, bien froides et amorties? Mais surtout vostre personne ne pouvant plus estre seure entre leurs armes, qui ne voit à l'œil que ce corps d'armee, quelque grand et fort qu'il soit, s'en ira en peu de temps en pieces,

n'estant reteneu par le respect de vostre majesté, n'estant aussi conteneu par sa presence?

Certes, naturellement l'enfant endure du pere; et quelque droict qu'il pense avoir, se contente de parer aulx coups, de mettre la main devant, ou de se soubmettre à sa colere. Si c'est ung valet ou ung estranger qui l'entreprend, l'enfant sort des gonds; il trouve du cœur et de la force. Autant que la reverence lui en rabattoit, l'indignation lui en redouble. Et c'est, sire, ce que naturellement on doibt attendre d'ung prince, premier de vostre sang, que serviteurs estrangers vous veullent faire forclore de vostre famille; d'ung million de vos naturels subjects eslevés dessoubs vostre majesté, et soubs la doulceur de vos commandemens, qu'ils vous veullent faire exterminer pour aller chercher pays ailleurs; desespoir en somme tel, que nous pouvons prendre d'une telle indignité et indignation; et les extresmes conseils, consequemment, qu'ung tel desespoir sçait bien produire.

A l'architecte jadis, qui, pour engager les hommes à entreprendre ung bastiment, leur faisoit accroire qu'il seroit de peu de coust, les loix imposerent grandes amendes. Et c'estoit toutesfois pour bastir, et la plus grande commodité demeuroit au maistre du logis, et l'ornement à la republique. Quelle peine sera suffisante, sire, pour ceulx ci qui, pour vous donner envie de ruyner vostre royaume, n'ont honte de vous en faire l'entreprise facile? entreprise, sire, dont le dommage est à vous, la misere nostre, tout l'emolument tombe en leur part.

Parlons donc ici de reunir, et non plus de ruyner. Les maulx dont est question sont anciens. Des maulx anciens les anciens ont bien sceu les remedes. Ceux là sont plus seurs, sans qu'ayons recours aulx corrosifs des empiriques qui, pour tout, ont rempli la France de sang et de meurtres, de deuil, de funerailles, de pleurs. Et le mal contre lequel ils crient, la division dont ils se plaignent, est en pire estat que paravant.

Les dissensions en la relligion ont travaillé l'Eglise ancienne; plusieurs heresies ont pullulé entre le peuple, ont mesmes infecté des empereurs. Qu'a faict lors l'Eglise? qu'ont faict les bons empereurs qui la gardoient? L'histoire en est pleine. Ils ont veu que l'heresie estoit une opinion; que toute opinion avoit son siege en la teste; que c'estoit une image fausse de raison, qui ne pouvoit s'effacer que par la presence de la raison mesmes. Ils ont donc assemblé les Conciles; ils ont appellé nombre de gens suffisans de toutes parts. Chacung a mis en avant paisiblement ce qu'il a sceu. L'opinion enfin a cedé à la science, l'ombre à la lumiere, la vraisemblance à la verité, la sophisterie à la raison.

La relligion chrestienne, sire, ne la pensons si obscure, que la verité ne s'en puisse eclaircir en ung Concile. Elle a ses maximes tres certaines, ses principes stables, ses consequences inviolables. La mesme raison qui demesle les difficultés des loix, les peult demesler en la theologie. Et d'autant mieulx, sire, que c'est la loi d'ung seul Dieu, qui ne reçoit point de contrarieté et ne peult souffrir d'antimoine; au lieu que les loix pastissent souvent, ou de l'inegalité des legislateurs entre eulx, ou d'ung seul à soi mesmes. Et c'est faire tort en somme à ceste loi, qui s'appelle vraie lumiere, de croire qu'elle ne puisse eclairer ni eclaircir les hommes, et qui pis est, de faire croire que sans feu elle ne puisse luire; qu'il faille brusler ceulx qu'on pretend en tenebres,

plus tost que de les tirer au jour, plus tost que de retirer de dessoubs le tonneau ceste lumiere.

On nous dira, sire, qu'il n'est aulcung besoing de Conciles; que partout il fault suivre l'Eglise, et qu'elle. ne peult jamais errer. Les livres fournissent assés de repliques là dessus. Le Vieil Testament et le Nouveau sont pleins aussi des erreurs enormes du peuple de Dieu. C'estoit l'Eglise. Le Concile de Hierusalem condamna le Christ et ses apostres. C'etoit donc l'Eglise qui condamnoit son salut. Et sainct Paul nous dict que l'Antechrist mesmes se verra assis au temple du vrai Dieu. Qu'est ce donc, sinon la perdition adoree en l'Eglise? Ce sont des subtilités pour fuir un Concile. L'homme est tenebreux et l'Eglise une assemblee d'hommes; et l'Eglise donc un corps opaque et tenebreux, qui n'est lumineux que de par Dieu; qui ne l'est qu'autant qu'il reçoit lumiere en sa parole. Tirez la de là. Elle peult broncher à toutes heures. Et pourtant voyons nous les anciens souspirer apres la reformation, de siecle en siecle. Et pourtant aussi ordonna le Concile de Basle, que de dix en dix ans se tiendroit ung Concile, pour empescher les erreurs qui pourroient s'introduire en l'Eglise.

On repliquera qu'on en a desjà teneu contre la doctrine mesmes dont est question. Certes, quand ainsi seroit, ce seroit trop tost se lasser de bien faire. Les anciens roys ne se lassoient pas si tost contre ceulx de leur temps, contre les arriens mesmes; ouïs en dispute en toute liberté, condamnés en trois Conciles, ils n'estoient point refusans d'ung quatriesme. Mais s'il se fault ennuyer de reiterer mesme remede, combien plus, sire, de retourner à la guerre, practiquee en vain par tant de fois? à la guerre de laquelle les meil-

leurs succes sont plus dangereux et plus nuisibles que les mauvais mesmes des Conciles? Et combien seroit il plus louable de rassembler ung Concile, que de hasarder une bataille? de perdre une conference de propos, que d'espandre tant de sang en vain? La verité est que sur les differends qui se presentent, ont esté teneus ci devant deux Conciles. L'ung feut à Constance par les diligences de l'empereur Sigismond, où, contre la foi publicque, les disputans de l'aultre part, Jean Hus et Hierosme de Prague seurent bruslés vifs, et s'ensuivit ung decret de ne tenir foi aulx heretiques; decret monstrueux, cause de tous les desordres et exces depuis adveneus en la chrestienté. L'aultre feut à Trente, au milieu des troubles de la France, auquel, par le prejugé de ce decret, il n'estoit pas seur de comparoistre; où nos ambassadeurs, sire, ne feurent ouis en leurs propositions chrestiennes, pour le repos de l'Eglise; où ils proposerent nullité contre les actes du Concile, qui depuis a esté refusé par toutes vos courts de parlement, par vostre Sorbonne mesmes, quelque instance que le pape en ait peu faire. Jugez, sire, s'ils ont juste occasion d'alleguer le prejugé de ces Conciles; jugez, sire, si ces deux Conciles vous doibvent oster l'espoir du fruict que feroit soubs vostre auctorité ung libre et legitime Concile.

La difficulté est en ung poinct; que le pape, depuis quelques siecles, a tiré à soi l'auctorité d'assembler, qui souloit appartenir aulx empereurs, comme il est tout clair par les històires, qu'ils ont convoqué les plus celebres. Et pour ce qu'il craint la reformation des abus de court de Rome, mais surtout la question tant debattue, si le pape est au dessus ou au dessoubs du Concile, dont y a decrets contraires, il est apparent qu'il

fuira, tant qu'il pourra, la convocation faicte principalement à la poursuite et instance de l'Eglise gallicane, qui a tousjours souteneu qu'il estoit au dessoubs du Concile. Et de faict, pour assembler le Concile de Constance, il fallut que l'empereur Sigismond prist la peine d'aller d'estat en estat solliciter les princes, ne voullant les papes contendans bloquer en ung Concile; et là feut concleu que le pape seroit subject au Concile. Et depuis, pour convoquer celui de Trente, on sçait quelles protestations il fallut faire, quelles practiques il feit avec les princes chrestiens, pour s'en defaire, quelle peine on eut de le tenir ensemble, depuis qu'il feut convoqué, de quels monopoles les papes userent pour le rendre inutile à l'Eglise, utiles à eulx seuls qui, contre le precedent, y feirent concleure que le pape estoit au dessus du Concile.

En ce cas, vostre majesté a barre sur le pape, et lui aura clos la bouche, sans que plus il ose vous solliciter à ruyner vostre estat, lui qui aura refusé le legitime moyen de reunir et reintegrer l'Eglise. Mais encores, sire, en telle necessité de vostre estat, et en tel default du pape, les roys vos predecesseurs, par le conseil de vostre clergé, mesmes de vostre Sorbonne, vous ont tracé de long temps ung beau chemin. C'est de convoquer par vostre auctorité, au default du general, un Concile national en ce royaume. Chose practiquee au grand bien de l'Eglise et de l'estat, par les roys tres chrestiens, et par les plus saincts d'entre les plus chrestiens. Et les Conciles nationaux bien ordonnés, ont bien souvent mieulx valleu que les universels, brigués et monopolés par les practiques de Rome.

L'histoire en est pleine, sire. Si vous attendés que le pape y pourvoie, il sera peult estre tard; et jà vostre

estat est en combustion. Et si est il à propos d'en faire instance. Que si on vous dict, sire, que ceste assemblee sera en vain; qu'en telles contentions, ne feust ce que pour la gloire, nul ne veult ceder à la raison, chacung veult defendre son parti jusqu'au bout; qu'il n'est pas au reste aisé de convenir de juges; et choses semblables, es quelles sans doubte je ne recognois peu de difficulté: je leurs responds, sire, que Dieu benira le sainct zele et l'ardente affection de vostre majesté pour la paix de tant de consciences, qu'il exaucera les souspirs et les clameurs de tant de peuples qui, de ceste congregation, attendront leur bien et leur repos. Et Dieu n'a pas dict en vain, par son prophete, que la pluie du ciel ne tombe jamais sans fruict, sa saincte parole sans quelque notable effect, dessus la terre. Mais, quand les choses seront veneues à ce poinct, j'ose encores me promettre, sirê, de faire ouverture à vostre majesté d'ung moyen dont les deux parties seront d'accord, par lequel tout homme usant de raison, ne voullant tromper soi mesmes, pourra discerner facilement la verité du mensonge, la doctrine fausse de la vraie. Si l'œil, sire, de vostre raison est nettoyé de taches, ne doubtez aulcunement qu'il ne voie la verité et la cognoisse. Car la verité l'eclairera et l'eclaircira; et assés claire de son naturel, pour se faire voir soi mesmes. Dieu doint seulement que nous deposions nos passions sur le seuil de la porte; que nous y entrions pleins d'ung vrai desir de voir et trouver la verité, vuides de tout interest particulier, sauf de nos ames.

Pensés, sire, quel contentement ce vous seroit en vostre vie, quel honneur à la posterité, d'avoir en vos jours, par vostre sagesse ou vostre exemple, compose

ung schisme de tant d'ans; d'avoir faict chanter, par toute la chrestienté, le chant des anges, Gloire soit aulx cieulx, paix en la terre; d'avoir preveneu en ce debvoir les papes, les empereurs et les roys catholiques, surmonté mesmes les tres chrestiens, vos devanciers, vous monstrant vraiment le tres chrestien; chrestien pour vous mesmes, chrestien pour la France, chrestien pour toute l'Eglise.

Dieu m'est à tesmoing que je vous escris de cœur. Tout ce que je cherche, sire, c'est de voir l'Eglise repurgee en nostre temps; c'est de voir le temple balayé, afin qu'y puissions converser tous ensemble. Chacung est d'accord, et de tout temps, qu'il y a des abus entre nous. Qu'on les repurge; ne nous bandons poinct contre nous mesmes; n'allons poinct subtiliser à nostre dam; ne nous monstrons poinct sçavans contre nostre salut.

Attendant ce bien de vostre majesté, supportons les ungs les aultres en doulceur. Laissons regner nos edicts de paix; laissons en repos les consciences. Ceulx, sire, qui vous conseillent de surseoir ou d'interdire cependant les exercices des ames, monstrent n'avoir pas grand sentiment des leurs, puisqu'ils cuident que les ames puissent vivre sans leur action et leur pasture. Ceulx qui pensent si aisé aux aultres de se passer de servir à Dieu selon leur conscience, font assés cognoistre à la loi qu'ils donnent à aultrui, quels ils sont eulx mesmes; contempteurs de Dieu, sans relligion, sans conscience.

Sire, vostre majesté excusera ma hardièsse. Es grands inconveniens, les grands hommes n'ont poinct mesprisé les moindres voix. La voix d'ung seul chien a saulvé d'ung sac mainte maison. La voix d'ung oiseau a peu garantir

le Capitole. Le debvoir et le danger justifient ma presomption: mon debvoir, car au danger ce me seroit crime de me taire; le danger aussi, car il est evident que c'est manifeste dol de faire semblant de ne le voir. Je supplie le Createur qu'il assiste, sire, vostre majesté par son esprit, le vous doint pour conseil et pour conduicte; et vous doint, apres tant de travaulx, voir son royaume fleurir dedans le vostre, voir le vostre prosperer dessoubs le sien, à sa gloire, sire, à vostre louange, et au repos de vostre povre peuple. Ainsi soit il.

XLVII. - LETTRE DU ROY DE NAVARRE

A MM. de la Sorbonne, faicte par M. Duplessis.

Messieurs, je m'adrèsse volontiers à vous es affaires dont est question, comme à ceulx qui faictes profession particuliere d'avoir l'œil que l'Eglise ne reçoive ou souffre aulcung dommage. Vous aurés consideré ces remuemens derniers de ceulx de la maison de Guise, fondés sur plusieurs pretextes bien divers; mais finalement qui se sont reduicts et retranchés à ung, à sçavoir de remettre en son entier l'Eglise catholique, et à ceste fin m'exterminer, et ceulx qu'ils pretendent heretiques; et la force et violence a esté telle, qu'il s'en est ensuivi ung edict au plus pres de leur intention. Je ne veux doubter, messieurs, que, selon vostre prudence, vous n'ayés assés cogneu que leur but est aultre qu'ils ne dient; c'est soubs le manteau de la relligion d'avoir les armes en main, pour ruyner les premiers de la maison de France, et se faire voie à l'usurpation de cest estat; mais je desire, messieurs, que vous jugiez pour le faict mesmes de la relligion, qui d'eulx ou de moi

ouvre ung plus beau chemin pour reunir l'Eglise et lever le schisme qui depuis ung si long temps nous met en peine. J'ai esté nourri, messieurs, en une relligion que j'estime saincte et vraie; et que j'en fasse profession de cœur, n'est besoing de tesmoignaiges, aultrement j'eusse bien sceu eviter tant de maulx, qu'il m'a fallu souffrir, aulxquels naturellement on ne prend pas plaisir; aultrement aussi j'eusse bien sceu mesnager la bonne grace du roy et la bienveillance de son peuple, qu'apres la faveur de Dieu, messieurs, je cognois bien m'estre tres utile et desirable. Estant tel, messieurs, il est par trop dur, et m'asseure que le jugerés ainsi, de requerir que, sans aultre forme, j'abandonne ma relligion, et fasse force à ma conscience et à mon ame. Et, quand je serois si miserable que de me forfaire en telle sorte, à bon droict serois je accusé de peu de conscience; à bon droiet vous defieriés vous de moi en toutes choses, qui aurois manqué à ce que j'estimerois debvoir à Dieu au jugement de mon ame propre. Ce qui raisonnablement se peult requerir de moi, c'est, à mon advis, ce que j'ai jà volontairement offert, et que tous les jours encores j'offre; c'est, messieurs, d'estre instruict en ung Concile libre et legitime, où les controverses, meues au faict de la relligion, soient bien debattues et decidees, et d'acquiescer à ce qui en sera dict: voie, comme vous sçavés, messieurs, practiquee de tout temps en l'Eglise en pareil cas, et par les plus sages roys et empereurs du monde; voie par vous, messieurs, conseillee souvent aulx roys predecesseurs, moyennant laquelle vous avés sceu maintenir, contre plusieurs usurpations, les privileges et droicts de l'Eglise gallicane; voie en somme que l'Eglise, en sa plus grande vertu, n'a oncques refusee pour reduire peu de gens de

basse condition, mesmes ung seul homme en son giron, et que beaucoup moins doibt elle, ou rejetter aujourd'hui, ou reculer, qu'il est question de plusieurs millions d'ames, de villes entieres, de grandes provinces, d'ung nombre infini de gens qualifiés, mesmes des premiers princes du sang et des plus proches de la couronne, qui ne peuvent pas estre forcés qu'à toute peine, ni exterminés qu'en la ruyne de l'estat, et qui, au contraire, s'ils sont une fois persuadés par la raison à changement, peuvent estre occasion d'une ferme paix en ce royaume, d'une solide reunion à l'Eglise catholique par le prejugé de leurs personnes, et d'ung siecle plus heureux, non à ce royaume seulement, qui seroit ung gain inestimable, mais à toute la chrestienté et à toute l'Europe, qui se ressent necessairement des miseres et calamités d'ung si puissant estat.

C'est, messieurs, l'offre que j'ai faicte au roy monseigneur, que je vous repete en la presente, et dont je vous appelle à tesmoings vers tous qu'il pourra appartenir, afin qu'il soit evident, et à ceulx qui vivent maintenant, et à la posterité, qu'il n'a poinct teneu à moi que cest estat ne feust paisible, aussi peu que l'Eglise ne seust ramence en sa premiere union, paix et tranquillité.

Car, quant à ce qu'on allegue contre moi, que je suis heretique, c'est à vous, messieurs, à leur apprendre, de vous aussi je l'ai appris, qu'il y a grand' difference entre heresie et erreur; que tous ceulx qui tiennent une heresie ne sont pourtant heretiques; qu'heretiques sont ceulx proprement qui procedent par ambition ou par opiniastreté, opiniastreté qui ne peult tomber en moi, qu'on n'a jamais pris la peine d'enseigner; qu'au contraire on a voulleu rebuter par tous

moyens, ne m'alleguant pour toute raison que vive force. Ambition aussi peu, qui ai renoncé au grand chemin de la grandeur, qui m'estoit ouvert par la relligion catholique romaine, et ai pris le contrepied, le chemin de persecution et de disgrace, perseverant constamment en celle qu'on appelle et que j'estime reformee.

Mais quand mesmes ainsi seroit, c'est contre l'erreur et l'heresie que s'assemblent en l'Eglise les Conciles; c'est pour guerir les malades que se font les consultations; le chirurgien ne vient au fer ni au feu que quand ses emplastres sont trop foibles. C'est ung argument de passion tout evidente de commencer la conversion par la subversion, et l'instruction par la destruction, par l'extermination et par la guerre, qui doibt commencer par la fraternité, l'admonition et la doulceur.

Et ne suffit d'alleguer que le Concile de Trente ait esté teneu, qui ait condamné la relligion en laquelle jevis, qu'ils appellent heresie. Vous sçavez, messieurs, quel a esté ce Concile, que jamais vous n'avés approuvé, et contre lequel tout l'estat et le clergé et les parlemens de ce royaume ont protesté jà plusieurs fois. Vous sçavés aussi quand il auroit esté legitimement teneu et convoqué, qu'il n'empesche pas la convocation d'ung aultre, mesmes s'il y va du salut et restablissement de telles personnes et d'ung tel estat. Au contraire, j'ai appris qu'il feut ordonné au Concile universel de Basle que, de dix ans en dix ans, il se tiendroit un Concile pour empescher les erreurs qui pourroient s'introduire en l'Eglise, et à plus forte raison pour en dechasser ceulx qui jà y seroient introduicts. Jugés donc ici, messieurs, qui des deux parties a plus de droict, qui des deux doibt avoir plus de respect en son droict,

qui des deux aussi propose ung expedient plus salutaire à cest estat, plus favorable à l'Eglise. L'estranger requiert que l'enfant de la maison soit chassé par force souhs pretexte d'heresie; l'estranger, qui de long temps trame d'entrer en sa place; moi, bien que par trop inegal à eulx, sur les actions duquel ils n'ont que voir, je n'ai desiré et ne desire que d'estre oui en ma cause, d'estre instruict en ung Concile, de mieulx faire, si mieulx je suis enseigné. Quel, messieurs, jugerés vous le plus equitable? et qu'est il donc besoing d'embraser tout ce royaume? car qui doubte que vous ayés à choisir, ou une guerre civile, ou un Concile? ou l'extermination d'une partie de cest estat par l'aultre, ou bien la reunion des deux partis de ce royaume en ung, qui sera tiree sans doubte en consequence en toute la chrestienté?

Or, messieurs, je vous declare encores, pour la fin, que je requiers et suis prest d'acquiescer à ung Concile; que je suis tout prest d'ouïr l'Eglise en icelui, et pourtant ne puis estre reputé de vous pour ethnique ou publicain; vous declare que, d'abondant, en default d'ung Concile general, pour faciliter les choses, je ne refuse ung national, comme souvent s'est veu practiquer en ce royaume, et par vostre advis et conseil propre.

Si, nonobstant ma requeste, on poursuit contre tout l'ordre de l'Eglise par proscriptions, meurtres et aultres rigueurs et barbaries, à ces enormes precipitations et violences, je me delibere d'opposer une juste defense; et la malediction en soit sur ceulx qui ont troublé cest estat soubs le faulx pretexte de l'Eglise! Je vous aurai pour tesmoings, messieurs, des equitables conditions aulxquelles je me soubmets; Dieu pour defenseur, qui

sçaura debattre mon bon droict contre mes adversaires, et lequel je prye, messieurs, etc.

XLVIII. - LETTRE DU ROY DE NAVARRE

A MM. du parlement de Paris, faicte par M. Duplessis. (1)

Du 11 octobre 1585.

MESSIEURS, je ne desire aultres juges que vous de tout ce qui s'est passé depuis ces derniers remuemens; car vous avés peu voir en combien de sortes les ennemis de cest estat et les miens ont tenté ma patience; avés veu aussi combien le respect du roy et le bien de ce royaume ont eu de pouvoir sur moi pour me retenir en ma juste douleur. Cependant il en est adveneu (et je m'asseure que vous reconnoissés tous le tort qui m'y est faict), que les ennemis du roy et du royaume

⁽¹⁾ On a cru devoir remettre ici ces paroles tirées de l'Abrégé chronologique de l'Histoire de France, par le président Hénault, année 1585. Dans un maniseste du cardinal de Bourbon, du dernier mars, il prend le titre de premier prince du sang, et recommande aux Français de maintenir la couronne dans la branche catholique. Cette déclaration, appuyée des noms de presque tous les princes de l'Europe, le pape à leur tête, et dans laquelle les ducs de Lorraine et de Guise étaient qualifiés de lieutenans généraux de la Ligue, était relative à un traité conclu avec le roi d'Espagne, dont la politique, appuyée du prétexte de la Ligue, mit le royaume à deux doigts de sa perte.... Sixte Quint, sans approuver la Ligue, publia une bulle par laquelle il excommunie le roi de Navarre et le prince de Condé, et les déclare indignes de succéder à la couronne. Le roi de Navarre appelle comme d'abus de cette bulle au parlement et au Concile général.

sont auctorisés et armés contre moi, tellement qu'il fault que ma patience et mon obeissance portent la peine de leur rebellion, et que l'estranger soit contenté aulx despens du domestique, et le serviteur de l'enfant de la maison. C'est chose, messieurs, qui m'est à la verité tres dure; mais j'ai Dieu pour protecteur, la France pour juge, vous tous pour tesmoings, le roy mon seigneur (car je n'en puis doubter) pour approbateur de ma sincerité. Je plains le malheur de cest estat; mais Dieu sçait à qui en est la coulpe, et leur en sçaura donner la peine. Je plains les calamités du peuple; mais on sçait qui a troublé la paix de gaieté de cœur, et quelle necessite m'est imposee de me garder. C'est en vain, messieurs, que je vous repeterois les conditions que j'avois proposees; vous les avés veues et sçavés assés si elles meritoient qu'on y eust quelque esgard. Ne me reste plus que de vous supplier tous, par le serment que vous devés à la France, de vous opposer, par vostre auctorité, à la conjuration que vous voyés à sa ruyne. Au moins n'assistés de vostre auctorité ung si pernicieux desseing; au moins favorisés de vos vœux ceulx qui veullent employer leur vie pour empescher la misere et dissipation de cest estat. Je ne veulx et ne requiers de vous que ce que vous jugerés selon vos consciences. Si ma cause est juste, je desire que vous l'approuviés; si elle est injuste, ordonnés, messieurs, ce que vous penserés estre de vostre debvoir et du bien de cest estat. Dieu m'est pour tesmoing que je suis et ai esté fidele au roy; que j'aime la France, que j'honore les gens de vertu qui la maintiennent; que je pleure la confusion et la calamité que j'y vois entrer en tous estats. Je le prye, messieurs,

qu'il vous assiste de sa vertu, vous que j'ai toujours

teneus pour colomnes de ce royaume, à ce que puissiés, en ces esbranlemens, avoir la louange, comme plusieurs fois, d'avoir sousteneu et appuyé le corps de cest estat; et j'espere aussi qu'il me fera la grace d'y servir si bien le roy mon seigneur, et d'y estre si bien servi des bons François, amateurs de sa couronne, que je lui ferai voir en peu de temps la fin de ses ennemis et le repos de ses subjects, à quoi je n'espargnerai ni mon sang ni ma vie. Sur ce donc, messieurs, je ferai fin pryant Dieu vous avoir en sa garde et protection.

Du Mont de Marsan,

XLIX. — ASSOCIATION DE BERGERAC.

Novembre 1585.

Nous soubssignés catholiques et de la relligion reformee, considerans la deplorable division qui est en
ce royaume, tant en la relligion qu'en l'estat; et en
l'estat nommeement, comme il est notoire à ung chacung, soubs ombre de la relligion; et prevoyans qu'elle
n'y peult longuement durer sans ruyne inevitable de
nostre patrie, à laquelle nous debvons nos vies et nos
moyens, et à laquelle nous sommes teneus, en tant
qu'en nous est, de rendre en meilleur estat à la posterité qu'elle ne nous est escheue en nostre temps;
après l'invocation du nom de Dieu, que nous prenons
pour tesmoing de nos justes intentions, declarons,
promettons et jurons les ungs aux aultres ce qui ensuit.

Premierement, comme il a pleu à Dieu nous faire naistre chrestiens, et que son service nous doibve estre à cœur sur et avant toutes choses, declarons que nous ne desirons rien tant que l'extinction du schisme qui est à present en l'Eglise chrestienne, et

la composition des differends en la relligion, pour nous voir tous reunis en la forme de servir à Dieu, comme jà nous sommes au but et intention de le servir. Et par ce qu'il est notoire qu'il n'y a moyen plus sainct, ni plus expedient, que par ung Concile general ou national, deu et legitime, moyen practiqué par l'ancienne Eglise de long temps; nous promettons et jurons tous devant Dieu d'employer tout ce qui est en nous et de nous, pour obtenir au plus tost ledict Concile, et en telle forme que les deux parties ayent de quoi prendre confiance et esperer contentement. Cependant, et en attendant que par icelui puissent estre composés les differends susdicts, promettons respectivement les ungs aulx aultres de vivre doulcement et paisiblement ensemble, chacung servant Dieu en sa relligion, selon le jugement de sa conscience, sans en rien troubler ni inquieter les ungs les aultres, ainsi que premierement avoit esté arresté par les estats generaulx de ce royaume pendant la minorité du roy Charles IX, et depuis par edicts solemnels des roys Charles susdict et Henry à present regnant, nos souverains seigneurs, meurement deliberés en leur conseil, jurés par les princes de leur sang et officiers principaulx de leur couronne, et homologués en toutes les courts de parlement de ce royaume.

Promettons, en oultre, de nous opposer par tous moyens à nous possibles, à tous ceulx, de quelque qualité qu'ils soient, qui vouldroient troubler ceste nostre union tant necessaire à cest estat, en entreprenant contre les ames et consciences, par la voie des armes, que nous recognoissons tres inutile et tres mal propre à la paix, reduction et reunion d'icelles. Et particulierement, d'autant que certains perturbateurs de cest estat qui font profit de nos divisions, auroient faict une

execrable Ligue, soubs pretexte d'exterminer l'heresie, mais sans doubte pour s'auctoriser parmi les armes civiles, et, par la confusion de toutes choses, se faire chemin à l'usurpation de cest estat; opposans à ceste conspiration pernicieuse ceste saincte union et concorde pour la conservation du royaume; sçachans et recognoissans tres bien que le but des dessusdicts est tout aultre qu'ils ne disent, comme est apparu par leurs effects; qu'au but mesmes qu'ils veullent sembler se proposer, les moyens qu'ils tiennent sont totalement contraires; qui plus est, que les edicts n'agueres publiés en conformité de ceste violence et passion, ne sont procedés du mouvement du roy, moins encores de la deliberation de son conseil, qui les auroit recogneus et declarés criminels de leze majesté; et affectés à la ruyne de l'estat et la sienne, et, auparavant leur conspiration, ne tendoit qu'à l'establissement d'ung bon repos, soubs edicts formellement contraires; ains sont extorqués par vive force et main armee, comme est trop notoire à ung chacung, et par la collusion de quelques ungs aupres de lui, complices et alliés evidemment de ces perturbateurs. Et pourtant à l'execution d'iceulx entendons et promettons d'opposer virilement nos justes armes, declarons pour ennemis tous ceulx qui tiendront la main, en sorte que ce soit, à l'effet d'execution desdicts edicts, estant tout certain qu'ils tiennent en ce faisant la main à violenter la volonté du roy notoirement contraire, et precipiter la dissipation de son estat en faveur desdicts perturbateurs.

Cognoissons tres bien que l'intention desdicts perturbateurs est de se saisir et emparer de la personne du roy, et de s'en defaire alors qu'ils verront leurs entreprises, menees et desseings bien acheminés; ce qui est maniseste par leurs demandes, quand ils ont requis que monseigneur le cardinal de Bourbon feust declaré successeur de la couronne, ung prince vieil, à nostre roy, jeune et en fleur d'aage, contre le cours de nature et contre le discours de la raison. Promettons donc unanimement d'employer nostre pouvoir pour delivrer la personne du roy et de leurs desseings et de leurs mains; et si tant estoit, ce que Dieu par sa clemence veuille detourner, que par fraude ou force ils veinssent à attenter à sa vie, jurons devant Dieu d'en rechercher et poursuivre la juste vengeance par voies de droict et de faict à nous possibles, tant sur eulx que sur leurs. adherens, pour laisser ung exemple notable à la posterité en leurs personnes, tant de la fidele affection de vrais subjects, que de la juste punition qui poursuit la perfidie contre son legitime prince.

Cognoissons que de long temps, notoirement depuis vingt et cinq ans et plus, le desseing desdicts perturbateurs avoit esté d'opprimer et abolir la maison de Bourbon, qui seule restoit de la maison de France, tantost soubs une couleur, et tantost soubs une aultre, pour tirer enfin l'estat à eulx, et se mettre en la place. Et d'autant que le roy de Navarre est chef de ladicte maison, et premier prince du sang de France, auquel, hors de tout doubte, la succession en appartient, l'en auroient voulleu tout fraischement forclorre soubs pretexte d'heresie, auroient poursuivi et obteneu une bulle du pape à ceste fin, et par toutes voies auroient tenté sa ruyne et attenté à sa vie; declarons pour ceste cause que nous cognoissons la maison de Bourbon estre la vraie maison de France, à laquelle seule, advenant la mort de nostre roy sans hoirs (que Dieu veuille empescher), appartient le droict de la couronne; promettons

en degré, contre tous usurpateurs quelconques, et, à ceste fin, employer et nos moyens et nostre vie jusqu'au dernier souspir et la derniere goutte de nostre sang; conjurons et adjurons nostre posterité de faire le semblable; et en tant qu'en nous est et sera, et que ceste vie le nous permettra, l'obligeons des à present à ceste juste union et necessaire entreprise, et l'en mettrons en chemin pour entrer en nostre place, ne cognoissans pour heritiers en nos maisons que ceulx qui defendront courageusement le droict de ceste maison et son juste heritage; et exheredans des à present tous ceulx des nostres, si tant ils pouvoient degenerer, qui vouldroient favoriser l'usurpation.

Recognoissons particulierement pour chef de ceste maison, auquel de droict divin et humain, au cas dessusdict, la succession en appartient, le mort saisissant le vif, sans qu'aulcune solemnité y soit requise, Henry, roy de Navarre, nonobstant exceptions ou oppositions quelconques; et, comme dessus, promettons inviolablement et jurons sainctement l'y maintenir, et à la defense de son droict obligeons nos biens, nostre vie et nostre sang, et hypothequons des à present, à peine de malediction, nostre lignee et posterité. Quant à la bulle du pape Sixte, declarons que nous avons appris de tous les roys devanciers, de tous nos predecesseurs vrais et bons François, de tous les prelats de l'Eglise françoise es siecles precedens, des arrests des courts de parlemens de ce royaume, et des decisions de la Faculté de Theologie, en icelui solemnellement, souvent et fraischement reiterees, que le pape n'a aulcung droict ni auctorité sur ce royaume, pour en decider ou liquider les droicts, ou pour s'ingerer à determiner

de la succession; que mesmes ses declarations, excommunications et interdicts ne sont receus par auctorité, et qu'il n'appartient qu'à ung seul Dieu de disposer des royaumes, qui a ordonné ceste lignee, et en ceste lignee certains degrés, que les hommes, quels qu'ils soient, ne peuvent auleunement troubler. Pourtant, declarons tenir pour criminels de leze majesté divine et humaine, ennemis de Dieu, de l'estat, ceulx qui, à present ou ci apres, soubs quelque pretexte que ce feust, oseroient troubler ou empescher le fil de ceste succession, par quelconques voies, en la personne dudict sieur roy de Navarre, à qui proprement es cas susdicts elle appartient. Et d'autant que nous n'ignorons poinct que lesdicts perturbateurs, sçachans qu'ils ne peuvent pas troubler ung droict si clair, usant des voies execra-. bles par trop practiquees en la corruption du temps, pour s'abbreger le chemin où ils pretendent, tascheront et desjà taschent, par divers moyens, de lui oster la vie; promettons et jurons tous, et chacung de nous, de defendre et garder sa personne à l'encontre, et la couvrir mesmes des nostres propres, aulx despens de nostre vie, de tout nostre pouvoir; obligeons à la juste vengeance de leurs attentats, que Dieu detourne, nostre sang et nostre vie, et de nos enfans, tant contre eulx que contre tous leurs adherens et successeurs; resoleus de servir la memoire dudict seigneur roy de Navarre contre eulx non moins ardemment que sa personne, d'avoir la raison par toutes voies de leur enormité sur leurs maisons, et de les laisser marqués de notoire peine et infamie à la posterité. Et pour ce, nous obligeons des à present chacung de nous à faire et executer tout ce qui, par l'advis de ceste nostre union, en sera ordonné apres l'invocation du nom de Dieu et

deliberation d'ung bon conseil, sans le pouvoir refuser pour exception quelconque que ce soit.

Es haultes poursuictes que dessus, cognoissons tres bien que rien n'est plus necessaire qu'une vraie et durable concorde; pour ce, promettons tous d'une voix, et donnons la main les ungs aulx aultres, envers tous et contre tous, de garder fidelement ceste union, nous entretenir, supporter et secourir les ungs les aultres envers tous et contre tous, sans nous pouvoir departir de ce serment, tant que Dieu, pour la gloire duquel nous le prestons, nous conservera la vie. Et, pour eviter la consequence des querelles et divisions qui pourroient sourdre entre nous, pour cause que ce feust, promettons, de quelconque differend qui pourroit estre ou naistre entre aulcungs de nous, concernant nos biens, vies ou honneurs, et tout ce que nous ' pourrions avoir de precieux, nous nous soubsmettons à la volonté dudict seigneur roy de Navarre, ou, en son absence, croirons le jugement de nos associés en juste nombre, sans que jamais, pour quelconque cause, nous venions aulx armes entre nous, voullans reserver et conserver ce que nous avons de force et de courage tout entier, pour n'estre exercé en aultre object qu'à la defense commune de l'estat, conservation des sainctes loix, et ruyne de nos ennemis.

Et parce qu'ayans à vivre comme vrais membres d'ung mesme corps, nous avons aussi à compatir aulx afflictions, pertes et douleurs les ungs des aultres, et les soulager en tant qu'en nous sera; consentons aussi et accordons pour plus ferme liaison ce qui ensuit.

Que si aulcung des associés en ceste nostre union vient à perdre ses biens ou equipage par saisie, confiscation, sac, bruslement, ou autre malheur proce-

dant de ceste guerre, ou union, il sera pourveu à sa necessité, eu esgard à sa qualité et merite.

Que s'il vient à estre prisonnier, nous emploierons tous moyens de le tirer en liberté, soit par eschange de prisonniers de contraire parti, qui pourront estre entre nos mains, soit par le payement de la rançon, suppleant à sa necessité de nos moyens, comme en pareil cas s'il est blessé ou estropié en ceste nostre union.

Que si aulcung des associés est tué en faict de guerre, ou mesmes aultrement en la desense et poursuite de ceste nostre union, nous prendrons le soing de subvenir à sa veusve et orphelins, selon leur qualité, et particulierement de la nourriture et instruction de ses ensans, comme ensans d'une mesme famille, nés et engendrés pour le service de Dieu et de la republique.

Que, s'il est faict tort à aulcung des associés en ses biens, vie, honneurs et liberté, par aulcung qui qu'il soit, le tort à lui faict sera reputé faict à nostre union: en general et chacung de nous en particulier s'appropriant, chacung à part soi, l'injure comme sienne, pour la faire reparer par tous moyens à nous possibles.

Et, pour subvenir aulxdictes charges, promettons nous tous en general et chacung en droict soi, oultre la subvention qui sera à l'arbitrage d'ung chacung, de contribuer de toutes prises, butins, proficts et emolumens quelconques, qui se feront sur nos ennemis, une cinquiesme partie, laquelle en chacune generalité, ou aultrement, selon qu'il en sera ordonné, sera mise es mains de deux ou plusieurs gentilshommes, personnes notables de ceste union, pour en faire la recepte

et la despense par les mandemens de ceulx de ladicte union aulxdictes generalités, ou d'ung conseil ordonné representant leur corps. Et d'iceulx deniers se rendront les comptes, de trois en trois mois, par devant les dicts de l'union, ou leur susdict conseil.

Et parce que ladicte cinquiesme partie ne pourroit evidemment suffire, veu la rigueur des edicts, guerres et persecutions, pour subvenir aulx necessités de tous, le roy de Navarre; soubs l'auctorité duquel ceste union se faict, sera par nous supplié tres humblement de nous voulloir accorder en chacune generalité, une cinquiesme partie de tous les biens des ennemis publics; à sçavoir, des habitans residens es villes esquelles l'edict dernier d'octobre est mis en execution, des bourgs et villages qui refuseront la contribution pour la guerre presente, par nous entreprise pour la paix et liberté publicque, des gentilshommes portans les armes avec les rebelles contre nous, et des ecclesiastiques qui contribueront et auront contribué pour les susdicts rebelles, ou aultrement, seront(1) suffisans de contribuer et payer, selon les reglemens, pour la manutention de la cause publicque.

Desirons que ceste nostre union soit expressement jurce et signee de tous princes, seigneurs, gentils-hommes, provinces, villes, communautés et personnes quelconques, qui vouldront des à present, ou ci apres, s'introduire ou faire recevoir en icelle; ayans prealablement invoqué Dieu et leu serieusement ce que dessus de poinct en poinct; et à ce que ceste nostre union soit profondement engravee en nostre cœur, et nous soit tousjours recente en la memoire, entendons que

⁽¹⁾ Recusans.

tous les premiers jours du mois elle soit leue haultement en tous lieux où se trouvera mediocre assemblee d'associés en icelle, la pryere à Dieu prealablement faicte, et qu'apres la lecture d'icelle, le serment susdict soit reiteré par un chacung, attestant le Dieu vivant de vivre et mourir en et selon icelle.

Le roy de Navarre sera supplié tres humblement d'estre chef de ceste union, faicte pour le bien de l'Eglise chrestienne, le repos du roy et du royaume, et pour son particulier service, et d'ordonner une marque, par laquelle ceulx de l'union soient recogneus des aultres; d'establir aussi les officiers necessaires pour la conduicte et direction de l'union, tant pres de lui qu'en chaque generalité, nommeement chancelier, conseillers, secretaires, thresoriers, receveurs, etc.; lesquels il sera pryé d'elire indifferemment des deux relligions, et des plus notables et qualifiés personnages en icelle, aulxquels promettons rendre chacung endroict soi tout l'honneur et le debvoir qu'à leurs dignités appartiendra.

Et, pour la fin, protestons devant le Dieu eternel qui voit nos cœurs, qu'en ceste union nous n'apportons aultre ambition que de sa gloire, de nostre salut et du bien de ce royaume; appellans la malediction de Dieu sur nous, si nous avons aultre but que cestui là, asseurés aussi de sa faveur et benediction en tous nos desseings et entreprises, parce que nous regardons à lui, et n'avons aultre intention que son service.

Faict, etc.

L. — LETTRE DU ROY DE NAVARRE

Au roy Henry III, dressee par M. Duplessis.

Decembre 1585.

Monseigneur, j'ai esté adverti de l'edict nouveau contre vos subjects de la relligion, par les executions qui s'en commencent desjà par deçà. Plus j'y vois d'extremité et de rigueur, et moins recognois je qu'il soit procedé de vostre majesté, quand je considere d'une part vostre bonté et prudence, d'aultre part l'obeissance et la fidelité que vos subjects de la relligion vous ont rendeue, tres mal recogneues, s'il fault que les desloyaulx et desobeissans soient gratifiés et satisfaicts à leurs despens. Je sçais, monseigneur, quels ont esté vos premiers arrests et jugemens contre la Ligue, quand ils estoient libres, premier que la force et la collusion eussent gaigné sur eulx. Le changement qui s'est veu depuis, il me seroit mal seant de l'attribuer à vostre volonté. Je l'impute, monseigneur, à la violence des perturbateurs de cest estat, et de leurs adherens; et tout le progres qui s'en est ensuivi, ou suivra ci apres, vostre majesté trouvera bon que je l'interprete en mesme sens, comme procedant evidemment de mesme cause. J'ai veu aussi, monseigneur, la declaration du Pape contre moi. Ainsi en feit son predecesseur Jules II, quand le roy Louis XII, vostre predecesseur, le sollicita de tenir ung Concile pour la reformation des abus en l'Eglise. Il exposa son royaume en proye, et delivra de serment tous ses subjects. Lors le roy, mon bisayeul, qui s'estoit adjoinct au roy Louis en ceste saincte intention, lui feut aussi joinct en la proscription que

publia le pape, soubs pretexte de laquelle le roy Ferdinand d'Espaigne se saisit violemment de son estat. Et mesmes hasard couroit le roy Louis, s'il eust eu voisin assés puissant pour l'entreprendre. Le peuple françois, mesmes le clergé, ne s'esmeurent poinct de ces vents là; ils sceurent bien alleguer que ce royaume ne dependoit poinct des loix du pape; qu'il n'avoit que voir en cest estat; mesmes que l'Eglise gallicane n'avoit à le recognoistre que pour l'ordre; et feut teneu ung Concile à Pise, non soubs lui, mais contre lui, où feurent examinees et condamnees ses actions. De moi, monseigneur, je ne suis au temps, et n'y veulx estre, que j'aye à debattre si le pape me peult debouter de la succession de ce royaume ou non. L'interest de ceste declaration vous touche proprement, et de plus pres, qui devés penser s'il est à propos, vous vivant, et en fleur d'aage, qu'ung pape s'ingere au gouvernement de cest estat, et à decider vostre succession : chose que nul oncques de vos predecesseurs n'a toleree; chose que vos courts de parlement et le clergé de ce royaume ont de tout temps debatteue et combatteue; chose qui va plus avant, et qui sert de marche et de degré pour ung plus hault desseing; c'est par cest essai, qui se faict en ma personne soubs pretexte d'heresie, de gaigner ce poinct sur vos subjects, qu'il soit dict et creu que le pape puisse disposer de ce royaume, pour, dans quelque temps, soubs aultre couleur, vous declarer incapable de regner; tout ainsi qu'en une telle circonstance que celle où nous sommes, à l'instance de pareils perturbateurs, Chilperic, roy legitime, feut degradé du royaume par le pape Zacharie. Le pretexte feut que, contre les Sarrasins, il estoit besoing de princes belliqueux, tels qu'estoient les enfans de Pepin; non d'ung prince pacifique, tel qu'estoit le prince legitime. Et qui vouldra garantir que ceulx à qui vous baillés vos armes, quand ils les auront affermies en leur main, n'en abusent contre vous, soubs ombre peult estre que vostre bon naturel n'aura pas esté capable de toutes leurs rages et fureurs? Je dirai ung mot pour faire cognoistre à vostre majesté leur passion precipitee. Ceste declaration du pape est de septembre, premier que vos deputés eussent rien negotié avec moi. Si me semble il qu'ils debvoient avoir tant deferé à vostre majesté, que d'attendre ma response et vostre depesche sur ce faict; comme aussi il me declare non seulement heretique, mais relaps, et incapable de plus recognoistre l'heresie. Quelle affection d'instruire! ains plustost quelle violence à me destruire, de me voulloir condamner premier qu'ouïr! de me voulloir, en tant qu'en lui est, fermer la bergerie, lui qui doibt courir de tous costés, s'il est pasteur, pour chercher la brebis egaree! lui, s'il est tel qu'il se dict, qui debvroit avoir le sein ouvert à toute heure qu'elle vient, pour la recueillir et la loger! Par là jugés, monseigneur, de l'intention et du desseing de ceulx qui ont sollicité ceste execrable bulle. Ils veullent se faire voie à vostre estat; ils veullent lever de leur chemin par tous moyens les obstacles qui leur nuisent. S'ils ne tendoient qu'à l'advancement de la relligion, ils me vouldroient convertir, non subvertir; ils m'ouvriroient à l'envi la porte, qu'ils me ferment. Et pour mon regard, je sçais que Dieu m'aidera; je me sie en lui; je despens de son voulloir; je suis certain qu'il est garant de mon droict, qu'il m'assistera d'amis, et me mettra au dessus de ceulx qui me tourmentent. Je plainds vostre majesté, assiegee de ceulx qui ont conjuré sa mort et sa ruyne, desarmee pour les armer, et pour les armer

contre son sang, contre ses plus proches, contre ses meilleurs et plus loyaulx subjects. Dieu veuille y pourvoir, qui voit nostre integrité et leurs menees. Et parce que j'ai remis le surplus de ce que j'aurois à dire à vostre majesté sur le porteur, je la supplie le croire comme moi mesmes, qui suis, et serai toute ma vie, quelque mal qu'on me pourchasse, etc.

LI. — LETTRE DU ROY DE NAVARRE

A la royne mere, faicte par M. Duplessis.

De mesme date que la precedente.

MADAME, j'ai sceu l'edict qui a esté resoleu contre moi, et ceulx de la relligion; je ne puis l'imputer à vos majestés, pour estre trop repugnant et à vostre naturel et à nostre merite; je l'attribue à la force, à laquelle je vois bien qu'il nous en fault opposer une aultre; et je me console que ma conservation soit conjoincte avec la liberté de vos majestés. Si ceulx de la Ligue eussent esté poursuivis de semblable rigueur, il n'en feust desjà plus de memoire. En cela se voit la passion trop evidente, que deux edicts l'ung sur l'aultre, rigueur sur rigueur, se soient faicts en peu de temps contre les innocens; contre les perturbateurs on n'a procedé qu'avec lenteur et connivence. J'ai ung poinct particulier, madame, que je vous supplie de remarquer. Pendant que les deputés du roy sont avec moi, et premier qu'ils aient eu ma response, je suis declaré relaps, descheu de tous droicts, incapable d'acquisitions et de successions; en somme, exposé en proie par la declaration du pape. Je ne crains, grace à Dieu, ses fulminations. Et les roys predecesseurs par leur exemple ont

assés monstré le cas qu'il en fault faire. Mais jugés, madame, si c'est pas trop entrepris à lui sur cest estat, mesmes du vivant d'ung roy plein de vigueur; si c'est pas aussi vous faire tort et aimer vostre ruyne, de troubler, en tant qu'il peult, les moyens d'une paix generale, que vous mesmes, par vostre labeur, taschiés de procurer à ce royaume. Or, Dieu veuille que les premiers effects de ceste declaration ne tombent sur le roy. Au moins me sie je en lui, madame, qu'il me donnera bien les moyens de les detourner de dessus moi. Puisqu'on en est là, je vois qu'il y va de tout; nul ne trouvera estrange que j'emploie tous les moyens que je pourrai pour me conserver et ruyner mes ennemis. En ung tel contraste, à mon grand regret, je prevois de grandes miseres; j'apprehende des calamités sur cest estat; mais Dieu sçait, et vous le sçavés, madame, qui en a la coulpe. J'en ai le cœur net. Je férois contre nature de ne defendre ma vie, et ma conscience, et ma maison. Je verrai le jour, madame, que le roy et vous recognoistrés, peult estre trop tard, en quelles mains vous avés mis vos armes. Vous plaindrés la paix qui s'est faicte à nos despens, et la guerre qui se faict vraiment aulx vostres. Dieu me gardera contre leurs menees et leurs menaces, et me fera voir la fin de tous mes ennemis. Les grands inconveniens que j'apperçois, madame, m'ont arraché ces propos, que je supplie vostre majesté prendre en bonne part. Le surplus vous sera dict par le porteur que vostre majesté orra, s'il lui plaist, et croira, comme moi mesmes, qui suis et serai tousjours, nonobstant toutes les peines qu'on me donne, etc.

Lettres de mesme substance feurent dressees par M. Duplessis, et envoyees à monseigneur de Montpensier, pour estre de sa part escrites au roy, à la royne et aux parlemens.

LII. — LETTRE ESCRITE A UNG CARDINAL (1),

Pour estre semee à Rome; faicte par M. Duplessis.

Du 4 decembre 1585.

Monseigneur, je vous ai escrit par ci devant l'espoir que j'avois de faire quelque chose à vostre contentement pour vostre abbaye de Foix. J'en avois escrit à qu'elques miens amis pres du roy de Navarre, qui m'en avoient faict assés bonne response, nonobstant ces troubles, et monstroient envie de vous faire plaisir. Depuis, je ne vous veulx poinct celer que j'y ai trouvé du refroidissement, et ne le puis imputer qu'à la declaration de nostre sainct pere, en laquelle on vous a veu signé, qui peult avoir enaigri ledict seigneur roy de Navarre. Et à ce propos, monseigneur, je m'enhardirai de vous dire que ceste declaration n'a esté trouvee bonne de tous; mesmes j'en vois des principaulx de nostre clergé, qui eussent bien desiré qu'on eust procedé d'aultre methode. Ils alleguent que ces voies extremes menent ordinairement les hommes en des precipices, au lieu de les ramener au bon chemin; que Luther feut ainsi desesperé par le pape Adrian, qui lui feit remuer choses aulxquelles il ne voulloit toucher: et vous sçavez, monseigneur, quel esbranlement en a souffert toute l'Eglise; que le pape Clement, par semblable rigueur, ruyna l'Eglise en Angleterre, ayant mis Henry VIII hors des gonds, qui, par despit, desauctorisa tout son clergé, saisit les principaulx biens qu'il possedoit en son royaume, et meit en chemin son

⁽¹⁾ Le cardinal d'Este.

successeur de jetter nostre Eglise par terre, l'ayant en ceste façon minee; que par ceste bulle on met le roy de Navarre en mesme train, de hair les catholiques et d'abhorrer le clergé, les armant et suscitant contre lui; tellement que, s'il n'est d'ung esprit bien moderé et esloigné de vengeance, venant à regner, on lui donneroit envie de les ruyner et mal traicter. Qu'au reste, advenant telle mutation, il se voit evidemment quel peril courroit tout le siege romain, estant adjoinct ung estat si grand et si puissant au parti protestant, qui l'emporteroit sans doubte à la balance. Je ne doubte, monseigneur, que le zele n'ait esté tres bon, nostre sainct pere voullant, comme je presuppose, prevenir les inconveniens d'une mutation, avenant que le roy de Navarre veinst à la couronne. Mais ils desireroient aussi qu'il eust consideré que les huguenots sont desjà forts; que beaucoup de catholiques suivront alors le roy de Navarre, le cognoissans indubitablement leur prince; et deferans plus à son droict naturel qu'à une excommunication du pape; qu'en la corruption où nous sommes il y a bien peu de zelateurs en ce royaume, beaucoup de gens disposés à s'accommoder à la relligion du prince, que les meilleurs mesmes, conduicts par les princes catholiques de la maison de Bourbon, se rangeront avec eulx aupres du roy de Navarre, considerans lesdicts princes, qu'on ne lui peult oster la couronne, qu'on ne fasse ung prejugé contre eulx. Alleguent en oultre, qu'il sera fortisié des princes et estats voisins, faisans mesme profession et interessés en l'execution de ceste bulle, tellement qu'il sera malaisé de lui empescher l'acces à la couronne. Eussent donc esté d'advis, les dessusdicts, qu'on eust tasché de le moderer et ramener par doulces procedures; qu'on n'eust

232 LETTRE ESCRITE A UNG CARDINAL, etc.

rejetté à plat les moyens qu'il avoit presentés, et surtout que la haine de ce qui s'entreprend contre lui n'eust esté toute renversee sur le clergé, c'est à dire sur l'Eglise. Il vous soubvient, monseigneur, de feu d'heureuse memoire le pape Farnese, qui voulloit mesmes faire cesser les persecutions, disant qu'elles estoient dommageables à l'Eglise. Ce que je dis toufesfois à vous, et non à aultre; et ne sçais comme vostre interest particulier m'a amené à parler du public. Pour y revenir, je vous supplie me commander ce que vous vouldrés que j'y face à l'advenir. Au surplus, nous souffrons jusques íci plus que nous n'agissons, et ne sçais à qui en est la faulte; on menace prou les huguenots de ces quartiers; mais cependant nous sentons leurs coups. Dieu vous en veuille bientost donner la fin. Monseigneur, commandés à vostre tres humble et tres devotieux serviteur, qui, sur ce, supplie le Createur vous avoir en sa saincte et digne garde.

Vostre tres humble et tres obeissant serviteur, B. F^e. de R.

LIII. — LETTRE DE M. DUPLESSIS

A madame la duchesse d'Uzès. (1)

Du 15 decembre 1585.

MADAME, je me sens bien heureux d'estre honoré de vostre bonne grace; mais encores plus, si je le suis de vos commandemens. Nous sommes attendans monsieur de Mayenne. Son affinee s'evapore en menaces, et les effects en seront tant moindres. Croyés, madame,

⁽⁷⁾ Grand' tante de M. Duplessis.

qu'il nous tarde de les essayer, et que ce sainct est taillé de ne faire pas grands miracles en Guyenne. Vous nous parlés de paix; mais permettés que je vous die qu'elle n'est encores meure. Il nous fault premier avoir remis leurs majestés en liberté, afin qu'elles puissent pleinement deployer leurs volontés. Et c'est nostre seul regret, que, par tant de maulx qu'on verra souffrir à ce povre royaume, il nous faille parvenir à ung repos. Nous nous approchons du Languedoc, et bientost, comme j'espere, vous orrés à bon escient parler de nous. Attendés en somme telle resolution et telles actions de nous, qu'une juste cause et ung bon cœur oultré de desespoir sçauroit produire. Dieu nous aidera, lequel je supplie, madame, vous avoir en sa saincte garde, etc.

De Leitoure.

LIV. — * LETTRE A M. STUKIUS,

Professeur en theologie à Zurich.

BINAS, mi charissime Stukui, a te accepi, quibus utique si diem quo datæ intuearis, seriuscute: at sin quo receptæ, maturè satis respondisse videar, in causa sunt crebræ prosectiones, quæ me hùc illùc distrahunt: ut quo loco consistam, vix mihi constare queat, nedum amicis; nedum verò tibi, qui ut amicitia intimus es, ità certe locorum ratione ni extimis censeri potes. Vis dicam? accidit mihi ex tuis illis quod iis solet, qui ex longinqua navigatione amicos revisunt; addidit lætitiæ temporis longinquitas; amicitiæ addere quidem vix poterat; dempsit saltem nihil, éx quo dissoccati sumus procellis recordaris, quoties hominum opinione mersi; quoties Dei benesicio emersimus, et sis verò intumescere

novi sluctûs, una Eurus, notusque ruunt, et providerit si, eo tempore, interim nolui te ignorare plerumque eò consilia spectare, ut cum conjuratis transigatus nostro damno dispendioque, nimirùm eâ conditione, ut religioni juniori in Gallia nullus deinceps sit locus; si id agitur, ex eâ pace nobis bellum; bellum ex religione tuum est, mi Stukui, tuos admonere, quorum spectata fides, pietas, prudentia; ne quo milite rem publicam Gallicam adversus concuratos juvare studuerunt in nostram perniciem perniciosi Galliæ consiliarii abutantur. Quod te mature admonitum velim, ut si occasio ferat, recorderis cæterum; scito, nihil nobis sincerá pace antiquiùs, nihil optabiliùs esse. Commendasti mihi Jacobum Rinegium à Bellicon multis nominibus: tuo nomine nihil potius in ea commendatione mihi erit. Si qua in re usui ei esse possum, amicum me propter te experietur, tu in eo. Et si fortè, odii mihi non levem occasionem præbuit qui tuas ad me dudùm diutiùs retinuit. Vale, mi charissime Stukui et me cum prorsus esse recordare, quem in academia lutesiana nosti, amantissimum tui, et porro cognosces quibuscumque in rebus probare volueris; iterum vale.

Bergeraci Petragoriorum, 10 junii, stylo nostro 1585.

LV. — * LETTRE DEDICATOIRE

A tres haulte, tres vertueuse et tres excellente princesse Catherine de Navarre, sœur unique du roy de Navarre.

Du 24 aoust 1585.

MADAME, je vous donne, puisqu'il vous plaist, mes meditations, si donner je puis, chose qui naist en vostre champ, et qui ne peult estre que vostre. N'y cherchés, madame, ni ung ordre ni ung beau langage; l'ordre et le langage viennent du loisir et du plaisir, et l'ung m'est osté par vos affaires, l'aultre par les douleurs de ce temps, qui pleurent plutost qu'elles ne parlent. A ceulx qui sont à leur aise appartient de composer des livres, à moi proprement de composer mon esprit contre les mutations de ce temps; à ceulx qui ont du plaisir, de se plaire en leur langage; à moi, mon langage ne me plaist qu'à me deplaire, si ce n'est, madame, qu'en ces meditations je vous aye peu plaire peult estre en me deplaisant. Ung temps viendra que je ferai chose, Dieu aidant, qui vous puisse aggreer dadvantage: ung air plus serein, une mer plus calme, qui composera tous nos esprits. J'en prye Dieu, madame, qui regit les vents et leurs haleines, et que cependant, madame, il vous, etc.

De Montauban.

LVI. - * AU ROY.

Du dernier de l'an 1585.

Monseigneur, je me console tousjours en l'opinion que j'ai que quelque mal qu'on tasche de me faire,

vostre majesté ne me peult voulloir mal, ni selon son naturel, ni selon l'obeissance que je lui ai rendeue. De mes ennemis, je m'en donne, certes, peu de peine; seulement il me deplaist de les voir couverts de vostre nom, qui m'eust deu couvrir contre leurs violences. Vous entendrés, monseigneur, comme leurs pernicieux desseings se continuent, tant par les memoires que je vous envoye par ce porteur, que j'ai recouvrés de lieu certain, comme par sa bouche mesmes, dont je supplie tres hamblement vostre majesté de voultoir ouir et croire. Rien ne me peult degouster de ressentir vivement ce qui vous touche, et je prye Dieu, monseigneur, qu'il vous veuille preserver des practiques de vos ennemis.

De Montauban.

LVII. — * ESTAT

Des gentilshommes, gens de conseil et officiers de la maison du roy de Navarre, desquels il entend se servir par chacung quartier de la presente annee, commenceant le premier jour de janvier 1585.

Ministres de la parole de Dieu.

M. de Clerville, pour le quartier de janvier.

M. de Vaulx, pour le quartier d'avril.

M. de la Rochechandion, pour le quartier de juillet.

M. d'Hesperien, pour le quartier d'octobre.

Aulmosnier.

M. Jehan Auzou, ordinaire.

Premier gentilhomme de la chambre et chef du conseil.

M. le vicomte de Turenne.

Surintendans de la maison, affaires et finances.

M. de Segur.

M. de Clervant.

M. Duplessis.

ESTAT DE LA MAISON, etc.

Maistre de lu garderobbe.

M. de Rocquelaure.

Chambellans pour servir par quartier, et de deux en deux annees.

La presente annee 1585.

JANVIER.

M. de Rieux.

M. le baron de Castelnau.

M. de Montmartin.

M. de la Barre.

M. de la Force.

M. de Linans.

OCTOBRE.

AVRIL.

M. de Bethune.

M. de Plassac.

M. de la Boulaye.

M. de Longue Barriere. M. le baron de Salignac.

M. de Chouppes.

M. de Favas.

· JUILLET.

M. Dandelot.

L'annee prochaine 1586.

JANVIER.

JUILLET.

M. de Mouy.

M. de la Roque Benac.

M. d'Esdiguieres.

M. du Pouet.

M. de Gouvernet.

M. de Blacons.

AVRIL.

OCTOBRE.

M. de Seneguas.

M. Deygivers.

M. de la Roque.

M. d'Auberville.

M. de Pujol Cazenove.

Encores que les sommes de ce chapitre soient tirees hors ligne, ne sera compté pour la presente année, ains servira pour la prochaine.

Gentilshommes de la chambre, pour servir aussi par quartier, de deux en deux annees.

La presente annee 1585.

JANVIBR.

M. de Thignomeille.

M. de Parabere.

M. de Belsunce le jeune.

M. de Fequieres.

M. de Hauteville.

M. de Mayac.

Le capitaine la Rane.

M. de la Cassaigne.

M. de la Borde.

M. Viala Falaische.

M. de Rastele.

M. du Brandat.

JUILLET.

M. de Valori.

M. de Haraulcourt Manican.

AVRIL.

M. de Noyan Briquemault.

M. de Lavedan.

M. de Savignac.

238

ESTAT DE LA MAISON

M. de Carnez.

M. de Salbeuf.

M. du Villar.

M. de Fouquerolles.

OCTOBRE.

M. de Rosny.

M. de Panfar.

M. de Saincte Coulombe.

M. de Villebeau.

M. de Brenier le jeune.

M. de Marueil Bethune.

M. du Saulmont.

M. du Ruat.

L'annee prochaise 1586.

JANVIER.

M. de la Rochegiffart.

M. de la Caze le jeune.

M. de Reyran.

M. de Sanaillan.

M. de Madailhan le jeune.

M. de Tauvenay.

AVRIL.

M. de Badefon.

M. de Saincte Marye Dumont.

M. de Minbray.

M. de Brenyer l'aisné.

M. de Royzé.

M. de Merle.

M. le baron de Rostanges.

M. de Nenfuy.

M. de Parneau.

M. de la Rocque Dubreuil.

M. de Reaulx.

OCTOBRE.

M. de Paulin.

M. de Saincte Coulombe Fayet.

M. de Corné.

M. de Beaumont.

M. de Puyguyon.

M. de Villeneufve.

M. de Matecoulon.

M. de Vignolles l'aisné.

JUILLET.

M. de Haraulcourt de Lorraine.

Encores que les sommes de ce chapitre soient tirees hors ligne, ne sera compté pour la presente annee, ains servira pour la prochaine.

Gentilshommes de la chambre, ordinaires.

M. de Buzenval.

M. de Constans.

Valets de chambre.

Le sieur d'Ysoré Jehan d'Armaignac, premier, Et Simon d'Armaignac, son fils.

Ordinaires.

Adrian Auzeres.

Beringhuen.

DU ROY DE NAVARRE.

Servans par quartier, de deux en deux annees.

La presente annee 1585.

JANVIER.

JUILLET.

Forfaniche.

Fayac.

Guillaume Guerbout.

Legrand Anthoine.

Jehan Du Puy.

Jacques.

AVRIL.

OCTOBRE.

Noel Henryot, dict Lachappelle.

Guilbem de Saincte Marie.

Robert de la Noue.

de Brugelles.

Jacques Margonne, dict Sainct

Pierre de Garre, dict le Rous-

Dame.

seau.

L'annee prochaine 4586.

JANVIER.

Chauvet.

Richard Torcy.

Claude Guerin.

Emmanuel de Bacove.

OCTOBRE.

Dazy.

Le jeune la Noue, au lieu de

AVRIL.

M. Noel.

Guillaume Girault.

Bloys.

Marc Hamelin.

Bertrand Cauldron.

Bunel Lepeintre.

JUILLET.

François Palu.

Encores que les sommes de ce chapitre soient tirees hors ligne, ne sera compté pour la presente année, ains servira pour la prochaine.

Barbiers de la chambre, servans quatre mois.

François Garsuan, pour servir en janvier.

en may.

François Rouault, François du Rion,

en septembre.

Huissiers de chambre.

Jehan Maingreneau, dict le Mere, en janvier.

Michel Boussemaine, dict Leval, en avril.

Chesnevert,

en juillet.

Randet de Cazenave,

en octobre.

Valets de garderobbe.

Claude Cottin,

en janvier.

Jehan de Sabalos, dict Mimaister, en may.

Jehan de Troguet, dict Peroton, en septembre.

ESTAT' DE LA MAISON

Portemanteaux.

Le Gravail,

pour servir en janvier.

Villeray,

en avril.

La Cave,

en juillet.

Guillaume Fouquet,

en octobre.

Medecins servans par quatre mois.

Le sieur Bertrand,

en janvier.

Le sieur d'Orthoman,

en may.

Le sieur de Riouperroux,

en septembre.

Chirurgiens servans chacung quatre mois.

M. Jacques Angerron,

en janvier.

M. Pierre Legendre,

en may.

M. Françoys Martre,

en septembre.

Apothiquaires servans chacung six mois.

Raymond de la Ruive,

en janvier.

Françoys Geoffrion,

en juillet.

Tailleurs servans chacung six mois.

Berthelemy de La Fernau,

en janvier.

Pierre Marrel,

en juillet.

Chaussetiers servans chacung six mois.

Jehan Bonenfant,

en janvier.

Jacques Bonenfant,

en juillet.

Tapissier.

Denis Lepage.

Gouverneur des paiges des chambres.

Le sieur de Lussan, ordinaire.

Precepteur desdicts paiges et de ceulx de la petite escuyerie.

Le sieur de Sainct Hilayre, ordinaire.

Valet des pages de la chambre.

Richard Beauchefin, ordinaire.

Faulconniers de la chambre.

Le sieur de Harambure, ordinaire.

Le sieur Gallois Legrand, ordinaire.

Le sieur Charles Legrand, ordinaire.

Clerc de la chambre.

Feret, dict La Coudraye.

GENS DU CONSEIL.

Chancelliers.

Messire Loys Dufour, seigneur de Gratenx, servant six mois. Messire Arnaud du Ferrier, les aultres six mois.

Secretaires des commandemens.

Hurosius Berziau, seigneur de la Marsilliere, ordinaire, pour servir en janvier.

Jacques Lalier, aussi ordinaire, et pour servir le quartier d'avril.

Jehan le Royer, seigneur de Panchien, en juillet.

Odet de Mazeliers, en octobre.

Maistres des requestes.

Me Bertrand de La Valade, en janvier.

Me Michel Erard, en avril.

Me Soffre Calignon, ordinaire,

et pour servir en juillet.

Me Jehan Dufraire, en octobre.

Me Jehan de la Burthe, pour servir à Paris.

Me Inard Brachot, pour servir à Paris et en court.

Me Pierre Pelisson, ordinaire, et pour servir de lecteur.

Secretaires signans en finances.

Me Ramond de Vicose, ordinaire.

Me Jehan de Mongaurin, pour

servir en janvier.

Me Guillaume de Severac, en avril.

Me Jehan du Jay, en juillet.

Me Martin Jouye, seigneur

d'Ardre., en octobre.

Secretaires ordinaires servans par quartier.

JANVIER. Me Thomas Lambert.

Me Arnaud de Sainct Pie. OCTOBRE.

Me Anthoine de Lomenie. Me Jehan Pancherive, seigneur de Lamberdiere.

Me Pierre Bordenave.

Me Guillaume Mesples.

Mc Le Gruyer. Mc Jehan Cussonnel, pour serjuillet. vir et succeder au premier

Me Salomon Certon. quartier vacant.

MÉM. DE DUPLESSIS-MORNAY. TOME III.

242

ESTAT DE LA MAISON

Tresoriers generaulx de la maison et finances.

Me Vincent de Pedefelaux, servant l'annee sur cest estat.

Mº Marc du Perray.

M^c Julian Male.

Huissiers du conseil servans chacung six mois.

Jehan Blanc. Jehan Dihars, en janxier. en juillet.

Maistres d'hostel.

Le sieur Cristofle de Modene, en janvier.

en avril. Le sieur de Chreveroches,

Le sieur d'Espalungues, en juillet.

Le sieur d'Estourneaux, en octobre.

Controlleurs de la maison.

Me René Sinault,

en janvier.

Me Pierre de Lafons,

en áviil.

Me Pierre Juglet,

en juillet.

Me Anne Foussart,

en octobre.

Me Laurent le Poulalier,

ordinaire.

Gentilshommes sérvans par quartier de deux en deux annees. La presente annee 1585.

JANVIÈR.

JUILLET.

Le sieur de Grans Maisons.

Le sieur de Sery.

Le sieur de Fressillon.

Le sieur de Vassieux.

Le capitaine Mesnil.

Le sieur de Jonquières.

Le sieur de Beauchamp.

Le sieur Désportés.

AVRIL

OCTOBRE.

Le sieur de Laporte Yssertieux.

Le sieur de Sainct Pater.

Le sieur Du Puy le jeune.

Le sieur Duyson.

Le sieur de Rimbelure.

Le sieur de Boesse le jeune.

Le sieur de Gessan.

Le sieur de Boissorran.

Le sieur de Lambert.

Le sieur de Menasse.

L'annee prochaine 1566.

T T T A T X Y T "

Le sieur de Chambray le jeune.

Le sieur de Rioux.

Le sieur de Monbartier.

Le sieur de S. Germ. Falaische.

Le sieur de Sainet Hermine.

Le sieur de la Garcie.

Le sieur de Monteils.

Le sieur de Corne le jeune.

JUILLET.

OCTOBRE.

Le sieur de Ricart.

Le sieur de la Combe.

Le sieur de Buren, nepveu de

Le sieur de la Binardiere.

M. de Resignan.

Le sieur de Verac.

Le sieur de Mezieres l'aisné.

Le sieur de Melet.

Le sieur de Vilate.

Encores que les sommes de ce chapitre soient tirees hors ligne, ne sera compté pour la presente année, ains servira pour la prochaine.

Escuyers d'escuyerie.

Le sieur de Lone, premier escuyer.

Le sieur de Frontenac, ordi-

naire, pour servir

en janvier.

Le sieur de....

en avril.

Le sieur du Pin,

en juillet.

Le sieur d'Aubigné,

en octobre.

Escuyers de la grande escuyerie et cavalcadour.

Le sieur de Fontlebon.

Le sieur de la Bergerye.

Et sont payés par estat à part. Neant.

Mareschaulx des logis.

Le sieur de Renvoysé,

en janvier.

Le sieur de la Coste,

en avril.

Le baron Pateau.

en juillet.

Le sieur de l'Espine,

en octobre.

Fourriers.

Jehan Desportes, dit Vizet, ordinaire.

JANVIER.

Jehan Duveguier, dict Varrane.

Françoys du Mirail.

Bernard de Pesart, dict Rago.

MAY.

Françoys de la Riviere, dict les Fontaines. Jehan Despied, dict l'Ausmonier.

Galian Desportes, dict Vizet.

SEPTEMBER.

Arnauld du Baille.

Peroton de la Salle.

Jehan de Lignettes.

Trompettes.

Jehan Bertranjon, dict Fenier, pour servir six mois.

Huissiers de salle pour servir quattre mois.

Jehan de Chaufon,

en janvier.

Guillaume Bouleau,

en may.

Loys de la Rocque, dict Cachault, en septembre.

Huissiers du bureau et salle du commun.

François Cousin, ordinaire.

Maistres de salle et fourriere.

Marin Leschalat,

en janvier.

Jehan Jofferan, dict le Provençal, en avril.

Françoys Tonnerel,

en juillet.

Charles Gaury,

en octobre.

Aydes en ladicte fourriere.

Bertrand du Luc, ordinaire, à cause qu'il est garde linge, et

pour servir

en janvier.

Bastien Lagot,

en may.

Jehan Rocher, dict Lalemant, en septembre.

Sommeliers de panneterie servans quattre mois.

Jehan Perichot,

en janvier.

Arnauld, dict Perique,

en may.

Loys Robin,

en septembre.

Aydes à cheval servans quattre mois.

Simon de la Vanele,

en janvier.

Jacques de Sainct Martin, dict

le Touzin.

en may.

Pierre Beauchesne,

en septembre.

Aydes à pied ayans le sommier servans chacung six mois. Pierre Bouchillon, dict le Grec, pour les six premiers mois. Gilles Cottin, pour les six aultres mois.

Aultres aydes à pied.

Jehan Chedeville, dict Bon Jehan.

Pierre Marchant.

DU ROY DE NAVARRE.

Sommeliers d'eschansonnerie.

Guillaume Gobmet,

en janvier, et Guillaume Gobmet

son fils, à survivance.

Charles Fousteau,

en avril.

Jacques Brevet, dict Clugny, en juillet.

Estavien de Preaux,

en octobre.

Aydes à cheval.

Mathurin Calleu,

en janvier.

Jacques Nicques,

en avril.

Jehan de Lignac, dict Jehan

Leblanc,

en juillet.

Françoys Alleaume,

en octobre.

Aydes à pied ayans les sommiers.

Phelipot Montier, pour les six premiers mois.

Mathurin Rouger, dict Matelot, aussi pour lesdicts six premiers mois.

Pierre Venier, dict le Jeuneur, pour les aultres six mois.

Pierre Jousset, aussi pour lesdicts six aultres mois.

Escuyers de cuisine et maistres queux.

Montain Lefebvre,

en janvier.

Christofle le Tonnellier,

en avril.

Jehan Gerbault,

en juillet.

Jehan Margontier, dict Limo-

sin,

en octobre.

Hasteurs et potaigers servans quattre mois.

Bertrand Margontier,

en janvier.

Françoys Rambourg, aussi

en janvier.

Pierre le jeune, dict le grand,

Pierre,

en may.

Bernard de Meilsun, aussi

en may.

Marquet Mestrault,

en septembre.

Guillaume des Rieux, dict Bel-

lefon, aussi

en septembre.

Pastissiers servans chacung six mois.

Lamond de Lorme, pour les six premiers mois.

Rignan Crosne, pour les aultres six mois.

Ayde ordinaire.

Simon Linant.

Enfans de cuisine.

Jacques le Tonnelier, ordinaire, menant le sommier du garde manger.

Arnaulton Larribion, ordinaire, menant le sommier des broches.

Gallopins ordinaires.

Simon Fabvre.

Hector.

Christofle Lachant.

Gardevaisselles servans six mois.

.... les six premiers mois.

Margontier, pour les aultres six mois.

Lavandiers servans six meis.

Bertrand Baruch, dict le Gascon, les six premiers mois. Jehan de Ternay, dict Cachault, les six derniers mois.

Porteurs en cuisine ordinaires.

Abraham du Portau Michel.

Michel de la Garele.

Huissiers de cuisine ordinaires.

Jehan Dupont.

Vinant Suran.

GENS SERVANS EN LA PETITE ESCUYERIE.

Receveur et argentier.

Me Samuel Matras.

Controlleurs ser ons chacung quattre mois.

Archambault de Nolibet,

en janvier.

Me Germain Doniz,

to may.

Me Arnauld de Rospide,

an septembre.

Varlet des paiges ordinaire.

Jehan Desborde.

Maistres palefreniers servans chacung six mois.

Peroton de Pillan,

en janvier.

Anthoine Lefebvre, dict Lon-

jumeau, :

en juillet.

DU ROY DE NAVARRE.

Aydes ordinaires.

Jehan de la Rivet.

Peirot de Sainct Genet.

Jehan Gardien, dict Loignac.

Jehan Dandiran.

Guillaume Pavan, dict Capette.

Estienne Vidal.

Girault de Sainct Lye.

Clement.

Mareschal de forge.

Jacques Vidailhae, compris sa depense de houche...

Scelliers servans chacung six mois.

Pierre Reguet, compris sa depense de bouche et desfray de son cheval.

Claude Barboteau, aussi compris sa depense de bouche et desfray de son cheval.

Varlets de pied.

Jehan de Monpirroux.

Le grand Basque.

Astingues.

Le petit Arnault.

La Marque.

Bernard.

Petit Jehan.

GENS DE MESTIER.

Boulangers.

Pierre Mantalan, dict Gandelu.

Pourvoyeurs.

Henry Mocet.

André Huart.

Nicolas Mocet.

Jehan Truelle.

Capitaine des mulets.

Estienne Couarin, compris sa depense de bouche.

Cordonniers servans chacung six mois.

Guillaume Blondeau, compris sa depense de bouche.

Arnauld de Moniseux, compris sa depense de bouche.

Barbier du cómmun.

Berthelemy du Rion, ordinaire.

Mercier.

Estienne Robin.

Menuzier.

Jehan de Boyn.

. Lingere.

Robin.

Esperonnier de la grande et petite escuyerie.

Claude Audou.

Portefaix.

Denis Lesueur, ordinaire, la somme de trente francs.

Gardes du corps de nation suisse.

- A Hans Herrard, lieutenant, es ladicte garde, pour sa depense et entretenement, à raison de vingt livres par mois, revenant pour toute l'année à
- A treize soldats qui servent à present dans ladicte garde, à raison de dix huict livres pour chacung par mois, compris leur augmentation de deux sols par jour, qui revient, par an, à
- Auxdicts lieutenant et soldats ci dessus, pour leur habillement de toute l'annee, à raison de deux cent quarante livres pour ledict lieutenant, et cent livres pour chacung de ses soldats, montant le tout à la somme de

Somme totale des sommes tirees hors ligne en ce present estat, non compris en ce ceulx qui se doibvent payer l'année prochaine, quattre vingt trois mille six cent quattre vingt dix neuf livres quinze sols.

DE PAR LE ROY DE NAVARRE.

Monsieur amé et feal conseiller, thresorier de nostre maison, et receveur general de nos finances, maistre Vincent de Pedesclaux, salut:

Nous voulons, vous mandons et ordonnons que, des premiers et plus clairs deniers de vostre charge et recette, tant ordinaire qu'extraordinaire, vous payiez, bailliez et delivriez, ou fassiez payer, bailler et delivrer comptant aulx personnes escriptes et denommees au present estat, les sommes par nous à eulx ordonnees en icelui, pour leurs gaiges et estat de la presente annee mil cinq cent quattre vingt cinq, montant ensemble la somme de quattre vingt trois mille six cent quattre vingt dix neuf livres quinze sols; et rapportant par vous cedict present mandement et estat et quittances des parties prenantes, tant seulement les sommes que vous aurez peu payer, vous seront passees et allouees

en la mise et despense de vos comptes, par nos amés feaulx conseillers, les auditeurs d'iceulx, aulxquels mandons ainsi faire, sans difficulté; car tel est nostre plaisir.

Donné à Saincte Foy, le premier jour de janvier, l'an 1585.

LVIII. - * POINCTS ET ARTICLES

Ayant esté respectivement conditionnés, promis, jurés et acceptés entre monseigneur le prince de Parme et de Plaisance, lieutenant gouverneur et capitaine general pour le roy catholicque es Pays Bas, pour et au nom de sa majesté d'une part, et le seigneur de La Noue, sur sa delivrance dans l'ordre, la forme et manière qui s'ensuit.

En premier lieu, ledict sieur de la Noue, pour parvenir à sadicte delivrance, a solemnellement promis et juré, promet et jure par ceste, entre les mains de son altesse, de jamais ne porter les armes, servir ou faire acte d'hostilité contre sa majesté catholique ou ses successeurs, sçavoir est : en Espagne, Italie, Bourgongne et dicts Pays Bas, ou aultres pays appartenant à sadicte majesté, soubs quelque pretexte ou pour quelque occasion que ce soit, ni mesmes par commandement de roy, prince, ou aultre qui lui pourront estre faicts.

Comme semblablement il a juré et promis de jamais, doresnavant, ne se retrouver esdicts Pays Bas, en quelque sorte et soubs quelque couleur que peult estre, si ce n'est oultre valable congé ou passe port de sadicte altesse, gouverneur general, y commandant au nom de sadicte majesté catholique.

Pour seureté et corroboration de laquelle sienne pro-

messe il mettra, incontinent apres sa sortie de ces Pays Bas, ung sien fils (qui lui reste) en ostage es mains de monseigneur le duc de Lorraine, pour y demeurer l'espace d'ung an.

Et par dessus ce, s'est obligé, en cas de contravention, de payer, au profict de sadicte majesté, la somme de cent mille escus, dont et pour laquelle monseigneur le prince de Bearn se constituera respondant, ainsi qu'il s'est offert, et obligera les terres et biens qu'il possede esdicts Pays Bas, avant que de proceder à l'eslargissement dudict sieur de la Noue.

Et comme ledict seigneur de la Noue avoit promis de bailler aussi monseigneur de Lorraine pour respondant de la mesme somme, suivant la promesse qu'il en avoit dudict seigneur, et qu'à cause des presentes altercations de France, il semble qu'il en est ung peu refroidi, il promet neantmoins, quand il aura parlé à lui, de le faire condescendre à ce poinct, tant au moyen des pleiges qu'il lui baillera en son propre pays, que par l'asseurance qu'il lui donnera qu'il ne portera les armes contre monsieur de....

Et dont il a supplié qu'il pleust à sadiete majesté se contenter, pour ceste heure, de la responsion de monseigneur le prince de Bearn, de cent mille escus et dadvantage, de l'advis du sieur de Theligny, que ledict seigneur de la Noue obligera encores jusqu'à ce qu'il ait mis ceci dessus à execution; ce qu'acceptant sadicte altesse, icelle lui accorde à cest effect le temps et terme de quattre ou cinq mois, au plus tard.

Mais si d'adventure (comme les choses les plus seures sont incertaines) il advenoit que monseigneur le du de Lorraine le refusast, ledict de la Noue promet de faire obliger ung prince d'Allemaigne pour ladicte somme

de cent mille escus d'or, pour les payer audict seigneur, deus au profict de sa majesté. En cas de contravention à la promesse susdicte, et en default d'ung prince alleman, il promet de faire obliger ung canton de Suisse à monseigneur le duc de Savoye, pour la mesme somme qui tournera au profict de sadicte majesté catholique. Ce à quoi ledict seigneur de la Noue donne sa parole.

Promettant encores oultre ce, ledict seigneur de la Noue, de tant faire que lesdiots seigneurs ducs de Lorraine et de Guise donneront leur parole par escrit, et soubs leurs seings, armes et scels accoustumés, qu'il n'enfreindra ce qu'il a promis; ce qu'il ne doubte poinct d'obtenir, quand il aura parlé à culx, mais se mettra plus tost en gage entre leurs mains, jusques à ce qu'il aura accompli cest article.

Et advenant que ledict seigneur de la Noue ne peust effectuer l'une de ses trois obligations d'argent, en dedans le temps susdict, il promet sur son honneur, et foi de gentilhomme, de se venir rendre en ostage es mains de monseigneur le duc de Lorraine, et de y estre tant qu'il aura donné cours aulx obligations valables et surtout sans aulcune exception de droict ou tout aultre moyen au contraire.

Et finalement, pour l'accomplissement des choses susdictes, ledict seigneur de la Noue promet de faire effectuer ainsi, eslargir et mettre en liberté monseigneur le comte d'Egmont, sans rançon, en payant seulement ses despens.

Comme aussi reciproquement ledict seigneur de la Noue sera eslargi, mis en liberté, conduict, de la part de monseigneur le duc de Lorraine, sera, ou bien es mains de monseigneur de Guise, accompagné seulement de deux ou trois gentilshommes, tels que sadicte

altesse choisira, pour l'assister en chemin, moyennant la foi, parole et promesse que ledict seigneur de la Noue a promis qu'avant tout œuvre il ira trouver les-dicts sieurs, la part qu'ils feront pour y accomplir ce qui ci dessus a esté promis, et pour de là se retirer de sa maison, apres avoir donné satisfaction aulx susdicts seigneurs ducs de Lorraine et de Guise, et ce aussi sans rançon, en payant ses despens.

Desquels poincts et articles ont esté faicts et passés trois divers escrits, tous trois soubssignés de la main de sadicte altesse, et dudict seigneur de la Noue; et sont restés gardés les deux, par sadicte altesse, au nom de sa majesté, et le troisiesme par ledict seigneur de la Noue, en tesmoignage de quoi, et pour verification de ce que dict est ci dessus.

Faict, etc.

Et plus bas, ALEXANDRE.

Plusieurs pourront s'estonner de quoi ledict seigneur de la Noue est veneu jusqu'à ce poinct d'accorder des conditions si dures et si insupportables, comme sont celles ci dessus escriptes, et diront qu'il ne debvoit pourchasser une liberté enveloppee de tant de servitude. Mais s'ils considerent, de l'aultre part, son estat et longue prison de cinq ans et demi, les apparences d'y demeurer à perpetuité; refusant les dictes conditions arrestees au conseil d'Espaigne, par apres des advis qu'il avoit receus de plusieurs, la mort du baron de Rocca, qui lui avoit esté donné pour sa seureté, l'extresme maladie du comte d'Egmont, la perte duquel estoit sa tres assuree ruyne, la prison du seigneur de Theligny, son fils, et de plus les mouvemens et deteriorations de la France, qui lui pouvoient encores beaucoup nuire; il est d'adventure qu'ils jugeront qu'il n'a pas mal faict d'embrasser l'occasion, lorsque Dieu, par sa grace, lui a presenté de sortir d'ung si perilleux passage, ou dans de plus grands, puisqu'ils lui sont demeurés perdeus. Neantmoins se confesse il franchement d'estre beaucoup obligé à monseigneur le prince de Parme, tant pour avoir esté favorisé de lui en sa delivrance, que pour ce qu'il lui a gardé inviolablement sa parole, et faict plusieurs courtoisies.

· LIX. — * REMONSTRANCES

En forme de requeste, pour presenter au roy de la part des princes catholiques de la maison de Bourbon; faicte par le sieur de..., corrigee et concleue par le sieur Duplessis. (1)

Sire, les princes de vostre sang, qui ont ce tres hault et tres excellent degré d'honneur en cest estat, d'estre nés enfans de vostre royale tige et branche de la maison de France, unis de cœur et de sincere vollonté au tres humble et tres fidele service de vostre majesté, à qui, graces à Dieu, n'ont eu en leur vie differend ni division quelconque avec l'Eglise catholique, apostolique et romaine, laquelle ils reverent et honorent comme leur saincte mere, et sont asseurés, moyennant la grace du Sainct Esprit, que jamais ils ne seront aultres; ains protestent devant Dieu qu'ils veullent vivre et mourir aulx pieds de vostre majesté, pour la conservation et augmentation d'icelle en icelle. S'employans tres fidelement pour aydes à vostre tres

⁽¹⁾ M. de Montpensier, envoyant le sieur de Mondon vers le roi de Navarre, lui fait communiquer cette déclaration.

saincte et tres chrestienne entreprise, à servir vostre majesté au tres sainct et tres chrestien but qu'elle a de reunir tous ves subjects en la susdicte relligion catholique, apostolique et romaine, afin que ce reyaume tres chrestien puisse fleurir jusqu'à la fin des siecles, par la grace de Dieu, se representans et mettans de vant les yeux qu'ils sont François, vos tres bambles et tres fideles subjects, obligés, de tout droict divin et humain, à vous servir, procurer le bien, honneur et grandeur de vostre couronne; apres s'estre longuement rejouis, et loué Dieu de ve que vostre majesté, comme pere de son pays, tuteur ét curateur de tant de povre peuple, auroit par ci devant, par sa prudence, justice, clemence et benigne dexterité, en l'accord de tant de divers cerveaulx de son royaume, trouvé l'expedient digne d'ung prince pacifique et tres chrestien, de faire cesser les violences reciproques qui ont presque atterré cest estat, de radoucir le mal, et remettre la France au chemin de son ancienne grandeur, par la paix, par la reconciliation de ses humeurs contraires, et rappellant à son auctorité souveraine tous les subjects de sa couronne.

Toutefois, ils ont presque au mesme instant appercei le feu plus embrasé qu'auparavant, les actions et vollontés des perturbateurs plus esloignees de la paix, les provinces de vostre royaume plus desolees et ruynees les maisons du laboureur desentes, bref, la pluspart de vos povres subjects qui sont à la campagne, mouri de mal et de faim, d'ailleurs affligés de maladies contigieuses, vrais et indubitables signes de la fureur de Dieu: pour tout dire, la France en general, sire, est pleine de desolation, remplie de confusion, de la missere et eris des femmes veusves, des larmes des enfants

orphelins, et de la plaincte du povre oppressé, la voix duquel se faict ouïr au ciel.

Et si ce n'est pas tout, sire; car il eust semblé aulx François avortons, ingrats à leur pays, tres mauvais serviteurs de la couronne, que leur projet, leur iniquité, leur fureur, et très érnelle execution, n'estoient pas suffisantes pour mettre à chef tant d'injustices, de cruautés et de ruynes qu'ils apportent à leur patrie, s'ils n'eussent, par leur detestable conseil, donné occasion d'appeller ung grand nombre d'estrangers, pour achever de tout perdre, et redoubler la misere des affligés qui crient et lamentent nuict et jour pour les oppressions qu'ils supportent.

Ge qui a tellement frappé au cœur des princes de vostre sang catholique, sire, comme vrais et naturels François, qu'ils ont pris occasion d'essayer à recognoistre la cause d'une si sanglante et felonne obstination, laquelle ils scavent aussi fort bien que vostre majesté, nourrie en toute pieté, bonté et singulière affection au soulagement de ce desolé peuple, porte fort impatiemment, si bien qu'enfin ils ont veu clairement que ceulx qui, par le pretexte simulé du zele de la relligion catholique, apostolique et romaine, et de la reunion de vos subjects en icelle, se sont armés soubs le nom de Ligue, depuis un ang en ça, et, par leur rebellion, ont refraischi la playe que la clemence de vostre majesté avoit presque consolidee, sont ceulx à qui la passion et l'ambition, ou le peu de mal qu'ils ont souffert, ou le peu de pitié qu'ils ont de ceulx qui le supportent, ont faict perdre toute raison.

Partant, lesdicts seigneurs princes, esmeus de compassion et de pitié envers la povre France, desirant aussi de voir vostre majesté contente et satisfaicte du debvoir, du respect et de l'obeissance que vos subjects vous doibvent, bruslant pareillement de tres grande affection que tout vostre royaume soit reuny en la relligion catholique, apostolique et romaine, selon vostre tres sainct et tres chrestien desir; considerant que ceulx qui consultent à l'adventure par passion, ne donnent jamais ung bon conseil, et jettent pour leur profict ceulx qu'ils conseillent à l'adventure en ung grand inal; recognoissant pareillement que la rudesse et la vigueur engendrent plustost ung desespoir aux bons et dociles, qu'elles ne peuvent retirer les desvoyez, qui par siel se rendent beaucoup plus revesches, ont pense et se sont resoleus que, pour leur debvoir et service tres fidele qu'ils rendront toute leur vie à vostre majesté, il estoit necessaire de vous faire tres humble requeste de regarder derechef de vostre œil de pitié tout ce povre royaume, prevoyant sa misere, sa ruyne et la maladie si forte qui est en lui, que par icelle il ne peult estre en paix ni en guerre; soit vostre bon plaisir prendre advis et conseil, s'il y avoit moyen, aultrement que par le glaive, de planter entre vos subjects quelque bon accord et paix, tellement composee qu'elle peust demeurer ferme et stable en nos jours, sans tirer apres soi ni reserver aulcune semence de nouvelle guerre, afin que, par ce moyen, Dieu feust servi de tous, vous, comme pere commun, fussiez recogneu de vos enfans, et peussiez par vostre prudence prevenir au mal et ruyne prochaine qui semble menacer ceste couronne

Or, sire, avant que passer oultre, parce qu'il est de fendeu par la sagesse humaine de prendre advis de ceuls desquels on se desie, les susdicts seigneurs, princes catholiques, qui sont deliberés de vous faire aujour d'hui ceste tres humble requeste, supplient d'abon-

dant avec toute humilité vostre majesté de voulloir prendre la peine de jetter l'œil sur eulx, et considerer, s'il vous plaist, l'honneur qu'ils ont d'estre nés princes de vostre sang; tels que, grace à Dieu, en ceste cause ni à aultre quelconque qui concernera le bien de vostre service, leurs actions et leur vie peuvent estre suspectes aulx plus passionnés de la Ligue.

Car, sire, la demonstration de bienveillance qu'il vous a pleu faire jusqu'à l'heure presente à messieurs les prince de Conty et comte de Soissons, le soing paternel qu'il vous a pleu prendre de leur instruction et nourriture depuis leur plus tendre jeunesse, les ayant voulleu voir nourrir avec plus de signification de bonne vollonté qu'ils n'en eussent osé esperer de vostre majesté; d'aultre part, l'honneur, le respect et la subjection qu'ils ont tousjours portés à vostre personne, laquelle ils n'ont jamais voulleu perdre de veue pour quelque cause que ce soit, comme leur bon roy et souverain seigneur, peuvent assez lever le souspçon que les chefs de la Ligue se sont efforcés, et font encores journellement semer et courir parmi le peuple de France, une grande partie duquel ils ont teneu charmé jusques à maintenant, soubs pretexte de leur zele simulé en la relligion catholique, et par l'auctorité qu'ils se donnent soubs le nom de vos armes.

Quant à MM. de Montpensier: qui est celui, non seulement en ce royaume, mais par toute la chrestienté, qui ait peu remarquer prince plus relligieux, tres affectionné zelateur de l'Eglise catholique, apostolique et romaine, que feu M. de Montpensier? lorsqu'il a esté question de la guerre, qui en a, avec moins d'ambition, plus cherché les perils? qui, avec plus d'affection, en a supporté les incommodités, les depenses et les tra-

vaulx que lui, qui n'a pas espargné son propre sang, ni la vie de ses parens, quand il n'y est allé que de la relligion? Lequel neantmoins, comme prince sage et admiré, apres tant d'annees qu'il avoit avec telle affection (comme il est notoire à chacung) employees à la susdicte guerre, conveint tres bien, aulx estats derniers teneus à Blois, que le tout se faisoit contre sa maison, que c'estoit à la vie, non pas à la conscience du roy de Navarre et de M. le prince de Condé, que les principaulx de la Ligue en voulloient; que c'estoit pour les destruire plustost que pour les instruire, qu'ils tenoient si longuement les armes en la main, et qu'ils n'avoient d'aultre zele que, par la ruyne de la maison de Bourbon, se preparer l'eschelle à la royauté, de façon que, considerant cela, il s'employa de tout son pouvoir, et, sur ses vieulx ans, alla, par deux voyages, trouver ledict sieur roy de Navarre, afin de rompre les desseings des ennemis de sa maison et convertir les troubles, pernitieuses et sanglantes guerres, en une heureuse paix, en une bonne reconciliation des subjects de ceste couronne, à laquelle il parveint par le commandement, et au contentement de vostre majesté. Et feut celle qui feut faicte en l'an 1577, de laquelle la France s'est rejouie, et le peuple a esté soulagé, vostre majesté servie, obeie, recogneue et honoree de tous ses subjects indifferemment, jusqu'à ce que ceulx de la Ligue, au lieu d'esteindre le brasier qui restoit de leur ancien feu, l'ont soufslé le plus qu'ils ont peu pour le rallumer; et, en le faisant achever de consommer toute la France, s'en resjouissans tout ainsi que Neron ayant faict mettre le feu en la ville de Rome.

Que peult on recognoistre de moins à monsieur de Montpensier qui est à present? aultre que vous, sire,

ne peult mieulx juger de quelle affection il s'est tousjours employé aulx guerres passees, et depuis qu'il a porté les armes jusques à aujourd'hui, se pouvant vanter qu'il ne s'est donné bataille en France où il n'y ait assisté et faict ce qu'ung prince tres vertueux pouvoit pour le service de son roy. Il vous peult representer tres humblement, sire, quels sont ceulx qui, à vostre retour de Pologne, avoient les armes en la main dans vostre royaume, pour attendre l'heureuse veneue de vostre majesté, et conserver vos subjects en vostre obeissance, sinon feu monsieur de Montpensier son pere, qui estoit avec une armee en Poictou devant Lusignan, et lui en Dauphiné, où il eut le bonheur de vous recevoir; et, employant depuis fidelement le service qu'il doibt à vostre majesté, feit en sorte qu'il prit les meilleures places que ceulx de la relligion pretendeue reformee y tenoient. Mesmes vous rendit libre le passage du Pourin sur le Rhosne, place qui n'avoit peu estre prise de tous les troubles precedens. Ce qu'il ne dict pas, sire, pour vous faire ressouvenir les services qu'il a faicts, mais pour remarquer qu'il n'a pas espargné sa vie lorsqu'il a esté question vraiement de la relligion.

Si feu monsieur estoit vivant, il tesmoigneroit de quelle affection ledict sieur de Montpensier a faict les voyages d'Angleterre et de Flandres, et quelle reputation il en a acquise entre les princes vos voisins et nations estrangeres; cependant que ses ennemis tesmoignent, par leurs artifices, d'oster le gouvernement de Bretaigne à monsieur le prince de Dombes, son fils, lequel, pour tel, a esté receu aulx estats du pays qui se tindrent à Nantes en l'an 1579, au grand contentement de tous les deputés, tellement que feu monsieur de Montpensier, son ayeul, ayant cogneu comme il

avoit esté surpris, en receut ung tel desplaisir, que cela lui abregea ses jours.

Sire, monsieur de Montpensier ne doubte aulcunement que vostre majesté, ornee de toute candeur, prudence et cognoissance digne d'ung tres bon roy, ne lui fasse l'honneur de recognoistre de quelle ardeur il s'est dernierement employé en ceste rebellion et prise d'armes de ceulx de la Ligue, suivant le commandement qu'il a pleu à vostre majesté lui donner, et par icelui recognoistre la faulte qu'ils avoient faicte, en quel rang vous les teniés, le jugement tres certain que vostre majesté faisoit de leurs actions presentes et de leurs deportemens passés marquant le but auquel ils tendoient, et que c'estoit directement à vous et à la maison de France qu'ils en voulloient soubs ung masque de la relligion; si, qu'estant vostre majesté en ceste persuasion, commanda ledict sieur de Montpensier de se rendre dans la ville d'Orleans, occupee par ung des partisans de la Ligue, lequel faillit pour lors à payer ce prince obeissant et prompt à l'execution de vostre volonté, et lui faire gouster le fruict de son labeur, ce que veritablement ledict sieur prince ne veult imputer aulx habitans de ladicte ville, et n'ose bonnement les taxer d'ingratitude, quand il se souvient qu'ils se sentent encores aujourd'hui des effects du service qu'il a rendeu à vostre majesté, et par lequel leur ville est hors de la puissance de ceulx de ladicte relligion pretendeue reformee, s'en estant, ledict sieur de Montpensier, saisi en l'an 1568, lorsqu'il en estoit gouverneur, et dans laquelle incontinent il restablit l'exercice de la relligion catholique, apostolique et romaine, apres y avoir faict entrer les regimens du feu comte de Brissac.

Joinct que ce n'est pas le premier bien que ceulx

d'Orleans ont receu des princes de Bourbon, devanciers desdicts sieurs ducs de Montpensier, soubs l'auctorité des roys: car, entre aultres, il se trouve que, du temps du roy Charles VII, le comte des Salisbery, Anglois, ayant assiegé leur ville, Charles de Bourbon, fils, duc de Jean, se meit en grand hazard, pour entrer dans icelle; comme il feit encourager les habitans, feit ung service signalé à sa majesté, et ung bien inestimable à ceulx qui ne peuvent estre qu'ingrats, s'il en ont perdeu la memoire.

Pareillement, sire, supplient tres humblement lesdicts seigneurs princes catholiques, vostre majesté se representer que, graces à Dieu, l'advis et le conseil de leurs predecesseurs n'a esté jamais qu'heureux à la majesté de France, visant et regardant seulement le bien, la grandeur et l'accroissement de leur couronne, quand il a pleu à leursdictes majestés les accepter, et qu'ils s'en sont voulleu servir; d'ailleurs que l'adolescence de MM. les comte de Soissons et prince de Dombes ne scauroit empescher qu'ils ne tiennent aultre rang aupres de vostre majesté que les aultres. Comme aussi il ne peult estre mis en doubte que ceulx qui en restent aujourd'hui, ne soient fort capables de vous faire ung bon service, toutes les fois qu'il plaira à vostre majesté leur faire cest honneur de les employer, comme ont faict leurs devanciers les roys vos predecesseurs, qui s'en sont tres bien trouvés, et la France a cueilli les fruicts de la jeunesse verdoyante de ces princes. Jacques de Bourbon, comte de la Marche, non gueres plus aagé de vingt ans, feut honoré de l'estat de connestable de France soubs le roy Jean.

Jean de Bourbon, portant le tiltre de comte de Clermont, comme fils aisné du duc Jean son pere, gaigna,

en l'aage de dix huict ans, l'heureuse bataille de Fromingin, l'honneur de laquelle lui feut adjugé, contre la jalousie du connestable, par les seigneurs chevaliers et capitaines qui estoient en l'armee royale; si lui feit le roy Charles septiesme cest honneur de prononcer le jugement en l'assemblee des pairs de son royaume, appellés à ces fins, par l'advis desquels ce mesme jeune prince feut à l'instant envoyé en Guyenne, où, par sa conduite et valeur, il perça le vaisseau que le vieil et grand capitaine Talbot avoit rempli de ses victoires, durant vingt et quattre ans qu'il avoit combatteu en France; à la poursuite de laquelle ce Camille françois lui feit perdre la vie, et dadvantage acquit le surnom de Foudre de Mars. Les cendres de Charles de Bourbon, ayeul desdicts sieurs princes de Conty, de Soissons, sont encores assés chauldes pour se resouvenir qu'en l'aage de dix huict ans au plus, il feut lieutenant general pour le roy Louis XII en Picardie et Artois, et feut depuis si bien nourri au service du roy François le Grand, qu'il emporta le loz de l'ung des plus magnanimes et valeureux princes de son temps. François de Bourbon, duc d'Anguien, fils de celui ci, moindre de vingt et ung ans, gaigna la tant renommee bataille de Serisolles, preit la ville de Carignan, et rendit le nom françois redoutable, non seulement en Piemont, mais en toute l'Italie et à la nation des Suisses, pendant que son frere aisné, depuis roy de Navarre, non gueres plus aagé que lui, faisoit preuve de sa vaillance contre les ennemis de la couronne, au pays de Picardie et d'Artois, au gouvernement duquel il avoit succedé à son pere. Tant y a, sire, qu'ils sçavent fort bien que leurs predecesseurs, graces à Dieu, n'ont pas esté inutiles, en quelque aage qu'ils feussent, au service des roys. En consideration des-

quels leurs majestés ont laissé la memoire, la souvenance et la marque tres honorable en la famille des Bourbons, des services tres agreables d'icelle envers la couronne de France. Car, à la verité, sire, il ne peult estre mal seant aulx dicts seigneurs princes, puisqu'ils ont cest honneur d'estre de vostre sang, de dire que, depuis le roy Sainct Louis, duquel vous estes fils aisné, et ils sont les puisnés, ne s'est jamais veu en France, quelque grand nombre de princes du sang qu'il y ait eu, plus que maintenant de diverses familles plus proches que les Bourbonnois, que les roys ayent plus estimé le service d'aultres quelconques, ni mieulx et plus amplement tesmoigné la fidelité d'iceulx que des descendans de la branche de Bourbon, ayant la plus grande part des chefs d'icelle esté connestables de France, grands maistres, lieutenans generaulx, dedans et dehors cest empire, tuteurs et gouverneurs des roys, non seulement par l'auctorité des estats et loix de ceste couronne, mais par la pure et simple nomination des peres qui laissent leurs enfans, jeunes roys, soubs le gouvernement desquels, et qu'ils commettoient fort librement es conscience des ducs de Bourbon, lesquels, en ce cas, ont faict tout leur debvoir d'instruire en la craincte de Dieu leurs seigneurs souverains orphelins, et sans discretion pour le bas aage auquel ils se trouvoient.

A raison de quoi les susdicts seigneurs princes se promettent aussi que vous, sire, leur ferés ce bien et honneur de recognoistre qu'il y a autant d'inegalité entre eulx et les chefs de la Ligue, qu'il se trouve de difference entre la majesté du royaume et couronne de France, et les deserts du duché de Lorraine.

Or, sire, pour venir au poincf, il n'est poinct queștion de ramener les anciennes practiques; ressouvenés

vous seulement, s'il vous plaist, de tout ce qui s'est passé depuis six ou sept ans en çà que les principaulx de la Ligue ont commencé de faire provision pour enlever ce bastiment, dans lequel ils ont entrepris de loger leur fortune en ce royaume; remettez en memoire à qui ils s'en sont adressés pour leur donner conseil, duquel faict foi le detestable advis trouvé entre les papiers de feu David; regardez d'abondant, sire, le livre composé par l'archidiacre de Thoul: tout ce qu'il contenoit pour rendre vos subjects susceptibles de rebellion, et lever de leur conscience le respect et l'honneur qu'ils vous doibvent; souvenez vous, sire, par qui l'aucteur a esté conservé, qui a demandé sa grace à vostre majesté, qui est celui là qui vous avoit promis de vous faire escrire le contraire, et s'il a teneu sa promesse; representés vous, s'il vous plaist, la deposition de Salsede; regardez le tableau des propos injurieux, calomnieux et scandaleux que les chefs de la Ligue tenoient et faisoient publier en leur armee, jusques là qu'il falloit vous confiner dans le cloistre d'ung monastere; mettés devant les yeulx les memoires qui ont esté dernierement surpris au cabinet de Tavanne, l'ung des plus echauffés de la Ligue. Ont ils espargné vos deniers, vos finances sacrees? ils se sont associés avec les estrangers, ont pris argent des anciens ennemis de vostre estat pour vous faire la guerre. Qui sont ceulx qui premiers ont monstré le chemin de rebellion qu'eulx mesmes? qui sont les aucteurs des citadelles, que Timoleon appelloit le nid de la tyrannie, par lesquelles les gouverneurs se cantonnent, et s'opposent à vostre auctorité, sinon eulx et les creatures de leurs mains? Devant la levee de leurs armes, ne pouviés vous pas, sire, aller fort librement entre tous vos subjects,

et commander dans toutes les plus fortes places de vostre royaume? ne sont ce pas eulx mesmes qui premiers vous ont fermé les portes, ont suborné vos subjects; les ont jugés, soubs pretexte qu'ils disoient que vous ne vivriés pas trois mois; faisoient entendre aulx aultres qu'il y avoit de l'intelligence entre nous pour executer leur desseing contre le roy de Navarre et monseigneur le prince de Condé, pendant que vostre majesté protestoit à ses serviteurs que jamais elle n'avoit receu injure plus atroce, et qui plus l'eust offensé que l'insolence de ceste maison, à qui elle avoit faict tant de bien, donnant commandement tres expres à tous vos officiers de le faire entendre à la noblesse, et lever l'opinion de ceste supposition à vostre peuple? Si c'est pour la defense de la relligion catholique, apostolique, romaine, qu'ils se sont rebellés, ont ils mieulx traicté les ecclesiastiques qu'auparavant? Les ornemens et reliques des eglises, où leurs troupes ont passé, n'ont ils pas esté pillés et volés pour la pluspart de leurs soldats? Bref, sire, il semble qu'en ceci ils ayent imité les Juifs du temps de Vespasien, qui, soubs pretexte de combattre pour le temple de Salomon, meirent eulx mesmes le feu au dedans d'icelui, et de rage bruslerent leur sanctuaire. Ils ont bien faict pire encores; car ils vous ont contrainct, par leurs armes et par leurs forces, non de les pardonner, ains de les advouer, de les excuser publicquement, et traicter accord avec eulx, sans lequel ils n'eussent pas quitté les champs, et par lequel vous estes declaré l'aucteur, avés rejetté sur vous l'envie, le peril et l'effort d'une guerre effroyable, sanglante, obstinee et pleine d'immortel desespoir entre vos subjects; car, sire, puisque c'estoit vostre volonté, vostre desir, vostre but, qui

est tres sainct et tres louable, qu'il n'y ait qu'une relligion en ce royaume, c'est la piete, c'est le zele, c'est le voulloir d'ung prince tres chrestien, il estoit aussi besoing d'adviser à l'instant (soubs vostre correction), si les moyens par lesquels ils ont voulleu que vous soyez entrepris, sont possibles sans croire vos ennemis, qui, pour vous retenir au jeu, feront la playe fort petite; d'ailleurs, il estoit tres necessaire de peser meurement s'il y va rien de vostre estat : et si, pour parvenir à ce but, il n'y a poinct d'aultre voie, en quoi lesdicts seigneurs princes s'asseurent que vous recognoistrés, s'il vous plaist, sire, qu'il y a vingt et cinq ans que le feu roy Charles, vostre frere et vous, n'avés espargné vie, moyens, serviteurs ni amis, que Dieu vous ait donnés, qui n'ayent esté hasardés pour le mesme desir; les chefs de la Ligue ne sont pas maintenant plus forts et n'y peuvent sçavoir plus expediens moyens que ceulx dont ils ont usé jusques ici. Vos subjects catholiques n'ont pas plus de pouvoir ni la vollonté plus ferme pour vous servir fidelement; les ecclesiastiques n'ont pas plus de thresors pour y employer; les moyens de ceulx qu'on a faicts declarer ennemis, ne sont aulcunement descreus. Chacung a veu, et vous, sire, l'avés plus particulierement recogneu, les effects de la paix que vous aviés plantee, en laquelle vostre majesté tenoit ung chemin si propre pour ramener et rappeller à soi ceulx de la relligion pretendeue reformee, que, pendant cinq ou six ans de paix, vostre majesté a beaucoup plus affermi l'Eghise catholique et rapproché les cœurs de ses subjects du droict chemin par son exemplaire pieté et par la rondeur de la justice, que ne sçauroit la Ligue, en vingt ans, par la guerre, de sorte que veritablement il semble, sire, que le conseil qu'ils vous

ont forcé de choisir en la reunion de vostre peuple, soit plustost l'instrument pour tout consommer et tout perdre, auparavant que vostre majesté puisse sentir les fruicts de son labeur; il semble que ce soit le chemin pour rendre plus partiaux, plus aspres et plus desvoyés et obstinés ceulx qu'on a deu persuader à vostre majesté d'affoiblir, desunir et gaigner par doulceur ou benignité, comme estant leur bon roy, pere tres doulx et gracieux. Il semble que ce soit ung vrai moyen de transformer les huguenots en autant d'hypocrites ou d'athees, pestes tres dangereuses pour l'honneur de Dieu et l'estat de la terre. Qu'est ce donc aultre chose, sire, que se ruyner soi mesmes, que chercher son malheur, hazarder son estat sans subject? qu'est ce, sinon mettre au desespoir partie de vos subjects, pour leur faire apres chercher toutes extremités qu'ils penseront propres à sa conscience, à quelque prix et peril que ce feust? Qu'est ce, sinon introduire et appeller ung grand nombre d'estrangers, qui, s'ils estoient de mauvaise nature, apres avoir epuisé et consumé ce peu qui reste de moyens dans ce miserable royaume, se pourroient joindre ensemble, tant d'ung que d'aultre parti, pour tirer chacung à soi partie de cest estat? Representés vous, s'il vous plaist, sire, tant de roys, empereurs et monarques qui, pour leur trop grande resolution à la guerre inutile, ont perdeu leurs estats et leur vie; d'aultres, pour avoir appellé leurs voisins à leur aide, ont frayé le chemin à la conqueste et grandeur d'iceulx, qui aultrement n'eussent eu garde d'y, penser. Ainsi, sire, les divisions et partialités trop obstinees des princes et estats chrestiens ouvrirent les passages de la chrestienté au Turc, et toute l'Europe en pleure. Ainsi sommes nous en grand danger que,

par telles animosités, le chemin ne se prepare à ung monarque pour donner la loi à tous les aultres, et assubjettir à sa discretion tous les voisins: les exemples en sont infinis et les desseings manifestes, et en ce faisant, sire, vient à considerer que, depuis quelque temps, les estrangers ont trop souvent gousté la doulceur de vostre royaume. Partant, sire, vostre majesté se gardera, s'il lui plaist, qu'on ne puisse dire de vous qui estes, graces à Dieu, tres sage et rempli de toute prudence, que vous ayés ressemblé ceulx là qui pryent et qui hazardent ce qu'ils ont, pour acquerir ce qu'ils n'ont et n'auront poinct.

Si le blasme que tous les gens de bien, amis et serviteurs de la couronne de France donnent aulx chefs de ceste Ligue est faulx, et qu'ils n'ayent aultre zele que l'honneur de la relligion çatholique, apostolique, romaine, et le bien de vostre service, il reste encores, graces à Dieu, quelque esperance de moyen pour radoucir l'aigreur de tant de maulx; car, en ce cas, sire, nous serons tous unis de volonté; vostre majesté, d'estre obeie et recogneue, ainsi qu'il est tres raisonnable; nous, de vous servir fidelement. Il est aussi certain que le roy de Navarre et M. le prince de Condé sont vos tres humbles et tres obeissans subjects, et qu'ils ne vous feront jamais faulte. De sorte que, par ceste union et bon accord, Dieu suscitera des expediens propres pour la saison, et nous preparera des doulces medecines qui n'offenseront poinct le corps de cest estat, s'il vous plaist de les accepter; mais si vostre majesté, sire, ne trouve bon ce moyen, et que sa resolution soit de suivre la poincte de la guerre, on ne peult assés admirer ni detester le conseil de ceulx qui vous ont persuadé de faire chefs et conducteurs de vos armes ceulx qui les portoient dernierement contre vous; car, en ce faisant, sire, vostre majesté faict croire au peuple et à la noblesse de France, ce qui neantmoins est contraire, qu'il y eust de l'intelligence entre vous et la Ligue, et que ce feust ung jeu pour surprendre et donner occasion à la guerre contre le roy de Navarre et ceulx de son parti. Quel argument en voullés vous plus grand, dira la noblesse et le bourgeois, que d'avoir desarmé M. de Montpensier, prince tres catholique, auquel on ne peult imputer, sinon qu'il porte les armes de Bourbon; que de voir maintenant les chefs de ceste Ligue mener les ' armes du roy, commander comme chefs et generaulx d'icelles, dont aussi, sire, ils feront tres bien leur profict, et n'oublieront d'escrire particulierement et admonnester ceulx qui, lors de la levee de leurs armes, sont demeurés resoleus en vostre obeissance, sur la parole et asseurance de vostre majesté et des principaulx officiers de la couronne, qu'ils apprennent une aultre fois à les croire, puisqu'ils voyent maintenant les effects de leur premier advis? Tellement que s'il advenoit, sire, comme ceste humeur de personnes ne manque jamais de subject ni d'affection à vous mal faire, vostre majesté se trouveroit bien fort courte à retenir à soi, et faire croire ses affaires à la pluspart de ceulx qui ne sont reteneus que par l'apparence de ce qui se presente en nos actions.

D'abondant, sire, il est tres necessaire que vostre majesté s'eveille, s'il lui plaist, du profond somme auquel on nous tient endormis: il semble, à la verité, sire, que vous minutiez vostre ruyne: vous avez pardonné aulx rebelles, à ceulx qui avoient semé les germes de rebellion, desquels vous avez veu le fruict; à ceulx que vous sçavez en vostre ame estre vos ennemis; conju-

rés à vostre desastre, et pour envahir vostre estat; toutesfois vous leur mettez vos armes en la main; mais en quel temps, sire? Trois jours apres que vostre majesté leur a eu pardonné ung crime inexcusable, par vous recogneu plusieurs fois; vous baillés à garder vos tiltres à ceulx qui, tousjours auparavant, ont plaidé contre vous; vous les voulés rendre insolens par le gain d'une bataille; vous les voulés faire si forts, qu'ils ayent moyen d'executer le malheur qu'ils ont juré, il y a long temps, contre vous. Sire, la victoire gaignee incite le vainqueur à suivre heureusement le cours de sa fortune. Astiages, roy des Medes, perdit la vie et le royaume par ung pareil traict que celui qu'on vous a persuadé, et par maint grand prince a esté ruyné, s'estant confié de toutes ses forces et moyens, à celui qui l'avoit offensé, et en somme, à ung ennemi reconcilié; et pourtant les princes bien conseillés, apres les guerres civiles, ont toujours temperé leur clemence d'une prudence et discretion notable, desarmant de force, d'auctorité et de commandement, ceulx qui s'estoient eslevés contre eulx en armes, pour leur oster le moyen de les troubler une aultre fois, les laissant au reste vivre en personnes privees, avec toute liberté et asseurance. Et de faict, si vostre majesté veult considerer leurs actions, depuis qu'ils ont les armes en mains, ils ne font pas tant la guerre à ceulx de la relligion contraire, qu'ils la font à vostre estat : ils n'ont pas tant le desseing d'attaquer les villes qu'ils habitent, que de surprendre et gaigner à eulx celles qui ont en tout et partout suivi les intentions de vostre majesté, tesmoing les practiques qu'ils ont faictes à Perigueux, à Limoges, à Thoulouze, qui ne peuvent pas estre cachees à vostre majesté; tesmoing l'entreprise qu'ils ont

n'agueres faillie sur Angoulesme, pendant que les villes qui sont teneues par ceulx de la relligion susdicte se fortissent à leur teste, et se rendent au dessus de leurs efforts; pendant, sire, que les fauxbourgs deviennent villes, et leurs plus foibles places imprenables. C'est, en somme, qu'ils ont leur desseing, non sur Montignac, mais sur Paris; non de chasser ceulx de la relligion contraire hors de France, mais de se loger et establir eulx mesmes en la France. Qu'ainsi soit, sire, vostre majesté ne trouvera jamais mauvais qu'on die que ceulx de la Ligue lui doibvent estre fort suspects, selon que leurs actions ont monstré jusques ici. Ostez leur donc le moyen et l'opportunité de vous faire dommage; aultrement, que pourroit on penser de vostre majesté, sire, de vous, à qui nature a donné tant de graces, à qui Dieu a departi tant de prudence, à qui les peuples estrangers ont tant eu de creance qu'ils ont mis en vos mains leur vie, leurs enfans et ce qu'ils ont plus cher, ont orné vostre chef de leur riche couronne? Certes, la crainte du mal futur, le peril et la souvenance des exemples passés, vous admonestent, sire, d'avoir l'oreille au vent et l'œil à la campagne, pour empescher qu'ung si grand malheur n'enveloppe toute la postérité.

Vostre majesté peult donc maintenant juger, sire, si les princes de vostre sang ont grande occasion de se craindre; car si ceulx de la Ligue, et leurs principaulx chefs, ont esté tres cruels contre vostre majesté, et vous ont desdaigné de faict, de parole et par esprit, il est aisé de recognoistre s'ils seroient humains envers ceulx qui d'ailleurs ont aujourd'hui tres grande raison de se plaindre et se douloir à vostre majesté de voir ces estrangers, qui sont leurs ennemis, armés soubs

vostre auctorité, sire, pour, contre tout ordre de justice, executer le jugement qu'ils vous ont faict donner, et courir sus aux premiers princes de vostre sang, les destruire, et ruyner leurs maisons soubs ung pretexte que vous mesmes, sire, aurés plusieurs fois recogneu estre feint, faulx et simulé; comme aussi lesdicts sieurs princes sont assés advertis qu'ils ne feignent poinct de dire qu'apres vostre majesté, la fin de laquelle ils se promettent assés tost, il n'y aura plus de roy en France qui soit de vostre maison; aupres de leurs personnes ils reçoivent ceulx de la relligion pretendeue reformee, et n'en font poinct de distinction pourveu qu'ils leur promettent leur service; dadvantage, sont tres liberaulx à chacung d'eulx de sauve garde pour eulx et leurs maisons, partout où leurs forces passent, sans les presser selon vos edicts derniers, dont ils font executer la rigueur à vostre majesté, comme sergent de leurs passions, pour mettre au desespoir vos subjects, et se reservent à eulx d'en dispenser pour gratifier qui bon leur semble, et obliger ceulx qui sont en peine, et faire profict de la rigueur de vos edicts en toutes sortes; font escrire aussi dadvantage que la loi salique, principal fondement de la couronne, par laquelle vous estes roy, se peult et doibt estre abolie en leur consideration, qui est ung argument sans response pour asseurer qu'ils veullent, en essertant les branches de la maison royale, enter des sauvageons et faire place aulx plantes estrangeres; car ce sont ces libelles qu'ils sement, ce sont, sire, les propos damnables, ce sont les impudens langages que leurs plus fidelles conseillers tiennent, desquels lesdicts seigneurs princes se plaignent aujourd'hui à vostre majesté, se jettent aulx pieds d'icelle, et la supplient tres humblement de prendre toute la famille en vostre protection, et ne permettre que les estrangers serviteurs dominent sur vos enfans, afin que le desespoir ne les rende capables de conseils extremes, et ne leur fasse chercher le conseil de la nature; que le peril ne les contraigne et enhardisse, ou plustost qu'ils ne soient forcés par la necessité, qui ne leur permettoit d'esperer mieulx que par le desespoir : de fait, sire, ils aiment mieulx dix mille fois mourir, qu'il soit dict qu'ils ayent survescu la destruction de leur maison, qu'on les ait dejettés en leur vie du rang qu'ils doibvent tenir par nature. Sire, ils esperent que Dieu vous fera prosperer apres eulx; ce que vos ennemis appellent leur fortune, les princes de vostre sang estiment leur plus grand malheur en vous perdant, et si Dieu les privoit de vostre majesté; mais ils sont, apres vous, les restes des roys vos devanciers, en eulx vous voyés leur image. Qui sera donc celui qui pourroit croire que vostre majesté, pleine de pieté et conscience, et qui a plus faict de demonstration de devotion, de relligion, de justice et bonté que roy qui ait regné il y a long temps en France, ne veuille favoriser la juste douleur de ces princes qui ont merveilleusement à craindre, voyant leurs ennemis armés au milieu du royaume, tellement que s'il advenoit, par malheur, qu'ils vous perdissent, sire, ils se trouveroient sans doubte plustost accablés par la force que conseillés par les discours; par quoi tant s'en fault qu'ils ne veuillent courir la fortune de leurs parens pour la conservation de leur maison, non pas pour leur relligion, qu'ils engageront plustost leur vie, que de la voir subjecte à la tyrannie de leurs ennemis, et se voir posseder par ceulx qui ne cherchent qu'à les detruire. Sire, lorsqu'on ne peult aultrement se sauver, le conseil est sans

conseil, et ce que l'homme faict par force ou par necessité est devant tous digne d'excuse. Puis donc que
ces princes gardent la chambre de leurs peres, et qu'ils
voient le feu se prendre à la maison, ils sont fort resolleus de n'attendre à y courir qu'il soit parveneu
jusques au lit. Nature a imprimé à toute creature le
desir immortel de conserver les siens, voire que naturellement celui qui les mesprise est plus lasche que bon.
Cléon disoit, sire, que la force est fort excusable quand
l'oppression, qui faict perdre le sens aulx sages, est
insupportable ou cruelle, et peult admonester les plus
discrets de prendre ung parti resolleu, courageux et
hardi, plustost que de temporiser sur ung trop meur
et trop tardif conseil.

Qu'est ce qu'on sçauroit dire dadvantage du roy de Navarre et de M. le prince de Condé? Ils ont presenté les deux choses sur lesquelles leurs ennemis ont faict jusques ici si grande instance, et ont faict declaration à vostre majesté qu'ils estoient tres contens d'estre mieulx instruicts qu'ils ne sont au faict de la relligion; ils ont offert et offrent d'abondant de mettre en vos mains les places qu'il vous a pleu leur accorder pour la necessité de leur conservation, pourveu que les ligues rendent aussi toutes celles qu'ils tiennent, desquelles is se sont saisis, ou par force et contre le gré de vostre majesté, ou par cauteleuse finesse. Est il chose plus raisonnable, sire? ne sont ce pas les offres de princes chrestiens et tres obeissans à vostre volonté? Aussi tous les susdicts seigneurs princes catholiques supplient tres humblement vostre majesté croire que ce dernier coup, ores que l'intention de la Ligue feust descouverte par vostre bouche seure et veritable, meantmoins, ils ont esté quelque temps regardans le progres et l'evenement

de ceste tragedie, à laquelle ils eussent, à la verité, fort blasmé le roy de Navarre et M. le prince de Condé, s'ils les eussent veus opiniastrés, s'ils ne se feussent promptement rangés à quelque raison, s'ils n'eussent faict humblement entendre à vostre majesté le desir qu'ils avoient d'estre instruicts en une relligion meilleure que celle en laquelle ils ont esté nourris; et qu'en tout ils n'ont plus rien jamais desiré que de satisfaire à vostre volonté, s'ils ne l'eussent protesté au peuple, s'ils ne l'eussent declaré aulx princes estrangers. Quelle apparence y a il donc maintenant, sire, que les ennemis jurés dudict roy de Navarre et de sa maison; du roy de Navarre, sire, qui a cest honneur d'estre le premier prince de vostre sang, aillent à lui l'espee au poing, le contreindre de ployer à leur volonté, d'estre esclave de leur tyrannie, et de se conformer à leur cruel appetit, contre lequel n'y a poinct de conseil humain pour fuir ces dangers extremes; mais nature en a monstré ung seul de repousser la force par la force.

Non pourtant, sire, que, pour tout cela, il soit jamais entré au courage desdicts seigneurs princes d'entre-prendre chose quelconque contre vostre intention, contre vostre desir : car ils sçavent assés, sire, que, pour rien, vous ne vouldriez consentir à leur ruyne; moins feront ils jamais chose contre leur debvoir, ni contre le service tres humble qu'ils ont voué à vostre majesté; mais ils sont deliberés d'opposer seulement à la temerité de leurs ennemis la sauvegarde et protection de vostre majesté, et avec icelle, si l'insolence des auftres, passans oultre en leur entreprise, les contrainct, ne tenir les bras croisés, lorsqu'on detruira leur famille et leur nom, ains en tout cas recourir à la juste defense. En quoi ils s'asseurent que Dieu leur suscitera au besoing grand

nombre d'amis et de serviteurs catholiques dehors et dedans le royaume, bons et naturels François, mesmes des officiers de la couronne, qui sont obligés, par serment, à la protection de l'estat de France. Ce sera principalement, sire, parce que la cause d'icelle est joincte avec le bien de vostre estat, avec la conservation des principales loix et fondemens de ce royaume, pour le service de vostre majesté; à ce que sa pleine et parfaicte volonté, forcee par les ennemis de la maison de France, lui soit entierement restituee, et pour empescher seulement que leurs ennemis, mauvais serviteurs de la France, ne leur puissent nuire, contre lesquels il y a grande apparence que les princes de vostre sang, vrais et naturels François, trouveront assés d'amis et serviteurs parmi vos subjects pour faire une contre ligue, et ramener à quelque raison les estrangers qui n'ont honneur ni bien que de vostre couronne.

Mais, sire, afin que les affaires ne s'aigrissent dadvantage, que le mal ne se rende incurable par la grandeur ou danger de la plaie, d'ailleurs, que vostre povre peuple, qui a tant pasti depuis vingt et cinq ans en çà, pour la mesme occasion, puisse estre soulagé; que le service divin, qui est intermis par le tumulte des armes en ung si grand nombre de places, villes et provinces de vostre royaume, n'attire encores plus fort l'ire de Dieu sur nous, et que, par mesme effect, les princes de vostre sang, de l'estat et de la vie desquels il y va, non de la relligion, puissent tenir pour resoleu qu'il plaist à vostre majesté les continuer en sa bonne grace, et se declarer à jamais leur bon pere, leur bon roy et souverain seigneur, comme elle a faict jusques ici; d'abondant, sire, à ce que la memoire de vostre majesté soit saincte et honorable à la posterité, pour n'avoir voulleu conniver à la destruction de son propre sang, qui se feroit devant vos yeulx et par vostre puissance, et qu'on ne puisse presumer, aulx siecles advenir, ce qui est du tout incroyable, et ne sçauroit entrer en l'ame d'ung prince tres chrestien, que vostre majesté ait voulleu transiger avec les estrangers, vos ennemis jurés, des princes de vostre sang, des officiers de la couronne, et de tous les gens de bien françois, en leur donnant en proye la vie de ceulx ci et l'estat de vostre royaume. Du moins, sire, afin que la necessité naturelle ne rende les apparences moins dociles et disciplinables, sentans la cruauté exercee sur eulx et les principaulx de leur nom.

Les susdicts seigneurs princes catholiques supplient tres humblement vostre majesté de surseoir l'execution et l'effect de ceste guerre, jusques à ce qu'il ait pleu à vostre dicte majesté conferer et prendre advis de vos tres fideles subjects, bons et naturels François, qui ne sont poinct conjurateurs ligués, ni partisans de vos ennemis et de la maison de France, sur les moyens qui se pourront ouvrir pour mettre vostre povre peuple en repos, et reprendre les voyes que vostre majesté, pleine de prudence et de benignité, avoit fort heureusement acheminees pour la reunion de vos subjects à la devotion tres chrestienne, à l'honneur de Dieu et de l'Eglise catholique. Ainsi, sire, s'il plaist à vostre majesté enteriner l'instance, la tres humble instance et tres affectionnee requeste desdicts seigneurs princes catholiques, et user de ceste clemence envers vostre povre peuple, il n'y a poinct de doubte qu'elle n'esprouve celle de Dieu : s'il vous plaist de quitter quelque chose à la rigueur envers vos subjects, et du moins pour conserver les bons, essayés à reunir les desvoyes; les François sont de tel naturel, qu'ils

s'oublieront eulx mesmes pour vous honorer et servir de tout leur cœur; et Dieu benira vostre couronne et vous fera regner longuement en paix et prosperité.

C'est pourquoi, sire, lesdicts seigneurs princes catholiques supplient tres humblement votre majesté de prendre ceste leur tres humble remonstrance en bonne part, comme procedant de tres humble service qu'ils vous doibvent, et de ladicte monition de la nature, qui ne peult voir espandre son sang sans estre esmeue de juste douleur.

Ils ont tres bien recogneu que votre majesté n'a pas pris de plaisir à ceste guerre; qu'elle y a esté conduicte et amenee par violence; qu'elle en recognoist les perils incidens et les dangereuses consequences. Ils s'asseurent doncques que vostre majesté leur sçaura gré, et leur imputera à fidele service qu'ils ayent rallié et rallient pres d'eulx vos plus fideles subjects et serviteurs, pour mettre la volonté de votre majesté au large, et contrepeser la force de vos ennemis.

Ont aussi consideré, comme vostre majesté l'a tres bien recogneu, et les deportemens de ces ennemis l'ont tesmoigné, qu'il n'y va ici de la relligion, mais de l'estat et maison de France; mesmes, si en eulx estoit, de vostre personne propre.

Pourtant s'asseurent, lesdicts seigneurs princes catholiques, que vostre majesté prendra en bonne part qu'ils se soient mis ensemble pour desarmer vos ennemis qui abuseroient sans doubte de leurs armes contre vostre majesté, si elles venoient à leur succeder; protestant, pour prevenir tant de maulx et de calamités, qui, à faulte de ce, en procederoient, ne laisser jamais les armes que lesdicts rebelles ne les ayent posees, ou qu'ils ne les leur ayent arrachees par force, afin que, par ce moyen, ils puissent voir en leurs jours l'obeissance rendeue au roy, le repos à ce royaume, et la paix à tous les bons subjects de sa majesté, pour le present et pour l'advenir.

Et par ce particulierement qu'ils se sont pris au roy de Navarre et à M. le prince de Condé, commençans par les princes les plus proches de vostre majesté pour en eteindre le sang, ont practiqué toutes voyes et les plus extraordinaires, de les detruire et ruyner, jusques à les faire exposer en proye et declarer inhabiles et incapables à toutes dignités et successions, etc., chose inouye et non jamais practiquee en ce royaume; requierent tres humblement vostre majesté lesdicts seigneurs princes catholiques, qu'il leur soit faiet droict et raison d'ung si notable tort, et lui en demandent la justice, s'asseurent qu'elle trouvera tres equitable que l'estrange serviteur qui a osé entreprendre d'exterminer et chasser les enfans de la maison, en soit banni et forclos comme il merite. Protestent partant de ne poser poinct les armes qu'ung tort si indigne ne soit reparé condignement au sang de France, et particulierement aulxdicts seigneurs roy et princes; et requierent, comme chose necessaire au bien, repos et tranquillité de cest estat, que lesdicts rebelles et perturbateurs, ennemis du sang royal, ayent à sortir de ce royaume, pour n'y estre plus receus à tenir aulcung office, dignité, ni grandeur.

Finalement, supplient tres humblement vostre majesté pour affermir une bonne paix et union à ce royaume, entre tous ses naturels subjects, d'entrer en conseil avec soi mesmes, et avec tous ses bons et loyaulx serviteurs, des moyens plus propres et plus convenables, eu esgard à la condition et qualité tant du mal 280 REQUESTE POUR PRESENTER AU ROY.

que du malade, qui ne peult souffrir sans inconveniens les remedes corrosifs et rigoureux; afin que, par ce moyen, Dieu soit mieux servi, vostre majesté mieux obeie, et vostre peuple en répos apres tant de miseres; vous presentent, pour l'execution d'une si saincte intention, contre tous les contrevenans, leurs vies et leur sang, qui est proprement vostre, et pryent Dieu qu'il donne à vostre majesté tres longue vie, au souhait de tous ses bons subjects et serviteurs, au regret-de tous ses ennemis.

LX. — * INSTRUCTION

Pour M. de Montmartin, allant en Allemaigne.

Monsieur de Montmartin dira à M. le prince l'estat des affaires de deçà, tel qu'il a veu, et le desir qu'auroit le roy de Navarre qu'il peust s'advancer avec ses forces, aussi ce qui s'est passé avec le sieur de Mondon pour le regard de M. de Montpensier.

Mais particulierement le pryera de tenir la main à la subvention necessaire pour l'armee estrangere; à ce que les sels, pastels, vins et aultres marchandises convenables, y soient affectees et employees au meilleur profict, et au plus tost que faire se pourra.

Et, pour cest effect, entend le roy de Navarre que les deux dixiesmes, à sçavoir, de l'amirauté et de la cause, y soient employés, et, quant au surplus qui pourroit appartenir aulx proprietaires des vaisseaux qui ont faict les prises, et aulx capitaines, equipages et avictuailleurs, a donné pouvoir ledict seigneur roy audict sieur de Montmartin et au sieur de Canaye, conjoinctement, et l'ung au default de l'aultre, d'en traicter INSTRUCTION POUR M. DE MONTMARTIN. 281 avec eulx, et l'en obliger avec eulx en son propre et privé nom, sauf à les payer en les acquittant des droicts des prises qu'ils feront ci apres, jusques à la concurrence de la somme, ou en telle aultre façon qu'ils trouveront convenable.

Dira ledict sieur de Montmartin audict seigneur prince le moyen qu'a jugé plus propre ledict seigneur roy, pour composer le differend de La Rochelle, lequel il espere qu'il approuvera et trouvera bon, à sçavoir, de commettre, soubs son auctorité et en son absence, à ceste fin M. le comte de Laval, tant pour les bonnes qualités qui sont en lui, que pour n'avoir icelui rien de particulier, ni aultrement à demesler avec lesdicts de La Rochelle, et pour mesme raison le fera trouver bon à M. de Rohan.

Et cependant ne lui celera qu'en leurs memoires, il a apperceu beaucoup de choses mal fondees et mal prises, lesquelles il ne veult attribuer à la communauté, mais à quelques ungs qui vouldroient subtiliser à leurs despens, au prejudice de l'union, et de la mutuelle intelligence qui est necessaire.

Exhortera aussi ledict sieur de Montmartin, M. de Rohan, M. de Laval, M. de la Tremouille, tous les seigneurs et gentilshommes, villes et communautés de par delà, tant en general qu'en particulier, à deployer leurs moyens pour la subvention susdicte, leur monstrant, par ce moyen, l'esperance et asseurance d'une proche armee, de laquelle ils comprennent assés les consequences.

Fera tenir, ledict sieur de Montmartin, les deux paquets adressans en Angleterre, en remerciement de ce que la royne a accordé par le voyage du sieur de Guitry, à sçavoir, l'ung de La Rochelle par la mer, l'aultre

de Paris par la voye de l'ambassadeur de ladicte dame, et, pour ce, pourra faire tenir ce dernier au sieur de Salettes.

A Sedan, verra M. de Bouillon, et le remerciera au nom dudict seigneur roy, de la bonne resolution en laquelle il entend qu'il est, et des bons offices qu'il faict en toutes sortes au parti, l'asseurant d'une parfaicte amitié envers lui; le pryera de se voulloir joindre au gros de l'armee, avec ses troupes, tant françoises qu'estrangeres, et tant à pied qu'à cheval, l'asseurant que M. son oncle fera de mesmes, et lui remonstrant qu'il n'est que d'estre tous ensemble pour estre en terreur à leurs ennemis.

Et neantmoins est d'advis ledict seigneur roy, que ledict seigneur de Bouillon advise, par tous moyens, de faire saisir le plus de bonnes places qu'il pourra autour de lui, tant sur la Lorraine que sur la Champagne, afin de faire sentir la guerre à leurs plus particuliers ennemis, et de les tenir bridés à l'advenir; à ce exhortera les seigneurs gentilshommes et capitaines qui sont là refugiés et des environs, lesquels il visitera de la part dudict seigneur roy, et asseurera de sa resolution au public et bonne volonté envers eulx, et n'oubliera de s'enquerir si le sieur Du Fresne, conseiller du roy au grand conseil, sera arrivé, et entendre de lui ce qu'il aura faict en vertu des charges et pouvoirs qu'il avoit emportés dudict seigneur roy.

Remerciera aussi madame la duchesse de Bouillon de la bonne volonté qu'elle porte audict seigneur roy de Navarre, et l'asseurera qu'il tient messieurs ses enfans comme sa maison propre, et qu'ils participeront tousjours à ce que Dieu lui donnera jamais d'accroissement.

En Allemaigne, remerciera tres affectionnement

M. le duc Casimir de la sincere affection qu'il lui faict paroistre en ce besoing, et lui dira le contentement extresme que receut ledict seigneur roy de Navarre des bonnes nouvelles qu'il a receues par lui, et combien il lui tarde de le voir et embrasser, pour lui tesmoigner plus vivement l'obligation qu'il se ressent avoir en son endroict, qu'il ne pourra jamais oublier; qu'à ce coup, il pourra dire qu'il aura humainement rendeu la vie à nos eglises, et remis la France et ceulx qui y ont plus d'interest, en ung meilleur estat. Aussi lui dira le debvoir qu'a faict ledict seigneur roy de Navarre, tost apres sa veneue, les principales Eglises, chacung, selon ses moyens, pour parfournir à ce qui defailloit pour marcher, si sa bonne volonté n'y suppleoit, de laquelle seule il attend et espere l'accomplissement; comme aussi n'ignore, ledict seigneur roy de Navarre, que sa recommandation, envers la royne d'Angleterre, n'a pas peu servi à lui faire incliner à la negotiation du sieur de Guitry.

Fera entendre aulx trois, qui sont de N. N. N., le grand gré que ledict seigneur roy de Navarre leur sçait du soing qu'ils ont de ses affaires par de là, et de la peine qu'ils prennent de les advancer, les pryant de s'entre assister en ung si bon œuvre, et ne s'y ennuyer poinct tant qu'ils l'ayent amené à bonne fin.

Et, quant à l'estat des affaires de deçà, leur dira ce qu'il a veu, que, grace à Dieu, les ennemis n'ont encores rien gaigné qui merite sur nous; qu'ils n'ont encores osé attaquer une bonne place; qu'en diverses rencontres, dont quelques unes sont assés notables, ils ont esté battus. Dieu, nous ayant tant benis, qu'ils n'ont encores eu aulcung tant soit peu advantage sur nous à la campagne : comme ainsi soit qu'a par celles,

on leur ait desjà tué plus de mille hommes; que M. de Montmorency se lie de plus en plus tres etroictement avec ledict seigneur roy de Navarre, et d'amitié et d'affaires; mesmes que tout fraischement M. de Monpensier a envoyé vers lui pour resouldre ensemble au bien de leur maison, contre les ennemis communs, dont il discourra les particularités.

Que ledict seigneur roy de Navarre est resoleu d'aller au devant de l'armee que conduira monseigneur le duc Casimir, avec la sienne qui sera composee, comme il espere, de douze cens bons chevaulx françois (non compris ce qu'il ralliera d'ailleurs), et de huict à dix mille arquebusiers, et tiendra si bon chemin que ses ennemis ne pourront l'empescher.

A ceste fin, qu'il les prye ne faillir, incontinent qu'ils auront accordé et conveneu avec les colonels et ritt-meistres du lieu de la place Monstre, de depescher deux hommes vers lui, en diligence; l'ung, par voye de Paris, et l'aultre par voye de Suisse et Geneve, par lequel il soit adverti du temps qu'ils s'y rendront, du chemin qu'ils tiendront et qu'il aura à tenir; et, en somme, de tout ce qu'ils verront convenir pour amener tout à bien.

Et cependant est l'advis dudict seigneur roy, que ledict sieur de Montmartin fasse entendre audict seigneur duc, et aux susdicts seigneurs, que l'armee se vienne rendre et loger en la Lorraine, et qu'elle y rallie toutes ses trouppes: aussi qu'ils s'y saisissent des places plus commodes à fortifier, ou jà fortes, si aulcunes ils peuvent, et y laissent garnison, quand ils en partiront; tant afin que chacung cognoisse que c'est la maison de Lorraine à laquelle, proprement, on se prend des desseings qui se font contre la maison de France; qu'afin

aussi que ces places servent de les occuper et tenir en bride à l'avenir; et quant à ce qu'on pourroit alleguer que c'est terre d'empire, que M. le duc Casimir vouldroit respecter, est à respondre que c'est au roy de Navarre à qui on auroit à s'en prendre, pour lequel sera veneue l'armee.

Partant de la Lorraine, trouve bon, ledict seigneur roy, que ladicte armee tire son chemin par le Bassigny et Bourgogne, pour rencontrer la riviere de Loire, vers le Nivernois, comme l'an 1576, quand M. le duc Casimir se veint joindre à feu monseigneur; et là, ledict seigneur roy faict son compte de la rencontrer, n'y ayant chemin plus commode pour leur rencontre.

Toutesfois si, par la diligence d'aulcung de ses serviteurs, ou par le moyen de M. de M., il se presentoit quelque meilleure ouverture, par la prise de quelque place sur la riviere de Loire, les en tiendra advertis incontinent, et leur mandera ce qu'il sera d'advis de faire, comme ils feront de leur part, s'il se presente ou empeschement sur ce chemin, ou plus de facilité par ung aultre.

Desire ledict seigneur roy, en tant qu'il sera possible, que la levee des Suisses se fasse au nombre de dix mille, et pour ce, prye M. de Clervant d'entrer en responsion, promettant l'indemniser et recognoistre à jamais ung si notable service.

Et enfin asseurera, ledict sieur de Montmartin, que jamais ledict seigneur roy ne feut si resoleu de servir à Dieu, ressentant de jour en jour sa benediction sur ses affaires: adjurant tous les gens de bien qu'il verra, de ne l'abandonner en la poursuite d'une si saincte et juste cause pour laquelle il fera exemple à ung chacung de n'espargner sa vie.

LXI. - LETTRE DU ROY DE NAVARRE

A MM. du clergé, faicte par M. Duplessis.

De Montauban, le 1er janvier 1586.

Messieurs, je me plains à vous en corps et en commun, et si ne puis je croire que soyés menés d'ung mesme esprit en ce qui se brasse contre moi. Vous ne pouvés ignorer de quelle moderation j'ai tousjours usé en vostre endroict, mesmes en la rigueur des armes; n'ignorés aussi les justes necessités qui m'y auroient quelquesfois reduict, et m'asseure qu'en vos ames vous en sçavés bien donner le blasme à qui il appartient. Tant y a que je n'ai oncques troublé la paix de gaieté de cœur; ains puis dire avec verité que j'ai donné mes justes douleurs et mescontentemens, et en beaucoup de sortes, au bien et repos de cest estat. Ceulx, messieurs, si vous y prenés bien gardé, que vous assistés de vos moyens pour ma ruyne, n'ont pas procedé de mesme sorte. D'une ambition particuliere ils ont faict ung zele de l'Eglise, de leurs mescontentemens privés une guerre publicque, n'ont faict conscience au reste d'allumer le feu aulx quattre coings de ce royaume, pour se donner ce plaisir d'avoir mis le roy en quelque peine, d'avoir sceu venger les defaveurs qu'ils s'imaginoient avoir receues de lui par une calamité universelle. Dieu vous veuille ouvrir les yeulx et vous faire voir le fonds de leurs intentions! Je ne crains (et Dieu le sçait) le mal qui me peult venir, ni de vos déniers, ni de leurs armes; l'ung et l'aultre ont esté jà employés assés de fois en vain. Je plains le povre peuple innocent, qui souffre presque seul de ces folies; je plains mesmes

ung grand nombre d'entre vous, qui contribués à l'ambition de ces perturbateurs, vous de vostre povreté, eulx de leur abondance; je plains principalement la faulte que vous faictes tous, les ungs d'une affection, et les aultres d'une aultre, qui aurés ung jour à respondre à ce royaume et à vostre patrie des miseres et des precipices où vous les jettés à vos despens; vous qui devés estre, selon vostre office, les appuis de la tranquillité publicque, à respondre devant Dieu de tant de sang innocent qui se respand, des desordres et des vices que la guerre que vous nourrissés amene, des pleurs, des cris et des langueurs de tant de povres familles que vostre abondance debvoit ou nourrir ou soulager, que vous faictes instrument de leur misere, cause de leur faim et seau de la chose publicque. Vous m'alleguerés le zele de l'Eglise, et je veux bien croire qu'aulcungs d'entre vous en soient poussés. Que dira donc la posterité, que vous ayés negligé les offres que j'ai faictes, que vous ayés mieulx aimé mettre tout en confusion que vous disposer à ung Concile; mieulx aimé venir au sang que conferer doulcement du sens des Escritures; mieulx aimé la voye de subvertir l'estat, que la voye de convertir les ames que vous pensés desvoyees; mesmes y allant de ma personne, que certes vous eussiés deu plustost instruire que destruire? Ceulx qui abusent de vostre zele, sçavent bien qu'il leur est impossible de tenir ce qu'ils promettent, je dis d'extirper la relligion en laquelle je vis par la force des armes; ils ne cherchent pas la reunion de ce royaume, ains sa ruyne. Et souvenés vous qu'aultresfois en vain ils vous ont faict vendre vostre temporel soubs ce pretexte; et souvenés vous que vos deniers seront consumés et vostre devotion de les fournir

esteincte, premier que vous ayés veu tant soit peu de progres en vos deliberations. On passe plus oultre. Aulcungs du clergé (je ne veulx pas croire qu'il y en ait beaucoup qui ayent consenti à ung tel monopole) ont sollicité le pape contre moi, et ont obteneu de lui certaine declaration, par laquelle je suis exposé en proye, et declaré inhabile à la succession de ce royaume. Ne pensés, messieurs, que ces foudres m'estonnent; c'est Dieu qui dispose et des roys et des royaumes, et vos predecesseurs, qui estoient meilleurs chrestiens et meilleurs François que les faulteurs de ceste bulle, nous ont assés enseigné que les papes n'ont que voir sur cest estat. Il me deplaist seulement que, contre toutes bonnes mœurs, il se soit trouvé des gens si inconsiderés que de faire consulter et decider à Rome la succession d'ung roy vivant et en fleur d'aage. Car à quoi peult estre bon cela, qu'à nous susciter en cest estat, ou plusieurs dissipateurs, ou ung usurpateur? Me deplaist aussi que nous ayons faict cognoistre aulx nations estrangeres que nostre nation, jadis si devotieuse envers ses princes, ait produict des monstres en ce siecle, qui, pour leur plaisir ou leur ambition, exposent la republicque en proye, et convient, à leur escient, au sac de cest estat tous les voisins; car, quant à mon interest, Dieu me garde que mes esperances percent au delà de la vie de mon prince. Dieu confonde en sa juste fureur ceulx qui fondent leurs grandeurs sur son tombeau, ceulx qui sont si providens que d'anticiper sa mort par leurs conseils! Messieurs, laissons ce propos, je veulx mieulx juger de vous, que vos actions ne m'y convient; j'aime mieulx juger de vos affections par moi que par vos actions. On m'a pourchassé beaucoup de mal; je ne le veulx imputer à tous en general; je

veulx croire que c'est le complot de quelques ungs, poussés d'ailleurs, peult estre de l'inspiration de quelques jesuites, semence d'Espaigne, ennemis du bien de cest estat; et Dieu doint qu'ils soient aussi prompts à s'abstenir du mal à l'avenir, comme je me sens des à present prest de le leur pardonner. Ce qui me reste à vous dire, Dieu m'a faict naistre prince chrestien, je desire l'affermissement, l'accroissement et la paix de la relligion chrestienne. Nous croyons ung Dieu, nous recognoissons ung Jesus Christ, nous recevons ung mesme Evangile. Si, sur les interpretations de mesme texte, nous sommes tombés en disserend, je crois que les courtes voyes, que j'avois proposees, nous pourroient mettre d'accord. Je crois que la guerre, que vous poursuivés si vivement, est indigne de chrestiens, indigne entre les chrestiens, de ceulx principalement qui se pretendent docteurs de l'Evangile. Si la guerre vous plaist tant, si une bataille vous plaist plus qu'une dispute, une conspiration sanglante, qu'ung Concile, j'en lave mes mains, le sang qui s'y respandra soit sur vos testes. Je sçais que les maledictions de ceulx qui en patiront ne peuvent tomber sur moi; car ma patience, mon obeissance et mes raisons sont prou cogneues. J'attendrai la benediction de Dieu; sur ma juste desense, lequel je supplie, messieurs, vous donner l'esprit de paix et d'union pour la paix de cest estat et l'union de son Eglise. Amen.

LXII. — LETTRE DU ROY DE NAVARRE

A MM. de la Noblesse, faicte par M. Duplessis.

De mesme date que la precedente.

Messieurs, vous estes nés tels, que vous approchés assés des affaires de l'estat pour donner le tort ou la raison à qui elle appartient, sans qu'il soit besoing de longs propos pour vous ouvrir les yeulx. Vous avés veu naistre en pleine paix les remuemens de la Ligue contre le repos de ce royaume; vous savés la patience que j'ai eue, quoiqu'ils m'eussent pris comme à partie et pour subject et pretexte de leurs armes; vous avés veu les Ligueurs declarés rebelles par le roy, et poursuivis comme tels par toutes ses courts de parlement; vous vous estes veus vous mesmes commandés, armés et combattans contre eulx, par l'expresse volonté du roy, soubs l'auctorité des princes du sang, des pairs et principaulx officiers de la couronne. Je ne doubte donc qu'il ne vous soit tres estrange de voir, comme en ung instant, ce changement; de vous voir armés contre le sang de France, commandés par les estrangers que vous combattiés comme perturbateurs, et, qui pis est, contre ceulx là qui, trois jours auparavant, pour le service du roy et du royaume, se trouvoient mandés et commandés comme vous, ranges soubs mesmes enseignes et de mesme volonté que vous: mais vous sçavés bien juger aussi que les premiers mandemens procedoient du propre mouvement du roy; ceulx qui ont suivi depuis, de la violence des perturbateurs; car qu'ont faict depuis, mesmes entre deux, ceulx de la Ligue, pour leur faire perdre les qualités

de rebelles, crimineux de leze majesté, perturbateurs du repos, qui leur sont attribuees par tant d'arrests? ou qu'ont commis ceulx de la relligion, vivans soubs le benefice des edicts, que sa majesté avoit mandés indifferemment pour son service, qui couroient aussi egalement à l'embrasement commun, pour estre aujourd'hui à l'appetit desdicts perturbateurs, chassés du royaume, pourchassés à mort de toutes parts? si c'est' pour le faict de la relligion, y avoit il pas edict expres? estoit il pas fraischement reiteré? ce qui est permis par les loix du royaume peult il estre reputé à crime? peult il estre poursuivi de quelque peine? si c'est (et ce l'est vraiement) pour avoir contrarié aulx desseings de la Ligue, estes vous donc pas complices de ce crime? estes vous donc pas subjects à mesme peine? cherchés vous donc pas vostre ruyne propre? car quel crime poursuit on en eulx, que d'estre et ne voulloir estre que François? Je viens à moi mesmes. Soit que vous jugiés de moi par moi, ou par la comparaison de ceulx de deste Ligue, je sçais bien que vous ne me pouvés donner le tort; je sçais mesmes qu'en vos ames vous le donnés à mes ennemis; ils se meslent de parler de ma relligion. Vous qui cognoissés la dignité du sang de France, qui sçavés bien dire que vous ne devés respect qu'à celui là, sera il donc dict que j'en rende compte à l'estranger? me suffit il poinct d'en donner contentement. au roy et à la France? quelqu'ung s'est il plainct que je l'aye violenté pour sa relligion? et qu'ai je peu faire au reste, ou plus raisonnable, ou plus chrestien, que de requerir ung bon Concile? ils se sont formalisés aussi du gouvernement de cest estat, ont voulleu pourvoir à la succession, l'ont faict decider à Rome par le pape. Vous donc, qui tenés le premier lieu en ce royaume,

si le besoing d'icelui l'avoit requis, auriés vous esté si nonchalans de vous laisser prevenir par estrangers en cest office? n'auriés vous poinct eu de soing de la posterité? vous seriés vous endormis en ce debvoir? car qu'a on veu que Lorrain en tous ces remuemens? Mais, certes, pour reformer ou transformer l'estat, comme ils desirent, il n'estoit besoing de vostre main. Pour faire passer l'estat en estrangere main, il n'appartenoit qu'à estrangers à l'entreprendre; pour chasser la France hors de France, le proces ne se pouvoit juger en France : elle estoit par trop suspecte en ceste cause, il falloit qu'il feust jugé en Italie. Ils se sont au reste pris directement à moi; je me suis offert à ung duel; je suis descendeu au dessoubs de moi mesmes; je n'ai desdaigné de les combattre. Je l'ai faict, et Dieu m'en est tesmoing, pour saulver le peuple de ruyne, pour espargner vostre sang; de vous, dis je, de qui principalement il se repand en ces miseres. S'ils avoient quelque chose à dire contre moi, leur estoit il pas plus honorable? s'ils avoient à cœur le bien et salut de cest estat, les mettois je pas en beau chemin? Il s'en est trouvé qui mettoient leur vie pour le salut de leur patrie. Quels jugerés vous estre ceulx ci, qui, pour se soustraire du danger, veullent voir perir tout ung estat? vous faictes profession de gens d'honneur, quel tort ont ils faict à leur honneur de n'accepter poinct une si belle voye? quel tort faictes vous au vostre de les accompagner contre moi, vous qui feriés conscience contre l'ung de vos voisins d'assister une supercherie? ne pensez, messieurs, que je les craigne; je sçais ce que peult la force contre moi. On sera plustost lassé de m'assaillir, que je ne serai de me defendre; je les ai porté plusieurs annees, plus forts qu'ils ne sont, plus foible beaucoup

que je ne suis. Vous avés experience et jugement, le passé vous resouldra de l'avenir. Je plains, certes, vostre sang repandeu et depandeu en vain, qui debvoit estre espargné pour conserver la France. Je le plains employé contre moi, qui le me deviés garder, estant ce que Dieu m'a faict estre en ce royaume, pour, dessoubs l'auctorité et le bonheur du roy, joindre une France à la France, au lieu qu'il-sert aujourd'hui à la chasser de France. Je le plains aussi qui ne sera ni payé ni plainct presque d'aulcung; car le roy, forcé en son voulloir, ne se tient pas pour servi en ceulx qui lui font force. Ceulx d'ailleurs qui lui font force, ne vous sauront pas de gré de ce service, qui sçavent que c'est le nom du roy et non pas le leur que vous servés. Messieurs, Dieu vous doint y bien penser; les princes françois sont les chefs de la noblesse. Je vous aime tous; je me sens perir et affoiblir en vostre sang: l'estranger ne peult avoir ce sentiment, l'estranger ne sent poinct d'interest en ceste perte. J'aurois bien à me plaindre d'aulcungs, j'aime mieulx les plaindre; je suis prest de les embrasser tous. Ce qui me deplaist, c'est que ceulx que je distingue en mon esprit, que je sçais avoir esté circonveneus, je ne les puis distinguer au fort des armes; mais Dieu sçait mon cœur, leur sang soit sur les aucteurs de ces miseres! Quant à moi, messieurs, je le prye et le pryerai incessamment qu'il lui plaise ouvrir la voye par laquelle son nom soit servi et honoré, le roy obei, l'estat en repos, tous les ordres et estats de ce royaume en leur ancienne dignité, prosperité et splendeur. Amen.

LXIII. - LETTRE DU ROY DE NAVARRE

A MM. du Tiers Estat, faicte par M. Duplessis.

De mesme date que les precedentes.

Messieurs, je n'ai poinct besoing de grand langage pour vous faire entendre la justice de ma cause. Resoubvenés vous que, lorsque ces remuemens sont adveneus, nous vivions en paix, et de jour en jour allions en mieulx. Resoubvenés vous, nonobstant qu'ils feussent directement contre moi, que je n'ai bougé huict mois durant; que ma patience a passé toute borne. Resoubvenés vous, que j'ai veu les armes mesmes, qui me debvoient estre plus propices, joinctes à mes ennemis, et acheminees contre moi, premier que de me resouldre à me defendre. Et je vous jure, messieurs, que l'horreur d'une guerre civile, et l'apprehension sensible des miseres et calamités qu'elle produit, me rendoit stupide et insensible à mon dommage propre, si je n'eusse apperceu que ma longue patience tournoit en danger et en ruyne à ce royaume, donnant loisir aulx perturbateurs d'y faire violemment tout leur plaisir. S'il a esté question de la relligion, je me suis soubmis à ung Concile; si de plainctes concérnantes cest estat, à une assemblee d'estats. J'ai desiré mesmes de tirer sur ma personne tout le peril de la France pour la saulver de ' misere, m'estant esgalé de mon plein gré à ceulx que nature m'a rendeu inferieurs; au lieu que de leur propre interest ils ont faict une calamité commune; de leur querelle particuliere, une confusion publicque. J'aurois à me plaindre de ce que mes justes offres n'ont esté receues. Je m'en plains à vous, pour vous toutesfoys,

et non pour moi. Je plains les extremités où l'extreme injure qu'on me faict m'aura reduict de ne me pouvoir deffendre, sans que le peuple innocent en souffre. Je plains ma condition, que, pour garantir ma vie, il faille que vous sentiez du mal et de la peine; vous, pour le soulagement et bien desquels j'estois prest de repandre mon sang, si mes ennemis n'eussent mieulx aimé se racheter d'ung combat, où je les appellois, par ung parricide contre cest estat, par une combustion universelle. Mais je me console, que vous sçaurés bien considerer que la nature des maulx est telle, qu'ils ne peulvent pas estre gueris sans quelques maulx; que vous en sçaurés attribuer la cause, non pas au chirurgien qui a but de guerir, mais à celui qui a faict la playe, et en ceste playe, par consequent, toutes les douleurs qui s'en ensuivent; que dans peu de temps, au reste, Dieu me sera ceste grace, apres tant de traverses, de voir cest estat purgé de ceulx qui le travaillent, de vous voir aussi jouir d'ung repos certain et asseuré, qui nous fasse en peu de temps oublier tous les travaulx passés. Jugés, je vous prye, par les effects des intentions des hommes. Pour vous faire applaudir à ces troubles, ces gens vous voulloient faire esperer qu'ils reformeroient les abus des finances, qu'ils diminueroient les tailles et subsides, qu'ils rameneroient le temps du roy Louis XII, et desjà, qui les eust voulleu croire, ils se faisoient surnommer peres du peuple. Qu'est il adveneu? Leur guerre, apres vous avoir rongés estrangement de toutes parts, s'est veue terminee par une paix, en laquelle ils n'ont pensé qu'à leur particulier, et ne s'y est faict aulcune mention de vous. Leur paix, qui pis est, s'est tout aussitost tournee en une guerre contre ceulx qui demeuroient paisibles, par laquelle le roy est contrainct de doubler les imposts, le peuple exposé en proye aulx gens de guerre, la France obligee, si Dieu n'y met tost la main, à estre meurtriere d'elle mesmes. Car qu'est aultre chose l'edict, qu'ils ont extorqué, qu'une necessité imposee au roy de ruyner son peuple, de se defaire soi mesmes de sa main? Au moins, s'ils ne voulloient soulager le peuple, que ne se contentoient ils de l'avoir abusé? Et que leur avoit il faict pour l'accabler? On couvre ce mal d'ung zele de l'Eglise. L'ardeur de ce zele se debvoit monstrer en une charité; et la charité en l'union des deux relligions. Quelle charité qui n'a pensé qu'à exterminer! Quelle ardeur de zele qui embrase sa patrie, qui met en combustion tout ung estat! Cependant, soubs ombre que le clergé aura payé quelque somme d'advance pour donner courage à commencer la guerre, la voilà en train; ce sera au povre peuple à courre. Deux cens mille escus ou environ, l'auront obligé pour l'advenir aulx millions. Aulcungs du clergé en somme au regret du roy, et mesmes de leur corps, pour leur passion particuliere auront concleu le marché tous seuls, en auront faict advancer les arrhes. Ce sera au povre peuple à le tenir et à parfournir le reste, à quoi qu'il monte; à celui qui n'en peult mais, qui en porte le dommaige, et n'en attend poinct le fruict, à supporter tout le faix, et endurer tout le mal qui en viendra. Messieurs, je vous repete ceci: je suis né prince chrestien, j'ai cherché et proposé les voies chrestiennes pour composer cest estat et reunir l'Eglise; je suis né François, je compatis à vos maulx; j'ai tenté tous les moyens de vous exempter des miseres civiles. Je n'espargnerai jamais ma vie pour les vous abreger, je sçais que, pour la plus part, vous estes assubjettis soubs ceste violence; je sçais que vos volontés sont serves, je ne veulx vous imputer vos actions; vous estes François, j'aime mieulx vous imputer vos volontés; je ne vous demande à tous, qui, selon vostre vocation, estes plus subjects à endurer le mal, que non pas à le faire, que vos vœux et vos souhaits, et vos pryeres. Pryés Dieu, messieurs, qu'il distingue par ses jugemens ceulx qui cherchent le bonheur ou le malheur de cest estat, la prosperité ou la calamité publicque. Quant à moi, je le prends à tesmoing que je ne desire que le bien de ce royaume et de vous tous, je le prends pour juge si ambition ou passion particuliere a poussé ou animé aulcunement mes armes.

LXIV. — LETTRE DU ROY DE NAVARRE

A MM. de la ville de Paris, faicte par M. Duplessis.

De mesme date que les precedentes.

MESSIEURS, je vous escris volontiers; car je vous estime comme le miroir et l'abregé de ce royaume; et non toutesfois pour vous informer de la justice de ma cause, que je sçais vous estre assés cogneue; au contraire, pour vous en prendre à tesmoings; vous, qui par la multitude des bons yeulx que vous avés, pouvés voir et penetrer profondement tout ce qui se passe en cest estat; vous sçavés quel jugement a faict le roy des le commencement des aucteurs de ces miseres, quels il les a prononcés et declarés à vos oreilles; il vous requeroit de l'assister contre eulx, comme ennemis publics. Et c'estoit lors que sa volonté estoit entiere et libre, premier que la violence eust rien gaigné sur lui. Tout le changement qui y est veneu depuis, je sçais que vous l'avés imputé, non à son

voulloir, mais à leur force. Et, de faict, je suis bien adverti qu'estans peu apres requis de fournir aulx frais de ceste guerre, vous avés bien seeu respondre que ces troubles n'avoient oncques esté de vostre advis; que c'estoit à ceulx qui les mouvoient, non à vous, à en porter les frais; response que vous n'avés pas accoustumé de faire, quand vous pensés qu'il est question ou du service du roy ou du bien du royaume; car jamais subjects ont ils esté plus liberaux pour ce regard, que vous? Mais certes, quand vous appercevés que vos deniers ne vont pas aulx reparations, comme quelquesfois on vous faict croire, mais à la ruyne du royaume; quand vous voyés clairement qu'on ne vous demande pas vos bagues pour fournir à la rançon d'ung roy François ou de ses enfans, ou d'ung roy Jean, mais pour esteindre le sang et la posterité de France, pour reduire vostre roy en servitude et en prison. Or, je sçais tres bien que le roy vous en aura sceu gré; et tous bons François ont ceste obligation en vostre endroict; mais j'y en reçois pour moi une tres speciale pour le rang que Dieu m'a ordonné en ce royaume; et pour estre, puisqu'il lui a pleu, des enfans de la maison. Jugés quel besoing il nous estoit de ceste guerre. Vous sçavés que cest estat se rendoit de jour en jour capable d'une paix. S'il falloit rien remuer en la relligion, sans rien alterer, il ne falloit qu'appeller ung bon Concile; si au maniement de cest estat, le roy n'eust pas refusé d'ouvrir une assemblee d'estats; et, pour coupper le chemin à ces malheurs, vous sçavés que je m'y suis soubmis par declaration expresse, mesmes de vuider par ung duel ce que les perturbateurs eussent peu particulierement pretendre contre moi. Ceulx donc qui ont refusé ces beaux moyens, sont les aucteurs de la

guerre, et d'une guerre non necessaire et donc injuste; moi, qui les ai desirés, et qui volontiers m'y suis soubmis, me sens dechargé de tous les maulx qui en viendront. Car des moyens legitimes on a pris plaisir de me reduire aulx extremités extremes; tellement que les armes, que j'ai en la main, sont naturelles et necessaires, et donc tres justes. Comparés en somme mon obeissance à leur rebellion, ma grande patience à leur precipitation, mes modestes actions à leurs passions immoderees; et vous proposés sur tout cela quels ils sont en ce royaume, et quel j'y suis; vous conclurrés qu'il m'est faict ung tort inestimable, dont il n'y a gentilhomme en ce royaume qui ne s'efforçast, et à qui il ne feust permis d'en avoir raison. Je le dis avec verité, j'en apprehende les consequences; je vois que les innocens en souffriront. Mais soubvenés vous tousjours que mes ennemis sont ceulx qui ont esté declarés ennemis du roy et du royaume; qu'ils ont troublé le repos, appellé les estrangers, faict exterminer les domestiques, emprunté les ennemis, et employé leurs moyens, non à ma ruyne seule, mais à la confusion de cest estat. Lors, messieurs, vous imputerés à leurs offenses tous les inconveniens que peult amener une juste desfense; vous leur sçaurés mauvais gré des maulx consecutifs, comme vous les recognoissés aucteurs et causes des premiers. De moi, je me deplairai en mon malheur, de ne pouvoir dechasser le mal universel de cest estat sans quelques maulx. Je me plairai pour le moins en mon integrité, qui les ai voulleu racheter de ma vie, qui la sentirai tousjours bien employee pour la conservation de cest estat et de vous tous. Or, messieurs, je vous dirai pour la fin, que j'attends et attendrai tousjours de vous tout ce qui se peult et doibt de vrais François, et de la regle exemplaire des François. Attendés de moi pareillement tout ce qui se peult et doibt d'ung prince françois et d'ung prince chrestien, pour l'union de l'Eglise, le service du roy mon seigneur, le bien du royaume, le soulagement du peuple et le contentement de tous les gens de bien. Je prye Dieu, messieurs, qu'il ait pitié et compassion de ce royaume, et nous doint à tous ung bon conseil pour sa gloire et nostre propre bien. Amen.

LXV. — * LETTRE DE M. DUPLESSIS

A M. de Messe, ambassadeur pour le roy à Venise.

Du 4 febvrier 1586.

Monsieur, le gentilhomme, present porteur, m'a convié à vous escrire; je n'ai refusé, quelque temps qu'il vente maintenant, sçachant que vostre vertu est au dessus du temps; vous saurez tout nostre estat par lui. Ce prince, quoi qu'il en soit, ne peult se persuader que les gens d'honneur ne l'aiment, et ne plaignent sa condition, vous particulierement et vos semblables, qui voyez au fonds les affaires du royaume, et n'y pouvez voir sans y recognoistre le tort qu'on lui faict, et à sa justice. Dieu doint ung conseil plus libre au roy; je dis une volonté plus franche et non violentee; car nous sçavons bien qu'il n'y va de son affection, et qu'il n'y apporte mouvement ni action, qu'autant qu'on les lui force. Croyez moi, monsieur, que les efforts qu'on prepare sont en vain, et souvenez vous que je le vous escris. Nostre defensive est telle, au regard de l'offensive de nos ennemis, que l'une se ruyne contre l'aultre. Il eust mieulx valeu vivre paisiblement ensemble que

s'entretuer, sans que l'ung puisse survivre à l'aultre. Nous reviendrons sur meilleures erres, quand il plaira à Dieu, lequel je prye, etc.

SONNET.

Barque qui va flottant sur les escueils du monde, Qui vois l'air tout espris, et les vents conjurés, Le gouffre entrebaillé, les flots demesurés, Sans ancre, sans abry, sans emmare et sans sonde;

Barque, ne perds poinct cœur! Qui doùbte que ceste onde Ne soit subjecte aux vents? Aux flots mal assurés, Ung esquif my brisé. Mais les cieulx azurés Sont ils pas sur les vents et sur la mer profonde?

Au ciel? Non! qu'à la mer commande ton pilote; Par lui vente le vent, par lui ce monde flotte, Vente et flotte pour toi, pour te conduire au port.

Ton port, c'est l'Eternel, et tu t'en veux soubstraire. Veux tu calme ou bon vent? tu demandes ta mort; Pour surgir à ton port, il te fault vent contraire.

LXVI. — LETTRE DU ROY DE NAVARRE

A MM. les Estats generaulx des Pays Bas.

Messieurs, j'envoie vers la royne d'Angleterre le sieur de Buzenval, gentilhomme ordinaire de ma chambre, auquel j'ai commandé de vous faire part de mes nouvelles, et m'advertir des vostres, selon la correspondance qui doibt estre ordinaire entre nous. Je desire que vous fassiés ung singulier estat de mon amitié et bonne volonté envers vous, et qu'il se presente occasion en laquelle je vous en puisse faire preuve. Dieu me fera, s'il lui plaist, la grace, quelque jour, d'estre soulagé, ou delivré des affaires où je suis, pour avoir cest heur d'apporter quelque soulagement aulx vostres. Cependant, messieurs, je ne doubte aulcunement

302 LETTRE DU ROY DE NAVARRE, etc.

qu'il n'ait soing de ses Eglises, et qu'il ne nous mette hors, et vous et nous, des perplexités et fascheries que nous souffrons; seulement attendons son aide en pátience, et ne nous ennuyons poinct en la defense d'une si juste cause que, sans doubte, il sçaura bien secourir en son temps. Le surplus vous sera dict par ledict sieur de Buzenval, lequel je vous prye de croire comme moi mesmes, et particulierement de l'assister et favoriser es pays de vostre auctorité, en ce qu'il aura besoing pour mon service. Ce que je remets sur lui à vous dire et declarer plus specialement. Je prye Dieu, messieurs, etc.

LXVII. — LETTRE DE M. DUPLESSIS

A M. de Fleury, ambassadeur en Suisse.

Du 4 febvrier 1586.

Monsieur, le gentilhomme, present porteur, a voulleu que je vous aye escrit. Je n'ai pas cest heur d'estre cogneu de vous, et n'ai pourtant moins de voulloir de vous servir pour vostre vertu, et l'honneur que je porte à de vos alliés que je pense qui m'aiment. Ce prince, quoi qu'on lui fasse, ne se peult persuader qu'il ne soit aimé des gens de bien; de vos semblables particulierement, qui voyent au fonds des affaires, et par consequent au fonds de sa justice. Et c'est en cela qu'il se console. Monsieur, croyés moi, et sans feintise, on s'efforce en vain à sa ruyne, et non en vain seulement, mais avec dommage inevitable. Dieu doint, non meilleur conseil, mais plus libres mouvemens pour le pour suivre. Je le prye aussi, monsieur, etc.

LXVIII. — LETTRE DE M. DUPLESSIS

AM. de Liverdi, ambassadeur pour le roy aux Ligues des Grisons.

Du 4 febvrier 1586.

Monsieur, le gentilhomme, present porteur, a voulleu que je vous aye escrit, et je ne l'ai peu nier ni à son respect, ni à la reputation de vostre vertu, qui prend tout en bien. S'il vous est à importunité, je le recompenserai en quelque bon service, si vous le me voulés commander. Vous voyés le temps. Ce prince, quoi qu'il en soit, ne peult se persuader qu'il ne soit aimé des gens de bien, soit en comparaison de ses ennemis, soit à raison de son droict et de sa justice. Et de vous, et de vos semblables, il se tient tout asseuré particulierement, qui voyés jusqu'au fonds des affaires, et par consequent au fonds du tort qu'on lui faiet, et du droict qu'il a reteneu entier de son costé. Croyez, monsieur, que les efforts qu'on prepare contre lui seront en vain. Nostre estat est tel; la proportion si balancee de celui qui assaut à celui qui defend, que l'ung ne peult pas ruyner l'aultre sans se ruyner soi mesmes. Et combien vauldroit il mieulx se conserver ensemble? Dieu doint au roy non meilleur conseil, ou aultre volonté, mais plus de liberté et plus de force. Cependant, monsieur, etc.

LXIX. — INSTRUCTION

Pour le sieur des Reaux, allant de la part du roy de la Navarre en Suisse, Allemaigne et Italie, dressee par M. Duplessis.

Febvrier 1586.

Monsieur des Reaux fera entendre aulx sieurs de Fleury, de Liverdy et de Messe, ambassadeurs pour sa majesté, vers messieurs des Ligues, des Grisons, et la seigneurie de Venise, le tort qu'on a faict au roy de Navarre, en ceste guerre, et la verité de son droict; ce qu'il ne peult mieulx que par la comparaison de ses deportemens et de ceulx de ses ennemis. Mais particulierement les asseurera de la bonne disposition qu'il a recogneue en lui, envers le service du roi, le bien du royaume, et le contentement de tous les gens de bien; ne regrettant icelui rien plus que de se voir obligé, par la necessité publicque, à une guerre de laquelle il est malaisé que beaucoup d'innocens ne portent le dommage.

Leur dira que ledict seigneur roy de Navarre sçait fort bien recognoistre les serviteurs de sa majesté, d'avec les partisans de ses ennemis, qui sont proprement ceulx de la Ligue, et qu'il lui fasche fort de les voir aujourd'hui si meslés et si confeus ensemble, qu'il ne les puisse aussi bien discerner en traitement, comme il les discerne bien en esprit et volonté. Particulierement qu'il sçait bien que ceulx qui ont cest honneur, comme eulx, de voir, par le moyen de leurs charges, l'origine et le progres des choses, ne peuvent lui donnen blasme; au contraire, plaignent sa condition, et la

regrettent d'autant plus qu'elle procede de celle du roy, reduict, par la force et violence des perturbateurs, à conseils du tout contraires à son naturel et volonté. Aussi qu'ils se peuvent asseurer qu'il leur veult bien, et qu'il le leur fera voir, selon le moyen qu'il en aura.

Selon que ledict sieur des Reaux les verra s'affectionner, tant au droict qu'à la vertu et bonnes qualités dudict seigneur roy de Navarre, il pourra entrer plus avant en propos avec eulx, pour les lier plus estroictement à son service, qu'il leur aura faict cognoistre tres conjoinct avec celui du roy et du royaume, mesmes advenant mutation, pour lui faire le service qui lui a esté amplement discoureu, et qu'ils ne lui peuvent refuser.

En Suisse, faict bon faire entendre aulx principaulx le tort qu'ils se sont faict d'endurer que, contre l'alliance, il se soit faict levee en leur pays, au prejudice du service du roy; leur faire apparoir, par le memoire, comme on pretend practiquer une division entre eulx, comme, pour n'y rien omettre, on la veult mesmes nourrir entre leurs regimens qui sont en France. Mais surtout que les perturbateurs sont stipendiés du roy d'Espaigne, né de la maison d'Autriche, maison, de tout temps, qui a hai et espié leur liberté, et avec laquelle ils ont plusieurs choses à debattre; comme aussi ledict seigneur roy d'Espaigne, en tant qu'en lui est, ne peult souffrir auleune republique, ni mesme ombre de liberté, ce qui est tout evident en l'usurpation de Besançon, voisine d'eulx, n'aguere imperiale et libre, qu'il a joincte fraischement à la Franche Comté. N'est aussi à negliger, que le frere uterin de ceulx de Guise est presomptif heritier de la maison de Savoye, avec laquelle ils ont plusieurs droicts à demesler; et pourtant

3o6 INSTRUCTION DU ROY DE NAVARRE

que leur grandeur leur doibt estre suspecte. Et est à noter que les Suisses tiennent la comté de Habspurg, originelle de la maison d'Autriche, plusieurs bailliages demembrés de la Savoye et de la comté de Bourgongne, et Lucarne et Bellinsone, arrachés de la duché de Milan.

Ce mesme argument peult servir entre les Grisons, qui tiennent la Valtoline, usurpee sur la duché de Milan; et envers les Venitiens, qui occupent Bresse, Bergamo, Creme, et toute la Ghiara d'Adda, demembrees de ladicte duché; et partie de la Carinthie, Istrie et Dalmatie, usurpees sur le patrimoine de la maison d'Autriche; joinct les pretentions de l'Empire, qui est de long temps en ceste maison, lequel s'attribue les villes de Padoue, Verone, Vicence, Trevise, le Friul, etc.; tout le pays aussi que tiennent les Suisses et Grisons, qui l'ont jadis recogneu, et n'en sont distraits qu'en tant qu'on a abusé du declin et de la soiblesse de l'Empire. Et venant la maison d'Autriche à s'agrandir, ou par la dissipation des puissans voisins, ou par la conjonction de la puissance espaignole à l'auctorité de l'Empire, comme tous les deux se brassent maintenant, qui doubte qu'ils ne sceussent bien rechercher leurs vieilles chartres pour regaigner la possession qu'ils ont perdeue?

Les jurisconsultes disent que la republique a interest qu'ung homme privé ne gaste pas son bien, et, à plus juste raison, toute l'Europe (qui ne doibt estre censee qu'ung corps), qu'ung puissant estat, comme celui de France, par mauvais conseils, ne s'y ruyne Car il est tout evident que c'est ce seul corps qui tient aujourd'hui l'Europe en contrepoids, que toute l'auctorité ne tombe en une main, et tous les aultres

estats à la discretion d'ung seul, qui est le roy d'Espaigne. Il importe donc que tous les estats exhortent le roy de France à une ferme paix; il importe que la maison de Guise, qui tend à la dissipation de cest estat, soit reprimee. Car cest estat, dissipé et departi, ne retiendroit son poids. Il importe qu'ils n'aient le moyen de le jetter aulx mains d'ung roy d'Espaigne; ce qui adviendroit par la ruyne de la maison de Bourbon, et à quoi jà il pretend; revoquant la loi salique en doubte, loi fondamentale en ce royaume. Il importe que, pour le present et l'advenir, le droict soit gardé à qui il appartient, et qu'on ne recognoisse pas pour toute loi la bienseance ou la force.

Les Suisses et leurs alliés peuvent privement donner ce conseil au roy; car nul ne peult estre mieux receu à donner conseil de paix que celui qui ne s'espargne poinct à donner secours en guerre. Ils y ont aussi ung interest; car ils y perdent leur sang, s'en affoiblissant contre leurs voisins, le corps de toutes les Ligues contre les Autrichiens, les cantons catholiques romains contre les evangeliques. Et se soubviennent les catholiques que la bataille de Dreux les affoiblit d'ung canton, Glaris se trouvant plus fort par la perte qu'ils seirent, qui requit alors de faire au plus; et se soubviennent aussi combien leurs familles sont diminuees depuis nos troubles, combien leur discipline enervee, estant aujourd'hui contraincts ceulx qui font les levees, d'emprunter des lansquenets de la comté de Ferrete, Algovie et aultres lieux; au lieu que les lansquenets auparavant, pour la dignité qu'avoit acquis la nation sur eulx, n'eussent jamais peu estre receus es bandes des Suisses.

Les Venitiens ont tousjours eu la louange de garder

308, INSTRUCTION DU ROY DE NAVARRE

ce contrepoids, se rangeant plus tost à la calamité d'ung prince abbaissé de la fortune qu'à la prosperité d'ung conquereur ou d'ung victorieux. Or, ce qui leur estoit auparavant utile, leur est aujourd'hui tres necessaire; aujourd'hui que l'Espaignol ne debat plus pied contre pied Naples, Sicile et Milan contre nos roys, mais la France mesmes dans la France et par la France; aujourd'hui qu'il ne lui reste plus que cest estat ou à dissiper ou à s'adjoindre. Et se ressoubviennent ici les Venitiens combien fresles ont esté les alliances qu'ils ont voulleu faire avec l'Espaignol, mesmes la derniere pour la defense de Chypre, combien dispareilles, combien mal fondees; se ramentoivent aussi qu'il leur sçaura bien ramentevoir qu'ils ont (bien que pour raison d'estat) pendeu tousjours du costé de France; comme n'agueres encores, lorsqu'il a esté question de la preseance entre les princes, encores que le pape et l'empereur eussent, en quelque façon, prejugé pour l'aultre part.

Avec les Suisses et Grisons, ce que dessus se pourra negotier par le moyen de l'ambassadeur, ou bien des personnages notables, auctorisés, imbeus de ses rasons, desireux de la prosperité de nostre estat; et d'autant plus aisement, qu'en quelque façon ceulx de ceste nation sont teneus pour naturels François. A Venise, il y fault plus de moyens et de voyes indirectes; car ils craindront d'offenser le pape et l'Espaignol, zelateurs et directeurs de ceste guerre. Et puis il y a moins de hantise avec les senateurs. Mais l'ambassadeur pour roit l'escrire au roy, comme procedant des vœux et des souhaits de ce senat. Et sera d'autant plus vraisemblable, qu'ils donnoient ung mesme conseil au roy, revenant de Pologne, plus capable de le croire et suivre

maintenant, qu'il ne faict la guerre que pour contenter les passions d'aultrui.

Le duc de Florence peult estre batteu de mesmes argumens. Car il est jaloux de la grandeur d'Espaigne; ennemi partant de la prosperité de ceulx de Guise, ses stipendiés; mesmes d'autant plus, qu'il debat la preference avec la maison d'Este, alliee de la maison de Guise. On pourroit, de plus, traicter avec lui, que s'il veult accommoder le roy de Navarre de quelque notable somme de deniers, en faisant la paix il divertira la guerre sur le roy d'Espaigne, soit es Pays Bas, soit en Espaigne mesmes; quoi faisant, on le met hors de peine que Sienne ne lui soit demandee. Et, pour l'interesser dadvantage, on le pourroit asseurer que ledict seigneur roy de Navarre lui affermiroit son tiltre et preseance contre le duc de Ferrare et ses competiteurs.

La veue des lieux et des personnes pourra lui ouvrir aultres negotiations; et il sçaura bien s'en prevaloir. Cependant ne fault obmettre de bien faire son profict des memoires projettés à Montereau et à Chaalons, par lesquels il est tout evident que ceulx de la Ligue font les affaires du roy d'Espaigne, et ne taschent qu'à faire profict des aultres princes et estats avec lesquels ils negotient, leur couvrant malicieusement le piege où ils les tirent.

Vers le Turc, l'argument de la grandeur d'Espaigne et de l'affermissement du royaume de France, a mesme force contre ceulx de Guise, et en faveur du roy de Navarre; car il est certain que la maison d'Autriche, qui reunit dedans soi l'auctorité de l'Empire et la puissance d'Espaigne ensemble, venant ou à dissiper ou à s'adjoindre l'estat de la France, n'auroit rien, au reste, à craindre, et se rendroit formidable à tout le monde,

310 INSTRUCTION DU ROY DE NAVARRE

ralliant tous ses pays par le lien des Gaules, qui les separent; et conjoignant leur auctorité et leurs deniers aulx forces d'ung grand royaume, peuplé, plus qu'aulcung aultre qui soit, de gens de guerre. Le mal est que c'est une nation accoustumée à prendre d'ung chacung, et à bailler à nul; que le sieur de Germigni, agent du roy, depend du cardinal de Bourbon, et partant de la Ligue; qu'il n'est bien aisé d'avoir acces à faire entendre au grand seigneur ce qui seroit requis. Tout l'expedient seroit de practiquer et instruire quelque medecin juif, comme il y en a d'auctorité aupres de lui, pour lui donner ceste impression; s'enquerir aussi si Jean Miguet vit encores, ou quelqu'ung de mesme auctorité et nation, banni d'Espaigne. Il y avoit ung marchand anglois qui a le premier basti l'intelligence d'entre la royne d'Angleterre et le grand seigneur, et depuis a teneu lieu d'agent qui joueroit fort bien ce personnage. On peult voir aussi si on peult gaigner l'agent du roy, Germigni, ou aultre qui ait sa place; et se pourroient rencontrer des François confidens qui feroient ce voyage, lesquels, on pourroit instruire à ceste fin.

A tous dedans et dehors la France se peult tenir le langage qui ensuit: Que la France estoit paisible, et en bon train, lorsqu'ont commencé ces remuemens; que ceulx de la Ligue sont meus d'une ambition qu'ils ne peuvent contenter qu'en ruynant l'estat; que le roy, les princes, ceulx de son conseil, tous les parlemens, et les meilleurs François ont recogneu leur intention, et ont desiré s'y opposer; que la paix qui s'en est ensuivie, et dont est sortie une nouvelle guerre, n'a esté que pour en penser esviter une pire; que le roy n'y apporte poinct d'affection, et d'action aussi peu, s'il lui

estoit possible; qu'il séroit fort aise d'estre requis d'une paix, sçachant bien qu'au long aller il y faudra venir, et peult estre à son desadvantage; que ceulx qui l'y convient, l'obligent, selon son naturel, plus beaucoup que ceulx qui lui offrent service pour la guerre. Quant au roy de Navarre, qu'il est prince bien né, nourri, à la verité, en la relligion de laquelle il faict profession, mais qui se soubsmet à toutes voyes, soit d'estre instruit en particulier, soit de servir à lever le schisme qui est en l'Eglise; qu'il est servi indifferemment des ungs comme des aultres, sans acception de la relligion, en toutes les charges publicques et domestiques, et s'y sie egalement, qui doibt estre comme eschantillon de ce qu'il feroit si Dieu l'appelloit à plus grandes choses; qu'en tous lieux de son auctorité il laisse et a tousjours laissé la relligion romaine et le clergé en paix, quelque rigueur qu'on exerce contre lui et ceulx de sa relligion; tenant pour tout resoleu que les armes et la force ne doibvent avoir de jurisdiction, ni peuvent avoir de force sur les ames; qu'en le maintenant, au reste, on conserve l'estat du royaume, lequel ne peult se saulver de dissipation apres la mort du roy, si on permet sa ruyhe.

On objectera peult estre que, s'il vient jamais à estre roy, il attirera par une voie ou aultre à sa relligion tout le royaume, dont l'Eglise catholique sera en danger'tout evident. Fault respondre que c'est ung effort en vain que de lui penser empescher le chemin à la couronne; que ce n'est oster l'Eglise de danger, ains plustost advancer sa ruyne; que les François ont tousjours accoustumé de courre au droîct, et qu'il est si claîr de son costé, qu'il n'y a que tenir; qu'il n'est plus en France de ces zelateurs du temps passé, qui se

312 INSTRUCTION DU ROY DE NAVARRE

veuillent mettre en telle peine; qu'ils courront tous à l'envi à qui sera le plus tost et le plus prest à se jetter à ses pieds, et lui apporter tous leur service; que les excommunications du pape n'y esmeuvent plus personne; que chacung est eclairci que c'est la querelle de l'estat qu'on accoustre du nom d'heresie; que jà le parti de ceulx de la relligion est bien si fort, qu'il ne se peult accabler que par la ruyne du royaume; qu'il grossira de beaucoup par l'adjonction d'une aultre part de gens, qui n'ont poinct plus grande relligion que la faveur de leur prince et leurs affaires. Mais que mesmes les plus zelateurs et les plus devots des catholiques seront joincts à ce parti, quand les princes catholiques de la maison de Bourbon, desquels le credit est grand, considereront qu'on ne pourra faire tort au chef de la famille que les membres ne s'en sentent; qu'en retranchant de l'espoir de la couronne le roy de Navarre, par mesme moyen ils en seront forclos; que ce ne sera, en somme, passer d'ung degré en l'aultre, mais d'une race en une aultre, et de nation en nation; chose qui n'advient jamais sans ung siecle tout entier de calamités et de miseres; qu'oultre le dedans, le roy de Navarre sera assisté des estats d'Angleterre, de Dannemark et d'Escosse, des protestans d'Allemaigne, des evangeliques de Suisse, de tous ceulx, en somme, qui ont pretendeu la reformation, qui se sentiront interessés à ne voir executer l'arrest du pape, qui seroit ung prejugé contre eulx à ne voir forclorre ung prince de son heritage pour la mesme-cause qu'ils soubstiennent; que mesmes tous aultres princes bien conseillés y recognoistront quelque interest à cause de l'exemple. Car qu'y a il plus aisé, si telle forme a lieu, que de trouver une heresie en ung prince? et combien sont

liberaulx les papes de leurs excommunications? Quel prince n'a à craindre qu'ung pape, passionné d'ailleurs, soubs pretexte d'heresie, l'exposé en proye au voisin, en tirant quelque commodité pour soi? Ainsi a on veu, es siecles précedens, plusieurs de nos roys, des plus saincts et des plus catholiques, declarés rebelles à l'Eglise, heretiques, schismatiques, interdicts et excommuniés, privés du royaume, et exposés en proye. S'ils n'eussent esté puissans, ou leurs voisins foibles aupres d'eulx, cest estat couroit peril de changement. L'estat est debout; les papes passionnés sont morts; ceulx qui sont veneus apres, ont condamné leur arrest, ont levé le blasme d'heresie.

Ne pouvant apparemment le roy de Navarre, ni par force, ni par droict, estre excleus de la couronne, fault bien faire entendre, et, s'il est possible, au pape mesmes, le mauvais chemin qu'il prend, soit pour l'Eglise romaine en general, soit en particulier pour la gallicane; que les rigueurs et les desespoirs n'ont jamais avancé les affaires, moins celles de la relligion, qui ont leur siege en une partie qui ne peult recevoir violence, si ce n'est par la force de la raison; que le pape Adrian desespera Luther, et lui feit penser à choses aulxquelles il ne voulloit penser, dont est adveneu l'esbranlement notable du siege papal, qui n'a peu encores se rasseurer; que le pape Clement mit hors des gonds Henri VIII pour assés legere occasion, dont advint que lui, qui prenoit la peine auparavant d'escrire contre Luther et sa doctrine, se declara chef unique de l'Eglise en Angleterre, reunit à son domaine les principaulx biens de son clergé, et sappa, par ce moyen, les fondemens de l'Eglise romaine en son estat, dont depuis il feut aisé à Edouard, son successeur,

314 INSTRUCTION DU ROY DE NAVARRE, etc.

d'en achever la ruyne; que le pape Farnese feut plus sage, mais trop tard, qui voulleut tousjours bien esperer des hommes, et contregardoit le lin fumant, tant qu'il pouvoit; que l'extremité dont a usé le pape Sixte contre le roy de Navarre, s'il n'estoit de tres doulx naturel et esloingné de vengeance, lui feroit hair les catholiques et abhorrer le clergé, en danger, venant à la couronne, de les despouiller des biens dont ils ont abusé, sans lesquels ils ne se peuvent soubstenir; en danger aussi de faire ung changement prejudiciable à tous les catholiques; que le royaume de France, au reste, est de telle importance, assis, riche et puissant, comme il est, et les partis en la chrestienté pour la relligion desjà si balancés, que, s'adjoustant à l'aultre balance, il emporteroit de son poids tout le reste. Et, à ceste fin, pourra servir la lettre du prelat au cardinal de Sens pour faire courre; comme aussi tous les propos susdicts: peuvent estre discoureus aulx personnes de poids, surtout aulx ambassadeurs des princes et estats qui resident à Venise, pres la seigneurie, pour en rendre capables leurs maistres.

Tout tend à ce poinct; qu'on cognoisse le mauvais desseing de ceulx de Guise, tendant à la dissipation de nostre estat, dont s'agrandira le roy d'Espaigne, au dommage de tous les voisins; qu'on cognoisse aussi la bonne cause du roy de Navarre, le bon droict duquel il importe à tous les princes de garder et maintenir, pour contrepeser les factions et la grandeur d'Espaigne, pour ne l'irriter aussi, et mettre au desespoir, au peril eminent et evident de toute la chrestienté.

LXX. — LETTRE DE M. DUPLESSIS

A madame la duchesse d'Uzès.

Du 11 febvrier 1586.

MADAME, les petites lettres sont de saison. Le sieur de Lambert, present porteur, vous dina amplement de nos nouvelles. Croyés que nous avons le courage bon, et que rien ne le nous attendrit, que la misere de ce royaume. Vous avés oui parler de certains petits chasteaux dont M. de Mayenne aura faict bruict. Voyés en la carte gallicane, et vous n'y en trouverés pas ung. Nos moulins, en somme, commencent à s'asseurer aulx coups de son canon; et rien ne nous nuit, que trop de desir de tout desendre. Si on vous parle aultrement, demandés aulx conteurs de nouvelles si Mont-Limar, Ambrun, Lodeve, Saint-Pons, ou Taillebourg, sont pris encores. A peine auront ils gaigné les villes des annees passees, qui n'auront pas recouvré les nouvelles prises. C'est pour vous dire, madame, que la Ligue ne peult reprendre en deux ansi de bon succes ce qu'elle a perdeu en quatre jours. Et voilà comme ils servent le roy. Madame, vous scaurés le surplus par le porteur; et ne me reste que de vous baiser tres humblement les mains, comme vostre, tres humble et tres fidele serviteur, etc.

De Casteljaloux.

LXXI. — INSTRUCTION

Au sieur de Lambert, allant de la part du roy de Navarre vers M. de Montpensier.

Du 11 febvrier 1586.

Le sieur de Lambert fera entendre à MM. les princes catholiques de la maison de Bourbon le contentement que le roy de Navarre a ressenti de la negotiation du sieur de M., et de la sienne, et le bien qu'il en attend, et pour cest estat, et pour leur maison.

Leur fera trouver bon son advis sur la requeste qu'ils lui ont envoyee, et ce qu'il a jugé estre necessaire d'y adjouster, n'obmettant à leur dire, que plus vigoureusement ils parleront et plus tost ils parviendront au but qu'ils pretendent, qui est la paix generale de l'estat et l'affermissement de leurdicte maison.

Le roy de Navarre estime que l'ordre et les degrés pour y parvenir sont tels qu'il s'ensuit.

Que lesdicts seigneurs princes advisent des ceste heure à se loger dedans les meilleures places qui leur viendront en main, surtout passages de rivieres. Poictiers et Amboise, pour applanir le chemin jusqu'à Paris, leur seroient propres.

Et ne semble qu'il faille trop s'arrester à la force des places, pourveu qu'elles soient suffisantes pour rallier la noblesse et les trouppes; car il n'y a apparence qu'on les puisse ou veuille battre.

Au contraire, il est fort apparent que le roy sera bien aise d'avoir ceste occasion de parler de paix, et d'alleguer au pape et aulx princes, plus partiaulx pour la Ligue, que les princes catholiques de son sang lui auront faict prendre ce chemin. Logés qu'ils seront, est besoing d'envoyer ung gentilhomme signalé et homme d'entendement vers leurs majestés, qui leur porte la requeste et protestations susdictes, et leur declare leur intention sur icelle, et, s'il est possible, en plein conseil et avec la plus solemnelle façon que faire se pourra. Fauldra aussi qu'il ait lettres de, mesme substance à leurs majestés.

Sera bon qu'il en ait à messieurs de la court pour leur approuver ceste action, et qu'il demande congé au roy de les leur presenter.

Si le roy s'arme contre lesdicts seigneurs princes, il sera aisé au roy de Navarre et à M. le prince de Condé de les joindre. D'ailleurs l'armee estrangere est preste. Tellement qu'ils seront en terreur à leurs ennemis.

Et à ce propos, n'est à oublier le bon succes de nos negotiations, tant en Angleterre qu'en Allemaigne, que ledict sieur Lambert pourra plus particulierement discourir, comme aussi l'estroicte liaison avec M. de Montmorency, qui, tout fraischement, offre au roy de Navarre de le venir trouver où il vouldra avec toutes ses forces.

Si le roy, comme il y a plus d'apparence, prend de là ung subject d'envoyer vers eulx, pour employer ceste occasion à une paix, ce leur sera ung moyen plus court de s'entrevoir; et lors ils adviseront ensemble de leurs affaires.

N'est d'advis, ledict sieur roy de Navarre, que des le commencement ils joignent leurs trouppes avec les siennes, pendant qu'elles se forment, d'autant que, pour diverses raisons, les catholiques s'y joindront plus volontiers, ne pensant estre si odieux que s'ils s'adjoignoient directement audict seigneur roy de Navarre.

Et ne lairront toutessois de s'entreprester toute aide

318 INSTRUCTION DU ROY DE NAVARRE, etc.

et secours.comme tous membres d'ung mesme corps et ressentans ung mesme interest. Les trouppes estans formees, ce respect n'y aura plus de lieu, les personnes estans obligees; et lors lesdicts seigneurs princes ne se pourront trop tost voir.

Cependant est de besoing de demeurer d'accord des articles qui ensuivent: 1°. de pourchasser d'ung commun accord les meilleurs moyens de reunir la France en toutes sortes; 2°. d'affermir la dignité de leur maison pour le present et pour l'advenir; et, sur ce, leur sera dict que tous ceulx de la relligion s'obligeront volontiers de la maintenir de degré en degré, et de proche en proche, sans acception de relligion, envers tous et contre tous, et y hypotequeront, en tant qu'en eulx sera, leurs enfans et leur posterité; 3°. d'estré communs en paix et en guerre ensemble, et n'entrer en aulcung traicté que par le commun advis de tous, afin que chacung soit satisfaict de son interest.

Ne fault oublier de representer à M. de Montpensier l'obligation que lui aura la France d'avoir esté seul aucteur, par ce moyen, d'une paix generale; sa maison aussi, de sa restauration et raffermissement.

Leurs majestés mesmes s'en sentiront obligées à lui, qui, sans doubte, vouldroient sortir de ce labyrinthe, et ne voyent chemin pour en sortir honnestement.

LXXII. — MINUTE DE LETTRES

Pour monseigneur de Montpensier au roy, envoyee par le sieur de Lambert.

Monseigneur; je pense que mes actions passees sont si cogneues à vostre majesté, qu'elle ne peult mal

presumer des presentes; car elle sçait en quelle fidelité je l'ai tousjours servie. Vostre majesté se peult aussi ressoubvenir des propos qu'elle m'a faict cest honneur de me tenir de ceulx de la Ligue, et des commandemens qu'en mesme temps elle me departoit contre eulx. Je les ai veus toutesfois ung peu apres auctorisés de vostre nom et de vos armes, pour destruire vostre propre sang; et l'impute, monseigneur, non à vostre volonté, mais à leur violence. Le pis est que leurs desseings s'advancent contre vostre estat et vos fideles serviteurs, et qu'ils usent de vos armes à vostre ruyne propre, dont la consequence tombe sur nous tous. J'en ai enduré tant que j'ai peu, peult estre trop pour vostre service; mais pardonnés, monseigneur, si j'ai mesmes deferé à l'ombre de vostre volonté, encores que j'eusse deu plustost en rechercher et respecter le corps. Maintenant que j'apperçois que le mal s'en alloit sans remede, vostre majesté prendra en bonne part que je tente les moyens de l'empescher, qui se trouveront d'autant plus justes, que, de jour en jour, ils se rendent plus necessaires. Que si vostre majesté, par sa sagesse, pensoit à quelques expediens pour pacifier et composer ce povre estat, je m'estimerois heureux de lui pouvoir, en ung si sainct œuvre, faire quelque agreable service; et ne plaindrois pas mon sang, qui est né vostre, contre tous ceulx qui l'en vouldroient empescher. Monseigneur, pensés que vous tirerés par ce moyen sur vostre teste les vœux et les benedictions d'ung innombrable peuple; et croyés, monseigneur, que c'est l'œuvre qu'aujourd'hui vous pouvés faire le plus agreable à Dieu, lequel je supplie, monseigneur, etc.

LXXIII. — MINUTE DE LETTRES

Pour monseigneur de Montpensier à la royne mere, envoyee par le sieur de Lambert.

MADAME, nul ne peult mieulx tesmoigner de mes actions passees que vous; nul, par consequent, plus sainement juger de mes actions presentes. Vostre majesté a tousjours veu de quelle fidelité j'ai procedé au service du roy et au vostre; ce que je fais maintenant tout de mesmes. Mes armes, madame, qui ont tousjours esté vostres, ne peuvent jamais estre que vostres. J'ai servi vos majestés quand j'y ai veu vostre volonté et quelque apparence de raison, mesmes contre mon sang propre; les respects plus naturels ont cedé à vos commandemens. Jugés donc, madame, quelle occasion m'a peu mouvoir à m'estre armé, sinon que j'ai recognen ung effort tout evident faict à vos volontés; ung effort, madame, qui vous contrainct à mettre la dague en vostre sein, vous oblige à la calamité de vos subjects, à vostre ruyne propre. J'ai eu patience, et peult estre trop, tant que j'ai pensé que ma patience ne nuisoit qu'à moi; à qui toutesfois rien ne peult nuire pour l'honneur que j'ai de vous appartenir, qui ne nuise en quelque sorte à vos majestés mesmes; je me promettois, madame, que vostre prudence, tant cogneue, se sçauroit bien depestrer de la violence des perturbateurs, tant que j'ai cogneu que le mal s'en alloit sans remede. Et lors j'ai pensé de mon debvoir de m'accompagner de vos bons serviteurs, pour secourir vostre volonte et la delivrer de ceste force. Ne pensés, madame, qu'on me puisse jamais faire croire que vos majestés de bonne

volonté ayent mis les armes en main à ceulx contre qui vous me les faisiés prendre; ne pensés, madame, que je me puisse persuader que vous voyés de bon cœur emparés de vostre auctorité, et auctorisés de vostre nom, ceulx que, quattre jours auparavant, vos majestés declaroient rebelles. Ces conseils ne correspondent poinct à vostre prudence accoustumee; ces conseils ne peuvent s'attribuer qu'à une force. C'est à vous, madame, maintenant que Dieu m'a mis vos armes en main, de vous en servir contre ceulx là, et me commander ce que j'aurai à faire. C'est à vous aussi de donner ung bon conseil au roy, pour tirer son peuple de misere, se mettre en repos, faire droict à ung chacung selon qu'il appartient, et empescher la ruyne de l'estat. Pour ung si sainct œuvre, si quelqu'ung tasche de l'empescher, je tiendras ma vie bien employee, né pensant quel service vous puisse estre faict plus à propos ni plus notable. Aussi crois je fermement, madame, que c'est l'œuvre le plus sainct, le plus salutaire à vostre peuple, le plus agreable devant Dieu, que vos majestés puissent aujourd'hui faire. Je supplie le Createur, madame, qu'il vous ouvre et facilite les moyens d'y parvenir, et vous doint, pour jouir du bien et du contentement qui vous en reviendra en santé, tres longue vie, etc.

LXXIV. — MINUTE DE LETTRES

Pour monseigneur de Montpensier au Parlement, envoyee par le sieur de Lambert.

MESSIEURS, je pense que tout le cours de mes actions passees est suffisant pour approuver à tout ce

royaume celles qui peuvent venir apres, et les faire interpreter et juger en bonne part; car il est tout clair que ma relligion et mon obeissance n'ont jamais esté mises en doubte. Vous sçavés aussi, messieurs, si je me suis espargné pour la defense de l'Eglise, et si j'ai teneu la main à faire obeir l'intention du roy, tant que j'ai pensé qu'il y alloit ou de la relligion, ou du service qui lui est deu. Et c'est pourquoi je m'asseure qu'oyant dire que je suis armé, vous aurés tous concleu d'une voix que ce ne peult estre que tres justement et sainctement pour le service du roy, bien et repos de cest estat. l'ai veu, et vous l'avés veu, ceulx de la maison de Guise eslevés en armes fraischement contre le roy. J'ai esté armé par son auctorité contre eulx, et m'a esté commandé de les poursuivre comme perturbateurs et rebelles. Et je les vois, à trois jours de là, armés des armes du roy, auctorisés de son nom, pour exterminer les princes de son sang, commençans par les plus proches. J'ai donc recogneu une violence manifeste faicte au roy, en l'esprit duquel ung changement si subit ne peult tomber. J'ai pensé de mon debvoir de mettre sa volonié au large; n'estant pas croyable d'ung prince si sage, que, de gayeté de cœur, il leur baille ses armes. Et nels pouvant pas desarmer, j'ai pensé aussi de rallier les bons François en si saincte entreprise, d'opposer les naturels aulx estrangers, les interessés en la conservation de la maison à ceulx qui font leur profict de sa ruyne. J'ai temporisé tant que j'ai peu, messieurs, car je sçais tres bien qu'on ne peult trop tard venir auk armes; mais enfin, les regardant de pres, je vois qu'ils dispensent de la rigueur des edicts du roy-tous ceuls que bon leur semble, pourveu qu'ils leur promettent service; je vois qu'ils travaillent plus à surprendre les

villes paisibles, qui vivent conformement à ses edicts, qu'à assaillir celles qui resistent; à suborner ceulx qui portent les armes avec eulx, qu'à combattre ceulx qu'ils ont faict declarer pour ennemis. Je juge par là, messieurs, qu'il ne s'agit en ce faict de la relligion, mais de l'estat; que leur but ni leur espoir n'est pas de faire obeir le roy et ses edicts par ceste guerre, ains d'entretenir les armes en leur main jusqu'à sa mort, qu'ils se promettent prochaine, et que volontiers ils hasteroient par leurs desirs. Contre si pernicieux desseings, vous pouvés juger que c'est que j'ai deu faire; vous que j'apprehenderois pour juges rigoureux, si j'avois manqué ou connivé à ce danger, ou en rien manqué en ce debvoir. Je suis resoleu en somme, d'employer le sang que je n'ai pas tiré inutilement de la maison de France, pour la defense du roy et de son sang, conservation de sa maison et de son estat. Et, à l'aide d'une si saincte entreprise, j'appelle, messieurs, vostre prudence, qui a tant de fois appuyé ce royaume, jamais, certes, en plus evident danger qu'il est. Je prye Dieu, messieurs, qu'il vous veuille à tous ouvrir les yeulx et conforter les mains pour l'en garantir ceste fois; je le prye aussi qu'il vous conserve et fortifie en l'auctorité qui vous est deue, pour bien conserver l'auctorité du roy et son estat, etc.

LXXV. — INSTRUCTION

Pour M. de Montmartin, allant vers le duc Cazimir.

LE sieur de Montmartin dira à M. le duc Cazimir l'extreme contentement qu'a receu le roy de Navarre, de l'asseurance qu'il lui a apportee et rafraischie de son amitié, qu'il lui veult tesmoigner en ce besoing par si notables effects.

Et l'asseurera qu'il lui en ressent une obligation infinie, et qu'il n'oubliera jamais, estant tout certain qu'humainement ledict seigneur duc aura grandement aidé à relever et remettre sus non seulement les eglises reformees, mais mesmes l'estat de ce royaume.

Particulierement, que ledict seigneur roy n'ignore poinct que la recommandation qu'il a faicte de la negotiation du sieur de Guitry en Angleterre, n'a pas peu encliné la royne d'Angleterre à accorder sa demande, qui lui est encore une obligation tres speciale.

Lui dira l'estat des affaires de deçà, qui est tel que l'ennemi n'a gaigné encores aulcung advantage sur nous, mesmes n'a osé attaquer aulcune bonne place; au contraire, qu'il a esté batteu en diverses rencontres; tellement qu'il est tout certain que, survenant l'armee dudict sieur duc en la force et forme que ledict sieur de Montmartin l'a representee, les aucteurs des troubles seront en confusion estrange.

Lui fera attendre à ce propos comme M. de Montmorency s'unit estroictement, et de plus en plus, avec ledict seigneur roy et en amitié et en affaires.

Comme aussi tout fraischement M. de Montpensier a envoyé vers lui, et tous messieurs ses cousins, pour s'unir soubs les articles qui lui seront declarés pour le bien et conservation de leur maison.

Le pryera pour comble tres instamment, au nom dudict seigneur roy, de voulloir continuer en ceste sienne bonne volonté, et, suivant icelle, acheminer son armée au plustost que faire se pourra.

Pour à laquelle parvenir, lui dira le debvoir qui a esté faict, tant par ledict seigneur roy que par les eglises, selon le peu de moyens qu'ils ont, et les faicts et frais qu'ils ont à supporter, et aulxquels ils le supplient de voulloir suppleer par l'abondance d'affection qu'il leur a de tout temps demonstree.

Qu'au surplus, tout ce qui sera par lui et avec lui negotié pour la susdicte armee, il le tiendra faict et arresté, et le gardera inviolablement, pour l'asseurance qu'il a, et qu'il lui donne assés d'occasion d'avoir, de l'entiere affection qu'il a au bien de ses affaires.

Qu'il lui tarde de le voir, et d'avoir ce bien de l'embrasser, pour lui tesmoigner plus vivement l'obligation qu'il ressent envers lui, pour laquelle recognoistre il n'espargnera jamais ni ses biens ni sa vie.

Des particularités ledict seigneur roy de Navarre prye ledict seigneur duc croire ledict sieur de Montmartin comme lui mesme, etc.

LXXVI. — LETTRE DU ROY DE NAVARRE

A M. le duc Casimir, faicte par M. Duplessis.

Monsieur mon cousin, je ne vous puis dire l'extreme contentement que j'ai receu par la veneue du sieur de Montmartin; je vous prye de l'entendre de sa bouche; tant y a que je recognois que je vous ai une infinie obligation de vostre affection, qui m'est tesmoignee par tels effects, et vous jure que je ne l'oublierai jamais. Vous pourrés dire à ce coup que vous aurés grandement aidé à relever et remettre sus humainement, et nos affaires, et nos eglises; et j'espere, avec l'aide de Dieu, que ce sera de telle sorte, qu'il n'en fauldra plus donner de peine à nos amis. Ledict sieur de Montmartin vous dira comme nous sommes par

deçà. Jamais je ne sentis tant de benediction de Dieu; jamais je n'esprouvai plus que c'est que de debattre une bonne cause, soit en mon cœur, soit mesmes au succes de mes affaires; car, graces à Dieu, nos ennemis n'ont rien gaigné sur nous, nous, au contraire, beaucoup sur eulx en diverses rencontres, où il a esté tout evident que Dieu et leur conscience combattoient pour nous et contre eux. Croyés, monsieur mon cousin, et il m'en tarde, que si Dieu nous faict la grace d'estre ensemble, nous aurons moyen de le faire recognoistre et obeir à bon escient. Et sur ce, je vous pryerai d'entendre plusieurs particularités tres importantes dudict sieur de Montmartin, l'en croyant comme moi mesmes, qui salue, etc.

LXXVII. -- LETTRE DU ROY DE NAVARRE

A la royne d'Angleterre.

MADAME, j'ai sceu ce qu'il a pleu à vostre majesté accorder au sieur de Guitry. Je ne sçais comment vous en remercier; car il ne se peult rien adjouster, ni à mon obligation, ni à mon service. At ce coup, madame, vous avés humainement rendeu la vie à nos eglises; à ce coup, vous m'avés aussi mis en la main (et croyés que je le ferai valoir) de quoi mettre à la raison vos ennemis et les miens. Vous aurés oui, madame, le grand bruit de leurs armees. Jusques ici ils n'ont osé se prendre à une bonne place; et puis vous dire avec verité qu'en tous les endroicts où ils ont combattu, ils ont esté battus. Dieu, sans doubte, est protecteur des justes causes; et aussi ne ressentis je jamais si vivement sa faveur sur mes armes. Voyés, madame, que

ce sera quand elles seront vostres; car je me confie que vostre faveur n'a poinct commencé pour me faillir. Au surplus, vous permettrés que je le remette sur le sieur de Buzanval, que je vous prye croire, etc.

LXXVIII. — LETTRE DE M. DUPLESSIS

A M. de Walsingham, secretaire d'estat de la royne d'Angleterre.

Du 18 febvrier 1586.

Monsieur, je loue Dieu du succes du voyaige de M. de Guitry. Quelquesfois les medecins aiment mieulx tirer en deux saignees la quantité requise que tout en une. Il ne fault poinct demeurer en si beau chemin; et qui a si bien commencé, doibt achever. Pensés que vous avés humainement rendeu la vie à nos povres eglises dispersees. Quant à celles ci, elles sont pleines de vigueur, et vous dirai devant Dieu que nous sentons sa main en la nostre, et sur nos ennemis, pour la faveur qu'il desploie dessus nos armes, et sa fureur manifeste sur nos ennemis. J'en escris plusieurs particularités à M. de Buzanval, que je vous prye entendre de sa bouche. Ung peu d'aide nous peult retirer de peine, et en nous, peult estre vous et plusieurs aultres, qui estes remis et differés apres nostre ruyne. Je vous puis dire particulierement que ce prince croist en resolution et en constance, et s'en rend admirable entre nous mesmes; et ce nous sont arrhes de la benediction de Dieu sur ses affaires. Vous aurés une semblable lettre et de mesme date par une aultre voye, non toutesfois de ma main, ce que vous excuserés pour le faix que je porte. Je suis vostre serviteur, etc.

De Casteljaloux.

LXXIX. — INSTRUCTION

Pour M. Constans, allant vers M. de Montmorency.

Le sieur Constans, apres infinis remerciemens de la bonne affection de monseigneur de Montmorency au bien des affaires du roy de Navarre, lui en representera l'estat comme s'ensuit.

Que jusques ici l'ennemi n'a pas avancé grand chose, n'ayant pris que Montignac pour tout, qui est bien contrepesé par la prise de Royan; mais que la saison le convie maintenant à faire son effort, s'il ne veult perdre sa reputation.

Pourtant qu'il se prepare à le soubstenir, et à ce besoing appelle ses amis, estant resolleu que s'il peult faire retomber ce coup en vain, que c'est la ruyne entiere de ses ennemis.

Que, pour cest effect, sans aulcung retardement, il a besoing de deux mille arquebusiers, promis par ledict seigneur duc, ne pouvant sans iceulx suffisamment munir ses places, l'ennemi lui en pouvant mettre en jalousie plusieurs tout à la fois.

Pour ce le pryera tres instamment de les faire acheminer incontinent, soit soubs la conduicte du sieur de Chastillon, auquel il en escrit, soit à son default, de tel aultre qu'il verra à propos.

Qu'il ne fault doubter que, dedans ung mois tout au plus tard, l'ennemi ne s'oblige à quelque place, laquelle, estant bien munie, l'amusera ung temps, encores qu'il semble audict seigneur roy si la commodité dudict seigneur duc le permettoit, qu'il seroit expedient qu'ils joignissent leurs forces ensemble, et, pour cest effect,

qu'il s'avançast vers le hault Languedoc, moyennant quoi ils pourroient sans doubte secourir les assiegés et faire une escorne à l'ennemi, qui leur donneroit une reputation insigne.

Cependant que l'armee d'Allemaigne, de laquelle ledict seigneur roy a eu certitude par le sieur de Montmartin, s'avanceroit sur la frontiere, qui viendroit à temps pour rompre les desseings de leurs ennemis.

Ladicte armee sera composee de dix mille Reystres, dix mille Suisses et six mille lansquenets, quatre mille arquebusiers françois et quelque troupe de noblesse recueillie des frontieres. M. le duc Cazimir y marche en personne.

Le sieur de Guitry a touché argent en Angleterre, et est repassé en Allemaigne. Seulement, à ce que ladicte armée soit composée de tous poincts, est besoing encores de quelque somme, pour laquelle parfournir, ledict seigneur roy a envoyé argent à La Rochelle, pour, de là, le faire tenir à Hambourg, où se faict partie de la levee; et sera pryé tres instamment ledict seigneur duc de fournir au plus tost la subvention par lui promise, de vingt et cinq mille escus, pour icelle faire tenir à Geneve. Ledict seigneur roy de Navarre escrit au sieur de Lesdiguieres et à ceulx de Dauphiné et de Provence, pour fournir la quotité promise.

Dira ledict sieur Constans audict seigneur la negotiation qui s'est passee avec messeigneurs les princes de la maison de Bourbon, nommeement avec M. de Montpensier, et de la bonne resolution qu'il a prise, de laquelle il attend les effects; et pour preuve lui monstrera la copie de la protestation qu'il entend faire, en laquelle il espere estre assisté d'ung bon nombre de noblesse.

Comme aussi n'oubliera la negotiation avec l'ung de ceulx dont il avoit ci devant escrit audict seigneur roy, qui est en bon train, tant pour le present que pour l'advenir.

De la court, qu'il est adverti que les dessances entre le roy et ceulx de la Ligue continuent tousjours, mais non pour produire aultres effects que mols et soibles tant que nous ayons les sorces en la main en ce royaume. Pourtant, quelque semonce qu'on lui ait faicte, qu'il est resolleu à se rendre le plus sort qu'il pourra, et ne laisser jamais les armes, qu'il n'ait moyen de contenter ses amis, et d'avoir la raison de ses ennemis.

Des choses susdictes conferera avec le sieur de Pujols, qui lui dira jusques à quel poinct il a acheminé sa charge, particulierement pour la subvention du Languedoc, laquelle ils solliciteront ensemble; et surtout asseurera ledict seigneur duc, de la constante, parfaicte et immuable amitié et affection que ledict seigneur roy lui porté, qu'il espere ung jour lui faire voir par notables effects.

LXXX. — LETTRE DE M. DE LA NOUE

A M. Duplessis.

Du 20 mars 1586.

Monsieur, par vos lettres, j'ai veu deux choses qui me sont bien agreables. La première, c'est que nostre petit maistre va tousjours croissant en la vertu et en la crainte de Dieu. La seconde, que ceulx qui vous doibvoient devorer sont encores au commencement de leur ouvrage; mais je prends bien plaisir aussi de quoi vous m'asseurés tousjours de vostre bonne amitié, que

je prise beaucoup en ce temps, où elles sont si sophistiquees, et singulierement de ce qu'estes pres de celui qui a besoing d'ung M. Duplessis, afin qu'en ceste tres perilleuse navigation il lui monstre les escueils du monde pour les eviter. Servés lui de Seneque'et de Burrhus tout ensemble, afin que nous voyions en lui la personne d'ung Titus; mais j'ai grand'peur qu'auparavant il conviendra qu'il joue le personnage d'ung Cesar en quelques choses. Vous estes maintenant en de durs exercices, tant privés que publics, où je sçais bien qu'on faict ce qu'on peult et non ce qu'on veult, et que bien souvent les amis affligent autant que les ennemis tourmentent; mais c'est là que les vertus s'accroissent et s'affinent. Je desire à nos François de Gascongne ung peu plus de patience et plus d'affection à l'ordre, ce qui est bien practiqué par les Espaignols, qui m'ont dict plusieurs fois qu'avec la perseverance et les labeurs ils ont surmonté tous leurs contraires. Je ne vous parle des affaires publicques pour la crainte que j'ai que mes lettres ne soient surprises, et en feroit on bien son profict. M. de Clervant vous en dira ce qui en est. Enfin, monsieur, je suis en vostre endroict tel que desirés que je vous sois; car j'aurois tort si je n'aimois celui qui honore son siecle. Je brusle d'envie de voir vostre maistre, et vous et tous mes bons amis de par de là; ce sera quand il plaira à Dieu, auquel je prye vous accroistre ses graces et faire prosperer.

Vostre fidele ami et serviteur, LA NOUE.

De Ceneve

LXXXI. — LETTRE DE M. DUPLESSIS

A nadame de Laval. (1)

Du 24 mars 1586.

MADAME, la douleur est trop grande pour la penser assoupir, il est plus seant d'y condouloir. Vostre perte est commune avec tous les gens de bien de ce royaume. Le mal est que ce que chacung en souffre ne rabat rien de vostre mal particulier. De moi, madame, je puis dire avec verité qu'il y a long temps que je n'ai receu une si sensible perte (2). Et si vous voulez cognoistre combien j'honorois monsieur vostre mari, que j'aye cest honneur d'estre commandé de vous en chose qui vous puisse soulager. J'estime, madame, que, pour le regard des amis et serviteurs, la plus louable façon de pleurer, c'est de servir de tout leur pouvoir à ce qui survit ceulx qu'ils ont honorés vivans, et à leur posterité. C'est le deuil, madame, que je veulx prendre, et pourtant faites entier estat de mon bien humble service, et disposés de moi comme de personne toute acquise à vostre maison, et affectee à tout ce qui attouche seu monsieur vostre mari; car je le veulx honorer et servir en ce qui reste de lui et apres lui, et tel que je lui ai esté, tel vous veulx je demeurer toute ma vie. C'est, madame, etc.

⁽¹⁾ Anne d'Allegre, comtesse de Laval, depuis mariee à M. le mareschal de Fervaques.

⁽²⁾ Sur la mort de M. le comte de Laval.

LXXXII. - LETTRE DE M. DUPLESSIS

A M. de Bellievre.

Du 26 septembre 1586.

Monsieur, je n'ai receu les vostres que tard; et si j'estois aupres du roy de Navarre, j'y pourrois plus pertinemment respondre. Mais ayant esté envoyé en ces quartiers, lorsque M. de Mayenne faisoit mine d'assieger ceste ville, et s'estant, ledict seigneur roy, cependant retiré à La Rochelle, diverses occasions sur lesquelles j'ai receu ses commandemens, m'y ont reteneu. Vous pouvez assés penser que ledict seigneur roy ne refusera jamais les moyens d'une paix. Mais avisez aussi qu'il est prince de courage; qu'il ne presuppose poinct avoir de guerre au roy; qu'il le croit forcé, comme il en a occasion, à tout ce qui s'est faict, et pourtant qu'il lui est dur d'estre amené par les bravades de ses ennemis à parler d'une paix, s'ils ne voient en mesme temps qu'il a les moyens en main d'avoir la raison d'eulx par la guerre. Jugez aussi quel creve cœur ce lui doibt estre de parlementer de paix, pendant qu'on reduict les villes de son parti en cendre, pendant que M. de Mayenne triomphe de Castillon, et que M. de Joyeuse exerce des cruautés non ouïes à Marvejols; au lieu que vous savez bien que jamais, contre ceulx de la Ligue, on n'a procedé de la façon; ains on a reculé les armees, on a suspendu toutes hostilités premier que de leur proposer condition de paix. Ce seroit inegalité de traicter ceulx de la Ligue, et lui egalement. Pensez quelle iniquité il trouve de le traicter plus durement qu'eulx. Ne pensez, monsieur, pour ces pretendeus succes, que nostre cœur s'estonne. Nous avons de quoi porter et les ferveurs et les fureurs de la Ligue, plus beaucoup que naturellement elles ne peuvent durer; non toutesfois pour nous opiniastrer à nostre escient, contre le repos de ce royaume; mais pour avoir le moyen de l'establir si bien, qu'ils ne puissent pas une autrefois l'esbranler si aisement. Ce que je vous dis, parce qu'on ne vous conte par delà que triomphes, au lieu, certes, qu'on vous debvroit raconter plus tost des funerailles. Car si vous voyez ce qui s'y est passé, tout compté, deduict et rabattu, vous verriez que les affaires de la Ligue ne sont pas avancees d'ung seul pas. Mais on faict grand bruict de ce qu'ils prennent, et peu de ce que nous prenons; parce qu'ils ne prennent rien qu'avec grand apparat, et à coups de canon; au lieu que ce que nous avons pris ne nous a cousté que dix livres de poudre et ung petard. Et de faict, jugez qui vault le mieulx, Castés, Saincte Baseille, Monse. gur, Castillon, Montesquiou, Marvejols, lieux que ja mais Paris n'ouït nommer jusques aujourd'hui, ou bien Mont Limar, Ambrun, Lodeve, Sainct Ponts, Rolan et Taillebourg. Or, pour revenir au poinct, j'espere bien tost avoir ce bien, de voir le roy de Navarre. le m'asseure qu'il est disposé au bien de ce royaume, et que nul ne l'en peult detourner. Mais je vouldrois bien aussi qu'on se disposast à le traicter plus digne. ment; qu'on s'ostast ces fantaisies de sa ruyne si facile; qu'on presupposast au contraire qu'elle est impossible sans celle de ce royaume. Sur ce fondement, on pour roit establir une certaine paix. Sans ce fondement, tous nos traictés sont nuls. Au reste, vous sçavez que je suis vostre serviteur, et je vous supplie d'en faire estat Je saluerai donc bien humblement vos bonnes graces. et pryerai Dieu, monsieur, vous avoir en sa saincte garde.

De Montauban.

LXXXIII. — LETTRE DE M. DUPLESSIS

Soubs le nom d'ung gentilhomme catholique, contenant response aulx calomnies d'ung livret d'ung certain pretendeu Anglois.

Octobre 1586.

Monsieur, j'ai leu le livret que m'avez envoyé, encores que je ne lis pas volontiers les diffamatoires. Et quant à mon advis que demandez, il m'est soubveneu que les plus sages dient que ces livres là ne doibvent pas estre pesés, mais meprisés. Toutesfois, sans entrer au fonds de la cause qu'il plaide, que chacung debat selon son appetit, joinct que, contre telles passions, j'estimerois ma raison mal employee, j'ai examiné les plus notables poincts, page pour page, qui vous feront mieulx juger quel peult estre le reste.

L'aucteur veult estre pris pour Anglois; et je pense qu'en cela il n'a pas faict mal à propos, puisqu'il avoit entrepris de diré plusieurs choses qui ne peuvent sortir de la bouche, ni aisement entrer en l'oreille d'ung François. Toutesfois le style le descouvre : et ce n'est pas peu qu'il ait eu honte et conscience de faire tenir ung tel langage à ung François.

Page 6, à l'entrée, descrivant la maladie de France et d'Angleterre, il l'appelle premierement heresie; puis tout à coup il ensle son style, et lui donne le nom d'atheisme. Pensez si ceulx du parti contraire ont ung beau champ là dessus pour le bien galopper. Car, qui amais ouit dire, ou qui vouldroit croire qu'ung athee

veuille souffrir pour la relligion, non le feu, ni l'eau, ni les tourmens, mais la moindre perte ou incommodité? Et, qui toutesfois ne sçait combien d'annees les feux ont bruslé en Angleterre, et combien en ce royaume? Mesmes les calamités et pertes que ceulx de ceste profession souffrent enceres aujourd'hui? Je confesse que les heretiques ont eu leurs martyrs; et chacung est heretique à son voisin, jusqu'à ung Concile; je nie que les atheistes en puissent avoir. Car, nul ne perd ceste vie que pour une meilleure, et ne quitte ce qu'il a que pour espoir de mieulx; et te!les considerations ne peuvent tomber au cœur de l'atheiste.

Page 8, il dict que le roy François II feut emprisonné par ceulx du contraire parti. J'estois de ce temps, et vous de la court alors assés avant; et vous sçavés s'il en feut jamais parlé. C'est trop tard, vingt et cinq ans apres. Et du mareschal de Sainct André, tué à Dreux, et de feu M. le connestable, à Sainct Denis, qu'il leur reproche: on lui dira que, quand les visieres sont baissees, on ne cognoist personne; et que le bien ou le mal des actions particulieres en la guerre, despend et descend du tort ou droit de la cause qui s'y debat. Quant au meurtre de feu M. de Guise, je ne me suis peu tenir de rire, quand il dict que Beze et l'Admiral promettoient paradis à Poltrot; car j'ai tousjours oui dire que c'est ung des poincts de leur relligion, qu'il n'y a œuvre quelconque qui merite paradis. Mais l'aucteur s'est oublié, pensant parler des jesuites qui promirent paradis à l'Espaignol qui blessa le prince d'Orange, et depuis au Bourguignon qui le tua, les ayant enveloppés tous deux d'Agnus Dei et de parchemins vierges: ou bien pensoit il au cardinal de Como, qui traicta l'annee passee avec le docteur Parrei pour tuer la royne

d'Angleterre, et lui bailloit caution d'aller tout droict en paradis; et je crois que vous avez veu la lettre du cardinal et le proces de l'homme.

Pages 9 et 10. Il insiste, au reste, sur les prises d'armes, sieges et batailles, et sang espandeu, etc. Ce sont argumens, comme sçavez, communs à tous les deux partis; reproches que reciproquement les ungs feront aulx aultres. Car, depuis que les partis se sont formés en ung estat, les armes s'ensuivent; et depuis que les armes sont prises, chacung faict ce, qu'il pense à propos contre son ennemi, et pour sa conservation. Tout cela se justifie ou se condamne par l'injustice ou justice des partis; et chacung tire le droict de son costé; chacung a ses escritures, ses salvations, ses contredicts; chacung mesmes des edicts du roy en sa faveur, des arrests des courts souveraines qui approuvent, recognoissent et advouent ce qui s'est faict. D'ensler ses defenses d'une rhetorique d'advocat, ne sert de rien. Car les gens de jugement laissent cela pour les oreilles, et s'arrestent seulement à la solidité de la raison, pour demesler le droict.

Page 10. Il reproche à ceulx du contraire parti d'avoir voulleu quitter le pretexte de relligion, aulx seconds troubles, et s'estre couverts du vieil gaban de bien public, ainsi l'appellent ils. On sçait, toutesfois, qu'en la paix qui s'ensuivit, il ne feut parlé que de relligion, et l'edict en faict foi. Et à meilleur droict on pourroit dire que messieurs de Guise, qui s'estoient n'agueres revestus du bien public, s'en sont depouillés, pour se masquer de la relligion. Mais il est bon qu'il nous parle de ce vieil gaban, qui ne s'est trouvé encores si vieil, ni si usé, que ceulx de la Ligue ne l'aient emprunté tout fraischement pour abuser le peuple; et cha-

cung seait si en paix faisant, ils ont rien faict pour lui.

Page 17. Il s'ecrime contre le colloque de Poissi Quel remede y a il donc contre ung faulx-jugement, que la raison? Et qu'est ce ung colloque ou ung concile, qu'ung combat de verité contre verisimilitude, de relligion contre opinion, qui ne se peult decider que par raison? Et, veu que la verité est plus forte que tout, que diront les adversaires, si non que nous ressentons notre foiblesse? Et la foiblesse en une doctrine, qu'est ce que tare de verité, qu'est ce par consequent que mensonge?

Page 18. Il deteste les edicts de paix, et la fiebvre continue lui semble meilleure que l'intermittente. Propos d'estranger tel qu'il se faict, qui vouldroit voir cest estat en cendre. Et ceulx du parti contraire nous diront, et peut-estre avec plus de raison, que si on eust poursuivi la Ligue vivement, elle estoit exterminee en moins d'un demi an, et n'eust pas cousté au roy ni siege ni bataille. Et de faict, M. le cardinal de Bourbon, se voyant debarrassé par l'edict de juillet dernier, le confessa à la royne privement. Mais nos guerres ont elles pas este faictes par messieurs de Guise? Et eulx mesmes, quand ils s'en sont trouvés las et harassés, ont ils pas signé les articles de paix? Et vouldroient ils pas desjà l'avoir, maintenant qu'ils ont jetté leur seu; maintenant qu'ils voyent que le roy de Navarre aura son tour sans doubte, et peult estre tiendra le dessus?

Page 19. On verra, si à ce coup, ils combattront les estrangers, puisqu'ils se plaignent si fort ici qu'on ne l'a faict es troubles precedens, esquels toutesfois ils menoient les armes. Mais je m'attends qu'ils feront comme M. d'Aumale, lorsque le duc des Deux Pont-

entra en ce royaume. Il protestoit du service de leurs majestés, si on ne combattoit; et quand on lui consentit de combattre, si occasion s'en presentoit, il chercha des excuses. Et, de faict, s'ils se plaignent qu'on n'ait combatteu aussi souvent qu'ils eussent bien voulleu, ils se mettent en danger d'une forte replique. Car il est certain que, lorsqu'ils ont commandé en chef aulx armees, pendant nos troubles, il ne s'est poinct donné de bataille. Les batailles qui se sont données ont esté soubs le commandement de feu M. le connestable, ou mesmes du roy (lors Monsieur), à present regnant, afin qu'ils n'aient ou à eslever leur zele par dessus les aultres, ou à reprocher que la connivence ou la froideur des aultres ait esté cause de reculer le succes de la guerre.

Pages 21 et 22. Il se plaint que la Sainct Barthelemy n'a tout tué. Et notez qu'en ce feuillet, autant de lignes, autant de monstres. Nous sçavons que mesmes les aucteurs en eurent honte, et tascherent à la deguiser par tous moyens. Les plus eshontés en rougissent encores, quand ils l'oient nommer. La France en a perdeu son honneur en toutes nations, et les plus barbares ont esté contraincts de dire, Excessit medicina modum; et cest homme voulloit encores deux palettes pour la guerison, dict il, de tous les membres. Ces palettes, si vous les voullez sçavoir, il les vous dict. Ce sont le roy de Navarre et monseigneur le prince. Car, dict if, Constantin le Grand se depescha de son beau frere; et Clovis des freres de sa femme; et ainsi eust il voulleu que le roy se feust souillé du sang du roy de Navarre, son beau frere, qu'il appelle ailleurs cousin loingtain, reprochant au roy le zele du roy d'Espaigne, qui ait immolé son propre fils aulx jesuites. Et de faict, pour l'avoir es-

pargné, il lui propose qu'il est reprouvé de Dieu. comme Saul pour avoir saulvé la vie à Agag, roy d'Amalec. Comme si le roy eust eu commandement expres de Dieu de le tuer; comme s'il estoit Amalecite, payen, Turc, et non chrestien; comme si la maison de Lorraine estoit esleue au cabinet de Dieu pour entrer en la place du roy, et de son sang; comme si desjà M. de Guise, ou aultre de la race avoit receu l'onction d'ung Samuel, comme David, pour estre establi au lieu du roy. Et, jugez par ces conclusions, où pretend ce pretendeu Anglois. Et qui ne sçait toutesfois que, pour de river la haine des massacreurs sur le roy, ceulx de Guise, qu'il veult enter en sa place, feirent des douk et clemens en leurs gouvernemens, mesmes en l'hostel de Guise, saulverent des principaulx de la relligion contraire.

Il condamne la paix faicte par nos roys avec ceulx du contraire party; et sa raison est que ce sont heretiques, qu'il ne fault jamais laisser en paix. Que dira il donc des infideles? Car, qui vouldroit ignorer que l'infidelité ne feut pire qu'heresie? que l'infidele, par consequent, ne merite plus grief traictement que l'heretique? Et voilà toutesfois que le pape laisse les juis en repos au milieu de ses terres, au milieu de Rome. et en tire tribut; et les princes d'Italie à son exemple. Et si l'heresie lui semble plus gluante ou plus contagieuse, voilà le duc de Savoye qui laisse vivre avec libre exercice ceulx de la vallee d'Angroigne ses subjects. ceulx aussi des bailliages, n'agueres à lui restitués par les seigneurs de Berne, que ce livret tient pour heretiques. Que dira il du roy d'Espaigne, qu'il nous baille pour le miroir d'ung : prince catholique, qui pacifia l'an 76 avec, ses subjects de Hollande et Zeelande.

condition non seulement qu'ils jouiroient de leur relligion, mais, qui plus est, que la sienne n'y seroit receue? qui, depuis encores, au traicté de Coulongne, accordoit mesme condition aulx villes de Gand, d'Anvers, d'Utrecht, etc., par le duc de Terranove, traictant de sa part avec les deputés des Pays Bas? Mais les estats du pays la requeroient par tout, et les edicts et traictés en sont communs. Ce qui sera sainct au pape, pourquoi profane au roy tres chrestien? Ce qui sera catholique au roy d'Espaigne, pourquoi anatheme, pourquoi marque de vraie reprobation au roy de France? Mais certes ce catholique cherche la grandeur du roy d'Espaigne en nos ruynes, et lui deult que ceste guerre, qui sans doubte nous mene à ruyne, reçoive quelque intermission, quelque intervalle.

Page 25. Et n'est à propos ce qu'il adjouste, qu'ainsi feurent extirpés les Albigeois par Philippes Auguste. Car s'il avoit bien leu les histoires, il sçauroit qu'il y eut des colloques et des conferences; qu'il y eut aussi divers traictés de paix, et non dissemblables à ceulx ci. Mais je dirai plus, qu'il n'y a nulle comparaison, ains trop de difference. Car alors ceste doctrine ne tenoit pour tout qu'ung coing de France, qui tient aujourd'hui des royaumes entiers, qui a my parti les empires et republicques; qui n'a, en somme, laissé pays, famille, et presque maison en chrestienté, où elle n'ait sceu prendre racine, où elle n'ait sceu gaigner sa part. Et pensés s'ils sont unis estroictement, s'ils se ressentent bien vivement les ungs les aultres, quand jamais nos guerres n'ont passé ung an entier, qu'ils n'aient esté secoureus d'une tres forte armee; quand, depuis que la Ligue est debout, nous n'avons veu qu'ambassades vers le roy d'Angleterre, de Suisse, d'Allemaigne, de

Dannemarck mesmes, ou pour exhorter le roy à leur rendre la paix, ou pour, au default de ce, lui declarer qu'ils ne les pouvoient abandonner en telle guerre.

Page 25. Il fouldroye contre le roy, qui a mis soubs sa protection la ville de Geneve, parce qu'elle est alliee estroictement avec les Suisses; tousjours selon ceste regle, que tout est reprehensible à nostre roy; tout au roy d'Espaigne, non que remissible, mais louable. Tant de sages princes, tant de sages conseillers, qui leur ont assisté, ne sont pas à condamner si promptement. Le grand roy François negotia premier par M. de Langet, grand personnage de son temps, l'alliance avec les princes protestans du sainct empire. Le roy Henry la feit et concleut depuis, et lui mesmes se meit en campagne en leur faveur. De là ils tiennent la paix dont ils jouissent; de là nous tenons encores Mets et aultres villes; et M. de Guise, pere de ceulx ci, la defendit contre l'empereur Charles; et ne meit poinct en dispute. qu'elle ne feust acquise sur lui à tres bon tiltre. Ceste couronne a une alliance tres estroite et tres utile avec MM. des Ligues de Suisse et des Grisons, avec la royne d'Angleterre, avec les roys de Dannemarck. d'Escosse et de Suede. Qui seroit si idiot que de conseiller au roy par superstition de s'en distraire? Et que dira donc ce bon Anglois du roy d'Espaigne, qui tant de fois a negotié en Angleterre, pour rafraischir l'alliance avec la royne? je dis ceste alliance ancienne de la maison d'Angleterre et de Bourgongne, qui tasche pour tous moyens de tirer à soi les Ligues des Suisses. qu'il sçait estre mi parties au faict de la relligion, et toutesfois si estroictement unies ensemble, qu'il ne peult estre allié aulx ungs selon leur union, qu'il ne le soit aulx aultres? qui a recherché par tous moyens

le roy de Navarre, mesmes lui presentant et ouvrant tous ses thresors, pourveu qu'il voulleust troubler le roy en son royaume? Et qui ne sçait qu'il a son ambassadeur vers le Turc? qu'il practique de tenir le premier lieu au prejudice de la France, lui qui condamnoit auparavant telle alliance? qu'il en a avec les roys de Barbarie, d'Ethiopie, des Indes, idolastres, Turcs et Sarrazins? lui qui, par ses advocats, nous veult rendre abominable la communication que nous avons avec nos voisins chrestiens? Et que dirons nous du pape mesmes, de Sixte? Je dis celui qui expose en proye le roy de Navarre, et monseigneur le prince; qui, pour diviser les reformés, a recherché ceulx de la confession d'Ausbourg, disant pourveu qu'ils voulleussent recognoistre la dignité de son siege, qu'ils estoient es aultres choses tolerables jusques à ung Concile? eulx toutesfoys qui abominent la messe non moins que les aultres? qui mesmes, pour la seule commodité de ses affaires, pour exempter Avignon et le comtat de la foule de nos guerres, a faiet concordat expres avec ceulx de la principaulté d'Orange, ceulx de Daulphiné aussi, et de Provence, qui sont armés aujourd'hui contre la Ligue? Ce sont des pretextes que la Ligue faict mettre en avant pour rendre le roy odieux à son peuple. Mettez leur demain le sceptre en main, qu'ils y touchent seulement du bout du doigt, pour le retenir ou l'acquerir ils feront toutes choses. Tout ce qui leur sera sain leur sera sainct, ils ne feront difference du chrestien au Turc, de Jerusalem mesmes à Gomorrhe.

Page 27. Il reproche qu'on ne s'est mis en aulcung debvoir pour regagner santé; ce sont ses propres termes. Disons, je vous prye, que nous peult il dire que nous n'ayons essayé, que nous n'ayons jà faict? Nous avons

bruslé trente ans et plus en ce royaume : apres, il y avoit vingt et sept ans tantost que nous faisons la guerre, cruelle et sanglante s'il en feut jamais; car il y est mort deux cent mille hommes; il s'y est donné quattre batailles generales, et de toutes avons eu victoire; il s'y est passé infinis sieges, infinis combats; il n'y a famille en ce royaume qui n'ait faict deux ou trois deuils pendant ce temps. Non contens, nous les avons desfaicts en pleines nopces; le clergé y a contribué son abondance; le tiers estat jusques à sa necessité; la noblesse le plus clair, le plus beau de son sang; nos roys mesmes leur honneur, leur reputation, leur foi. Que pense cest homme que nous puissions faire dadvantage, si ce n'est, peult estre, qu'il se persuade que, soubs le nom de Ligue, il y ait quelque grand stratageme, quelque grand mystere ou quelque force occulte?

Il s'imagine peult estre qu'au nom de la Ligue les huguenots tourneront arriere; qu'à la veue de ce bel oriflamme ils seront aveuglés, et nous voyons tous s'ils s'en esmeuvent, nous sçavons le compte qu'ils en font; c'est, certes, ce qu'ils ont bien sceu dire. La Ligue n'a poinct creé hommes nouveaulx, ni nouveaulx cœurs es hommes; la Ligue n'a poinct ouvert nouvelles mines ni nouveaulx thresors. J'obmettois une ineptie en ce discours; car il dict que le duc Cazimir envoya Vier, qu'il appelle protecteur des sorciers, vers le roy, pour se plaindre de la Ligue de Peronne; et notés qu'il doibt avoir leu ung livre des illusions des diables, composé par ung Vier, medeoin du duc de Cleves, et se faict accroire que c'est cestui ci, conseiller du duc Cazimir. Pages 31 et 32. Le but de la Ligue, dict il, ce doibt estre que le roy de Navarre, le roy venant à mouris, ne soit pas roy en France; et ses raisons sont que les

roys et princes ne viennent poinct en consideration quand il est question de la relligion : c'est parlé bien generalement de ceulx que Dieu a constitués sur nous. Qu'il est heretique: ceste question est debatteue fort amplement par ung jurisconsulte, et puis qu'il en estoit veneu si avant, il debvoit avoir refuté ses raisons; car de l'emporter de haute lutte, son auctorité est trop petite. Et puis il a esté souvent respondeu qu'il ne peult estre teneu pour heretique, se soubmettant mesmes à estre instruict jusques à la decision d'ung bon Concile. Que M. le cardinal son oncle est plus proche que lui: on pourra respondre à cest Anglois que les Anglois nous sont trop suspects pour interpreter la loi Salique; que ce n'est à eulx à decider de nostre rang; et puis il debvoit respondre aulx traictés de Hotoman et de Belloy, par lesquels il est prouvé par toutes loix, tant anciennes que modernes, qu'es choses non divisibles, le fils de l'aisné est preseré au frere, le nepveu à l'oncle. Le roy et la royne n'en ont pas jugé ainsi; car mesmes, depuis ces remuemens, ils ont tousjours parlé du roy de Navarre comme du premier prince du sang, et en paix faisant avec ceulx de la Ligue, ils n'y ont aulcunement voulleu toucher. Les courts souveraines ont de long temps prejugé la question, quand, en la presentation des roses qui se faict par les princes du sang, chose solemnelle, où l'ordre des princes est gardé, le roy de Navarre, sans dispute, y a tousjours teneu le premier lieu, mesmes il y a arrest donné en parlement depuis deux ans, où ceste clause est expressement en faveur de la proximité qu'a le roy de Navarre avec le roy. L'air du peuple mesmes, qui nous est comme ung consentement, en a toujours opiné ainsi, et il lui fault nouvelle instruction pour le faire penser au contraire. Et je vous puis dire dadvantage qu'il n'y a pas ung an et demi que M. le cardinal me commanda par deux fois de pryer le roy de Navarre, son nepveu, de ne croire poinct ce qu'on lui pourroit dire; qu'il estoit son oncle voirement, plus vieil que lui, mais qu'il le recognoissoit pour chef de la maison, et comme à tel lui rendroit tousjours ce qui lui estoit deu; qu'il estoit de trop bon naturel pour rien entreprendre oultre le droict et la nature, et m'asseure qu'il ne sera malaisé de l'en faire resoubvenir.

Page 33. Vous marquerés, en passant, qu'il dict que le roy de Navarre depescha le sieur de Segur en Allemaigne, tost apres le deces de feu Monsieur, pour practiquer les moyens de parvenir à cest estat: et c'estoit ung an auparavant, son altesse estant en tres bonne santé. Que ce feut aulx persuasions d'ung ministre Brocard, qui lui auroit faiet entendre qu'il se roit roy de France: et notés que Brocard est ung vieil Italien, qui n'est et ne feut jamais ministre, qui a esté condamné par leurs synodes, qui ne veit oncques le roy de Navarre, et ne meit jamais le pied en France. Par là jugés des conclusions qu'il tire; par là de la verité des aultres choses, dont je n'ai pas tant de cognois-sance.

Page 35. S'ensuit une absurdité moins supportable, quand il dict, que c'est cas resoleu entre les huguenots et leurs ministres, qu'il est loisible à tous hommes, et principalement aulx princes, de dissimuler la relligion. Il est aisé à voir où il tend. C'est pour dire que quand le roy de Navarre se reuniroit à l'Eglise romaine, qu'il ne fault pourtant le recevoir. Et Dieu nous conservera le roy pour nous oster de ceste peine. Mais s'il est permis, entre les huguenots, de deguiser

sa foi, si c'est mesmes une maxime resoleue, comment estoient tant de gens de toutes qualités et nations, si mal instruicts en leurs articles, qui se sont laissés brusler tout vifs pour la relligion, et qu'on convioit, par tous moyens, à s'en dedire? Et qui ne sçait, au contraire, que c'est une discipline entre eulx, quand quelqu'ung a vacillé en sa relligion, qu'il n'est poinct admis en leur communion, qu'il n'ait faict penitence publicque? Jusques là que le roy de Navarre se retirant de la court où il avoit flechi, le feit en pleine assemblee à Alençon, premier que d'estre receu à nommer des enfans au baptesme. Pensés qu'il y a belle apparence qu'ung ministre conseille la messe à ses paroissiens, et quelle creance il auroit vers ung prince, s'il lui ordonnoit de feindre sa creance, et combien eust peu durer ceste relligion, au milieu des feux et des massacres, à la preuve de tant de miseres et calamités, si elle eust eu pour article de se seindre, c'est à dire de s'exterminer et esteindre soi mesmes. Mais je ne sçais duquel il y a moins en ces discours, de verité ou de jugement.

Page 36. Parce qu'il voit que la Ligue ne peult s'excuser d'avoir troublé la France, il veult faire croire que le roy de Navarre faisoit son estat de surprendre Orleans pour y tenir sa court. Recours à M. le chance-lier qui y commande, si jamais il en ouït parler; recours à ceulx d'Orleans, s'ils en ont eu le moindre vent. Ains qu'il nous die donc soubs quel pretexte ceulx de ceste Ligue, à Orleans, fermerent les portes à monseigneur de Montpensier, envoyé de par le roy pour y entrer; lui tirerent mesmes quelques canonnades pour l'accabler de ruyne en une maison du fauxbourg où il estoit, où de faict en feut tué des siens. Certes, le sang

de Bourbon, le sang de nos roys leur est tout hugenot; à peine qu'ils ne nous dient impudemment que ce prince est heretique. Et M. le cardinal le leur seroit comme les aultres, s'ils pensoient qu'il eust encores dix ans à vivre.

Page 38. Il nous faict peur ici d'Angleterre. L'Angleterre a ses façons et nous les nostres. Nous cognoissons l'Angleterre mieulx que lui. D'autant que les papes se disoient souverains d'Angleterre, et tenoient les roys pour leurs vassaulx, le roy Henry VIII, prince non lutherien ni huguenot, ains prince au contraire qui a faict des livres (et nous les lisons encores) contre Luther, voulleut sortir de ceste tutelle, à laquelle il se voyoit assujetti par la superstition d'ung certain roy Inas, et en passa si avant, qu'il feut declaré par les estats que le pape ne seroit plus recogneu souverain d'Angleterre. Ses successeurs ont continué de mesmes; et comme des lors quelques catholiques superstitieux y avoient contredict, il s'en trouve qui le font encores. Tels sont chastiés, en Angleterre, comme crimineux de leze majesté, et non pour article de relligion; car il ne se veit jamais symbole où il soit dict que le pape soit roy d'Angleterre. Et de faict, le parlement d'alors ne pensoit poinct de rien innover en la relligion; mais les jesuites, quand ils vont susciter les Anglois contre leur souveraine, quand ils vont prescher entre les ignorans qu'elle est usurpatrice du royaume sur le pape; quand ils lui suscitent des assassineurs de fois à aultres, choses confessees, choses pleinement verifiees à tous les princes de la chrestienté, choses manifestes et cogneues à ung chacung, estans decouverts et chastiés comme ils meritent, nous vouldroient bien faire croire qu'ils souffrent pour la relligion, qu'ils sont martyrs. Quelle foi nous a jamais permis d'attenter à la vie de nos princes? et quels assassins de princes ont jamais esté (sinon entre eulx) canonisés martyrs? Ces ossemens donc, et ces quartiers que cest Anglois nous monstre sur la tour, sur les portes de Londres, ne pensés que ce soient des reliques, ce sont marques de rebellion, d'attentat, d'assassinat, de trahisons, crimes detestés entre les plus barbares, crimes pour lesquels juger il ne nous fault parlement ni Concile, crimes que nature a condamnés suffisamment au cœur de tous les hommes, quand entre les hommes n'y auroit ni loi ni Escriture.

Page 41. Je passe pardessus toute ceste eloquence injurieuse. Il exhorte fort à renouer et resouder la Ligue. Ne pensés si le roy ne s'en mesle, que le roy de Navarre et les siens s'en mettent fort en peine; les huguenots sont unis par le commun peril, et ce prince sçait assés que les catholiques sçavent bien qu'ils n'ont rien à craindre de sa part. Le roy de Navarre, dict il, a tant pour son plat. Il n'y a si ignorant en ses affaires qui ne sçache bien qu'il ne prend rien d'aultrui, et y depend le sien. La Rochelle et Sancerre sont liguees ensemble. Voyés quelle ligue, veu que Sancerre est demantelee et ruynee quinze ans y a. Ces ligues mettent tous les ans deniers en la bourse commune. Pensés quand encores ils doibvent le payement de leurs Reystres de l'an 76, pour lequel lever tout le conseil du roy tesmoignera qu'ils ont eu commission du roy, et diverses contrainctes comme pour ses deniers propres, et en est le thresorier comptable en la chambre des comptes; et si la levee se feust faicte aultrement, ne doubtés qu'assés de gens eussent pris ce pretexte pour les molester. Ce que je trouve de mieulx, c'est qu'apres avoir vomi ung

million d'injures, teintes de colere, il reproche aulx huguenots que leurs livres ne tiennent rien des Tertulian et des Basile, es escrits desquels il n'y a injure ni colere, rien que doctrine et humilité.

Page 45. Ils nous vouldroient faire croire qu'ils sont entrés es villes du roy paisiblement et sans exces; bien leur estoit il aisé d'ainsi le faire quand ils en estoient les gouverneurs, quand ils en tenoient et les cless et les portes; mais s'ils les ont doulcement traictees, pourquoi ceulx d'Auxonne s'en sont ils soubstraicts, ville de Bourgongne, en leur gouvernement, où il n'y a ung seul du contraire parti? et pourquoi les habitans de Bourg se jettoient ils tous les jours pardessus les murailles? et pourquoi ceulx d'Agen mesmes, où la royne de Navarre estoit, qui moins se debvoient ressentir de leurs exces pour sa presence, ont ils esté reduicts à tel desespoir, que de les aller forcer dedans leurs citadelles, et les en chasser honteusement? On sçait qu'ils y ont vescu tous à discretion; qu'es lieux où ils ont faicts mine de payer, il s'est trouvé que c'estoit faulse monnoye; qu'ils les ont contraincts à sommes excessives, et par rigueurs extraordinaires. J'en ai honte; et, si le fault il dire, qu'il y a eu des femmes pendeues pour avoir gemi et souspiré. Il allegue deux ou trois exemples de cruautés du parti contraire. Qui ignore que la guerre n'en produise, que la guerre ne mene à sa suite des meschans qui se font cognoistre par leurs actes tels qu'ils sont? Mais quel champ ouvre il de lui respondre, quand en pleine paix ils peuvent objecter les horreurs de la guerre au plus riant d'une comedie, les cruautés tragiques plus en une seule ville et en ung seul jour, qu'il n'en sçauroit recueillir en trente annees? Il revient tousjours sur le roy de Navarre, et l'accuse qu'il faisoit pendre les moines en la prise d'Angoulesme. Chacung sçait que lors il estoit à La Rochelle avec la seu royne sa mere, et qu'il ne prist les armes qu'apres la bataille de Jarnac. Aussi, qu'ung du Casse, son lieutenant à Bazas, commit une cruauté insigne à l'endroict d'une semme. J'ai cogneu le Casse, capitaine de la citadelle, homme violent et vicieux. Je n'ai toutesfois entendeu ceste histoire; bien sçais je que le roy de Navarre lui osta la charge de la ville de Bazas, et sur les plainctes que lui feit M. le mareschal de Matignon qu'il fortifioit une sienne maison aupres, l'alla prendre en ceste maison là lui mesmes, ou aultrement il eust falleu mener le canon, et la feit raser à mesme beure. Et depuis, son frere s'estant, par déspit, mis de la Ligue, qui prenoit tout le rebut des aultres, ledict sieur mareschal le feit prendre à Bourdeaux, et tout chaudement lui feit trancher la teste.

Page 52. Quant aulx inhumanités exercees à Montaut en la comté de Foix, cinq cens gentilshommes catholiques, qui estoient en Foix lorsque M. d'Espernon veint à Pamiers vers le roy de Navarre, tesmoigneront ce que j'en dirai; et je dirai plus, M. Duranty mesmes, premier president au parlement de Thoulouse; c'est qu'il n'y feut respandeu une goutte de sang, ni pris ung poulet, ni rien attenté contre personne, en sa relligion, en son honneur, en sa vie, en ses biens, et en oserois respondre en propre nom. Au moins n'alleguant que trois exemples contre le roy de Navarre, ils debvoient estre certains et veritables; et si voyés vous assés, les ayant cherchés par tous les coings, qu'il ne l'a pas faict pour l'espargner.

Page 53. Combien dirons nous plus veritablement que le roy de Navarre, es lieux de son auctorité, n'a

poinct faict de difference entre les gens de bien pour la relligion; qu'au fort de la guerre il a mainteneu les catholiques, les presbtres, les moines, mesmes a laissé leurs exercices et devotions en leur entier; que jamais il n'a souillé ni sa main ni son honneur au sang d'aulcung, non de ses plus aspres ennemis, non de ceulx là mesmes qui avoient juré et entrepris sa mort; qu'au sortir des armes il a donné ses injures à la paix, pour jamais ne s'en ressoubvenir; que mesmes en pleine paix ses subjects du Mont de Marsan, s'estans insolemment opiniastrés contre lui, nonobstant frequentes jussions du roy, il auroit trouvé moyen de les surprendre en une nuict, et toutesfois leur auroit à tous donné leurs faultes, sans qu'aulcung y feust pillé, sans qu'il y moureust des habitans, qu'ung seul en se defendant à l'abordee. Et de ce tesmoignera M. de Bellievre, qui lors arriva aupres de lui pour aultres affaires de la part du roy. Je laisse l'exemple memorable de ceulx d'Eauze, ses subjects en Armagnac, qui, en l'an 77, ayans levé le pont sur lui, l'enfermerent, lui septiesme, dans leur ville; et nonobstant s'estant resolleu oultre toute croyance, et leur ayant gaigné une tour pour faire entrer le reste, il saulva la vie à tous les habitans, en consideration qu'ils estoient ses subjects, et n'y eut pour tout qu'ung seul homme pendeu à l'instance de ceulx qui estoient avec lui, qui lui avoit tiré une arquebusade dont toute la ville eut le cœur si touché, qu'il n'en a poinct eu depuis de plus obeissante.

Page 53. Et quant à la royne de Navarre, mere de ce prince; qu'il dechiffre à son plaisir, laissons, je vous prye, les morts en paix, laissons les dormir en leurs se pulchres. C'estoit une grande princesse, fille d'une sœur d'ung de nos plus grands roys; et s'il veult sinistrement

juger de la royne de Navarre, à cause de sa mere, de sa mere il ne peult ni ne doibt parler que bien pour la mere dont elle est isseue. Son petit estat feut esbranlé comme le nostre grand. Il eut ses folies et ses fureurs, et nous les nostres; et n'entrons poinct en comparaison, ni des acces, ni des exces de nostre maladie. La guerre respand du sang partout; mais nos paix ont esté à proportion plus sanglantes de beaucoup que les guerres des aultres; et pour le regard de ceste belle histoire, qu'il recite du tombeau du roy Henry d'Albret son pere, rompeu à Casteljaloux, voyés, je vous prye, comme il en est bien informé; car le roy Henry feut enterré à Lescar en Bearn avec ses predecesseurs, où son corps et son tombeau sont tout entiers, et par là jugés, ou l'ignorance du suppliant, ou la malignité insigne.

Il nous allegue Bearn pour consequence du traictement que le roy de Navarre fera aulx catholiques. Il me fasche d'avoir à presupposer en mes responses ce qu'il presuppose tant de fois en ses discours, la mort du roy, auquel je prye Dieu qu'il donne longue vie; mais j'en proteste une fois pour toutes. Il leur a esté mille fois dict : Que la royne Jeane, mere du roy de Navarre, en une assemblee generale d'estats, establit le changement qui se voit en Bearn; que depuis, les estats de Bearn n'ont jamais requis la messe; que mesmes, apres la Sainct Barthelemy, le roy de Navarre, reteneu en court, leur envoyant le sieur de Miossens pour gouverneur, l'ung des barons du pays et catholique, nonobstant l'horreur du temps et la terreur de deux si grands voisins, qui favorisoit les catholiques, nul ne s'y presenta oncques pour la leur demander; que les gentilshommes catholiques, neantmoins, y vivent doul-

cement sans estre recherchés, les sieurs de Miossens, de Saincte Colombe, de Lago, de Saincte Estefe et aultres, et ne vouldroient pas estre aultrement; que mesmes ceulx du clergé jouissent de leurs biens et de leurs pensions, le surplus estant employé à l'entretenement des escoliers et des escoles; qu'au contraire, en la Basse Navarre, où, pour la pluspart, le peuple est catholique, il n'y a aultre exercice par tout le pays, fors seulement à Sainct Palais, et leur est gardé et mainteneu inviolablement l'exercice entier de leur relligion, sans avoir touché aulx benefices et biens de l'Eglise. Qu'ils declarent nettement en leurs escrits, puisqu'ils veullent respondre, s'ils confessent ce que dessus, ou s'ils le nient; et s'ils sont contraincts de confesser (comme ils ne peuvent aultrement), qu'ont ils donc plus à nous alleguer l'exemple de Bearn, puisque soubs le mesme prince ils voyent le contraire en la Basse Navarre? Mais il nous fault bien passer plus oultre sur ce poinct. Pensés qu'ung roy de Navarre, si Dieu l'appelloit à la couronne, vouldroit prendre le modele de gouverner ce royaume sur Bearn! Pensés qu'il en vouldroit bien avoir l'advis de son conseil de Pau, dont cest homme nous veult faire peur; pensés qu'il seroit peu habile ou si mal conseillé que de ne considerer que cest estat est d'une aultre nature, et que s'il entreprenoit d'y changer la relligion, il attireroit une ruyne sur sa teste; pensés qu'il n'aura voulleu rien innover en la relligion es pays de la Basse Navarre, pays tout acquis, où il le peult faire sans danger, et qu'il le vouldra en ce royaume, pays jà parti de factions et plus que balancé. pays grand, puissant, duquel la richesse et la beauté sont suffisantes de rabattre et retenir toutes les passions que d'ailleurs il pourroit avoir.

Page 55. Je ne sçais qu'il fault plus à cest homme. Il conseille d'avoir ung roy catholique; il se fasche que le roy de Navarre veuille estre instruict, et instruict mesmes en ung Concile; il a peur enfin qu'il ne se fasse catholique. Et s'il voulloit ouir une messe, je pense à la verité qu'il ne le vouldroit poinct. Oyons ses propos. Il est condamné au Concile de Trente. Ce Concile n'est pas encores receu en ce royaume; mais avés vous donc si peu de charité, que, pour regaigner ung prince, ung prince sur qui regarde ce royaume, ung prince suivi de tant de milliers d'ames, vous plaigniés encores ung Concile? et combien de fois, pour moindre occasion, et sur ung mesme article, les anciens peres les ont ils reiterés? les anciens peres, desquels nous faisons bouclier à toutes heurtes? Il veult estre instruict; mais c'est, disent ils, feintise; car, avant la mort de feu Monsieur, il ne s'en parloit poinct. Ains y a il eu aulcung edict de paix par lequel le differend des deux relligions n'ait esté remis à ung Concile libre? et des l'assemblee de Blois, qu'on lise les cahiers et les memoires, le roy de Navarre respondit il pas aulx deputés qu'il estoit tout prest d'estre enseigné; que s'il estoit en erreur, on lui feroit plaisir de lui monstrer? et au lieu de terminer les differends, qu'a on faict que tenter tous moyens en tout ce temps de l'exterminer, et tous les siens? Les ministres n'y vouldront venir; ils sont couards. - Ains ils vous ont dict qu'ils feurent à Constance, et tres mal leur en prit; car ils y feurent bruslés contre la foi publicque, et depuis à Trente, et on sçait qu'ils coururent fortune et ne laisserent pourtant de se trouver à Poissi au colloque, où ils plaiderent leur cause vivement. Et c'est de quoi cestui ci se deult de ce colloque; car il eust voulleu qu'on les y eust tués pour retrancher

à jamais l'espoir d'ung bon Concile. Mais qui doubte que la verité ne soit de nostre part? Et on lui dira la moitié de l'Europe, Allemans, Polonois, Anglois, Escossois, Danois, Suedois, Suisses, plus d'ung tiers de France, plus d'ung tiers des Pays Bas, Rome mesmes n'est plus creue à Rome. Quand tant de gens en tous lieux protestent, royaumes entiers, nations entieres, peut ce estre sans apparence de raison? est ce donc pas le subject d'ung Concile? Mais nous sommes ceste Eglise que Christ a plantee, que les apostres ont cultivee, que les martyrs ont arrousee de leur sang. Ains, nous dient ils, nous sommes celle là mesmes, qui vous respondons que sur les plantes de Christ vous avés laissé venir l'yvroie; que les apostres et les martyrs ont cultivé et arrosé ceste mesme doctrine, que nous retenons, non pas les erreurs des hommes qui depuis sont surveneus; qui protestons contre vous de tels abus, et en requerons la reformation. Chacung tire les apostres, les martyrs et les docteurs à soi; chacung appelle à garant la parole de Dieu; chacung dict que sa doctrine est l'ancienne. Est ce pas donc derechef matiere de Concile? Et c'est, certes, comme qui, en nos estats, requerroit la reformation de plusieurs desordres et confusions, introduicts ou par le laps du temps, ou par la perversité des hommes; qui allegueroit alors que nostre estat avoit esté fondé, establi et ordonné par ung Clovis, ung Charlemagne, ung Capet, ung Philippes Auguste, etc., et pourtant qu'il n'y fauldroit toucher, ne seroit recevable; car ceulx là ont faict les bonnes loix, et les hommes en ont inventé les fuites et cauteles; ceulx là en ont fondé les colomnes, et le temps les a mangees ou esbranlees; ceulx là y auront donné la forme, et nous avons à nous plaindre des difformités, des rides, des macules. Toutes choses en ce monde se corrompent, les choses surtout qui passent par les hommes les plus corrompeus de toutes creatures. Il n'est pas, en somme, question de la forge ni de l'alumelle, mais bien de la rouille et de la vermouleure qui se voit à l'œil; et si vous faictes difficulté d'en accuser les hommes, accusés le temps, qui corrompt toutes choses, accusés en l'air si vous voulés. On n'en requiert que l'amendement, on n'en demande que le remede. Tout le reste, c'est que le roy de Navarre est heretique; qu'il est infidelle; que c'est ung Coré, Dathan et Abiron; que c'est ung esclave de Sathan, etc., toutes ou presuppositions ou hyperboles, qui ne trouvent pas grand lieu entre les gens de jugement, parce qu'on les peult nier tout en ung mot.

Mais, adjouste il (c'est le meilleur), le roy de Navarre est il pas suffisamment instruict par le jour Sainct Barthelemy? et si par là il ne l'est assés, qui le peult convertir? Pensés si ce jour estoit pour le destruire ou pour l'instruire, pour le subvertir ou pour le convertir. Quant à moi, j'ai opinion que si Sainct Barthelemy, pour convertir les Indes, eust teneu ceste methode là, qu'il n'en eust jamais persuadé aulcung à se faire chrestien. Et combien, de faict, en avons nous cogneu qui, par l'horreur de ce jour, sont entrés en doubte de leur foi, et enfin estans hors de danger, se sont faits huguenots? Mais voulés vous voir la charité de ce livret, qui ne craint rien tant, comme j'ai dict, que ce prince se change: Aussi bien, dict il encores, or qu'il se convertisse, heretiques repentis n'eurent jamais charge en l'Eglise; c'est à dire, quoi qu'il puisse faire ou devenir, il se fault resouldre de l'exclurre, il fault supplanter le sang de France pour y

planter le sang de Lorraine, il en fault entierement exterminer la race.

Page 58. G'est pour respondre aulx declamations qu'il faict jusques à la page 70. Et n'est toutesfois à oublier qu'entre deux il seme partout des inepties, des absurdités, des ignorances, qu'il est bon de remarquer. Il reproche que le roy de Navarre se dict protecteur de ce royaume. Il se debvoit soubvenir que messieurs de la Ligue, en leurs escrits, s'attribuoient ce nom, le marquis d'Elbœuf, M. d'Aumale et aultres, tellement que nous avons autant de protecteurs en France que la maison de Lorraine a de cadets. Jugés si, à meilleur droict, le roy de Navarre pourroit pas prendre ce tiltre, estant ce qu'il est en ce royaume. Il dict qu'il a envoyé chés les estats voisins, qui sont de mesme profession, pour les susciter contre la France. Suffit que le roy est demeuré content sur cest article, et que ceulx qui ont semé ces calomnies, ont à se laver du dementi qu'ils ont receu à ce propos; mais, pour preuve de son dire, il dict que les protestans s'en sont formalisés contre les calvinistes, et en ont escrit ung livre intitulé le Boutefeu. Qui aura leu ce beau livre, cognoistra assés quels boutefeux l'ont faict; car ce sont evidemment les jesuites, et n'y a homme d'entendement qui ne le voye. Et de faict, jugés par les effect; car, comme ceste ambassade tendoit principalement à reconcilier les differends en la relligion, s'en est ensuivi que ceulx de la confession d'Ausbourg ont embrassé les eglises de France pour faire doresnavant ung corps et une cause; que les voyant molestés en France, ils ont entrepris leur cause envers le roy, leur defense contre les perturbateurs, et nous en voyons et avons veu les ambassades. Tant s'en fault; comme le boutefeu nous voul-

loit faire croire, par ses responses mal supposees, qu'ils les eussent reboutés et rebutés comme ennemis. J'obmettois ce beau sonnet, qu'il entrelace, où il faict Mornay chancelier, et Marmet ministre du roy de Navarre, ce Mornay qu'il dict qu'on sçait bien n'avoir jamais faict ceste profession. Et de faict, je n'ai cogneu, de tout ce temps, que deux chanceliers du roy de Navarre, feu M. du Ferrier, tres grand personnage, le second Caton de France, qui moureut y a ung an du regret de ceste guerre de la Ligue, et M. de Glateins, frere aisné de M. de Pybrac, qui exerce aujourd'hui ceste charge avec beaucoup de louange. Et quant à Marmet, c'est le ministre de la ville de Nerac, d'où il ne bouge, content de son ministere, qui n'approcha oncques ni voulleut approcher ni maison, ni affaires de prince.

Page 73. Il faict accroire à Calvin, qu'il dict sur Daniel qu'il fault cracher au nés des roys catholiques plustost que leur obeir, et qu'il y mesdict de nos roys François et Henry, etc. Je l'ai recherché expres pour mieulx mesurer toutes ses menteries par les plus remarquables. Il est question en Daniel de Nabuchodonosor, qui veult faire adorer sa statue. Calvin dict qu'à l'exemple de Daniel, quelque lieu qu'il teinst en la maison du roy, il vault mieulx desobeir et desplaire à son prince que d'offenser Dieu. Qui sera le catholique qui n'en parlera de mesmes? et nos Cyprian, et nos Justin en ont ils pas faict ainsi? et qu'a cela de commun avec nos princes? Ailleurs, Daniel, parlant des monarques, les compare aulx lions et aulx ours, etc. Il dict qu'à la verité les estats ravissans et les princes tyranniques sont justement comparés aulx bestes, et que nous en avons veu en nostre temps de tels. Qui est ce que sainct

Augustin nous dict, que les grands empires sans justice sont brigandages et non estats. Et pourquoi veult ce bon interprete qu'il ait dict cela contre nos roys? Ains voiciles mots que j'ai rencontrés à l'adventure; je dis, à l'ouverture du livre, au serm. 3, sur le chap. 5: Que les royaumes se donnent par la providence de Dieu, soit par succession ou soit par election, soit par sort ou par conqueste; qu'il ne s'y faict changement qui ne soit ordonné de lui; que toutes puissances en procedent; mais particulierement qu'en l'estat royal y a plus d'excellence, estant ceste police non seulement ordonnee de lui, mais comme son image; qu'à cause de ceste image engravee de Dieu en la face des princes, ils doibvent estre obeis de leurs subjects, ores mesmes qu'ils usent d'exces en leur gouvernement; et que de faict ils sont souvent obeis par ce seulement qu'ils portent ceste image; que, quelques exces qu'il y ait aulx princes, comme Dieu les envoye tels, quand il veult chastier les peuples, neantmoins il nous fault louer Dieu, duquel la bonté surmonte en ce qu'il ne permet poinct que les polices soient confuses, estant tout certain que s'il n'y avoit principaulté et magistrat, nous serions trop pires que les bestes. Et lisant le livre plus avant, on y trouvera plusieurs passages plus expres; et de faict, qui veult voir ce que ceulx du contraire parti tiennent du magistrat, il ne fault pas aller arracher des mots decà delà; il ne fault pas rechercher ni les Pasquil, ni les Marphore; je dis les livrets diffamatoires, qui sont tout licentieux et insolens de part et d'aultre, et qui ne font foi ni pour l'ung ni pour l'aultre. Il fault lire les confessions de foi, il fault lire les traictés expres, il fault voir si la royne d'Angleterre, si le roy de Dannemark et si les princes protestans sont obeis en leurs estats, estats toutesfois où la relligion, dont il est question, regne sans contredict; car si nous voullions regarder les livrets, si mesmes par cestui ci nous voullions juger du respect et de l'obeissance des catholiques envers les roys, quel tort, je vous prye, leur ferions nous, veu qu'il dict ouvertement qu'en faict de relligion, les roys et les princes ne doibvent venir en consideration aulcune, veu qu'il ne craint poinct de dire que le roy est reprouvé de Dieu pour n'avoir tué le roy de Navarre et monseigneur le prince, lorsqu'ils estoient en ses mains, veu qu'il ne parle jamais des princes, de sa souveraine mesmes, puisqu'il veult estre teneu Anglois, qu'à bouche sanglante et venimeuse?

Pages 75, 76, etc. Il revient tousjours à son desseing, que le roy de Navarre ne soit pas receu à la couronne; et se bat sur ceste perche comme si le roy estoit à l'agonie, comme si entre ci et là, par sa prudence ou par ung Concile, ces difficultés ne pouvoient pas estre levees. Comment, dict il, sera il sacré? Et ils pensent à le massacrer, plustost qu'à le sacrer. Comment orra il la messe? Et ils n'apprehendent chose au monde tant que de l'y voir aller. Comment succedera il à ces bons roys defenseurs de l'Eglise? Et on lui pourra respondre que ces princes heroïques defendoient l'Eglise et non pas les abus; que le roy de Navarre proteste aujourd'hui contre ces abus là, et ne laisse nonobstant de reverer et embrasser l'Eglise. Ainsi, quand Charlemagne ordonna au Concile de Francfort que les images et statues, qui estoient veneues en grande idolastrie, seroient ostees des eglises, dont nous avons entre main le livre expres, il reformoit les abus et honoroit l'Eglise. Ainsi, quand le bon roy Sainct Louis, ennuyé des simonies de Rome, defendit, soubs grande

peine, d'y porter argent, et tascha de retrancher tant de corruptions en la distribution des charges de l'Eglise, il honoroit veritablement l'Eglise, il ne laissa d'estre honoré en l'Eglise. Ainsi, quand le roy Philippes declara le pape Boniface impertinent, et quand la Sorbonne l'excommunia, le condamna, le declara heretique, instrument de Satan pour la tyrannie qu'il voulloit usurper sur nostre Eglise comme sur les aultres, il ne laissa pas, ni eulx aussi, combien qu'excommuniés du pape, d'estre membres et membres notables de l'Eglise. Defendre, en somme, l'Eglise, c'est defendre la doctrine de nostre Seigneur, fondement unique de l'Eglise; et nul donc ne la defend plus veritablement que qui cherche de purger et reformer l'Eglise, les abus que le temps ou les hommes ont introduicts en l'Eglise. Nul ne l'honore plus serieusement que qui ne peult endurer patiemment qu'on la couvre d'ordures. Et ceste desense ne se faict par l'espee, mais par le livre, ne depend pas du succes d'une bataille, mais d'ung bon Concile; et qui proteste contre-l'abus, qui requiert qu'il soit reglé par ung Concile, est donc le plus vrai ami et desenseur de l'Eglise de Christ, si nous ne disons, comme les Juifs, que nostre Seigneur destruict le temple quand il chasse les marchands et les pigeons, les ordures et les tromperies du temple.

Pages 78,79, etc. Mais, dict il, au moins ne pouvés vous nier qu'il ne soit crimineux de felonie, car on l'a veu en campagne, etc. Si estre en campagne, si prendre les armes simplement est felonie, rend il pas donc crimineux de felonie sans doubte aulcune, M. le cardinal de Bourbon et messieurs de la Ligue, toute la maison de Guise, qu'on a veu armés ces jours passés, contre la volonté du roy, s'emparer des villes, mettre

la main aulx finances, ravager la France, attirer les estrangers dans le royaume, Suisses, Reystres, faire, en somme, tout ce qu'il impute à l'amiral, tout ce dont il veult rendre odieux le roy de Navarre et son parti? Felonie donc, s'il veult eschapper ce mauvais pas, n'est pas simplement prendre les armes. La prise des armes se forme ou en crime ou en service, selon le motif, selon la cause; et tousjours nous fault revenir à ce poinct, que la guerre prend la qualité bonne ou mauvaise, de la question qu'elle soubtient. S'ils dient que le roy a condamné les aultres; et qui n'a veu ses edicts, ses declarations contre eulx, esquels ils sont declarés rebelles, ennemis du roy et du royaume? et qui ne l'a oui tonner en parlement, les chambres assemblees, en plein hostel de ville de Paris, contre leurs actions? et tels propos en a il teneus à tous les ambassadeurs des princes qui resident pres de lui? et quelles depesches a il envoyees aulx siens, qui ont charge pres des aultres princes? que s'ils dient que le roy, depuis, les a auctorisés et approuvés par l'edict de juillet, et quelle justification ouvriront ils aulx aultres, qui alleguent leurs premieres armes prises par commandement verbal et par escrit des feu roys et de la royne sa mere? qui en ont produict les lettres originelles en toutes les courts et conseils de l'Europe, mesmes es pleins estats de l'empire? et combien d'edicts en est il ensuivi, qui adwouent leurs armes, en termes trop plus expres, et les recognoissent prises et continuees pour le service du roy et le bien du royaume? et ces edicts ont ils pas esté homologués es courts de parlement? et y a il ni formalité ni solemnité qui n'y soit employee? et s'ils veullent repliquer que c'a esté à main armee, qu'ils dient donc comment ils ont obteneu leur edict de juillet? et combien de fois le roy a il depuis dict et escrit que leur violence l'avoit contrainct de ce faire, ne sentant mesmes sa vie trop asseuree entre leurs partisans? C'est tousjours pour revenir à nostre fondement, la prise des armes est bonne ou mauvaise par la cause, et la cause, certes, si je n'ose dire qu'elle est prejugee contre la Ligue par le roy, au moins nul ne peult nier que ce n'est à elle à decider ce poinct.

Pages 79 et 81. Le roy de Navarre, nous dict il, a faict venir le duc Cazimir en France; il lui a faict donner l'ordre des gendarmes, des possessions, des pensions. Il est cause qu'il a mené nos despouilles en triomphe à Heidelberg. Voyés où la passion nous mene; il parle de l'an 76. Qui ne sçait que ceste guerre là feut meue par feu Monsieur? que la paix surensuivie feut concleue soubs son auctorité? le duc Cazimir pave et honoré à son instance? Qu'au contraire le roy de Navarre, lors de toutes ses practiques, estoit en court? qu'il s'en retira pour s'en aller en ses pays, voyant que sa vie pendoit tousjours à ung filet, qu'il ne demanda rien par la paix pour ne retarder le bien de ce royaume, se contentant de se voir en liberté? Et, de faict, qui eust eu plus longue patience de vivre à la court à la discretion de telles gens, que ce bon discoureur, qui magnise haultement le roy d'Espaigne pour avoir tué son propre fils, et blasme nos roys de n'avoir voulleu souiller leurs mains au sang de leur beau frere, qu'il appelle cousin de bien loing? Et puis, avec quel front, je vous prve. reproche il le duc Cazimir, quand ceulx de la Ligue nous ont amené des Reystres tout fraischement? des Reystres pour defendre le clergé, qui ont courreu les presbtres; pour conserver les reliques, qui ont saccage et violé eglises et autels; pour extirper la relligion

contraire, qui ont faict prescher publicquement, qui ont mesmes faict la cene en leurs armees? Il accuse le roy de Navarre de parjure pour n'avoir rendeu les places de reserve à poinct nommé. On pourra respondre que c'estoit soubs la condition de l'execution entiere de l'edict. Mais il y a plus; car on sçait qu'en respondant le cahier, qui feut presenté au roy à Sainct Germain l'an 84, au mois de decembre, le roy consentit, par expres, que les susdictes villes demeureroient encores en la garde du roy de Navarre pour deux ans, pour donner loisir aulx animosités de s'amortir entierement de part et d'aultre; et est ceste response bien signee du roy, et contresignee de M. Pinard, secretaire d'estat, en date de l'onziesme de decembre. Et comme ceulx de la Ligue, en leurs protestations, voulleussent s'en prevaloir contre le roy, le roy de Navarre, qui n'avoit requis ses seuretés que contre leurs deloyautés et perfidies, s'offrit de remettre es mains du roy toutes lesdictes places, pourveu que ceulx de la Ligue, aulxquels toutesfois il ne veult s'esgaler, feissent de mesmes. Et pensés comme ces reproches leur sont bien seantes en la bouche, quand eulx mesmes ont requis et obteneu des seuretés du roy; eulx qui disposent à leur plaisir de leurs gouvernemens; eulx qui sont logés au milieu de provinces, où il n'y a rien à craindre pour eulx, où, au contraire, il n'y a à craindre qu'eulx? Car n'est ce pas donc les demander contre le roy, contre les catholiques, contre les allarmes et remords de leurs mauvaises consciences?

Page 82. Ils reprochent au roy de Navarre le mauvais traictement de sa femme. Jamais gens de jugement ne mirent le doigt entre marry et femme. Ces querelles s'accordent sans arbitres; et ceulx qui les veullent at-

tiser, le plus souvent s'y bruslent. Ne resveillons poinct ici ni les justes doleances, ni les fortes repliques; espargnons l'honneur du mariaige; espargnons l'honneur du sang de France. Il est bon que messieurs de la Ligue deviennent prescheurs de chasteté; on ne cognoist pas leurs mœurs et leurs humeurs; qu'ils nous fassent le proces du roy de Navarre sur l'amour; car on ne sçait pas et leur vie et leurs vices; que ce qu'il a de plus vicieux en lui seroit vertu entre eulx; que ce qu'ils ont de plus vertueux entre eulx lui seroit une tasche; que ce qu'ils s'estiment vertueux, c'est parce qu'ils sont si corrompeus et si cauterisés, qu'ils ne sentent plus de remords en leurs ames; qu'ils ne voient plus de distance entre vertu et vice. Certes il est hors de doubte que qui sortira de la maison du roy de Navarre pour entrer en celle de ceulx de la Ligue, pensera passer de Sion en Gomorrhe; que qui passera de la consideration de sa personne aulx leurs, en matiere des vices mesmes qu'ils blasment, pensera estre passé et transporté en songe d'ung David à des Sardanapales. Il est arresté en sa relligion; ni les croix ni les couronnes ne l'esmeuvent. Ceulx ci n'ont foi ni relligion qui tienne. L'ombre d'ung espoir les faict lutheriens; les fera, s'il leur peult proficter, mahumetistes. Et de faict, il n'y a pas long temps que M. de Guise, pour amadouer les huguenots. disoit qu'il n'en estoit pas si esloigné comme ils pensoient; que sa grand'mere estoit huguenote (c'estoit feu madame de Ferrare), qui lui en avoit assés appris. qu'aussi feu M. le cardinal son oncle l'avoit faict instituer en sa jeunesse en la confession d'Ausbourg. Le roy de Navarre est prince belliqueux, nourri au travail, refuyant toutes delices. Il sçait mespriser pour sa relligion les voluptés de la court et les grandeurs du

monde. Il voit les royaumes du hault du pinacle dessoubs lui, et il les foulle aulx pieds pour ne fouller sa relligion, pour ne violer sa conscience. Quel de ces princes,
nourris en ung serrail, feroit cela? Quel d'eulx pourroit
vivre sans l'amour ou sans la court trois mois entiers?

Ils alleguent ung exces pretendeu à Agen en l'an 77, qu'ils publient par tout le monde. Miserables! et qu'ils en enquierent ceulx d'Agen, grands et petits, hommes et femmes, si jamais il en feut mention. Je parle confidemment, et le dis derechef, s'il y en a jamais eu feu ni fumee. Madame la mareschale de Montluc, qui est aujourd'hui madame d'Escars, estoit presente; le roy de Navarre et madame sa sœur, princesse au dessus de la corruption et de la mesdisance de ce siecle, devisoient avec elle: qu'elle soit ouïe en tesmoignage, s'il y eut scandale ou de parole ou de faict : s'il y eut chandelle esteinte, comme ils dient, s'il partit du tout d'avec elle: si elle en ouit ung seul mot sur le lieu: si elle ne feut fort esbahie, quand, se trouvant de retour chez elle, on lui en veint parler. Et de faict il me soubvient que lors ung gentilhomme s'en venant de France pour se donner au service de ce prince, entendant à Perigueux ce bruict, voulleut en sçavoir la verité par ses amis, premier que lui parler, resoleu de retourner tout court, s'il estoit veritable. Et je fus present qu'il s'addressa à feu M. de Foix, personnage de vertu et de verité, qui lors estoit, de la part du roy, pres du roy de Navarre, lequel l'asseura sur son honneur qu'il n'en estoit rien, ni en souspçon ni en apparence : que c'estoit une meschante calomnie, et qu'il en avoit escrit au roy pour le tesmoignage qu'il debvoit rendre à la verité, et pour l'acquit de sa conscience. Qu'on s'enquiere mesmes à Agen. Le roy de Navarre en sera tres content; et encores qu'il y en ait de recusables, je m'asseure qu'il seroit marry d'en recuser aulcung pour ce regard. Mais c'est une calomnie hereditaire; car elle feut inventee par le feu admiral de Villars, beau pere de M. de Mayenne, pour degouster ceulx de Bordeaux et aultres villes de recevoir le roy de Navarre comme alors elles le desiroient. Et je dirai plus, que si on demande à ceulx d'Agen quel ils aiment mieulx en conscience ou vivre soubs ce temps là, dont ils veullent se prevaloir, ou soubs le regime de la Ligue (qui toutesfois debvoit estre temperé par la presence d'une royne), qu'ils aimeront mieulx les mois entiers soubs le roy de Navarre, que les plus courts jours soubs les desordres de la Ligue.

Page 85. Il poursuit tousjours en son desseing. Mais si vous venés à recevoir, dict il, le roy de Navarre à la couronne, souvenés vous que Marmet lui a donné advis que, pour expier la Sainct Barthelemy, il faul livrer es mains des ministres deux bourgeois de chaque ville. Pensés qu'il a de bons espions, et qu'il sçait beaucoup de ses affaires, quand il attribue ce conseil i Marmet, qu'on ne veit jamais entrer en son conselle Comme si le roy de Navarre ne sçavoit que la Saind Barthelemy n'est pas veneue du peuple; qu'à Paris n'y avoit bourgeois qui n'en feust desplaisant, et qui ne taschast à conserver son hoste; que mesmes on feut plus de deux heures à harer les crocheteurs, premier que de les faire mordre. Comme si aussi il ne sçavoit que, quinze jours apres et plus, quoiqu'on eust fait à Paris, les aultres villes ne tuoient poinct; que les mar demens en feurent envoyés d'ailleurs; que le peuple ne s'y pouvoit acharner; que les soldats n'y voulloient toucher; que mesmes, en quelques lieux, les bouchers, les mariniers, mesmes les bourreaux le refusoient;

comme si chacung ne sçavoit pas assés qu'il n'y a si bonne ville, si bons habitans, si bonnes mœurs où on ne trouve tousjours prou de meschans pour faire mal, quand, d'une part, personne n'empesche, et que, d'aultre part, ils sont auctorisés. Certes, s'il est question de l'expier, jà n'est grand besoing que les hommes s'en peinent. Dieu, auquel toute vengeance est reservee, semble bien en avoir desjà faict une partie, quand il a' fauché les principaulx aucteurs et les plus grands dedans le bout de l'an; quand nous avons veu leurs satellites, leurs brigands pourrir sur le fumier; quand nous remarquons autant de massacreurs, autant de fins tragiques; quand nos factions ont redoublé, nos calamités multiplié, que nous pensions esteindre; quand encores nous voyons la main de Dieu sur ce royaume armee de peste, de guerre et de famine; armee de nouveaulx fleaulx qu'elle y eslance, de ligueurs, de malcontens, de publiquains, la lie et le marc de tous les precedens, pour le ruyner evidemment et le confondre.

Page 88. Ores que cela ne soit, dict il, deux relligions ne peuvent aussi bien vivre ensemble. Ceste
question a tant de fois esté vuidee. Elles vivent doulcement ensemble en Allemaigne, en Poulongne et en
Suisse, pourquoi serons nous moins compatibles que
les aultres? Elles ont vescu en ce royaume; les particuliers s'y accordent tres bien soubs ung mesme toict
et en mesme maison, pourquoi moins les villes? pourquoi moins les provinces ensemble? En l'armee, que
doibs je dire plus, du duc de Mayenne, les Reystres
sont lutheriens; ils ont leurs ministres, leurs presches,
leurs cenes; la messe et le presche ont sceu, dis je,
s'accorder parmi leurs armes: pourquoi moins par une
paix publicque, voisin à voisin, citoyen à citoyen, nés

pour s'entreconserver, s'entresupporter et s'entr'instruire? Mais, dict il, le sieur de Montaigu n'a peu vivre aupres du prince de Condé. Il y a, certes, esté autant qu'il a voulleu. Il y a passé des ans et en paix et en guerre, et ne s'en est retiré que pour se marier. Mais posés que non. Tant de gens d'honneur de toutes qualités, catholiques s'il en feust jamais, servent le roy de Navarre en leur relligion, es plus importantes charges de ses terres, es plus proches dignités de sa personne, , en ses gardes, en son conseil, en son cabinet; ils y tiennent les plus anciens et les principaulx lieux. Si quelque particulier s'en voulloit retirer, ennuyé peult estre de la court, ou de soi mesmes, qui condamnera le prince ou la relligion pour ung homme ou ung humeur particulier? Mais le chappelain de la royne de Navarre feut massacré en Bearn. Elle mesmes respondra pour le roy, son mary, qu'il n'en est rien; et nous n'en voullons aultre tesmoing que l'evesque de Digne, son grand aumosnier. Et quant à ce qu'il adjouste, que les ministres de Bearn ont corrompeu l'ancienne pudicité du pays, ce mot seul suffit pour rendre suspect, à qui sçait le pays, tout le reste du livre; car il est certain que le clergé de Lescar, metropolitaine du pays, avoit introduict telle corruption, que la paillardise n'y estoit pas recogneue pour vice; au lieu qu'aujourd'hui, par les loix de la feue royne de Navarre, elle y est punie plus rigoureusement que ne sont ailleurs les adulteres et incestes.

Page 91. Il dict que ceulx du parti contraire tiennent le roy de Navarre pour bastard. Car, dict il, Belloy en son livre dict que non. Jugés quelle preuve, ou plustost quel nouveau genre de mesdire. La verité est que ceulx de la Ligue avoient faict ung traicté contenant quattre raisons, pour lesquelles le roy de Navarre ne pouvoit estre receu à la couronne; et celle là en estoit l'une, à sçavoir à cause du mariage qui feut traicté entre la feue royne de Navarre et le duc de Cleves; et Belloy refute doctement ceste malignité en son apologie parmi les aultres; et il eust peu adjouster, s'ils deferent quelque chose au pape, qu'il avoit faict declaration formelle sur ce mariage, qui est encores en nature, et bien gardee. Mais il n'en est ni sera jamais besoing, quoi qu'ils practiquent.

Page 92. Quand les roys, dict il, deviennent heretiques, c'est lorsque les catholiques les estiment moins que fange; car, perdant leur relligion, ils perdent leur dignité, etc. C'est chose certaine qu'en deux opinions contraires l'ung est heretique reciproquement à l'aultre; chacung catholique à soi et à son jugement. Et pourtant est ce une proposition tres dangereuse, que les princes puissent estre rejettés de leurs peuples soubs pretexte d'heresie. Philippe le Bel ung temps feut heretique au pape, parce qu'il ne voulloit pas tenir pour article de foi que le pape feust seigneur souverain et absoleu de tous les roys, mesmes pour le regard du temporel. Il feut excommunié, et son royaume interdict pour ceste cause, ses subjects dispensés du serment, et la France abandonnee au premier occupant. Pensés si l'Eglise gallicane et la Faculté de theologie eussent eu ceste maxime, que devenoit alors cest estat? Et le roy Louis XII, l'ang des bons princes du monde, pour avoir teneu la main à ung Concile pour reformer les insolences du pape Jules, et les abus et corruptions de court de Rome, feut traicté de mesmes; Maximilian aussi, lors empereur, et le roy Ferdinand d'Espaigne. Pensés derechef en quelle confusion venoit la chres-

tienté, si cest article de foi des jesuites eust esté receu entre les catholiques. Et qui doubte que ceulx de la confession d'Ausbourg tiennent ceulx de l'Eglise romaine pour heretiques? Et quel interest auroient donc, en ceste proposition, les empereurs de la maison d'Autriche, qui sont obeis et reverés des protestans sans contradiction, subjects toutesfois à estre depossedés et deposés, si ce bel arrest estoit receu? Les Venitiens aussi, qui, à toutes heures, ont à disputer leur patriarchat contre le pape; et quand ils ne veullent tout ceder, sont declarés excommuniés, et interdicts, et exposés en proye? Et qui ne sçait quantes fois, legerement pour vengeance ou passion particuliere, les grands princes ont esté declarés heretiques? Et que s'en falleut il que l'empereur Charles V ne feust excommunié apres le sac de Rome, ne feust blasmé d'heresie pour avoir receu Luther en conference, pour avoir poursuivi ung Concile? Et quel aultre crime peult on imputer au roy de Navarre que celui là? Certes, demeurons en la doctrine de sainct Paul et de sainct Pierre. Elle est plus certaine que la cabale des jesuites. Obeissés à toute puissance superieure; obeissés à tout ordre humain, pour l'amour de Dieu et pour l'acquit de vostre conscience; car telle est l'ordonnance de Dieu, etc. Et si vivoient ils soubs les plus infideles empereurs et les plus cruels persecuteurs qui feurent onques, combien plus à qui sollicite ung bon Concile, à qui ne desire que voir les abus repurgés, que de voir l'Eglise en son premier estat? Et combien plus relligieusement Calvin, qu'ils blasment tant, lorsque toutesfois ils n'attendoient ni recevoient aulcung support des princes? Il faut, dict il, obeir aulx princes, mesmes infideles et paiens; car ils portent l'image de Dieu.

Page 95. Il faict de grandes adjurations au roy; il lui ramentoit ce beau surnom de tres chrestien, son baptesme, le serment faict à son sacre, etc. Que s'ensuit il donc de tout cela, sinon qu'il conserve et maintienne l'Eglise? Et qu'y a il de plus digne de son nom, de son honneur, de son baptesme, que de procurer, apres tant de divisions, la reunion de l'Eglise chrestienne; apres ung si long et miserable schisme, la paix et concorde de la chrestienté? Et veu qu'il a recogneu par tant de fois que le glaive, que tira sainct Pierre contre le valet du sacrificateur, y est plustost dommageable qu'utile; que ce cimeterre aussi, qu'il a receu du pape, qu'il lui ramentoit, n'a poinct de puissance ni de prise sur les ames; vault il pas mieulx qu'il l'exhorte d'ici en avant à employer le vrai glaive de sainct Pierre, mieulx instruict depuis par le Sainct Esprit? le glaive spirituel de la parole de Dieu, plus penetrant, dict l'apostre, que tout glaive à deux tranchans, qui atteinct jusques aulx divisions de l'ame et de l'esprit, jusques aulx joinctures et aulx mouelles.

Pages 94, 95, 96, 97, 98, etc. Il crainct fort que le roy ne designe pour successeur le roy de Navarre. Et là dessus, il s'escarmouche en mille sortes pour l'en divertir. Grand abus à lui, comme pouvés penser; car, pour chose qu'il en die, il est bien certain qu'il n'y advance ni recule rien. Laissons ordonner au roy de son estat; pryons Dieu qu'il lui donne posterité. Il est prince sage, qui sçaura bien nous pourvoir contre tous inconveniens; et, du reste, laissons faire aulx loix de ce royaume. Mais, quant à ce qu'il le menace d'une soublevation des catholiques et d'une inondation des princes estrangers sur ce royaume, s'il le fait, je crois fermement que le roy a recogneu avec l'experience que la

Ligue peult de soi si peu, que, quand il auroit à resouldre ce poinct, il ne mettroit gueres en compte leurs menaces; et m'asseure, qui plus est, que le roy de Navarre ne retractera jamais la premiere declaration qu'il envoyoit au roy, par laquelle il le supplioit tres humblement de lui laisser demesler ceste querelle avec la Ligue, tant s'en fault qu'estant auctorisé du roy, il puisse entrer en aulcune crainte ou apprehension de leurs efforts.

Jugés, au contraire, avec plus de raison, le cas avenant, que, soubs pretexte d'heresie, on le voulleust debouster d'une succession à lui ouverte par le droict civil des gens; et de nature, s'il ne seroit pas tost secoureu de tous les princes et estats qui font mesme profession, d'Angleterre, d'Allemaigne, de Dannemarck, d'Escosse, de Suisse, etc., c'est à dire, de la plus forte partie de nostre chrestienté; se representans, chacung en son endroict, que le jugement donné contre ce prince seroit ung prejugé contre soi, ung arrest donné contre les princes et estats qui ont protesté des abus de l'Eglise, et en ont requis la reformation; si la France aussi ne seroit pas obligee, par ce moyen, à calamités perpetuelles, à une guerre mortelle et immortelle entre ses citoyens, qui ne pourroit avoir fin que par la fin de l'ung des deux partis, ni l'ung mettre l'aultre à fin, sans venir bien pres de sa ruyne. Et qui ne voit que, sur ce theatre, auroit à se decider alors la querelle de toute l'Europe? Et qui vouldroit bailler caution aulx catholiques d'obtenir victoire en ung combat si incertain, contrepesé, si balancé de part et d'aultre? Et posé, ce qui peult advenir, que le sort des armes feust contre eulx, que pourroit (je vous laisse à penser) produire l'animosité d'une guerre tant debatteue, d'une guerre si sanglante, si envenimee, si acharnee? Et combien est il plus souhaitable, plus raisonnable, plus salutaire de garder le droict à ung chacung; de se tenir aulx moyens plus doulx, sans passer à ces extremités, de s'obliger à la conservation, non à la confusion les ungs des aultres?

Pages 101, 102, 103. Je laisse M. le cardinal de Bourbon; je sçais qu'il commence assés à descouvrir les desseings de la Ligue; qu'il s'en est, apres l'edict de juillet, confessé à la royne, et que desjà il estoit lassé de leurs menees; et ne doubte aussi aulcunement que le roy, son nepveu, et lui ne s'accordent aiseement ensemble.

Page 104. Mais, quant à ceulx de la Ligue, à MM. de Guise nommeement, qu'il pretend laver de blasme, voyons, je vous prye, si son eau les en pourra garantir. Il dict que le roy de Navarre leur envoye des dementis de Joing. Vous sçavés l'histoire. En leurs protestations ils l'avoient calomnié en toutes sortes. Là dessus il envoya sa declaration au roy, escrite et signee de sa main propre, qui feut leue en plein conseil; par laquelle, sauf le respect deu à leurs majestés, il prononce ung dementi contre les aucteurs desdictes protestations, et offre, pour soulager le peuple d'une guerre, puisque ceulx de Guise le voulloient prendre à partie, de vuider ceste querelle en ung duel. Jugés si ung dementi si solemnellement donné, se couvre d'ung pasquil; jugés si ung libelle diffamatoire, espandeu au vent, satisfaict à une declaration si authentique; jugés qui a plus de cœur, ou celui qui offre le combat, ou celui qui l'eschive; qui a plus d'amour à ce royaume, ou qui n'espargne son sang pour le saulver d'une sanglante guerre, ou qui respand le sang d'ung chacung pour

espargner et racheter le sien. Et quant à ce qu'il le trouve donné de trop loing, le roy François le donna à l'empereur de bien plus loing, qui n'eust pas laissé de frapper de bien pres. De moi, pour vous dire verité, je n'y sçache qu'une excuse envers la chrestienté qui l'a sceu, envers la posterité qui le sçaura : c'est, certes, que MM. de Guise ont recogneu le roy de Navarre, à cause du sang dont il est isseu et du rang qu'il y tient, si hault au dessus d'eulx, qu'ils ne craignent poinct que ce qu'ils endureront ou auront enduré de lui, puisse prejudicier à leur honneur.

Page 106. Je laisse Godefroy de Bouillon, etc., qui ne viennent à propos sur ce subject; car les vertus des ancestres ne justifient pas les vices de leurs successeurs. Mais je m'esbahis comme il dict si souvent que MM. de Guise n'oublieront jamais qu'ils sont arrière fils du roy Louis XII, veu que c'est par feu madame la duchesse de Ferrare, leur grand mere, heretique, comme ils dient, et excommuniee, et qui a continué jusqu'à la fin. Car ne voient ils pas que, selon leurs maximes, elle auroit donc perdeu tous ses droicts de posseder, de succeder et de transmettre, et par consequent qu'elle ne peult pas leur en avoir laissé aulcung, et que leurs pretentions, tant celebres, sont nulles en Bretaigne et ailleurs? Mauvais advocat, qui, pour ung mot qui ne sert de rien, leur faict perdre une si riche cause.

Page 109. On leur faict, dict il, accroire qu'ils se disent heritiers de la couronne de par Charlemaigne. Et là dessus il allegue les services faicts par eulx à ce royaume. Comment aultrement eussent ils obteneu l'auctorité des armes? et sans ceste auctorité, qui y peult parvenir? Et Pepin, sans ceste mesme voie, eust il supplanté la race de ses maistres? Et combien fault il

faire de bien pour parvenir au mal, et à ung si grand mal? Mais, pour bien respondre sur ce poinct, il debvoit avoir desadvoué le livre de Rosieres, archidiacre de Thoul, subject de M. de Lorraine, de la genealogie des princes de Lorraine, là où il soubtient qu'ils sont roys de France, premier que Capet, que Charles le Grand et que Clovis, c'est à dire, avant les trois lignees; là où il les faict descendre neantmoins de Charlemaigne; mais par eschellons si fraisles, si interrompeus, si vermouleus, qu'il est malaisé, sans se precipiter, qu'ils montent jamais par là à la couronne; là où il deduict le tort faict par Capet (duquel nos roys sont descendeus) à Charles de Lorraine et à ses descendans, jusques à appeller Dieu en vengeance et garantie du droict qu'ils leur retiennent. Et ce livre a esté imprimé à Paris, et le roy l'a veu et leu, et se l'est faict traduire; et l'aucteur a esté prisonnier pour cest effect. Et M. le president Brulart a instruict son proces; et le roy, en son conseil privé, l'a condamné; tant que ceulx de Guise, par entremise d'amis, feirent convertir la mort en une amende honorable devant le conseil du roy, accordee neantmoins à condition qu'il retracteroit son livre par ung aultre expres; ce qu'il n'a encores faict.

A ces choses si preignantes et si concluantes, qui se sont traictees devant si grands tesmoings, et dont les actes judiciaires font foi à toute la France, et feront à la posterité, il falloit pertinemment respondre, non par vanteries de leurs services, non par vanteries songées contre ceulx de Bourbon, non par proverbes ni apophthegmes, car à gens de jugement tout cela ne faict rien, mais en detestant publicquement et authentiquement ces livres là, en protestant de renonciation à toutes ces pretentions, en requerant la punition severe et exem-

plaire des aucteurs. Et, quant à certains propos qu'il nous tire de certains libelles, dont il faict ceulx de la relligion contraire aucteurs, j'ai certes tousjours tant abhorré ceste façon d'escrire, que je n'ai pas pris la peine de les lire; et pourtant ne vous en puis particulierement respondre. Bien vous dirai je que je m'asseure que le roy de Navarre prendra grand plaisir d'en voir les aucteurs chastiés, soit de part soit d'aultre. Et ne sçais, veu que ce sont libelles sans nom, et fameux, par quel prejugé on les pourroit plustost donner aulx ungs qu'aulx aultres, quand on voit qu'il en est procedé evidemment de la boutique et des ungs et des aultres.

Page 112. On les accuse, dict il, d'avoir esté cause de mettre des imposts sur le peuple. Et il pense s'en estre bien eschappé, quand il a dict que la necessité des guerres en est cause. Et nous sçavons la verité, qu'à la guerre les deniers sont necessaires. Mais la question demeure toute entiere, si la guerre qu'ils ont introduicte estoit necessaire ou non. Car si elle n'estoit necessaire, ils demeurent aucteurs des imposts, qui aultrement n'estoient necessaires. Disons donc : Apres les estats teneus à Orleans, que nous vivions si paisiblement les ungs avec les aultres, estoit il tant necessaire que M. de Guise, pere de ceulx ci, sans commande. ment du roy, contre l'ordonnance qu'il avoit faicte es estats, allast tuer à Vassi, sans discretion d'aage et de sexe, ceulx qui s'y trouvoient au presche, usans de la liberté à eulx accordee par les estats? Et n'est ce pas toutesfois la source de nos calamités, l'origine de nos guerres? Disons encores de plus frais: Lors de ces derniers remuemens, que la France estoit par tout paisible, que nos cœurs de jour en jour se reunissoient, que toutes nos playes s'en alloient consolidées, que le

roy n'avoit aultre occupation que d'en effacer les cicatrices, de donner soulagement au peuple, de remettre sus la dignité à la noblesse, de restablir le clergé en son entier, rendre aulx personnes et aulx choses leur ancienne splendeur, estoit il donc necessaire de courir aulx armes, d'allumer le feu en ce royaume, de remuer les edicts de paix, la succession, le bien public, saisir les deniers du roy, emprunter le roy d'Espaigne, mettre l'estranger dans le royaume, renouveller tous les maulx, regratter toutes les playes, ramener et rappeller tous les desordres, qui s'en alloient dechassés de cest estat? Et à qui donc pouvons nous attribuer les vingt sept edicts nouveaulx, qu'à messieurs de la Ligue? edicts qui confondent la justice, la police, les finances, qui rendent taillable la noblesse, qui donnent le dernier coup au tiers estat; edicts dont MM. de Guise prennent une partie pour leur particulier, vendeurs de maree et de bestail, receveurs alternatifs d'espices, ampliation à tous sieges royaulx en finançant, lieutenant de robbe longue en chaque election, l'heredité des chambres des comtes en partie; oultre ce que les deniers qui provenoient des aultres sont destinés à leur guerre, c'est à dire passent par leurs mains, sont distribués et dispensés par eulx. Et n'objectent pas ici ceulx de la Ligue au roy de Navarre, les deniers qu'il leve maintenant pour se conserver contre leurs attentats. Ce qui est licite à qui defend sa vie, n'est pas estimé licite à qui assaut aultrui; l'ung vient de necessité, l'aultre d'ung guet à pens; l'ung excusé par les loix divines et humaines, l'aultre condamné, l'aultre puni exemplairement en tous pays, par toutes loix. C'est en ce cas que David mange les pains de proposition; en ce cas qu'il prend le glaive consacré à Dieu des mains du sacrificateur. Et si jamais prince se trouva en mesme cas pour ce regard, c'est celui auquel ils font la guerre, qui a le ciel et la terre garants de son innocence; leurs majestés, tous les parlemens, toute la France, tesmoings de sa patience, qui ne s'est jamais voulleu armer que quand il a veu la Ligue en ses entrailles, les forces du roy joinctes aulx leurs; le roy lui faisant assés entendre, par ses actions et par ses lettres, que qui s'armoit contre ceste armee, ne s'armoit pas contre lui, s'armoit pour lui.

Page 117. Il lui deult qu'on appelle ceulx de la Ligue Espaignols. C'est signe qu'on a touché le mal. Il en fremit. Est ce vice, dict il, que d'estre Espaignol? C'est vertu certes à l'Espaignol d'estre bon Espaignol: au François, ce n'est vertu d'estre Espaignol, c'est louange d'estre bon François. L'Espaignol, dict il, est et a tousjours esté bon catholique. Il n'a pas faict comme nous es Pays Bas. Il y a procedé par les armes, non par edicts de pacification. Et povre homme, s'il le sçavoit bien, aulx troubles des Pays Bas de l'an 65. ce ne furent qu'edicts de pacification du temps de la duchesse de Parme. Et nous sçavons la pacification de Gand, de l'an 76, par laquelle ceulx de Hollande et Zeelande ont libre exercice de leur relligion partout, et la messe par expres n'y est poinct restablie, et les biens de l'Eglise demeurent alienés entierement; et toutes les places que tenoit le roy d'Espaigne esdicts pays sont mises es mains du feu prince d'Orange; et le roy d'Espaigne l'a ratifié, l'a juré, l'a signé de sa main Jamais nos roys feirent ils edicts si desadvantageux pour leur relligion et pour leurs subjects catholiques? encores que le roy d'Espaigne, ce grand monarque du Nouveau-Monde, ce grand roy des Indes et des isles,

n'avoit à lutter que contre deux provinces, qui ne font pas la dixiesme partie des Pays Bas, et esquelles mesmes il tenoit bien pres de la moitié. Nos roys, au contraire, contre ung tiers de leur royaume, de leur sang, de leur noblesse, aidés et favorisés de puissans princes; nos roys qui, perdant la France, perdent tout, et ne la peuvent mieulx perdre que quand ils la jouent contre la France mesmes; le roy d'Espaigne, au contraire, qui, perdant Hollande et Zeelande, ne perdoit pas ung ongle du petit doigt, ung poil, s'il fault ainsi dire, de sa teste. Et qu'a il enfin gaigné par ses efforts? Au commencement, ils n'avoient que Flessingue, village pour tout plongé dedans les eaux; Flessingue s'est espandeu en face du duc d'Albe en Hollande, en Zeelande; Hollande et Zeelande ont attiré à leur parti les dix sept provinces du pays, dont à peine faisoient ils, comme j'ai dict, une dixiesme. Et n'en sçachent gré les Espaignols à leur industrie ou à leur force; qu'ils en scachent gré à nos folies, à nostre jour Sainct Antoine, non à leur devotion, ni à leur zele. Car aujourd'hui, sans cela, le roy d'Espaigne en seroit hors; et encores retiennent ils, quelques secousses qu'ils ayent endurees, la Frise, le pays d'Utrecht, et partie du Brabant, de Gueldres et de Flandres; et ont reduict en telle necessité Anvers et Gand, les conquestes du prince de Parme, qu'il sera contrainct de les leur rendre au premier jour, s'il ne veult laisser mourir de faim tout le pays.

Pages 118 et 119. Il nous est, dict il, aussi licite d'employer les Espaignols pour nous, qu'aulx aultres les Anglois. Donnons qu'ainsi soit. Mais voyons donc qui premier l'a faict, qui premier a introduict les estrangers. Car il est certain que, qui premier l'a faict,

a mis en necessité l'aultre parti de faire le semblable; et pourtant en doibt porter la coulpe, à la decharge et justification de celui qu'il a reduict en ceste extremité. En nos premiers troubles, desquels ceulx de Guise sont partout recogneus pour aucteurs, qui ne scal que les Suisses, les Italiens, les Espaignols estoient premier arrivés, avoient premier combatteu en France que feu M. d'Andelot n'allast chercher secours en Allemaigne, ou le vidame de Chartres en Angleterre? L seconds aussi, que les Suisses estoient à Chasten-Thierry deux mois premier que les armes se prissent? les Bourguignons et Vallons du comte d'Aremberghen Picardie, les Italiens conduicts par M. de Nevers et Auxerrois, premier que les Reystres du duc Cazimir en trassent en France? Es troisiesmes, que le marquis Philippes de Bade et les landgraves du second ma riage estoient premier joincts avec M. d'Aumale, que k feu duc des Deux-Ponts ne feust sur la frontiere? Et. quant à ces remuemens derniers, sçait on pas que la Reystres et Suisses de la Ligue ont pareu des le conmencement en la Champaigne? que, sans la paix de juillet, le comte Charles de Mansfeld leur amenoit de Espaignols et Bourguignons? Et qui trouvera estrange, quand ung estranger (car tels sont ceulx de Guise) 08 si avant que d'introduire l'estranger en France pour chasser le domestique, qu'ung prince du sang, un ensant de la maison, et le premier, s'aide de tous # amis, tant dedans que dehors, pour repousser lo efforts de l'estranger? Ici donc y a deux difference trop notables; ceulx de Guise assaillent sans occasion le roy de Navarre et ceulx de son parti. Il n'y a riens privilegié, si naturel que se desendre. Ceulx de Guise. seigneurs estrangers, introduisent l'estranger contre !

domestique. A qui doibt il estre donc estrange que le domestique, ains disons, que l'enfant de la praison, le premier prince du sang de France, s'arme contre cest estranger, se rempare et s'accompagne et d'estrangers et de domestiques, pour se garantir de leurs efforts, pour garantir, qui plus est, en sa personne, le roy, ses bons serviteurs et son royaume? Adjoustés que le roy de Navarre s'est addressé proprement à cenix aulxquels le roy mesmes s'estoit plainct de la conspiration de ceulx de Guise; je vous dis la royne d'Angleterre, le roy de Dannemark, les princes du sainct empire, messieurs de Suisse et des Grisons; à ceulx, dis je, qui, par ses propres depesches, estoient instruicts de sa volonté, de l'estat de ses affaires; à ceulx qui là dessus lui avoient offert et accordé secours contre la Ligue, lesquels, à mesme fin et intention, le conținuent et l'ont continué à l'instance du roy de Navarre, voyans tous evidemment que le roy, sans doubte, avoit esté ou surpris ou forcé, veu que trois sepmaines seulement auparavant ils l'avoient veu detester ceulx de la Ligue, condamner leur conspiration, protester de leur rebellion, les preparer, et tous les amis et alliés de sa couronne, pour l'assister contre leurs pernitieuses entreprises; et l'auroient veu tout à coup, par ung changement inopiné (prince toutesfois ferme en ses actions), armé contre ceulx qu'il voulloit conserver, et qui l'avoient tres fidelement servi contre ses ennemis, armant, qui plus est, et de ses propres armes, ceulx qui avoient conjuré sa mort et sa ruyne; ceulx à la punition desquels peu auparavant il convioit tous ses bons serviteurs, tout ce qu'il avoit d'amis et d'alliés hors du royaume.

Et notés que, contre ceulx de Guise, le roy ne de-

mandoit pas des secours au roy d'Espaigne. Car il sçavoit bien qu'ils avoient eu de son argent pour faire tomber l'orage sur la France, qu'il voyoit tout prest de fondre sur ses Pays Bas. Il sçavoit qu'ils avoient contracté avec le duc de Parme de racheter la prosperité de ses affaires par l'adversité et misere des nostres. Il sçavoit que, pour asseurance du traicté, ils avoient promis de lui livrer Marseille entre les mains, la clef d'une de nos principales portes, de la porte que, sur toutes aultres, l'empereur Charles, son pere, convoitoit pour la proximité d'Espaigne et d'Italie, pour la commodité de la mer, etc. Et, à faulte d'y avoir peu satisfaire, il n'a pas continué de mesme affection à fournir ses moyens.

Page 121. Il se fasche que le roy de Navarre ait escrit à messieurs du clergé, de la noblesse, du tiers estat, à messieurs de la ville de Paris semblablement; qu'il les ait tous advertis de leurs desseings, de repaistre le clergé d'hypocrisie, la noblesse de vaine esperance, le tiers estat de paroles de soulagement; qu'il ait dict à messieurs du clergé, et de bonne heure, qu'ils seroient las et recreus de tirer à la bourse premier que de voir aulcung progres en leurs pretentions; à messieurs de la noblesse, que leur sang ne seroit employé que pour exterminer le sang de France, et par gens qui n'auroient pas besoing de l'espargner, parce qu'estant estrangers, ils n'en sentent pas la diminution, et ne craignent la saignee au bras d'aultrui; à messieurs du tiers estat aussi, à ce povre peuple qu paye tout, que ceulx de la Ligue ne contractoient que pour les y engager, ils bailloient bien les arrhes, mais que ce seroit à eulx à fournir au marché; que nouvelles guerres lui apporteroient nouveaulx imposts; et à mes-

sieurs de Paris pareillement, l'abbregé des trois estats de France, la lumiere et le miroir de ce royaume, qu'à eulx proprement appartenoit d'y bien penser pour tous, qui avoient tant d'yeulx, tant d'oreilles, tant de bonnes testes; que, sans doubte, ceste guerre estoit une entreprise vaine, et que feust elle seulement vaine! ains pernitieuse, ains calamiteuse, miserable, ruyneuse à cest estat. Et qu'a il donc dict qui ne soit vrai, que nous ne voyions, que nous ne sentions, qui jà ne nous fasse souspirer au profond de nos cœurs, qui ne nousfasse desjà crier à Dieu pour nous y donner quelque soulagement? La Ligue, pour s'assouvir, aura exercé des cruautés; voici maintenant de grandes forces qui viennent; qu'en pouvons nous mais pour la pluspart? Et qui pourra toutesfois discerner nos volontés? Elle a rasé les maisons, elle a bruslé les villes entieres. Maintenant elle se cachera, elle cherchera de se mettre à couvert. Qui nous garantira de pareil esclandre? Tant de maisons, villages et villes qui ne peuvent pas soubstenir un effort; les meilleures mesmes, s'elles viennent, à estre surprises, veu que ceulx qui trempent en la Ligue, semblent tremper en ses cruautés.

Je ne vois certes aultre moyen, sinon que tous unanimement nous detestions la Ligue; protestions de n'y voulloir participer en façon que ce soit; recourions au roy, le suppliant tres humblement de detourner tant de calamités, de divertir les orages que ceste Ligue a esmeus et attirés sur ce royaume; surtout que nous nous convertissions à Dieu de cœur et d'ame; le prions par ses sainctes misericordes au nom de nostre Seigneur, auquel elle appartient, de consolider la chrestienté, de reunir l'Eglise, et particulierement de nous donner à tous ung vrai zele de sa maison, pour la tenir et desirer nette, et repurgee de toute corruption et de tous abus; ung esprit de charité pour supporter cependant les ungs les aultres, pour vivre paisiblement ensemble comme citoyens d'une mesme patrie, enfans de mesme famille, membres dependans d'ung mesme chef, et faisans mesme corps; c'est l'Eglise de nostre Seigneur, auquel soit gloire partout, et à tousjours. Amen.

Monsieur, vous avés enfin plus peult estre que vous ne vouliés, ni moi aussi, au lieu d'une lettre ung livre entier. Les absurdités et les mensonges de cest homme ont faict cela. Et pensés que c'eust esté, si je me feusse arresté à ses injures, à ses declamations et invectives. Si vous jugés que ce mien escrit soit utile au public, je le permets à vostre discretion. Je ne crains poinct d'y estre nommé; car je serai tousjours prest de m'inscrire en faulx contre l'aucteur et contre ses mensonges; de justifier aussi aulx despens de ma vie, la verité de tout ce que j'ai dit. Voyés au reste, monsieur, si en aultre chose je vous puis faire service, et me commandés, comme à vostre bien humble et entier ami et serviteur.

LXXXIV. — RESPONSE

A ung petit discours sur le voyage de M. de Mayenne en Guyenne.

Du 22 decembre 1586.

Discours. Encores que la valeur et sainctes intentions de M. le duc de Mayenne soyent cogneues d'ung chacung, et que les ennemis mesmes n'en peuvent doubter, si est ce que pour empescher les calomnies de ceulx qui interpretent toutes choses selon leur passion, et qui se veullent prevaloir des defaults provenans d'ailleurs, au prejudice de son honneur et reputation des affaires du roy, il est necessaire de representer succinctement ce qui s'est

passé jusques ici en l'armee de Guyenne; en quoi les bons catholiques recognoistront que c'est ung œuvre procedé de la seule bonté de Dieu, de ce qu'il a faict exploiter, et s'est si longuement mainteneu, ayant esgard au peu de moyens qui lui ont esté baillés et aulx grandes difficultés, contraventions et empeschemens qu'il lui a falleu vaincre et surmonter, lesquelles lui ont donné plus de peine et de travail que toutes les factions de guerre.

Chacung sçait que ceulx qui favorisent le roy de Navarre et les eatholiques politiques de France, trouverent moyen, par leurs conseils et artifices, de leur faire donner temps et loisir de pourvoir à leurs affaires, et de s'armer et fortifier; qu'ils empescherent que les forces catholiques, qui estoient toutes prestes, ne feussent employees pour les assaillir avant qu'ils eussent le loisir de se recognoistre; et qu'ils feirent encores commettre la pluspart des grades et principales charges de l'armee à des personnes peu experimentees et aguerries, et qui-estoient entierement à leur-devotion, avec tant d'auctorité qu'il ne se pouvoit rien entre-prendre que par leur intervention et assistance.

M. de Mayenne partit en cest esquipage sur le mois de novembre, n'ayant peu estre plustost depesché pour traverser presque toute la longueur du royaume de France par les pires chemins, et en la pire saison de l'annee.

Response. La preface de M. de Mayenne faict penser qu'en sa conscience il n'a pas faict grand chose, puisqu'il est en peine de s'en excuser envers le monde. Et est à presupposer qu'il n'a pas faict ce discours pour estre leu en Guyenne; car il y grossit les villages en villes, les bicoques en places imprenables; et nous faict miracles de choses moins qu'ordinaires. La vraie magnanimité, la vraie grandeur de courage, c'est de ne trouver rien grand de ce qu'on faict; c'est de voir tout ce qu'on faict plus bas que son courage. Le vrai signe de pusillanimité, c'est de trouver tout grand, de s'enorqueillir et s'enfler de peu; car il est certain que ce qui nous grossit doit estre en quelque façon plus que nostre courage.

Discours. Il se resoleut de combattre en passant le prince de Condé, qui estoit veneu pour secourir le chasteau d'Angers, lequel, le voyant approcher, entra en tel effroi, qu'il se meit, et toutes ses forces, en une honteuse route.

Response. Voyons les victoires de M. de Mayenne. Il nous cotte d'avoir, en chemin faisant, voulleu combattre monseigneur le prince. L'histoire est cogneue. Monseigneur le prince se trouvant engagé delà Loire, toutes les forces de France vinrent tout à coup fondre sur lui; dont il feut contrainct de departir ses troupes. Ce feut ung malheur à lui d'avoir esté trompé, pensant pouvoir repasser à Rochefort sur Loire. Ce lui feut ung heur, apres tel inconvenient, de s'en estre demeslé avec si peu de perte. D'honneur, je ne sçache poinct qu'on y en ait acquis, où l'honneur est à tres bon marché en ce temps ci. Et quand il y en auroit, M. de Mayenne en auroit le moins, car la moindre force qui y feust, estoit la sienne.

Discours. Depuis, estant joinct avec M. le mareschal de Matignon, qui avoit la charge de l'advantgarde, et qui menoit une grande partie des forces dont l'armee estoit composee, il delibera d'assieger Pons, à quoi il ne le sceut jamais faire condescendre; et d'autant que le roy l'avoit asseuré, à son partement de Paris, qu'il trouveroit audict sieur mareschal toute resolution, conseil et assistance, tant pour son experience et pouvoir qu'il avoit au pays, que pour ce que sa majesté se promettoit qu'il auroit donné ordre aulx magazins des vivres et aultres necessités pour l'armee, suivant ce qui lui en avoit esté mandé; il feut en une extreme peine lorsque, voullant deliberer avec lui des endroicts où il estoit plus necessaire d'employer ceste armee, il n'en sceut rien tirer qu'une infinité d'irresolutions pleines de difficultés sur tout ce qu'on lui proposoit, et d'impossibilités de pouvoir conduire et faire vivre l'armee en son gouvernement, où il dict qu'il ne lui pouvoit rien offrir que la peste et famine. Ce qui meit mondict sieur de Mayenne en tres grand doubte et perplexité, voyant les

SUR LE VOYAGE DE M. DE MAYENNE. 389 choses si alienees, des promesses qu'on lui avoit faictes et de l'estime, conduite et prevoyance dudict sieur mareschal. Lequel finalement feut d'advis, apres plusieurs et diverses opinions, et la perte de beaucoup de temps, de separer les forces et l'equipage de l'armee en deux pour les faire vivre, dont M. de Mayenne en conduisoit une partie vers la riviere de Garonne, par le Perigord, Limousin et Querci, et lui l'aultre partie par la Xaintonge et Bordelois; et qu'elles viendroient joindre sur le printemps, assiegeant cependant les places des heretiques estans sur le chemin.

Response. Au moins se pouvoit il prevaloir de l'inconvenient de monseigneur le prince, attaquant les villes de Xaintonge desnuees de sa presence et affligees de peste. Et maintenant il nous veult payer d'excuse. Remis à M. le mareschal de Matignon à respondre sur cest article. Tant y a que Taillebourg feut secoureu par M. de Laval, en la face de son armee, et ce qui estoit dedans le bourg, taillé en pieces. Tant y a aussi que M. le mareschal de Matignon, qu'il taxe, y feut le premier à attaquer Castets; et fault bien que son honneur soit foible, je dis celui qu'il pretend avoir acquis en ceste guerre, puisqu'il est contrainct de l'appuyer sur le blasme d'aultrui.

Discours. Cest advis feut resoleu, parce que l'on n'en sceut jamais trouver d'aultre où il se voulleust accorder; et, suivant icelui, mondict sieur de Mayenne prit son chemin tirant en Limozin. Ce qui contraignit les heretiques de quitter la ville de Thulle, dont Lamori, gouverneur d'icelle, feut tué, ayant dressé une embuscade au sieur Sacremore de Birague, qui, l'ayant descouverte, le desfeit, et meit en route.

Response. La verité est que M. de Turenne prit la ville de Thulle en Limozin; et, parce qu'elle n'estoit tenable, y laissa vivre ses troupes si long temps qu'il peut. Quant à la Maurie, il avoit dressé une embuscade aulx

Albanois, et sortit lui mesmes pour les attirer; et, de faict, ils le suivirent la lance dans les reins, jusques au lieu. Son malheur voulleut que ceulx de l'embuscade faisant une salve aulx Albanois (dont quelques uns tomberent), le tirerent pesle mesle avec eulx. Nul aultre que lui n'en receut mal. Et cependant, si vous les croyés, c'est un regiment taillé en pieces.

Discours. Mondict sieur de Mayenne assiegea et prit Montignac le Comte, Beaulieu, et ung chasteau au vicomté de Turenne nommé Gaignac, et seut bruslé, et ceulx de dedans passés au sil de l'espee. Il conduit et mena son armée sur la riviere de Garonne, passant par les pays dessusdicts, où elle pastit extremement, ayant des quatre elemens à combattre les trois; la terre, pour les mauvais chemins; l'eau, pour le passage de plusieurs rivieres; et l'air, pour les grandes neiges et gelees de cest hyver, qui estoient des ennemis assés suffisans pour destruire une plus grande armée que la sienne, sans la prevoyance et sage conduite dont il usa, par le moyen de laquelle elle seut conservee en son entier.

Response. Montignac, dont il faiet gloire ici, c'est Montignac le Comte, maison du roy de Navarre, en Perigord. M. le mareschal de Byron, qui la cognoist, en oyant vanter la nouvelle à la court, pensoit que ce feust quelque aultre Montignac. Et enfin, quand on lui dict que c'estoit ce Montignac qui estoit pris, demanda, par grand'merveille, s'il avoit teneu. Quant à Beaulieu, il debvoit dire que, peu de jours apres, il feut repris par ceulx de la relligion, qui le tiennent encores, et la garnison qu'il y avoit logee, taillee en pieces. De Gaignac, c'est ung pauvre chasteau, dont à peine pouvoit on trouver qui montrast le chemin dans le pays, et qui toutesfois attendit son armee, et sousteint ung assault. Et la nuict, celui qui commandoit, nommé Talmesch, se retira sans perte que d'ung homme, qu'il

SUR LE VOYAGE DE M. DE MAYENNE. 391 laissa blessé dedans. Puisqu'il prend tant de plaisir à dire que c'estoit une maison de M. de Turenne, que doncques n'attaquoit il Montfort, Turenne ou Sainct Seré, qui toutes lui appartiennent, et toutes venoient sur son chemin?

Voyés quels miracles! Il a combatteu les elemens; c'est à dire, à parler simplement, il a passé la riviere de Dordongne, et sans contrast; il a rencontré quelques chemins fangeux, il a eu froid au bout des ongles. Que nous diroient ces gens, s'ils avoient forcé les pas des Alpes en hyver, ou combatteu les passages des fortes rivieres; s'il leur falloit, comme aulx povres huguenots, trouver des guais au plus fort des eaulx; traverser toute la France sans faveur; quand tout à loisir, et à leur aise, favorisés de tous lieux, et incommodés de nul, ils alleguent pour merveille de passer une riviere en ung bateau? Mais il debvoit avoir dict, et il le cele, qu'ayans sejourné environ trois sepmaines en Querci, au milieu de quattre places qui tenoient contre la Ligue, il n'en osa attaquer aulcune, quelque requisition et offre que feist le pays pour l'y induire. En quoi il se voit que ce grand capitaine n'y vainquit pas, comme il dit, tous ces trois elemens; plustost qu'il se pouvoit dire, à meilleur droict, que les fanges et les neiges auroient morfondeu ceste grande magnanimité, et gelé en bourre ses victoires.

Discours. Estant à Villeneuve d'Agenois, il feut adverti que le roy de Navarre devoit partir de Pau, distant de quarante lieues ou environ, pour passer la riviere de Garonne, ne se trouvant asseuré es villes qu'il avoit de delà. A ceste occasion il monta à cheval, et feit douze grandes lieues de Gascongne tout d'une traicte, mesurant le temps si à propos, et ordonnant ses forces avec une telle prevoyance, que si ledict roy de Navarre n'en eust esté adverti promptement, et qu'il se feust arresté la nuict pour coucher à Caumont, ou qu'il eust pris son chemin par Nerac, et passé la riviere à Tonneins, ainsi qu'il avoit accoustumé, il l'eust, sans aulcun doubte, investi et pris audict passage; et encores qu'il feist de sa part une extreme diligence pour fuir 'et eviter ce danger, si ne le faillit il que de deux ou trois heures seulement. Avant que de retourner à Villeneuve d'Agenois, il feit tailler en pieces les troupes qui estoient sorties de Caumont et de Clerac, pour favoriser le roy de Navarre en son passage; ce qui donna telle frayeur à Parabere, qui commandoit à Damazan et au Maz d'Agenois, où ils tenoient ung regiment en garnison, qu'il les quitta. Comme feit le capitaine Lestelle, la haulte et basse ville, et le chasteau de Tonneins; et Melon, l'ung de leurs maistres de camp, la ville de Meillan.

Response. Le roy de Navarre, ayant donné ordre à la Gascongne, tant s'en fault qu'il se veuille cacher, passe à Bergerac, à la teste de son parti. M. de Mayenne se vante qu'il l'eust attrapé, s'il eust pris son chemin par Nerac et Tonneins, ou s'il eust sejourné à Caumont; si passa il à Nerac, chacung le sçait. Mais quelles enfances, je vous prye, que d'ung lieu à l'aultre on soit teneu de tenir tousjours mesme chemin? Et n'est ce pas ung faict de capitaine, ayant à passer entre deux grandes rivieres, proches de quatre lieues, sçavoir prendre temps à propos pour son desseing?

Car, quant au mot de fuir, duquel il use ici, si ung dementi servoit de rien apres ung aultre, il seroit bien employé en cest endroict. Mais l'empereur Charles, quand on le voulleut surprendre en la ville d'Inspruch, se sceut bien retirer à Villac, et en grande diligence; et ne feut poinct dict pourtant qu'il eust fui. Et moins certes le roy de Navarre, qui se loge à Bergerac, à quattre lieues de lui, qui attend deux mois sans en partir, ce qu'il pensera faire; qui passe de là à La Rochelle,

SUR LE VOYAGE DE M. DE MAYENNE. 393 à la teste des forces, où il a à soubstenir une armée de terre et une armée de mer.

Et que, pour le regard des beaux exploits qu'il feit en ce voyage, la verité est que quinze ou seize arquebusiers feurent taillés en pieces. Pour telle victoire, on n'accorda jamais triomphe à Rome. Mais il debvoit avoir dict que le sieur de Bethune, gouverneur de Monflanquin, lui defeit en ce temps une compagnie de gensdarmes entiere; que ceulx de Clerac, en moins d'une sepmaine, lui taillerent en pieces dix huict corps de garde. Et qui vouldroit, comme ce grand capitaine, faire cas de ces petites choses, il n'y a endroict de Guyenne qui n'en presentast assez à dire.

De mesme nature sont les conquestes qu'il dict du Maz d'Agenois, Damazan, Tonneins, Meillan, etc., et fault dire qu'il est malicieux ou mauvais capitaine. Car on sçait qu'il y a deux sortes de places; les unes qui peuvent soubstenir les efforts d'une armee, les aultres non. Celles là, on les debat jusqu'à l'extremité, ce que M. de Mayenne a tres bien experimenté: celles ci, et de ceste espece sont celles qu'il nomme, on les garde pour faire vivre les trouppes, et pour estre au large si long temps qu'on peult, resoleu de les quitter à la venue d'une grande force. Et, de faict, le Maz et Damazan sont deux villettes qui ne valent pas Touri en Beausse. Et la royne de Navarre ayant faict prendre Tonneins par ses gardes, le roy de Navarre les y força le mesme jour à coups de main. Et Meillan, qu'il dict ici, a esté depuis repris sans peine par le sieur de Vivans, qui le tient aujourd'hui. Mais pensons certainement qu'ils ont bien peur des villes, puisqu'ils font mine de ces villages.

Discours. Apres, voyant que M. le mareschal de Matignon

n'avoit encores attaqué aulcune place, et qu'il s'excusoit de le pouvoir faire, il s'advança pour lui donner moyen, par l'approche de ses forces, d'entreprendre sans crainte le siege de Castets, qui estoit une place sur la riviere de Garonne, fortifiet de longue main, laquelle, pour gaigner temps, mondict sieur de Mayenne receut à composition, suivant laquelle elle feut rasee et desmolie. Assiegea, incontinent apres, la ville de Saince Bazeille sur ladicte riviere, qui estoit environnee de grands esperons, cazemates et boulevards hors l'enceinte de la muraille. et en tres belle assiette; laquelle il prit, et feit raser et desmolir. Et d'autant que les soldats françois commencerent à se desbander, et les Suisses et Reystres à demander congé, à faulte de payement, il emprunta et feit emprunter de l'argent de tous costés pour les contenter, ne voullant, pour une si bonne occasion, espargner ses moyens non plus que sa vie, qu'il exposoit ordinairement en toutes sortes de perils et hazards qui se presentoient.

Il depescha lors vers le roy le sieur de Saisseval, pour lui remonstrer et faire particulierement entendre la necessité en quoi ceste armée estoit reduicte de toutes choses, et supplier tres humblement sa majesté que son bon plaisir feust d'y voulloir pourvoir promptement. Et, à l'instance et poursuite de M. le mareschal de Matignon, de la court de parlement et des habitans de Bordeaux, il assiegea et prit Montsegur, que les heretiques tenoient pour ville de seureté et des plus fortes qu'ils occupassent, tant à l'occasion de son assiette, qui est en pente et precipice de tous costés, et pour estre de muraille eslevee dessus le roc, et bien flanquee de boulevards et esperons.

Response. Castets estoit la maison du sieur de Favas, que M. le mareschal de Matignon assiegea, premier que M. de Mayenne feust en Bordelois; bien est il que M. de Mayenne, pour en derober l'honneur, traicta secrette ment avec ledict sieur de Favas, qui en estoit dehors, par l'entremise de Sacremore; et lui promit doure mille escus pour se la faire rendre. Ce que feit ledict sieur de Favas, soubs sa promesse, lequel toutesfois n'en a touché ung seul denier.

La royne, mieulx que personne, se peult soubvenir quelle est Saincte Bazeille; car elle y passa, s'en venant à Nerac; et est tres certain que le roy de Navarre, sur les premiers bruicts de ceste redoutable armee, s'estoit resoleu de la demanteler. Montsegur aussi, qu'il nous descrit ici comme le fort de la Goulette; tant qu'il veit que le peu d'effect de ceste armee, qui ne voloit que pour alouette, avoit asseuré toutes les places jusques aulx moindres; tellement qu'il ne lui feut plus possible de leur faire croire qu'ils deussent ceder à sa furie. Mais M. de Mayenne cele ici que, contre la foi promise, il laissa, ou feit tuer à Montsegur, deux ou trois cens soldats. Peult estre que violer sa foi lui semble peu de chose.

Discours. Le roy de Navarre, voyant qu'en si peu de temps on lui avoit pris trois villes, qu'il pensoit debvoir arrester ceste armée tout court, se retira à La Rochelle à grand presse, ne se trouvant assés asseuré aulx places de Guyenne; et, quelques jours devant, les heretiques qui tenoient Castelmoron, le quitterent.

Response. Castelmoron est ung bourg appartenant au roy de Navarre, à cause de sa duché d'Albret, qui a esté bannier à toutes les armees. Il fault bien, puis qu'il l'allegue ici, qu'il se sente vuide de meilleurs exploicts; car il tient encores aujourd'hui, aussi aisé des le lendemain à recouvrer, qu'il a esté à perdre.

Discours. Alors, estant mondict sieur de Mayenne tombé malade, plusieurs se departirent de l'armee, mesmes des maistres de camp et capitaines, creés par le colonnel de l'infanterie françoise, qui l'allerent trouver, suivis de l'eslite de leurs hommes; et y en eut qui laisserent leur regiment sans aulcung capitaine en chef. Les Suisses voulleurent, par plusieurs fois, battre aulx champs pour s'en aller; mais leurs colonnels estant veneus vers mondict sieur de Mayenne, malade à l'extremité, pour prendre congé de lui, il eut le pouvoir de les retenir pour ce coup, non toutesfois sans beaucoup de pryeres et de difficultés. Response. M. d'Espernon satisfera sur cest article comme aussi sur ce qu'il auroit dict auparavant, qu'il les principales charges de l'armee auroient esté donnée expressement à personnes peu experimentees et aguerries, c'est à dire, comme lui mesmes s'explique, per devotieuses à l'entreprise de la Ligue.

Que feroient ces gens, s'ils avoient à faire marchet les Reystres sans argent, et à les entretenir ung an entier sans en toucher, et apres deux batailles perdeues comme ont faict les povres huguenots? Ces gens ne sçavent rien faire qu'à graisse d'argent et de moyens. Tout le sang du peuple, toute la substance du clerge de ce royaume, tout le patrimoine de Sainct Pierre, et les Indes d'Orient et d'Occident, ne leur suffisent pas pour faire tant soit peu. Il n'y a rien que de l'homme en leurs affaires: et de l'homme, certes moins qu'homme. En ceulx qui d'ung rien, à proprement parler, font ce qu'ils font; qui, à tous ces grands moyens, n'ont presque rien qu'ils puissent apposer, se monstre le doigt de Dieu evidemment, qui de rien a toutes choses faictes; qui, par ung rien, à moins de rien, les defaict aussi quand il lui plaist.

Discours. Au mesme temps les nouvelles veinrent à mondit sieur de Mayenne que le mareschal de Byron avoit une armet pour la Xaintonge, M. le mareschal de Joyeuse pour le Languedoc, M. de Joyeuse, son fils, pour l'Auvergne, M. d'Espernon pour la Provence, et que le commandeur de la Chaste dressoit une grande armee de mer en Bretaigne; ce qui desbauche plusieurs de nos soldats, esperans d'estre mieulx traictés et payér en quelques unes de ces armees qu'en celle ci, dont la necessite augmentoit tous les jours.

Neantmoins, mondict sieur de Mayenne, incontinent apres sa convalescence, ayant receu commandement du roy d'assieger Castillon, s'achemina avec si peu de forces qui lui restoient. Ci

TW.

que sçachans les heretiques, qui n'ont jamais manqué de bons advertissemens, esperans que ceste place, qui est tres forte d'assiette et d'artifice, borneroit le cours de sa victoire, ils n'oublierent aulcune chose de ce qui estoit necessaire pour le bien pourvoir et munir, et meirent dedans, oultre les habitans aguerris de longue main, de mille à onze cens soldats, choisis par toutes les garnisons, et aulx gardes du roy de Navarre et du vicomte de Turenne, commandés par les maistres de camp, capitaines et aultres qui avoient entre eulx le plus d'estime et de reputation. La ville estant assiegee, Bethune, gouverneur de Montslanquin, feut rencontré et taillé en pieces par quelques trouppes de cavallerie de l'armee, allant à la guerre vers Saincte Foi, avec le sieur de Maligni, fils de Beauvais la Nocle, Pille, ung nepveu de M. le vicomte de Turenne, et quelques gentilshommes qui demeurerent sur la place. Ledict vicomte de Turenne, pour favoriser et secourir les assiegés, s'en veint à Saincte Foi, distant de trois lieues dudict Castillon, où il assembla, pour cest effect, toutes les forces heretiques de Guyenne, avec lesquelles il s'advança jusques à Montraveau et Gensac, qui sont deux forts occupés par les heretiques, distans chacung de Castillon d'une lieue seulement; où, apres avoir faict ung long sejour, il resoleut de donner une nuict à l'impourveue au quartier de M. de Mayenne, avec sa cavallerie et deux mille arquebusiers, et de faire attaquer au mesme temps, avec le surplus de ses trouppes, ce qui estoit de celles de l'armee au delà du pont à bateaux, dressé sur la riviere de Dordogne; mais, estant sur ces termes, il y recogneut toutes choses disposees avec ung tel ordre et prevoyance, qu'il jugea ne pouvoir rien entreprendre qu'à son desadvantage; et s'il n'eust eu ses retraictes bien proches, et en pays fort advantageux, il couroit le danger d'une honteuse route et defaicte; car l'effroi se meit parmi ses gens aussitost qu'ils ouïrent le son des trompettes et tambours, qui donnerent l'allarme en l'armee, laquelle feut i noontinent mise en ordre de bataille, encores que la nuict feust fort sombre et obscure, et y demeura jusques au poinct du jour.

Response. Castillon est une ville sur Dordongne, appartenante à M. de Mayenne, par sa femme. Tous ceulx qui l'ont veue, sçavent qu'elle est commandee de telle sorte. que, dans la pluspart des esperons, on voyoit les hommes jusques au pied. Bien est il que M. de Turenne us d'ung grand soing pour la munir. Et de faict, depuis k siege clos, il y feit entrer deux cens arquebusiers a despit de l'armee. Mais il debvoit dire que le siege de ce meschant lieu qu'Oronce et Postel ne cogneurent ja mais, couste à ce royaume ung million, et lui a dissipe son armee; et que, sans la peste qui les affligeoit de dans extremement, il estoit taillé de ne l'emporte poinct. Là, il a cogneu la resolution des huguenots qui lui feirent, tirer soixante coups de canon contre un simple baricade, et en a esté si rebuté, que, nonobstant que M. de Guise le pryast tres instamment d'assieger Roian, ou Pons, ou Taillebourg, pour continuer la armes en ses mains, il se resoleut de quitter tout, et de s'en retourner en France. Mesmes receut ceste honte avant son partement, que le village de Montravel, à demi lieue de Castillon, se fortifia tellement à sa barbe. qu'apres la prise de Castillon, l'ayant envoyé sommer. on lui respondit arquebusades, et ne l'osa attaquer. comme par la sommation il estoit obligé. Il se perdit à Castillon environ quatre cens soldats et quelques gen tilshommes, la pluspart de peste; mais il s'y est faid autant de capitaines, qu'il en est rechappé de soldats

La verité est que le sieur de Bethune, allant à la guerre avec quarante chevaulx, fut rencontré d'une plus forte trouppe, et feurent tués lui et le sieur de Luri, fils puisné du sieur de Beauvais la Nocle; deux de trois blessés; aultres ne moururent qu'eulx en ceste charge. Et ne debvoit pas celer qu'il y eust coup foure car Charles de Birague et Grimaldi feurent pris, et quelques ungs tués.

Discours. Durant ce siege le sieur de Saisseval reveint de la court, qui donna esperance, de la part de sa majesté, d'ung prompt secours, et n'apporta lors, pour subvenir aulx necessités de l'armee, que pour trente mille escus de lettres de change, lesquelles se trouverent si mal addressees, qu'il ne s'en peut tirer ung seul denier; ce qui en cuida causer l'entiere perte et ruyne.

Les assieges se voyans pressés, et desesperés de tout secours, apres avoir perdeu de mille à onze cens hommes, veinrent à parler de composition, où mondict sieur de Mayenne feit tres grande difficulté d'entendre. Mais, voyant qu'il se traictoit une suspension d'armes, attendant la resolution de la paix, et qu'il ne les pouvoit forcer sans grande perte des siens et du temps qu'il craignoit lui faillir, et principalement pour retirer quelques gentilshommes deteneus prisonniers à Sainct Jean d'Angeli et à Bergerac, qui estoient si mal traictés, et tellement recommandés aulx heretiques, qu'ils ne les avoient jamais voulleu mettre à rançon, ni relascher par aulcung aultre moyen, il les receut enfin à composition, neantmoins si desadvantageuse pour eulx, qu'il ne s'en est jamais veu de semblable. Suivant icelle, ils sortirent dudict Castillon deux cens trente soldats avec le baston blanc en la main, et les principaulx, comme le baron de Savignac, Alain, Couronneau, et quelques aultres capitaines et gentilshommes, jusques au nombre de treize, restans en vie de souxante qui s'y estoient enfermés, menés prisonniers aulx chasteaux de Bordeaux et à Blaie, pour estre rendeus au lieu des susdicts catholiques. La ville feut donnee au pillage des soldats, et le proces extraordinairement faict à tous les habitans, suivant les edicts du roy, lesquels feurent pendeus incontinent apres.

Response. En ceci s'est monstree l'animosité du sieur de Mayenne contre les povres habitans; et est à considerer, la chance estant preste à se tourner, comme on le voit, que c'est ung dangereux prejugé contre les catholiques, qui pourroient tomber en mesmes inconveniens, si le bon naturel du roy de Navarre ne combattoit opiniastrement la cruauté et malice de ses ennemis.

Discours. La reddition de ceste place est d'autant plus estimable, qu'il ne leur restoit que celle là dans tout le pays de Bourdelois; que le roy n'avoit aultre asseuré passage sur la riviere de Dordogne; que c'est la plus difficile et incommode assiette de ville pour ung siege qui se puisse trouver; que les heretiques y ont voulleu monstrer tout leur plus grand effort; qu'elle a esté aussi bravement assaillie et defendeue, et qu'il s'y est remué autant de terre, dressé autant de divers forts, cavalliers, mines et retranchemens qu'en nul aultre siege de ville qui se soit faict il y a long temps.

Response. Bourdeaux n'en est pas plus à son aise pour cela, qui s'attendoit de voir la Garonne et le commerce libre, selon les promesses de M. de Mayenne; et les voit plus empeschés que paravant, mesmes par la prise de Roian. Et pour le passage de Dordogne, Bergerac eust esté bien plus à propos pour la commodité du pont; mais il a tousjours gauchi les bonnes places.

Discours. Apres la prise d'icelle l'on ne peut plus retenir les soldats faulte de payement, ni les maistres de camp mesmes, qui disoient presque tout hault estre mandés de leur colonnel; d'ailleurs il ne resta au pays des munitions d'artillerie que pour tirer deux cens coups de canon, et poinct de vivres et aultres choses necessaires à la continuation de la guerre; de sorte qu'il estoit du tout impossible de rien entreprendre; sur quoi le sieur de Saisseval feut derechef depesché vers le roy, pour lui en faire tres humble remonstrance et supplication d'y pourvoir promptement, ou trouver bon que mondict sieur de Mayenne l'allast trouver. Les Suisses envoyerent pareillement le commissaire, qui les conduisoit vers sa majesté pour demander congé et payement de ce qui leur estoit deu, sans voulloir promettre d'attendre son retour.

Nonobstant toutes ces adversités, l'on assiege Puinormant, appartenant au roy de Navarre, qui estoit la seule place occupet par les heretiques sur le grand chemin de Perigord et Limoges, laquelle feut prise et rasee.

Response. Quant à Puinormant, M. le mareschal de Matignon testifiera que c'estoit ung lieu qui ne faisoit dommage à personne, où les catholiques avoient toute liberté; aussi qui estoit es mains du capitaine Roux, catholique, lequel l'avoit tousjours gouverné au contentement dudict sieur mareschal, et tous les siens, venoit recevoir ses commandemens, mesmes dedans l'armee. Mais, contre le gré dudict sieur mareschal, en vengeance du roy de Navarre, il le veint assieger; et, s'estant rendeu, comme de faict il n'estoit pas tenable, le feit desmolir entierement.

Discours. M. de Poiane est entré dans Tartas, et a mis au fil de l'espee trois compaignies de gens de pied, dont il a envoyé les enseignes à M. de Mayenne; lequel, estant adverti que les Suisses et les Reystres voulloient partir, a moyenné envers eulx, par ses pryeres et remonstrances, qu'ils lui ont promis d'attendre dix jours; et cependant a depesché ung courrier en toute diligence vers le roy pour l'en advertir.

Response. Tartas est une ville de la duché d'Albret, qui n'est poinct tenable qu'à la faveur du chasteau. M. de Poiane la surprit, et y tua quatre ou cinq hommes, et puis se retira. Tousjours selon la coustume, de grossir leurs moucherons en elephans. Combien nous seroit il plus seant d'alleguer la prise de Roian, la desfaicte de Lengus et de Beulac, et de quarante gentilshommes d'Armagnac; celle de la compagnie du sieur de Montluc dedans la ville d'Estafford; depuis, du sieur de Bonnivet à Villeneufve, de Panat en Rouergue, et plusieurs aultres; plusieurs forts aussi pris et batteus deçà delà en tous quartiers de Guyenne? Mais reservons leur de se glorifier de peu, et contentons nous de mesurer leur cœur à l'aune de leur gloire.

Discours. C'est l'estat où la necessité a reduict à present les affaires de ceste armee; à quoi si sa majesté ne pourvoit promptement, il ne s'en sçauroit plus rien esperer que l'entier desban-

dement; ne pouvant plus longuement le zele et la bonne volont du chef, et de quelques gens d'honneur qui l'assistent, supplet à tant de defaults; le moindre desquels seroit suffisant pour ruyner une armee.

Il y a tantost ung an qu'elle est sur pied, tousjours assiegeant et campant en pays d'ennemi, et mesmes en hyver, sans este rafraischie ni aultrement secoureue d'hommes, de vivres, de poudres, ni aultres munitions necessaires; la despense d'icelle montant par chacung mois, suivant l'estat dressé au conseil de sa majesté, la somme de huict vingts tant de mille escus, dont le receveur general du clergé delivra, lors qu partement de mondict sieur de Mayenne, six vingts mille escus, et, bientost apres, pareille somme, pour sournir tant à partie des frais des equipaiges, et attirails necessaires, qu'au payement des gens de guerre de la dicte armee, à qui il estoit deu, avant qu'elle veinst à joindre, de grandes sommes de deniers, et à la pluspart quattre ou cisq mois de paye. Depuis il n'a esté receu que soixante et quatre mille escus, sur lesquels il a falleu rendre les sommes emprunien pour les frais d'artillerie, achats de vivres et aultres despenses ordinaires et forcees. Partant il n'a esté receu, durant ledic temps, que trois cens quattre mille escus, au lieu de dix sept cens soixante mille escus, à quoi en revenoit le payement.

Neantmoins, avec si peu de moyens et de forces, tant de traverses et incommodités, practiques et intelligences dont les heretiques ont esté favorisés, il ne se pourra dire, avec verité, qu'ils ayent peu gaigner ung seul poinct d'advantage sur ceste armeten rencontre, assault, surprise, ni aultre exploiet qui se soit passé. Ils ont perdeu toutes les villes que l'on a assiegees, que les fortifications, boulevards, retranchemens et esperons qu'ils y avoient faiet faire depuis deux ans en ça, sans discontinuation n'ont peu garantir. Ils ont faiet perte de trois à quattre mille hommes des plus aguerris et signalés qu'ils eussent, et environ trente enseignes, dont la pluspart ont esté envoyees au roy.

Response. Messieurs du clergé se plaignent de M. de Mayenne, et M. de Mayenne reciproquement de messieurs du clergé. Tous deux, et trompés en leurs espoirs et trompeurs sans doubte en leurs promesses. Mais le

Discours. De sorte qu'ils sont des à present si esperdeus et estonnés, que, s'il plaist à sa majesté de donner les moyens de faire une prompte recharge, l'on les rangera à tel parti, qu'ils ne se pourront jamais relever pour lui faire la guerre.

Response. Pensés d'où peult estre cest estonnement,

quand ils voyent les armees dissipees, si ce n'est qu'ils s'esbahissent en eulx mesmes de se voir debout apres tant de menaces, de se voir en leur entier apres tant de menees. Jugés aussi, si es actions du roy de Navarre il s'en cognoist; quand il defend l'isle de Marans, ouverte en cent endroits contre une armee; quand on lui offre une tresve qu'il n'accepte poinct.

Et quant à ce qu'il promet ici merveilles, si sa majesté lui donne les moyens d'une prompte recharge; ce sont promesses d'ung alchimiste, qui, pour attraper argent nouveau, propose frais nouveaux. Tantost il aura teneu au feu ou trop aspre ou trop lent, tantost au charbon, tantost au verre. Tantost il fault operer sur nouvelle matiere; et autant d'inventions, autant d'affronteries, aultant d'erreurs. Tant y a qu'il ne peult dire que le roy n'ait faict ce qu'il a peu et ce qu'ils ont voulleu; que tout le royaume ne soit ruyné pour satisfaire à leurs desseings. Car on a veu six armees tout à la fois en ce royaume, et toutes grandes. Chose non ouie ni veue auparavant; chose non croyable à qui ne l'auroit veue. Et c'estoit pour occuper et distraire en divers lieux les forces du roy de Navarre, afin que ceulx de la Ligue qui avoient les principales forces du royaume, et qui estoient les premiers en armes pour tirer à eulx l'eslite de la France, eussent meilleur marché du roy de Navarre, duquel ils avoient entrepris la ruyne, ne pouvant ses serviteurs venir à lui pour estre iceulx reteneus et obligés ailleurs.

Discours. Les habitans de leurs villes ne veullent plus recevoir les soldats estrangers, de peur que, les ayans destruicts et mangés, ils ne les exposent encores au pillage, et ne les livrent afin de se racheter, comme ils ont faict à Castillon.

Response. Tesmoing ceulx de Millau, qui, à la ve-

sur le voyage de M. De Mayenne. 405 neue de M. l'admiral de Joyeuse en Rouergue, ont receu M. de Chastillon et toutes ses forces en leur ville, et les ont nourris à leurs despens; tesmoing aussi ceulx de Villemur, qui ont appellé comme chés eulx tous les voisins; et non tant pour se garder, qu'assister les assiegés de Salvaignac.

Discours. Les gens de guerre ne se veullent plus asseurer aulx vaines esperances du roy de Navarre pour attendre plus aulcung siege, soubs esperance de secours.

Response. Et de là se voit la verité de ce qu'il dict, que les gens de guerre ne se veullent plus jetter dedans les places; car jamais plus volontairement ne s'y jetterent qu'ils ont faict tout fraischement à Severac, à Villemur, à Salvaignac, et ung peu auparavant au Maz Sainctes Puelles, où M. le mareschal de Joyeuse espuisa en vain les magasins de Languedoc.

Discours. Les forces estrangeres, qu'il leur a faict si souvent entendre estre sur la frontiere, et tant de belles esperances dont il les a entreteneus jusques ici, leur ont manqué; et ne doubte poinct, si on les presse, qu'ils ne fassent, ainsi que ceulx de Daulphiné, lesquels, à la premiere armee que M de Mayenne y mena, soubteinrent quelques sieges, et employerent toutes leurs forces pour s'opposer à ses desseings. Mais depuis, le voyant revenir apres que l'hyver feut passé, desesperé de lui pouvoir plus resister, ils lui apporterent les clefs de toutes leurs villes et forteresses, dont ils souffrirent que les plus importantes feussent rasees et desmolies, et que l'exercice de la relligion catholique feust remis jusques dedans les vallees d'Angrongne et de Val loyeuse, où il avoit tres long temps esté discontinué.

Response. Quant à la veneue des estrangers, leurs majestés sçavent bien qu'elle est toute asseuree, et les signes en sont assés evidens à ung chacung. Et ce qu'ils ont retardé jusques ici est ung œuvre de Dieu dont le oy de Navarre ne le peult assés louer, qui a voulleu

faire voir à ce royaume que son parti n'est pas si petit, qu'il ne puisse soubstenir de soi, et sans secours d'ailleurs, tous les efforts de ses ennemis; qui, pour cest effect, a donné le loisir à messieurs de la Ligue de jetter leur seu tout à leur aise, de tirer jusques à la derniere piece, d'employer et de lasser tous leurs associés. tant de ce royaume qu'estrangers; qui mesmes a voulleu, par ung mauvais conseil, mais que, par sa providence. il a tourné et tournera à bien, que le roy ployast sa volonté aulx leurs; qu'il leur meist ses forces en la main pour en user à leur plaisir, qu'il les desployast, et roidist tous les muscles et les nerfs de ce royaume pour jetter par terre le roy de Navarre et ceulx de son parti. Afin que, par ce moyen, toute la France cogneust que la France, ne l'Espagne, ne toute la Ligue ne sont suffisans de le chasser de France. Afin que la France aussi, pour l'advenir, se resoleust, non plus de conjurer avec les Espaignols contre les François; mais certes, par une bonne paix, de bien unir tous les François, pour faire revivre l'honneur ancien et la gloire de France.

Mauvaise conclusion d'ung mauvais discours. Voyés quel exemple il prend pour nous accourager à nostre mal. Il en adviendra, dict il, comme en Dauphiné, et n'en doubtés. Il prit à coups de canon quelques villes en Dauphiné; quelques aultres composerent puis apres. Mais voici la fin: ces villes, qui lui cousterent cher. Die et Livron, et quelques aultres, on les a reprises au premier jour de la guerre, sans perte d'ung homme; on a saisi d'abondant Montelimar, Ambrun, et des principales du pays; on a fraischement defaict le sieur de Vins et son armee; il y est mort douze cens hommes de pied, vingt et sept capitaines, plusieurs seigneurs de Provence, partie prisonniers, partie tués, vingt et

deux enseignes prises, sans y perdre que six hommes de leur part. Si donc la continuation de ceste guerre doibt avoir mesme succes (et pensés que c'est par ung esprit de prophetie, comme Caïphe, ce qu'ils disent), jugés quelle en doibt estre la fin, sinon la ruyne totale du royaume. Et jugés, par consequent, qu'ils n'aspirent qu'à nostre ruyne, puisqu'ils la demandent, la desirent, et l'importunent tant.

De Montauban.

LXXXV. — MEMOIRE

Des deportemens de M. Duplessis à Montauban, l'an 1586.

Au commencement de l'an 86, M. le mareschal de Matignon ayant comme investi Castets sur Garonne, le roy de Navarre, pour lui rompre ce desseing, assembla ses forces, et se logea pres de lui, entre Meillan et Castets.

De là s'ensuivit que ledict sieur mareschal retira tout son camp à Langon, et, pour ce coup, ne l'attaqua poinct.

Le sieur Duplessis, que ledict seigneur roy avoit laissé à Montauban pour haster les fortifications et aultres affaires, eut commandement alors de le venir trouver devant Castets; ce qu'il feit aussi tost.

Ce coup estant rompeu, ledict seigneur roy, premier que licentier ses trouppes, alla rencontrer le sieur de Turenne à Caumont, pour resouldre avec lui, et aultres de son conseil, des moyens de s'opposer aulx efforts de M. de Mayenne.

Lors ledict sieur de Mayenne passoit la Dordongne

à Souillac, et tenoit, par ce moyen, en jalousie, tant les places de Dordongne, que celles du Hault Querci.

Cela seut cause que ledict seigneur roy seut d'advis que ledict sieur de Turenne se logeast à la teste de Dordongne, qui, à la verité, sousteint depuis le principal faix.

Et toutesfois, parce qu'il n'estoit pas sans souspçon qu'il tombast en Querci, trouva expedient ledict seigneur roy, de son propre mouvement, que le sieur Duplessis passast vers Montauban, pour de là le tenir adverti, haster les trouppes de Languedoc, et pourvoir avec le sieur de Terride aulx occurrences qui se presenteroient.

Lui bailla à ceste fin les sieurs de Tauvenai, Antereau et Herville, avec leurs compagnies d'arquebusiers à cheval, montans de six à sept vingt.

Et parce que le sieur de Terride, faulte de gens de cheval, ou aultrement, ne faisoit poinct lever les contributions; cognoissant d'ailleurs la necessité d'hommes qu'il y avoit en la province, on feut contrainct les nourrir de bled, vin et chair de munition, partie sur les villages plus volontaires, et partie sur le public.

Pendant ce temps, M. de Mayenne, avec toute son armee, se logea au milieu du Hault Querci, entre Figeac, Caillac et Caidaillac, comme il sembloit en intention d'en assieger l'une. On y jetta du Bas Querci tous les hommes que l'on peut; mesmes, comme le sieur de Giscard requit d'estre assisté pour la garde de la ville de Tournon en Agenois, ledict sieur Duplessis lui envoya le sieur de Herville avec cinquante arquebusiers à cheval.

L'apparence en somme feut telle, que l'orage veinst

fondre sur ceste province de Querci, que M. de Turenne mesmes y veint pour le soubstenir.

Et feut bien besoing d'avancer, à quelque prix que ce feust, les fortifications nouvelles de Montauban, tant deçà que delà le Tarn.

Qui feut cause que ledict sieur Duplessis emprunta argent pour aider à continuer et achever la Ville-Bourbon, comme il en avoit eu commandement expres dudict seigneur roy, lequel a depuis esté remboursé sur la recepte generale.

Mais, comme ledict seigneur roy entendit que ledict sieur de Mayenne descendoit en Agenois, il r'appella aussitost ledict sieur de Turenne en Gascongne, pour y donner ordre, commandant toutesfois audict sieur Duplessis de ne bouger de Montauban, à cause de l'incertitude du desseing de l'ennemi qui lui restoit en l'entendement.

Alors donc ledict seigneur roy passa à Bergerac, et ledict sieur de Turenne en Gascongne, qui emmena avec soi toutes ses forces; et d'abondant les susdictes compagnies des sieurs de Tauvenai, Antereau et Herville.

Et parce qu'il y avoit doubte que le Maz de Verdun ne feust attaqué, y logea et establit le sieur de Savaillan, à condition que ledict sieur Duplessis le pourvoieroit de toutes choses necessaires; ce que ledict sieur de Turenne, oultre les commandemens dudict seigneur roy, lui recommanda bien fort.

Est donc à noter que ceste place estoit desnuee entierement de vivres et munitions; et si desnuee, qu'advenant la menace d'ung siege, nul ne s'y feust voulleu embarquer.

Qui feut cause que peu de jours apres, feurent mis

dedans vingt quintaux de poudre, bonne quantité de plomb, soufre, corde, huile, sel, etc. Et, par ung second convoi, cent sestiers de bled, quelque quantité de sel encores, et aultres choses necessaires; oultre quarante barriques de vin, qui y feurent envoyees depuis.

Ledict seigneur roy eut advertissement de divers lieux, que M. de Mayenne, au partir de Montsegur, debvoit remonter vers Montauban, comme de faict on l'y convioit à grandes offres; et pour ce, lui commanda encores de n'en bouger, s'acheminant toutesfois au mesme temps vers La Rochelle. C'estoit environ le mois de mai dudict an 1586.

Et est à noter qu'il n'y avoit alors aulcunes compagnies de gens de pied reglees dans le pays; que M. de Terride n'avoit poinct levé sa compagnie de gensdarmes; que l'esperance des trouppes de Languedoc estoit perdeue; que M. de Cornusson se mettoit en campagne; que M. de Chattes lui amenoit deux mille arquebusiers; que la moisson, au reste, approchoit, en danger d'estre perdue si on n'avoit des forces.

De ce seut adverti le roy de Navarre; mais il estoit trop loing pour y pourvoir. M. de Turenne aussi; mais il avoit ung saix sur les bras plus qu'humainement il n'en pouvoit porter; qui seut cause qu'on se resoleut d'en mendier d'où on pourroit.

Lors arriverent de Castres huict gentilshommes françois, et le capitaine Tournebeuf avec vingt arquebusiers à cheval, qui avoient laissé M. le comte de Montgommery. M. de Terride feut d'advis de traicter avec eulx; et convint à vingt escus pour le gendarme, et vingt francs pour l'arquebusier à cheval, tant en consideration de leur condition que de la necessité; et en feut expediee ordonnance du conseil, signee des sieurs de Terride, de Grateinx, Duplessis, de Sorbiac.

Ils tesmoigneront que ledict sieur Duplessis declara en plein conseil qu'ils se chargeroient d'une obligation qu'ils ne pourroient accomplir, et qu'il les valloit mieulx laisser aller, si on ne voulloit donner aultre ordre aulx contributions. Toutesfois, la necessité presente feit passer oultre, nommeement qu'ils seroient entreteneus de tous deniers.

Peu de jours apres, et en mesme temps que le canon feut mené vers Caussade, arriva le sieur de Chappes avec M. le vicomte de Gourdon. Il avoit quelque six vingts arquebusiers, les deux tiers à cheval; et receut à l'assault de Jagot une fort grande arquebusade, pour guerir de laquelle il se feit apporter à Montauban.

M. de Terride, pour les raisons que dessus, traicta avec lui, et le retint, promettant tousjours de le faire payer, et de lever les contributions; et dresser à ceste fin sa compagnie.

Ce feut lorsque l'entreprise sur Montauban feut decouverte au sieur Duplessis, qui sans doubte, veu l'extreme confiance que prenoit le sieur de Terride des entrepreneurs, estoit tres executable. Joinct que le sieur de Cornusson feut deux mois et plus à rouer aulx environs avec ses trouppes pour choisir son occasion.

Et juge ung chacung s'il feut necessaire alors d'entretenir ce peu de gens de guerre qu'on avoit peu recouvrer, veu la consequence de la place, qui estoit encores ouverte en plusieurs lieux, et quel reproche eust encoureu ledict sieur Duplessis, si, à faulte de relascher la rigueur des reglemens pour le regard des finances, il en feust adveneu inconvenient. Adjoustés que le sieur de Terride ne prenoit plaisir qu'on proposast d'entretenir les gens de guerre aulx despens du peuple, pour ne reveiller les mescontentemens qui estoient contre lui, à cause des entrepreneurs qu'il avoit paravant soubsteneus.

De ceste entreprise, les lettres et les proces verbaux font soi, veus et approuvés par ledict seigneur roy et son conseil, dont il auroit commandé aulxdicts sieurs de Terride et Duplessis de proceder à toutes rigueurs contre les entrepreneurs, jusqu'à la ruyne et demolition de leurs maisons. Et chacung sera tesmoing du debvoir qu'y a faict ledict sieur Duplessis, et des empeschemens qu'il y a rencontrés.

C'estoit environ le fond de l'arriere saison, le fond par consequent des finances; qui feut cause qu'il falleut emprunter de l'argent pour le payement des gens de guerre, ne leur estant departies les contributions, et ne voullant pas le peuple continuer à fournir. En quoi ledict sieur Duplessis, par l'advis de MM. de Grateinx et de Sorbiac, et à l'instance mesmes dudict sieur de Terride, espuisa jusques au fond son credit; sauf à degager sa foi, et de ses amis, par le moyen des affermes.

Les villes circonvoisines, l'une apres l'aultre, se départirent de l'union et de l'obeissance; quelques unes rejetterent leurs gouverneurs, et les aultres estoient prestes d'en suivre l'exemple. Les consuls de villes tiroient à eulx toute jurisdiction et toute auctorité, en danger de mettre la main dans les finances. En feut escrit par ung commun advis au roy de Navarre et à M. de Turenne; et, sur la response dudict seigneur roy, feurent assemblés les estats du Bas Querci, et villes adjacentes, pour les reunir et rallier; ce qui succeda bien. Pour les y mieulx disposer, feut celebré le jeusne;

dont aussi se presentoit aultre subject sur l'esperance des Reystres.

Et parce que ledict seigneur roy mandoit que de toutes parts on feist provision d'argent pour son acheminement vers son armee, feurent exhortés lesdicts estats; consideré mesmes que le plus clair de ses finances en la recepte particuliere de Montauban avoit esté employé à l'entretenement des gens de guerre pour la conservation de la province.

Lesdicts estats accorderent volontairement quatre mille cinq cens escus; mais, pour les traverses qu'on y a donnees, il ne s'en est pas levé le quart, alleguans aulcungs que cest octroi avoit presupposé une fausse nouvelle.

Tandis que ce peu de trouppes seurent entreneues, on tascha, selon le peu de loisir qu'on en eut, de leur faire employer le temps. La Françoise seut prise à coups de canon. Peu apres, six ou sept sorts es environs de Villemur.

Mais particulierement elles veinrent à temps pour la ville de l'Isle, bloquee de fort pres de tous costés, et qui ne pouvoit plus patienter; ledict sieur Duplessis les y ayant menees environ le mois d'octobre pour assister M. de Fontrailles à la prise des forts et de ladicte ville.

Ne feut sitost retourné, que M. de Joyeuse veint en Albigeois et Bas Querci, où il menaçoit d'une mesme pierre Salvaignac et Villemur, toutes deux lesquelles le sieur de Terride n'eust peu suffisamment pourvoir.

Mais estant encores en doubte quelle des deux il attaqueroit, ledict sieur Duplessis se jetta dedans Villemur avec lesdictes trouppes, où il feut ung mois entier, tant que l'armee se feust retiree, et chacung tesmoignera que sans cela la place estoit perdeue; il feut assisté des sieurs de Savaillan et Suz à ce besoing, et d'aultres ses amis.

Au sortir de Villemur il entendit, par le secretaire Viçoze, venant de Gascongne, que M. le mareschal de Matignon alloit attaquer Meillan sur Garonne, et lui promit d'y passer deux jours apres avec ce qu'il avoit pour y servir. Les eaulx devinrent si grandes qu'il ne peut passer de quattre jours, encores à peine et non sans danger; ainsi Meillan se perdit à faulte d'hommes qui s'y voulleussent jetter.

Et s'advançant ledict sieur mareschal à Tonneins, l'opinion plus commune feut qu'il voulloit attaquer Leirac, mauvaise place et mal munie, que ledict sieur Duplessis, des le lendemain qu'il feut arrivé à Leitoure, alla visiter, y porta des poudres, assembla les capitaines pour en informer à son retour M. de Fontrailles.

Puis, comme ledict sieur mareschal feut arrivé à Agen, y conduict les dictes trouppes du sieur de Chappes et capitaine Tournebeuf, ayans icelles temporisé ung mois dedans la Sauvetad, pour n'entrer à Leirac qu'au besoing, asin d'espargner les vivres.

Il n'y a celui qui ne sçache qu'elles y veindrent fort à propos pour le sieur de Fontrailles, qui ne sçavoit où prendre des hommes pour l'en fournir suffisamment.

Il a prou fasché, et soubvent audict sieur Duplessis, que ces compagnies feussent en charge aulx finances de sa majesté, mesmes estans pour la plus part arquebuziers à cheval, et a cherché tous moyens de les en decharger, ce qu'il eust bien faict si cela eust despendu de son auctorité; mais il estoit toujours reteneu de ce respect de n'entreprendre rien de ce qui appar-

tenoit à M. de Terride, et d'ailleurs voyoit le danger où estoit le pays à faulte d'hommes, aulx occasions qui lors se presentoient; tant y a qu'il s'en console es bons services qu'elles ont faict, estant certain qu'à faulte d'icelles, il feust mesadveneu de plusieurs lieux.

LXXXVI. — REMONSTRANCE

Aux trois estats de France sur la guerre de la Ligue; faicte par M. Duplessis, soubs le nom d'ung catholique romain, l'an 1587.

MESSIEURS, on vous auroit assés adverti par ci devant que la Ligue seroit cause de grandes calamités en ce royaume, et ne feroit pas grand mal, quoi qu'elle vous promist, au roy de Navarre ni aulx siens; aussi a elle esté faicte contre ce royaume proprement, et pour telle recogneue premierement du roy et de vous tous; le roy de Navarre, comme il en sent en soi le moins de mal et vous le principal, n'en estoit que la couleur et le pretexte.

Le pis est que vous ayés mieulx aimé le voir que le prevoir, le sentir jusques au vif que de le croire; encores, certes, que je sçais que beaucoup d'entre vous ont servi de Cassandres à Troye, peu auctorisés pour detourner le mal, prou prudens et advisés pour le predire.

Les aucteurs de ceste Ligue, pour vous faire entrer en ceste guerre plus facilement, vous en proposoient une facilité tres grande; ce n'estoit que pour trois jours à faire; les meilleures places ne debvoient pas soubstenir le seul bruict de leur nom. Le roy de Navarre, au reste, estoit bloqué incontinent, et ne restoit que

416 REMONSTRANCE AUX TROIS ESTATS

son epitaphe à faire; et si quelqu'ung osoit remonstrer vingt et cinq ans mal employés en ce mesme desseing, beaucoup de temps perdeu à nous perdre, c'estoit crime et heresie formee; et ne manquoient ces repliques ordinaires; que la Ligue qui l'entreprenoit estoit tout aultre chose; que ses chefs sçavoient bien d'aultres finesses, et la violence les faisoit valoir pour la raison.

Representés vous ici, messieurs, le progres de leurs affaires en ung an; mesurés, par une annee, toutes les aultres, encores que leur principale ardeur s'en va evaporee; leur colere, pour la pluspart, convertie en phlegme, et vous jugerés par là du succes à venir, vous verrés que tout recreus et harassés que desjà nous en sommes, nous n'avons pas faict encore ung pas qu'en reculant.

Apres l'edict de juillet, procedé des violences de la Ligue, monsieur de Mayenne entreprit la province de Guyenne; et pour cest effect, oultre les forces de la Ligue, les forces du roy lui feurent consignees en main. Chacung peult juger de là quelle estoit son armee; car de deux mediocrement fortes il s'en faisoit une. Il partit saisi d'une grande somme de deniers, et espuisa presque jusques au fonds le zele du clergé; artillerie et munitions ne manquoient poinct. Et si vous voulez vous soubvenir, ou de leurs vanteries, ou mesmes de vos imaginations d'alors, toutes les murailles de Guyenne alloient en esclats ou s'envoloient en poudre, le roy de Navarre mesmes ne sçavoit où se ranger pour s'en mettre à couvert.

Et de faict il est certain qu'il estoit desarmé, ne s'estant jamais voulleu ni peu persuader, que l'obeissance qu'il avoit rendeue au roi, lui deust estre en ruyne; il estoit armé d'une fiance en Dieu, qui main-

tient le droict, mesmes tout nud, contre l'injure armee. Il se pensoit aussi bien couvert des armes de son roy, qui le debvoient couvrir, puisqu'il lui avoit faict cest honneur de recognoistre et tenir sa querelle pour sienne.

Vient donc ledict sieur de Mayenne en Poictou et Xaintonge. Il laisse derriere soi La Rochelle, Sainct Jean d'Angely, Pons, etc., et sans y rien attaquer. Si estoient ce les plus proches places du cœur du royaume; et l'occasion y estoit à propos, parce qu'elles estoient lors si travaillees de peste, qu'à peine les gens de guerre y pouvoient subsister. De là il prend son chemin par le Perigord, où il prend à composition le chasteau de Montignac le Comte, place qui avoit esté comme banniere tous les troubles precedens, et ung chacung le sçait. Et le fil de son voyaige eust porté qu'il feust allé à Bergerac pour y essayer la premiere fureur de son armee; il prit nonobstant son chemin par Souillac, où il passa Dordongne, laissant Montfort et Turenne, et Sainct Ceré, places du vicomté de Turenne, sans les attaquer. De là entra au Haut Querci, où ceulx du parti contraire tiennent Figeac, Cadenac, Cajarc et aultres places, en feut logé au milieu trois sepmaines durant; feut requis par les estats, importuné par l'evesque de Cahors et par le seneschal, de les en delivrer. Et de faict on sçait jusques à quels mots en vinrent les sieurs de Sainct Supplice et Camburat avec lui, voyans le pays tout ravagé et reduict à la faim et sans profict. Tant y a qu'il n'y feit aultre chose, sinon composer avec deux ou trois gentilshommes du pays, des plus foiblement logés, à condition qu'ils pourroient avoir'l'exercice de leur relligion chés eulx, que de leurs maisons ils ne feissent la guerre, sauf pour MÉM. DE DUPLESSIS-MORNAY. TOME III.

418 REMONSTRANCE AUX TROIS ESTATS

leurs personnes à la faire ailleurs, où ils vouldroient.

Les excuses feurent qu'il voulloit aller nettoyer les rivières et asseurer le commerce du pays; et aulx considens il disoit à l'oreille qu'il voulloit surprendre et investir le roy de Navarre en quelque lieu qu'il feust, stratageme pedantesque s'il en seut jamais, et qui toutesfois estoit leur fondement, comme si la France estoit ung eschiquier où ung prince n'eust de promenoir que quattre pas. Et de faict, en mesme temps, le roy de Navarre ayant pourveu, comme il pouvoit, à toutes les places qu'il laissoit derriere, veint à Bergerac à la teste de l'armee dudict sieur de Mayenne, et y sejourna ung mois entier, n'y ayant riviere ni ruisseau entre les deux, et sans que jamais on lui donnast allarme; et enfin passa jusqu'en Xaintonge, s'avançant devers la France, et visitant son gouvernement jusques aulx bords de Loire, lui qu'ils en debvoient chasser en quattre mois, lui qu'ils debvoient faire reculer jusqu'à l'accul, s'il ne se resolvoit bien promptement de vuider ce royaume.

Castets, maison du sieur de Favas sur la Garonne quand M. de Mayenne y arriva, estoit assiegee du mareschal de Matignon; ledict sieur de Mayenne, à son desceu, pour lui derober ceste petite gloire, composa à douze mille escus pour se la faire rendre, chose neantmoins inusitée entre tous gens de guerre, une place estant batteue et breche faicte, de lui donner ung assault d'argent.

De là en avant il prit Saincte Bazeille, Montsegur et Castillon, places incogneues avant ces guerres, places non jamais mentionnees dans les cartes plus particulieres, places de nul nom, que par la resolution de les desendre; places neantmoins, et surtout Montsegur.

qui lui cousterent cher, et est bien certain que, sans la peste qui travailloit ceulx de Castillon, plus que l'on ne sçauroit croire, il estoit pour recevoir ung grand affront devant, ayant esté ceste place, en la face de M. de Mayenne, secoureue et rafraischie par M. de Turenne. C'est, en somme, tout ce qu'il a faict eu Guyenne en une annee entiere; et notés que le roy de Navarre, en mesme temps, s'est accreu de Taillebourg et de Roian, places fortes d'art et de nature, ports de mer, emboucheures de Charente et de Garonne. Je ne nomme Sainct Jean d'Angle, Tonnay Charente, Mornac et aultres, qui recompensent sans celles là Castets et Saincte Bazeille, et mieulx.

Je laisse que la Garonne, qu'on avoit promis d'ouvrir pour le contentement de Thoulouse et de Bourdeaux, demeure tousjours close, plus mesmes que paravant la guerre; car ne pensés pas qu'apres Saincte Bazeille prise, ledict sieur de Mayenne ait osé attaquer Caumont, qui le regardoit, la riviere entre deux; aussi peu le Mas et aultres places, qui commandent la Garonne. Joinct qu'en mesme temps on a fortifié la ville de Meillan, qui vault mieulx que tout ce qu'il a pris, comme sçavent bien ceulx du pays, oultre certains forts decà et delà l'eau, qu'on y a bastis depuis au dessoubs de Clerac, tellement que les marchands aulxquels on avoit promis d'affranchir le commerce en dedans Noel dernier passé, leur defendant par expres, à peine de la vie, de composer pour la liberté et seureté de leur passage et de leurs marchandises, s'en voyant plus loing qu'ils n'estoient auparavant, et ayant souffert en cependant, à faulte du commerce, plusieurs pertes dont sont ensuivies notables banqueroutes, sont veneus enfin à composition, maudissant la Ligue et

420 REMONSTRANCE AUX TROIS ESTATS

tous ses adherens; mais c'est aussi ce que le mareschal de Matignon a tres bien recogneu (et quelque sobre qu'il soit, il ne s'en est peu taire en quelques lettres); que M. de Mayenne avoit plus d'entreprises sur Thoulouse et sur Bourdeaux (c'estoit parlant du chasteau Trompette), que sur le Mas de Verdun et sur Caumont.

Or, qu'ils puissent ci apres faire grand cas au reste de la Guyenne, jugés l'apparence qu'il y a; car toutes les places qui, à l'entree de la guerre commencee sur l'arriere saison, eussent peu avoir faulte de vivres, ont faict leur recolte tout à l'aise, et mesmes du gré de leurs voisins, soit qu'une necessité commune à tous les deux les ait amenés à mutuels offices, soit qu'ils abhorrent telles extremités et detestent la misere de ce temps. Et c'estoit en leurs memoires toutesfois, qu'ils presenterent au roi pour lui faciliter les choses, l'unique moyen qu'ils pretendoient contre les villes principales, moyen, certes, qui tient plus de la nature de l'extremité que du moyen, moyen, qui plus est, auquel ils ne peulvent revenir de deux bons ans et plus.

Es aultres provinces, la Ligue n'a pas mieulx prosperé en ses affaires; car, en Languedoc, M. de Montmorency, s'estant associé avec le roy de Navarre pour le tort qu'il cognoissoit lui estre faict, a reduict à sol Lodeve et Sainct Pons, villes episcopales et leurs dioceses, a fortifié les deux rives du Rhosne, jetté racines en Provence si avant, qu'on a esté contrainct d'accorder libre exercice de la relligion aulx gentils-hommes. Tout ce qu'on peult alleguer avoir esté gaigné en Languedoc, c'est le fort de Montesquiou en Lauraguois, qui pourroit estre contrepesé de plusieurs forts de mesme estoffe, qui ont esté pris en la mesme

province; et tout fraischement la prise de Marvejols, plus par trahison que par effort, et qui n'aura rien servi qu'à resouldre les aultres, y ayant esté, contre la foi promise, telles cruautés et insolences exercees, qu'il fauldroit trouver de nouveaulx noms pour les descrire; mais le siege du Mas Saincte Puelles en pourra tout seul contrepeser la gloire, place la plus miserable et moins tenable de toutes celles de Lauraguois, qui a repoussé l'armee de M. de Joyeuse, lui ayant tué trente deux capitaines et cinq cens arquebusiers, dissipé ou rebuté ses regimens, et faict perdre son credict entre les gens de guerre, jusqu'à se resouldre es estats depuis teneus à Castelnaudarry de ne s'en mesler plus.

Et quant au Dauphiné, la province, comme chacung sçait, si on a esgard à ceulx du contraire parti, la plus abbatteue de toutes, lorsque ces troubles ont commencé; la province, en somme, où M. de Mayenne pensoit avoir faict l'essai de sa fortune, et dont il s'estoit promis facilement la ruyne des aultres; chacung sçait comme ils y ont laissé prendre Montlimar, ville notable, et depuis Ambrun, ville metropolitaine du pays, les deux qu'ils pensoient avoir acquises à la Ligue, et que maintenant le sieur Desdiguieres lui a rendeues imprenables, oultre ce qu'ils ont laissé reprendre Die et Livron, et aultres lieux, de la conqueste desquels M. de Mayenne triomphoit et avoit faict sa gloire.

Je laisse plusieurs chasteaulx en diverses provinces, pris à moins de dix livres de poudre, dont la Ligue eust faict sonner les cloches et faict gaigner tous les contreporteurs du palais, s'elle les eust pris par l'effort du canon. Je laisse que ces petits chasteaulx, que M. de Mayenne faict sonner à nos oreilles, cousten tous miles.

422 REMONSTRANCE AUX TROIS ESTATS

lion d'or chacung et la vie de nos meilleurs soldats, au lieu que les bonnes villes que dessus n'ont cousté au roy de Navarre et à ses serviteurs qu'ung coup de petard et à peine quelque homme. Je laisse pareillement qu'en tous les combats qui se sont faicts par les meneus (car de grands il n'y en a poinct eu), il se trouvera, pour la pluspart, que la perte est tombee sur la Ligue, tellement qu'il se peult dire avec verité que, pour ung de la relligion pretendeue reformee, il en est mort trente de la Ligue pour le moins. Et pour abreger, en somme, voyés, toutes choses calculees, s'il y a homme si idiot qui voulleust troquer Roian et Taillebourg en Guyenne, Lodeve et Sainct Pons en Languedoc, Montlimar, Ambrun et Die en Dauphiné, etc., contre Montignac. Castets, Saincte Bazeille, Montsegur et Castillon, les trophees de la Ligue, les triomphes de M. de Mayenne; mais triomphes chers et ruyneux, et, j'oserois dire, funerailles.

Vient maintenant, apres qu'ils ont jetté tout leur feu, une puissante armee estrangere au secours du roy de Navarre. Quel miracle produira la Ligue ici pour s'en couvrir? Quand on alleguoit devant le roy qu'il seroit sans doubte secoureu des princes qui faisoient mesme profession que lui, puis mesmes qu'il y alloit de la relligion expressement, et qu'ils voulloient qu'on levast le masque; ils avoient, qui les eust voulleu croire, pourveu de long temps à tout cela. De la royne d'Angleterre, ils lui debvoient tant tailler d'affaires du coste d'Escosse, tant mesmes en son royaume propre, qu'elle seroit assés occupee en elle mesmes; et, de faict, ne fault doubter qu'ils n'ayent attisé tous les tisons fumans, remué toutes les cendres, et soufflé toutes les estincelles qu'ils ont peu. Cependant, comme il plaist

à Dieu souffler sur leurs desseings, jamais l'Angleterre ne feut plus paisible, jamais plus etroictement alliee à l'Escosse, jamais aussi ne s'y veit la benediction de Dieu plus clairement, soit dedans, soit dehors; Dieu ayant miraculeusement decouvert les practiques, et par plusieurs fois, que les jesuites suscitoient contre la royne d'Angleterre, sa personne et son estat; Dieu, au contraire, favorisant les entreprises qu'elle a faictes pour la defense de ceulx qu'elle a cogneu estre opprimés injustement.

D'Allemaigne, pour lever toutes difficultés au roy, ils entroient presque en caution, qu'il n'en sortiroit aulcung secours pour le roy de Navarre; alleguoient, pour colorer ce vain espoir, les vieulx differends sur quelques poincts de relligion entre les eglises d'Allemaigne et les Françoises, qu'ils pretendoient fomenter par leurs practiques. Et voilà qu'ils ont veu, au contraire, que leurs artifices n'ont servi qu'à reunir les cœurs et à faire cesser les disputes; qu'elles se sont reconciliees ensemble estroictement pour faire doresnavant et mesme corps et mesme cause; que le roy de Dannemark, et les electeurs, et les princes de l'Empire, les seigneurs aussi des Ligues des Suisses et des Grisons, se sont sentis offensés en la personne de ce prince, se sont sentis blessés en ses playes, et atteints en ses injures. Et de faict, qui ne s'en seust emen? qui n'eust aperceu la consequence de ce qui se brassoit contre lui, quand, pour la relligion qu'ils tiennent, et que les premiers ils ont receue en leurs pays, on expose en proye son estat, sa vie et son honneur? on le veult rendre incapable et de toutes dignités et de tous biens? Ils debvoient armer les Allemands les ungs contre les aultres; ils debvoient resusciter les plus villes que-

424 REMONSTRANCE AUX TROIS ESTATS

relles pour mettre la guerre entre les princes catholiques et les protestans; ils n'avoient pas faulte aussi, disoient ils, d'inventions pour diviser les protestans entre eulx mesmes. Où sont maintenant tous ces grands artifices? que sont deveneus tous ces discours, veu que l'Allemaigne n'a jamais esté ni plus composee en elle mesmes, ni plus disposee à secourir leurs amis? et que feront ils à ce cadet de Cazimir (car ainsi appellent ils ce prince), qui passera sur le ventre ung de ces jours (et combien l'a il faict?) à l'aisné de ces beaulx rejettons, à l'aisné de Lorraine?

Mais, au pis aller et à tout rompre, les Reystres venans à entrer, ils faisoient sortir une armee d'Italie, contribuee par les princes de la Ligue; ils la tenoient embusquee dedans les Alpes, toute preste à decoupler à poinct nommé; l'estat en couroit par le palais, il se lisoit sur la court du Louvre. Où donc s'endort elle maintenant? et que ne comparoist elle à ce besoing? et qui ne sçait au contraire que les seigneurs de Venize, les plus anciens amis et alliés de ce royaume, ont offert secours au roy contre la Ligue, et l'exhortent maintenant à une paix? que le roy d'Espaigne, sur lequel tournent tous leurs desseings, eulx n'ayant teneu ce qu'ils avoient promis, les a laissés à moitié chemin, et a renvoyé leurs negotiateurs avec reproches? et que diront ils du pape Sixte mesmes, qui a recogneu à M. de Montmorency qu'il avoit esté surpris par eulx en la declaration qu'il avoit publice contre le roy de Navarre et monseigneur le prince? qui le prye de radoucir les choses, lui soubs le voile duquel ils les avoient aigries? qui mesmes permet en Avignon, et par traicté expres, libre acces à ceulx de contraire parti de Dauphiné et de Provence, qui en tirent tous les jours, par

sa permission, vivres, armes, poudres et aultres munitions de guerre.

Ceste armee donc d'Italie, ou s'estant fondue, ou n'ayant esté fondee qu'en l'air; au contraire l'armee d'Allemaigne estant en nature, et tenant desjà le pied sur la frontiere: qui ne voit en quelle extremité, par leurs illusions, ils ont reduict le peuple? qui ne voit le bon marché qu'ils font de sa calamité, du sang de nous tous, de l'honneur du roy et du royaume?

Mais aussi les veullent ils combattre. Et c'est, à la verité, ung de leurs griefs en leurs livrets, que les estrangers n'ont esté combatteus sur la frontiere es troubles precedens. Je vouldrois donc sçavoir qui les a empeschés, quand, aux premiers troubles, seu M. de Guise commandoit aulx forces de la France; et quand, aulx seconds, feu M. d'Aumale avoit une armee sur la frontiere, pour leur en fermer l'entree (et la mort de feu M. le prince de Condé en mesme temps lui venoit à propos)? Et quand, la derniere fois, M. de Mayenne l'entreprit, qui estoit logé trois mois devant sur les passages, qui avoit choisi ses advantages à loisir, et qui toutesfois en tout ce long voyage ne leur donna une seule allarme? Mais ainsi ont ils accoustumé d'en faire pour avoir les armes en main, et se rendre arbitres des affaires. Ils se font tenir ung temps, protestans du service du roy, s'il ne leur est accordé de les combattre. Et quand on leur lasche la bride sur le col, ce sont les premiers qui cherchent des excuses, et prennent tres grand plaisir qu'on leur allegue alors qu'il est dangereux et inique de jouer la noblesse de France contre une armee estrangere, et dans le cœur du royaume.

En somme, voulés vous voir le bien que la Ligue a faict en ce royaume en general? Elle a all uné le feu

426 REMONSTRANCE AUX TROIS ESTATS

aulx qualtre coings et au milieu: elle a mis les meilleures provinces, les meilleures villes à la faim, et n'a pas encores faict ung pas en l'entreprise pretendeue en avançant. Elle avoit promis d'exterminer les huguenots; et voilà qu'ils ont ancré plus ferme. Elle les debvoit chasser en Allemaigne; et voilà que l'Allemaigne vient en France. Elle promettoit d'extirper leur doctrine; et voilà qu'elle nous a reduicts à tirer au baston avec eulx à qui demeurera, et à réfaire les lots, et r'entrer comme en nouveau partaige, au lieu qu'ils se contentoient auparavant de telle condition et part que nous leur accordions.

Voyons si au moins la Ligue, qui a confondeu tout cest estat, a faict quelque bien particulier pour nos estats. Ils s'estoient couverts, comme tous vous sçavés, du vieil gaban de bien public; car ainsi ils l'appellent. Ils avoient promis de decharger le peuple, et faisoient sonner bien hault qu'ils estoient les petits fils du roy Louis XII, et à peine qu'ils ne fussent successeurs du beau surnom qu'il merita de Pere de son peuple. Là dessus on vous avoit prou dit que vous sériez surchargés plus que jamais, que nouvelle guerre apporteroit nouveaulx imposts; que la Ligue, pour vous obliger, bailloit les arrhes, mais que ce seroit sans doubte à vous à tenir le marché, et payer les contracts. Voyés donc, au bout de l'an, l'engeance de la Ligue; voyés ce qu'a engendré ce bien public; vingt et sept nouveaulx edicts d'une volee, que vingt et sept ans n'avoient pas peu produire; edicts onereux à tout le monde, la lie et le marc de toute l'invention des courtiers d'Italie. Que restoit il plus pour accabler le povré peuple, pour accomplir la confusion de ce royaume? On s'estoit plainct aulx estats que multitude d'officiers en la jus-

tice, estoit multitude et longueur de proces; et voilà multiplication de presidens et conseillers, et aultres osficiers es courts souveraines et sieges presidiaulx; voilà receveurs alternatifs d'espices en payant finances, pour multiplier, entretenir, allonger, encherir les proces. On avoit infinies fois mis en avant la suppression ou reglement du nombre effrené de procureurs; et les nous voilà, non pas innombrables seulement, mais successifs et hereditaires; voilà, dis-je, nos proces qui tiennent coste et ligne, et passans de main en main, de pere en fils aulx procureurs, se rendent perpetuels à tous nos descendans. Combien eust il mieulx valleu laisser le roy en paix, qui ne vacquoit, lors de ceste Ligue, qu'à r'establir la justice en son royaume, qui consultoit si soigneusement les principaulx de ses courts souveraines des moyens plus propres de restablir l'ordre en toutes choses? On avoit aussi de long temps apperceu que nombre d'officiers au maniement des finances n'y apportoit que dommaige et diminution; que l'escu sortant des mains du povre peuple, passant puis apres par tant de financiers, ne revenoit pas à ung teston en la bourse du roy. Et de là estoit né ce conseil de remettre sus la façon ancienne, que tous les deniers royaulx seussent portés tout droict en l'espargne du roy. On y espargnoit, par ce moyen, et les comptables et les comptes; on y espargnoit les deux tiers des finances; et d'ung tiers par ceste espargne, et plus, le roy, sans s'incommoder, eust soulagé son peuple. Que ferons nous maintenant qu'on nous donne nouveaulx generaulx et generalités? qu'on nous remet sus sans aulcune raison les elections, qu'avec tant de raison on avoit supprimees? qu'on nous rend hereditaires les offices des chambres des comptes, et tous

aultres offices venaulx? c'est à dire qu'on rend les finances du royaume patrimoniales, hereditaires, venales, et à ceulx qui les manient, et à ceulx qui jugent de leur maniement? Ce sont de belles successions que le differend de la succession, si mal à propos mis en avant, nous a apprises; successions de plaideurs et de chicaneries; successions de larrons, de peculats, de mangeries; mille successeurs du vivant mesmes du roy en ce royaume, puisqu'ils succedent à ses finances.

Le roy proposoit, avant ces remuemens, de soulager son povre peuple; et voilà qu'on l'a reduict à ceste extremité de l'accabler. Il voulloit degager son domaine; et il le vend à plein; r'abbaisser les tailles et les aides; et il les redouble, mesmes il les vend, ce qu'il ne seit jamais. Il voulloit oster toutes les vieilles daces; et en voici de nouvelles d'heure à aultre, et de tant de sortes, qu'il nous fault ung calepin pour en sçavoir les noms: toutes ces surcharges, toutes ces inventions, engeances de la Ligue, qui n'a pas voulleu laisser loisir au roy de bien faire à son peuple, envieuse du bien, du repos, du restablissement de ce royaume; envieuse de l'honneur que s'acqueroit le roy de l'avoir restabli, de l'affection et de l'amour qu'il se gaignoit au dedans de son peuple, de lui faire sentir ung allegement apres tant de travaulx.

Et ne pensés pas aussi que les chefs de la Ligue n'en retirent bien le principal profict. Car, oultre ce qu'une partie de ces edicts nouveaulx est dediee à l'entretien de la guerre, qu'ils ont creée, qui se conduict par leurs mains, et, par consequent, leur passe entre les doigts; on sçait que particulierement M. de Guise a obteneu l'edict des dix vendeurs de maree, et l'edict des douze vendeurs de bestail à Paris; l'edict qui nous cree les

receveurs alternatifs pour les espices, l'edict d'ampliation à tous sieges royaulx pour exploiter partout le royaume en finançant: que M. de Mayenne a eu aussi les lieutenans de robbe longue en chaque election; et que tous deux participent à l'heredité des offices venaulx et des chambres des comptes; eulx, qui debvoient abolir par ung nouveau edict toutes les vieilles daces; eulx, qui debvoient r'amener, selon qu'ils protestoient, le siecle du roy Louis XII en ce royaume.

Peult estre auront ils mieulx traicté la noblesse; car ils la veullent amadouer en tant qu'ils peuvent; et peult estre l'auront ils remise en sa splendeur; car ils se disent princes de foi; et ils le promettoient. Nous le pouvons tous sçavoir, qui avons essayé leurs armees, si onc les maisons des gentilshommes, qui estoient auparavant sacrees, ont esté moins respectees que par leurs trouppes; si des Huns, des Goths et des Vandales on eust peu attendré pire traictement qu'on a eu d'eulx. Ceulx du contraire parti, parce qu'on voulloit verser la haine de la guerre sur le roy (qui y estoit forcé), ont trouvé de la faveur; parce aussi qu'ils composoient, par le moyen de leurs amis, moitié marchandise, et moitié guerre. Les catholiques tout au rebours, parce qu'ils s'asseuroient en eulx mesmes, en leurs privileges, leurs services, leurs merites, ont esté comme exposés en proye, ont esté traictés comme ennemis et estrangers.

Je laisse que, des surcharges que semble porter le tiers estat, la noblesse est plus chargee que lui. Et c'est en quoi nous nous flattons ordinairement. Car, soubs ombre que nous n'avons pas compté l'argent, on nous faict accroire que nous ne le payons poinct; comme si, en la saignee, le sang sortoit seulement du bras

où on la faict, et non pas des parties plus haultes qui ont à le remplacer incontinent. Certes, si le metayer est ruyné, il est evident que c'est le gentilhomme qui en souffre. Si les daces se redoublent sur les marchandises, c'est le gentilhomme qui plus porte; qui plus achete de soie, acquitte la douane; qui plus de chevaulx, est chargé de l'edict des courtiers; qui plus se pourmene par pays, des entrees des vins, des bleds, des chairs, du redoublement des aides, de l'impost sur les hostelleries. Disons plus, que qui a plus de terres, coustumierement aura plus de proces; et pour ce, ce sommes nous, à proprement parler, qui sommes chargés des nouveaulx presidens, conseillers, lieutenans et officiers, et qui payons les receveurs alternatifs d'espices, qui avons à soldoyer l'heredité des procureurs postulans. Le coup de lancette se donne en la peau du paysan, du marchand, de l'officier, du procureur, etc. Le premier sang, le premier argent sort de leur bourse; mais il se remplit des plus haultes parties. Ils se refont tous à nos despens. Car le paysan sçaura bien encherir ses labeurs et ses fruicts; le marchand faire son compte, et hausser ses denrees; l'officier nous debiter par le meneu ce qu'il aura payé en gros; le procureur eslargir ses lignes, enchem ses escritures et ses pas: tous enfin recouvrent leurs avances. Et sur qui, que sur les gentilshommes qui demeurent sur leur perte, et ne peuvent pas la recouvrer d'ailleurs ni de plus hault?

Quant à nos honneurs, vous vous souvenés qu'en leurs protestations ils debvoient remettre toutes choses en splendeur, loger ung chacung en son degré, faire rendre les gouvernemens à ceulx qu'ils en pretendoient avoir esté ostés, etc. Et parce qu'il faisoit mal au cœur

à quelques ungs de voir quelques gentilshommes pres du roy, qui, par la faveur et amitié qu'il leur portoit, avoient atteint aulx plus grands honneurs tout en ung coup, ils se prevaloient de ce subject pour nous envenimer. Mais vous vous ressouvenés aussi qu'en paix faisant ils n'en dirent jamais ung seul mot; qu'ils n'ont pas faict remettre ung seul de ceulx pour qui ils se sembloient formaliser. Quant à ceulx qu'ils decoupoient en leurs escrits, ils ont recherché leur bonne grace vilement, et ont tasché à les obliger en toutes sortes. Et de faict, vous les voyés, et ils les voyent, et plus grands, et plus auctorisés que paravant. Je ne touche poinct au choix qu'a faict le roy; je ne touche poinct à leurs merites; je sçais qu'il n'y a si grande dignité qui ne soit ouverte à la noblesse, où le bras aussi de la vertu ne puisse atteindre. Mais je veulx que nous recognoissions les pretextes qu'ils prennent, et comme ils se jouent de nous à leur plaisir; et que nous sçachions qu'ils se servent de nos choleres, de nos mescontentemens et de nos deplaisirs, et, tout aussitost qu'ils en ont faict, ne s'en soubviennent plus.

Au moins auront ils faict du bien au clergé; au moins auront ils faict quelque chose pour l'Eglise; l'Eglise, leur principal pretexte; le clergé, qui s'engageoit et se vendoit si volontiers pour eulx. Voyons: ils avoient promis de dissiper les huguenots en France; et voilà qu'ils les y ont unis estroictement; et voilà qu'ils les ont reunis, et reconciliés en toutes nations, François, Allemans, Anglois, Danois, Escossois, Suedes et Suisses; et voilà qu'ils les ont faicts associer avec nos princes catholiques et les principaulx seigneurs de ce royaume. Le parti de leur relligion se reunit, et le nostre se divise ouvertement. Combien eust il mieulx

432 REMONSTRANCE AUX TROIS ESTATS

valleu y proceder par sainctes admonitions, par doulce conversation, par bon exemple? Moyens peult estre plus lents pour les impatiens, mais salutaires au moins, et asseurés; moyens peult estre moins agreables aulx pretendeus medecins de nostre maladie, mais au moins utiles, mais au moins non dangereux pour le malade.

Et puis, qu'y ont mesmes proficté ceulx du clergé? Car quel de tous les evesques se peult dire avoir esté reintegré, quelques frais qu'il ait faicts? Quel avoir receu amendement par leurs armes? Au contraire, MM. d'Ambrun, de Lodeve, Sainct Pons, et aultres ont ils pas perdeu tout de nouveau leurs eveschés? Et combien leur fauldra il vendre de temporel pour les r'avoir de force? Et toute l'affection, toute l'ardeur d'engager, de vendre, de contribuer, sera elle pas evaporee premier?

Mais voulés vous voir aussi que ce ne n'estoit rien que pretexte? Les chefs de la Ligue s'escarmouchent, ce nous semble, quand on parle de prescher en France: ils ont extorqué edict expres du roy pour l'empescher. Et ils ont permis et consenti aulx gentilshommes du parti contraire, composans pour leurs maisons, d'y avoir libre exercice de relligion, pourveu que de leurs maisons on ne leur feist la guerre. Ils ont offert la mesme condition à villes, à chasteaulx et à particuliers. Ils souffrent à leurs Reystres, au milieu de leur armee, d'avoir leurs ministres et leurs presches. Ils ont presché dans les cimetieres et dans les eglises; ils ont celebré leur cene publicquement dedans leur camp. Ce qui se permet par eulx à quelques ungs, pourquoi moins l'aura permis le roy à tous? Ce qu'ils auront volontiers souffert aux estrangers, pourquoi moins le roy à ses subjects? Ce qui leur sera zele d'eglise, ce qui leur

sera ou meritoire ou veniel, pourquoi note d'heresie au roy? pourquoi damnable ou mortel à leur superieur?

Ces gens ont volé enfin, et violé les lieux sacrés. Ces gens ont pillé et rançonné les presbtres et moines. Ces gens, soubs ombre de pieté, ont perpetré cent mille impietés. Ces gens, par plaisir et de gaieté de cœur, nous ont epuisés de biens, nous ont tous noyés de maulx. De tant et de si grands maulx, quel bien nous en revient? quel au peuple? quel à la noblesse ou au clergé? quel en general ou en particulier? Et qui jamais feit du mal, au moins s'y voulleut opiniastrer, que pour espoir du bien? Ains pourrois je dire encores quel bien ont ils faict à eulx mesmes? Car Dieu a maudit leurs actions de telle sorte, que cependant qu'ils pensent souder leurs confrairies dedans les villes, sous pretexte de l'auctorité que la guerre leur donne, les meilleures places qu'ils eussent surprises, se sont retirees de leur subjection, Agen et Auxonne, et quelques aultres. Et notés que cest exemple, pour peu de mauvais visage qu'on leur fasse, s'en ira bientost suivi partout ailleurs.

Que s'ensuit, puisque ceste Ligue est inutile à elle mesmes, et puisque la guerre est dommageable à tous; puisqu'en tout ung an, et en sa plus grande vigueur, elle n'a faict chose qui vaille; puisqu'au lieu d'acheminer, elle ne va qu'en reculant; sinon que nous recourions à quelque aultre remede sans nous obstiner en cestui ci? en cest antimoine, corrosif et venimeux, qui chasse le bon et le mauvais ensemble, et souvent plustost le bon que le mauvais? qui, soubs ombre de vomir l'humeur peccante, nous fera jetter jusques au sang, et peult estre l'ame dans le sang? Certes, il nous fault tous addresser à nostre roy. Il est prince debonnaire,

434 REMONSTRANCE AUX TROIS ESTATS, etc. et qui aime son peuple. Il sçait bien qu'ung roy meurt en la mort de son royaume. Il est sans doubte blessé en nous plus que nous mesmes. Il aura pitié de soi en nous et en nos playes. Decouvrons les lui tout privement, et lui monstrons ceulx qui nous menacent. Disons lui tout hault les maulx que la Ligue nous a faicts. Supplions le, selon sa prudence singuliere, d'y trouver remede durable, et compatible à la disposition de nostre corps; remede que nostre debilité puisse porter, remede pour convertir et adoucir l'humeur, non pour, en pensant l'evacuer, mettre au bas nostre corps. Pryons Dieu surtout qu'il tourne vers ce royaume le doulx œil de sa misericorde; car qui pourroit soubstenir l'œil rigoureux de sa justice? qu'il assiste nostre roy de son esprit pour manier son sceptre, lui inspire de bons conseils, lui suscite de bons conseillers, l'emplisse de force et de courage pour composer les humeurs, et consolider les playes de ce royaume, c'est à dire pour esteindre les malheureuses engeances de la Ligue, pour rendre une saincte, heureuse et perdurable paix en cest estat.

LXXXVII. — * DISCOURS VERITABLE

Des actions et comportemens de M. de Chastillon pendant le temps qu'il a esté à Millau en Rouergut, et de la sedition que les consuls et habitans au roient esmeue à l'encontre de lui.

IL pleut au roy de Navarre envoyer commission à M. de Chastillon pour aller commander en Rouergue, comme son lieutenant general, avec pouvoir d'assembler les consuls, jurats, capitaines et gens de guerre,

DISCOURS DES ACT. DE M. DE CHASTILLON. 435 quand bon lui sembleroit; leur ordonner ce qu'il verroit estre à faire pour le service du parti dudict seigneur roy; faire faire toutes fortifications, reparations et demolitions de villes, ainsi qu'il verroit estre de besoing; les pourvoir ensemble, les places et chasteaulx de bons gouverneurs et capitaines; les changer, demettre et destituer; lever et assembler gens de guerre, tant de cheval que de pied; faire fonte d'artillerie, confection de poudres et salpestres; assieger places, soubstenir siege; faire traictés et compositions, imposer deniers pour le soubstenement de la guerre; pourvoir et donner ordre à la police, tenir la main à la justice, et generalement faire et ordonner tout ce qu'il cognoistroit et jugeroit estre expedient et pressé pour le bien du pays, desense et seureté des villes et advancement du parti, tout ainsi qu'eust faict ou peu faire le roy de Navarre, s'il y eust esté en personne, comme appert par les lettres de commission, du 28e jour d'avril 1586.

Long temps auparavant qu'il eust ladicte commission, les consuls et habitans de Millau, sçachant qu'il avoit pres de lui ung Anglois nommé Dubois, homme bien expert et entendeu en faict de fortifications, lui escrivirent qu'il lui pleust le leur envoyer, pour ordonner et conduire les fortifications qu'ils voulloient faire en leur ville, pour la crainte qu'ils avoient d'ung siege, d'autant que ceulx de Rhodez estoient tousjours apres d'y faire venir l'armee de M. de Mayenne, pour laquelle ils avoient desjà les munitions et toutes aultres choses prestes, ce que M. de Chastillon leur accorda.

Depuis, ils envoyerent, par trois diverses fois, leurs deputés vers lui, tant auparavant qu'apres que ladicte commission eust esté envoyee; mesme le sieur Denaulx, ministre accompagné dudict Dubois, et ung nommé

Valmagnier, pour le supplier d'accepter le gouvernement de Rouergue, et lui escrivirent des lettres pleines de toute l'amitié et affection qu'ung peuple sçauroit porter à ung chef qu'il aimeroit et honoreroit beaucoup: singulierement, au mois d'avril 1586, que le sieur de Cornusson ayant pris Padies, Tatunes et quelques aultres forts, faisoit semblant de prendre k chemin du Vabrez; et ceulx de contre party, du pays de Rouergue, commençoient à se preparer pour bloquer et serrer Millau de toutes parts, afin d'empescher leur recoite. Car, lors ils le supplioient d'y aller en toute diligence, avec quinze ou dix huict cens arque busiers; et le sieur Denaulx, qui estoit en ce temps là dans Millau, escrivoit qu'ils estoient en extresme necessité, usant de ceste comparaison, qu'ils avoient besoing d'ung medecin tel que M. de Chastillon, pour remedier au mal qui les pressoit, et qu'ils aimoient mieulx souffrir ung cautere de lui, que les huiles lenitives d'ung aultre. Le suppliant tres humblement d'exaucer les desirs et requestes du pays, lequel s'en alloit perdeu, s'il ne le secouroit. Et parce qu'il falloit du temps pour assembler ces trouppes, et que la commission du roy de Navarre n'estoit encore veneue, le sieur Denaulx reveint vers lui, avec des lettres plus pressantes que les premieres; lui remonstrant qu'ils avoient trois pieces d'artillerie; à scavoir, une canon, une conlevrine et une bastarde, et les munitions prestes pour attaquer les forts des ennemis, et s'eslargir et ne bouge de Montprés jusques à ce que M. de Chastillon eus dressé et donné le rendez vous à toutes ses troupes. tant il craignoît qu'elles n'y fettssent à temps pour favo riser la reussite.

Quand il seut là au lieu qu'il voulloit commence

d'attaquer les ennemis par les petits forts qu'ils tenoient es environ de Millau, cognoissant bien qu'il n'y avoit des munitions pour s'addresser à une bonne place, il falleut que, pour complaire à messieurs de Millau, il allast assieger Compierre là où on lui proposoit les choses si aisees et faciles, qu'en moins de cinquante vollees de canon, il debvoit emporter la place. Cependant, l'ayant batteu à l'endroict du lieu qu'on lui avoit designé le plus foible, il trouva qu'il avoit esté si bien remparé et fortifié par derriere, environ six mois auparavant, sans que messieurs de Millau en eussent rien sceu, qu'il estoit impossible d'aller à l'assault pour la prendre par là; et quand il eust changé la batterie ailleurs, la poudre et les boulets veinrent à manquer, de maniere que les ennemis eurent loisir de s'assembler, tant du costé de Rouergue et d'Auvergne, que du Gevaudan; et veinrent mesmes si fort de cavalerie, au secours des assiégés, qu'ils estoient six contre ung. Toutesfois Dieu feit la grace à M. de Chastillon de les repousser si bien qu'une bonne partie de la noblesse de Rouergue y feut defaicte, et le reste mis en fuite.

Or, comme il campoit encores là, attendant la poudre et les boulets, à mesure qu'on les faisoit dans Millau, veinrent nouvelles de la veneue de l'armee de M. le duc de Joyeuse, qui estoit parti de la court en intention d'aller assieger et prendre Millau, pour le ruyner comme a faict Marvezols et Peyre, et neantmoins feut mandé ung advis à M. de Chastillon, par le capitaine La Roche, qui estoit lors dans Marvejols, que ledict sieur de Joyeuse avoit debandé une partie de son armee pour aller donner sur ses trouppes, ce qui feut occasion qu'il leva le siege de Compierre, en retira son artillerie dans Millau; puis, entendant que M. de Joyeuse

avoit pris le Malzieu et assiegé Marvejols, apres avoir pourveu à l'ordre des fortifications de Millau, il s'en alla, avec ses trouppes, parquer à Molines, lieu plus proche des ennemis, attendant les forces de Languedoc, et pour essayer de secourir la place; mais les assiegés s'estant rendeus par composition, et l'armee tournant la teste vers le Rouergue, il se renforça de quelque nombre de capitaines et gens de guerre de Languedoc, et retourna dans Millau, resoleu de soubstenir le siege pour la defense et conservation de la ville.

· Il pensoit que l'exemple de Marvejols deust esmouvoir messieurs de Millau à ne rien espargner pour leur conservation; car, apres la composition faicte que les habitans sortiroient avec leurs armes, bagages et vis saulves, ils feurent tués pour la pluspart, et leurs femmes et filles violees, et la ville mise au sac, et apres rasee et entierement destruicte; mais ils portoient s impatiemment la despense des gens de guerre, qu'ils en laissoient toujours quelques ungs à la rue, sans leur donner logis; tellement qu'ils estoient contraincts de se fourrer dans les logis des aultres pour vivre, ou de s'en aller, comme il adveint au capitaine Baptiste, lieutenant du capitaine Fabre, lequel ayant esté blessé d'une arquebusade à Sainct Georges, et ne pouvant avoir à 5011 retour ung logis, feut contrainct de s'en retourner mal content à Uzes, en sa maison; et le pis estoit que ceuls qui avoient charge de faire les logis, soulageoient les riches et surchargeoient les povres; que ce feut cause de plusieurs plainctes et crieries, tant du costé des gens de guerre que des habitans, singulierement de povres qui portoient les plus grands frais de la despense. Que si M. de Chastillon s'en addressoit aulx consuls et aulx riches, leur remonstrant qu'il valloit mieulx despendre une partie de leur bien, en ceste necessité publicque, pour conserver le reste, que mettre le tout en hazard; ils respondoient qu'ils aimoient mieulx mourir tout d'ung coup que d'estre dechirés par morceaux; et combien que l'armee des ennemis feust desjà logee es environs de Millau, où les gabions estoient tout prests, l'artillerie s'avançant tousjours, ils ne se pouvoient persuader qu'il y eust du danger pour eulx, se vantant qu'ils avoient gardé la ville jusques ici, et qu'ils la garderoient bien encores sans les gens de guerre qui y estoient. Ils en voulleurent bien venir là ung jour que M. de Chastillon avoit faict sortir les compagnies pour aller à la fascine et au rempart, de leur fermer la porte et les laisser dehors à la mercy des ennemis, si, par cas d'adventure, il n'y eust eu une compagnie qui n'estoit encores sortie, laquelle il feit demeurer dedans pour garder le logis. Et autant en voulleurent ils faire une aultre fois, à une sortie que le sieur de Sainct Auban, lieutenant de sa compagnie, feit sur la cavalerie des ennemis qui se posta en bataille tout aupres de la ville.

Les plainctes des povres gens continuant à cause des logis, monsieur de Chastillon feit apporter vers lui le livre de la taille, en feit appeller quelques ungs de ceulx qui estoient en reputation d'estre les plus gens de bien, pour lui donner advis des moyens, facultés et industries d'ung chacung, afin d'egaliser la despense des gens de guerre, suivant les reglemens du roy de Navarre; mais il decouvrit en cela tant d'animosités et de vengeances particulieres, qu'il feut contrainct de prendre ung aultre expedient, qui estoit de faire vivre les soldats de munition; et pour empescher qu'il n'y eust aulcung abus, il feit mettre en bataille toutes les

compagnies à la place, et en bailla les rolles par nom et surnom aulx consuls; mais l'ordre de la munition ne feut pas plustost commencé, que le pain veint à manquer; et lorsqu'en plusieurs maisons de ville M. de Chastillon voulleut remonstrer aulx consuls et leur conseil, qu'il falloit visiter les grains, les farines, et prendre du blé pour la munition, à la charge d'egaliser apres le tout sur le pays, et pourvoir au remboursement des particuliers, ils se dresserent tous en pied, et lui dirent avec grosses paroles qu'ils n'estoient poinct pupilles. pour se laisser manier de la façon; qu'ils estoient asses capables pour mesnager leur bien, et qu'ils ne permettroient jamais qu'il feust mis en commun, mais que chacung portast sa charge comme se pourroit; et au partir de là, ils dresserent ung escript qu'ils porterent le soir à M. de Chastillon, par lequel ils lui remonstroient que ce qu'il leur avoit proposé des munitions estoit une ouverture maudite et tyrannique, laquelle ils pensoient lui avoir esté faicte par aulcung de ses capitaines qui voulloient faire ung magasin de blé auls despens de la ville, pour s'en donner apres par les joues. usant là dedans de plusieurs aultres paroles piquantes et outrageuses, comme s'ils eussent eu affaire aulx plus meschans et plus scelerats tyrans du monde. Il ne voul. leut poinct monstrer cest escrit aulx capitaines, pour ne les irriter, de peur qu'ils ne l'abandonnassent tous au besoing, ou ne feissent quelques desordres; mais estant desjà nuict, il alla trouver le sieur Delnaux, auquel. ayant monstré cest escrit, se plaignant de l'indignité de ces gens, il lui dict que c'estoit ung peuple rude, qui ne sçavoit comme il se falloit comporter à l'endroict de ses superieurs; et qu'au demeurant il n'avoit jamais porté aulcune foule ni despense extraordinaire, ce qui

L'armee des ennemis n'osant attaquer Millau, faisoit semblant tantost d'aller assieger Severac, et tantost de passer le Tarn, pour aller au Vabrez, par quoi M. de Chastillon, desirant conserver le tout, en soulageant Millau, envoya une partie de ses troupes à Severac, où estoit M. d'Andlot, son frere, et voullant envoyer le reste au Vabrez, M. de Panat le prya de lui bailler cinq cens arquebusiers, pour mettre dans Requista, lui remonstrant que si les troupes passoient le Tarn, pour aller au Vabrez, il estoit à craindre qu'elles se debandassent pour retourner en Languedoc, joinct qu'il craignoit que Requista feust attaqué; ce qui lui estant accordé, ledict sieur de Panat gaigna le devant pour aller preparer les logis; et comme le capitaine Carlincas qui conduisoit les cinq cens arquebusiers, seut bien pres de là, ledict sieur de Panat le contremanda, disant que sa femme estoit allee à Rhodez pour s'accorder avec M. de Joyeuse, et qu'il n'avoit, par ce moyen, besoing de ceste trouppe. Cependant l'armee venant à tourner la teste à bon escient, vers le Vabrez, M. d'Andlot y alla avec tout ce qu'il avoit, sauf une compagnie de cinquante hommes de pied, qu'il laissa à Severac, en garnison, de quoi madame d'Arpajon, qui est catholique, prit ung tel advantage, qu'ayant introduict dans le chasteau une bonne partie de ses subjects (desquels on ne se feust jamais doubté qu'ils sont de la relligion, elle auroit chassé et mis hors de ladicte compagnie, monstrant par là, à ceulx de Millau, le chemin d'en faire autant, comme ils ont faict depuis.

Or, les ennemis ayant batteu et pris ung meschant petit lieu appellé Rissene, qui est par desà la riviere du Tarn, prirent le chemin de l'Albigeois, sans passer au Vabrez; au moyen de quoi M. de Chastillon feit partir le sieur d'Andlot, son frere, avec toutes ses troupes. pour les suivre à la queue, sans retenir aupres de lui dans Millau que le sieur de Sainct Auban, lieutenant de sa compagnie de gendarmes, avec sept ou huict hommes de cheval de la compagnie du capitaine Saurin, qui estoit d'environ cinquante hommes de pied: et parce qu'il y avoit ung chasteau qui est au roy, par lequel la ville pouvoit offrir aisement surprise, et qu'il n'estoit possible qu'une seule compaignie de cinquante hommes gardast toute la ceinture des murailles. il commanda aulx consuls de faire continuer la garde bourgeoise comme ils avoient accoustumé; et, apres avoir faict mettre l'artillerie au bas de la tour de la porte de Vayzols, qui est aupres du chasteau, et faict murer ladicte porte dedans et dehors, il commanda audict capitaine Saurin de garder ladicte tour et le chasteau, et pareillement la porte de la ville de Millau. dejour pour soulager d'autant les habitans, qui n'estoient

particulieres.

Apres qu'il eust establi cest ordre, les consuls, qui avoient tousjours commandé absolument à la ville, et ne voulloient que M. de Chastillon y prist aulcung pied, commencerent à se plaindre de lui, disant que c'estoit contre leur liberté, le pryant de ne bailler la garde du chasteau à aultre qu'à eulx; ce qui le feit entrer en opinion qu'ils lui en voulloient faire une, et lui fermer la porte de la ville, quand il en seroit dehors, comme ils avoient faict à tous les aultres gouverneurs qu'ils avoient eus auparavant, tellement qu'il n'en voulleut faire aultre chose; et là dessus l'assemblee des estats. du pays venant à se tenir dans Millau, il y feut encores parlé de ce faict : pourquoi ayant M. de Chastillon representé ce qui estoit de l'auctorité que le roy de Navarre lui avoit donnee, remonstrant à messieurs de Millau que la compagnie du capitaine Saurin ne leur coustoit rien, estant payee et entreneue aulx despens du pays, et qu'ils n'avoient occasion de craindre qu'il leur voulleust oster leur liberté, d'autant qu'il n'y avoit ni vivres, ni lits, ni aultres meubles dans le chasteau pour s'y tenir, tous les capitaines, membres et soldats de la compagnie estans entre leurs mains, logés à la ville, sans qu'il entrast en garde dans ledict chasteau, sinon une escadre apres l'aultre par tour de rolle; joinct qu'il permettoit aulx consuls, et à tous les gens de bien et d'honneur de la ville, d'y entrer et sortir avec armes ou sans armes, de nuict et de jour, à toutes les heures que bon leur sembloit, et d'en chasser mesmes tous les soldats qu'ils auroient pour suspects; offrant, en oultre, d'oster ladicte garnison, et remettre le chasteau entre leurs mains, quand le roy

de Navarre le commanderoit par une simple lettre, quand elle ne seroit que de quattre doigts de papier. Il feut enfin conveneu et accordé en pleine assemblee, qu'ils envoyeroient de part et d'aultre vers le roy de Navarre, pour lui faire entendre leurs raisons respectivement, et qu'il seroit obei à ce qu'il lui plairoit en ordonner; et à ces fins, M. de Chastillon escrivit à M. de Joyeuse, pour avoir deux passeports, ung pour le deputé de Millau, qui feroit le voyage, et l'aultre pour celui que M. de Chastillon envoyeroit.

Ce faict accordé, M. de Chastillon n'ayant moyen de faire la guerre en Rouergue; à cause de la rigueur de l'hiver, s'en alla en Languedoc trouver M. de Montmorency, où il ne seut gueres de jours que ceulx de Millau escrivirent des lettres aulx eglises de Montpellier et Nismes, pleines de calomnies et d'ingratitude, à l'encontre de lui, par lesquelles ils se plaignoient qu'il leur avoit osté leur liberté, au moyen de la citadelle qu'il avoit faicte au chasteau du roy, pryant les dictes eglises d'en escrire et interceder pour eulx vers le roy de Navarre, et leur departir leurs bons advis et conseils à ce que la ville feust remise en l'estat qu'elle estoit auparavant. Ces lettres feurent portees au temps qu'on avoit convoqué une assemblee des eglises du Bas Languedoc, qui se debvoit tenir bientost apres à Nismes; qui feut cause qu'on leur feit response qu'ils y envoyassent leurs deputés, et qu'ils pryeroient M. de Chastillon de s'y trouver de mesmes, pour adviser à composer toutes choses au contentement des ungs et des aultres : à quoi M. de Chastillon s'accorda fort volontiers de son costé, se soubmettant de faire tout ce que les eglises lui conseilleroient pour le contentement desdicts de Millau, pourveu qu'elles le feissent trouver bon au roy de NaDES ACTIONS DE M. DE CHASTILLON. 445 varre, si tant estoit qu'ils ne voulleussent attendre son commandement par les deputés qu'ils debvoient envoyer vers lui respectivement.

Mais ceulx de Millau, qui avoient escrit ces lettres pour aller au devant du blasme qu'ils pouvoient en avoir à cause de l'attentat qu'ils avoient projetté de commettre, ou pensoient peult estre qu'on les deust conseiller d'en user ainsi, sans attendre les assemblees des eglises, ni le jugement et commandement du roy de Navarre, auroient conspiré, et executé le plus meschant, plus desloyal et plus malheureux attentat que gens de la relligion ayent jamais commis contre ceulx de ce parti.

Car le vingt huictiesme jour de decembre dernier, 1586 (qui estoit ung jour de dimanche), ils dresserent trois embusches au sieur de Sainct Auban et au capitaine Saurin, en trois maisons particulieres, aupres du temple où se faict le presche. Il y avoit deux de la conspiration qui se debvoient aller mettre justement derriere le sieur de Sainct Auban et le capitaine Saurin, quand ils seroient assis au temple pour ouïr le presche, portant chacung ung pistolet soubs le manteau, lesquels, apres avoir receu le signe que l'ung debvoit donner à l'aultre, les debvoient tuer, à sçavoir, chaeung le sien, d'ung coup de pistolet dans la teste; et cela faict, ceulx des embusches debvoient sortir pour aller saisir le chasteau, et mettre la garnison hors la ville; mais de bonheur il y eut ce jour là ung mariage de l'ung des plus apparens de la ville; au moyen de quoi, les traistres, craignans d'executer ce desseing, à cause de l'horreur du crime et la circonstance du lieu et de l'action, se teinrent cois sans en faire semblant: de quoi advertis ceulx des embusches, ils prirent

soubdain une aultre resolution, qui estoit de les tuer au sortir du presche; mais, voyant venir le sieur de Sainct Auban, suivi de quelque nombre de soldats, qui, par cas d'adventure, et sans y penser, avoit mis son espee sur le col, il en veint opinion qu'il avoit receu quelque vent de ladicte entreprise; de sorte qu'ils n'oserent sortir pour l'attaquer.

Ce desseing n'ayant peu reussir, le sieur Duluc, premier consul, dict au capitaine Maliole (qui est de la ville) qu'il regardast de s'accointer du capitaine Fevre, lieutenant du capitaine Saurin, pour le caresser et entretenir; et, lorsqu'il seroit de garde au chasteau, l'attirer en quelque maison pour jouer toute la nuict, s'il estoit possible, avec lui, afin de donner moyen aulx consuls et habitans de surprendre tant plus facilement le chasteau, lui promettant de lui fournir argent quand il perdroit bien cent escus.

Et, comme ce moyen ne peut encores sortir à effect, il adveint que le troisiesme jour de janvier 1587, le sieur de Sainct Auban estant allé le jour precedent à Sainct...., tout le peuple de Millau se meit en armes au son du tocsin, jusques aulx semmes et enfans, lesquels portoient des couteaulx ou des pierres entre leurs mains; et les povres gens qui n'avoient des armes, portoient des broches ou des leviers, fremissans de courroux, et remplissans la ville de cris et menaces espouvantables contre les soldats, disans que c'estoit l'heure et le temps qu'il falloit se mettre en liberté Surtout le capitaine Saurin seut estonné que n'estant jamais sortis quattre ou cinq hommes de guerre de la ville pour se joindre aulx troupes de M. de Chastillon, quand il falloit combattre les ennemis, s'excusans qu'ils n'avoient des armes, il en veit ce jour là plus de

DES ACTIONS DE M. DE CHASTILLON. 447 cent ou six vingts armés de cuirasses, et une bonne partie qui avoient des pots et des brassarts.

Au commencement de ce tumulte, les soldats qui estoient par la ville, voullant sortir avec leurs armes, pensant que ce feust une allarme que les ennemis eussent donnee, feurent incontinent saisis et desarmés; et le capitaine Saurin, qui venoit de visiter la garde de la porte de la ville, sans se doubter de rien, pris par huict ou dix hommes armés de pots et de cuirasses, entre lesquels estoient le sergent Cavalery, le caporal Maciole, frere du capitaine Maciole, et ung nommé Courtillac, lesquels, renjans le nom de Dieu, et lui portans les ungs leurs pistolets, le chien abatteu, tout contre la teste, et les aultres, la poincte, de leurs hallebardes au corps, lui dirent que c'estoit trop commander dans Millau, qu'ils en voulloient estre eulx mesmes les maistres et les gouverneurs, et que s'il faisoit semblant de bouger, il estoit mort. Or, le capitaine Fevre, son lieutenant, estant lors dans le chasteau avec huict. ou dix soldats de l'escadre, qui estoit entré en garde la nuict precedente (les aultres estans aller dejeusner à la ville armés, estoit la coustume que pendant que les ungs alloient prendre le repas, les aultres gardoient jusques à leur retour), ceulx qui tenoient le capitaine Saurin lui attacherent les bras et les mains par derriere avec des cordes, et, le voullant mener devant le chasteau, lui dirent qu'il falloit qu'il le feist rendre incontinent; aultrement, ils le feroient pendré à la veue de son lieutenant; mais, voyans qu'il n'en voulloit rien faire, et qu'au contraire il leur disoit que, s'ils le menoient là, il diroit à son lieutenant que, s'il estoit si lasche de le rendre, et que Dieu lui feist la grace d'eschapper de leurs mains, il le feroit pendre, ils le menerent à la maison du sieur Gally, et le laisserent là tout attaché, en la garde de sept ou huict, apres avoir blessé d'hallebarde dans l'espaule ung sien caporal, nommé Michel, et d'ung coup d'espec à travers le corps ung aultre, appellé Mellon, qui estoient avec lui, dont on pense qu'ils sont morts depuis.

Cependant on se saisit des papiers, armes et munitions, et de plusieurs machines et engins de guerre que M. de Chastillon avoit laissees en son logis, à lui appartenans, et des coffres, armes et habillemens du sieur de Sainct Auban, qu'il avoit aussi en son logis; le tout de grande valeur. Apres, les capitaines La Roviere, Maleole, Domeyran et le sergent Gattery, suivis d'ung grand nombre d'habitans, montans sur la muraille, allerent donner ung grand coup de petard à la porte de la tour de l'Ayrolle, où ils prirent prisonniers trois ou quattre soldats que le capitaine Fevre y avoit envoyés du chasteau, et se saisirent de l'artillerie qui estoit au bas de la tour.

D'aultre part, le peuple assiega le chasteau de tous costés, les ungs par le pied, les aultres par le faite des maisons et par les pigeonniers de l'entour qui commandent la courtine, desquels ils blesserent deux soldats, et percerent à jour les guerites à coups de mousquets, si bien que nul ne s'y pouvoit tenir; et quand l'artillerie feut saisie, une grande troupe de ce peuple, hommes, femmes et enfans, courans comme ung torrent desbordé, l'alla prendre et mener devant le chasteau. Lors, le capitaine Fevre n'ayant que sept ou huich hommes avec lui, sans vivres, sans munitions et sans esperances d'aulcung secours; entendant que les consuls le faisoient sommer de se rendre sans se faire battre ni massacrer par le peuple, leur escrivit les conditions

DES ACTIONS DE M. DE CHASTILLON. 449 de la composition qu'il voulloit avoir par une lettre de laquelle et de la capitulation qui lui feut accordee au pied, la teneur s'ensuit:

« Messieurs les consuls, je veulx que mon capitaine que tenés prisonnier, ait la vie saulve, ensemble, moi et tous les soldats, et que nous laisserés sortir avec armes et bagages, le tambour battant, la mesche allumee : et que de ce me fassiés une promesse, et que me juriés la foi, ensemble tous les chefs de ceste entreprise, et que vous signiés tous au dessoubs. »

« Nous, consuls et capitaines de la ville de Millau, prevoyant ung grand mal qui pourroit advenir, à cause de la sedition esmeue en la presente ville, promettons au capitaine Fevre, lieutenant du capitaine Saurin, que son capitaine, ni lui, ni aulcung de ses soldats, n'auront aulcung mal; et leur promettons qu'ils sortiront la vie saulve, avec armes et bagages, le tambour battant et la mesche allumee; et que conserverons la ville soubs l'auctorité du roy de Navarre. En foi de ce, nous sommes signés ce 3 janvier 1587. Ainsi signé, P. Aldiguier, Davesnes, Bardt, consuls; La Roviere, Blaliole, Galtier, Cavalery, Banot, Pe-Gurier.»

Ceste capitulation feut faicte le soir assés tard; et combien qu'il feist fort mauvais temps, et que le capitaine Saurin et ses soldats eussent cinq grandes lieues de retraicte, il eut prou à faire à gaigner ce poinct, qu'on les laissast pour ceste nuict dans la ville: encores ne voulloient, les habitans, permettre qu'ils s'en allassent par le pont qui est sur la riviere du Tarn du costé d'en hault, où ils voulloient passer pour ne tomber aulx embusches que les ennemis, advertis de ce desordre, leur pouvoient avoir dressees. Et le lendemain

matin, quattriesme dudict mois de janvier, tout k peuple estant encores en armes, veint au logis da capitaine Saurin, le sergent Cavalery, avec une grande suite de peuple, tout armé, portant ung pistolet au poing, disant qu'il estoit là de la part des consuls pour lui commander de sortir incontinent de la ville avec tous ses soldats, et qu'il se contentast de la courtoisie qu'on lui avoit faicte de les laisser ceste nuict dedans; et comme cestuy là parloit encores, veint le capitaine La Roviere, accompagné d'une aultre trouppe d'environ soixante ou quattre vingts hommes armés, lui dire qu'il rendist, ou feist rendre incontinent, par le capitaine Fevre, son lieutenant (la presente), la capitulation que les consuls et capitaines de la ville leur avoient accordee et baillee le jour precedent, ou qu'ils se resoleussent tous deux de mourir sur le champ. A cela seut respondeu, par le capitaine Saurin, qu'il estoit prest de partir pour s'en aller avec ses soldats, et au demeurant il n'estoit raisonnable qu'il rendist la capitulation, d'autant qu'il falloit que cela lui servist de justification vers M. de Chastillon, pour lui monstrer qu'il n'avoit abandonné la garnison de son gré, mais qu'il en avoit esté tiré par force. Lors le capitaine La Roviere prenant le capitaine Fevre, le meit entre les mains du peuple, et le capitaine Saurin entre les mains de sept ou huict avec de la trouppe, leur commandant de les ailer depescher. Parquoi le capitaine Saurin, se voyant en si grand danger, et sçachant que le capitaine Fevre, qui portoit sur lui l'original de la capitulation, en avoit reteneu une copie, se doubtant bien de ce qui leur adviendroit, lui commanda de la bailler; et, apres que le capitaine La Roviere l'eust entre ses mains, le capitaine Saurin, se tournant vers le peuple, lui dict qu'on DES ACTIONS DE M. DE CHASTILLON. 451 lui rendist au moins tesmoignage en temps et lieu comme on lui avoit osté la capitulation : parquoi le capitaine La Roviere respondit que cela estoit faulx : et quiconque vouldra dire que ce soit la capitulation (dict il en reniant le nom de Dieu) je le ferai mentir.

Le capitaine Saurin, ne pouvant supporter tant d'oultrages et de violences sans descharger son cœur, se prit lors à dire tout hault que c'estoit tres mal recognoistre les bienfaicts qu'ils avoient receus de M. de Chastillon, quand, apres avoir delivré et garanti leur ville et le pays de ruyne toute evidente, on l'en chassoit si indignement. Aulxquels propos le capitaine La Roviere repliqua que c'estoit trop parlé, et qu'il falloit sortir de la ville; et quelques aultres, qui estoient là, mesmes le capitaine Malliole, lui dirent que cela estoit vrai; qu'ils avoient receu beaucoup de bien de M. de Chastillon, mais qu'ils n'avoient rien faict que par le commandement des consuls, et au demeurant que le . capitaine Saurin ne s'estonnast pas de cela, parce qu'ils en avoient autant faict à tous les aultres gouverneurs qu'ils avoient eus, et les avoient passés compagnons pour se maintenir en liberté; adjoustant que si, par cas d'adventure, le sieur de Sainct Auban se feust trouvé dans la ville le jour de ceste esmotion, le peuple estoit resoleu de lui couper la teste, et la faire rouler par la ville comme une boule.

Enfin le capitaine Saurin et ses soldats sortirent de la ville, passant au milieu du peuple qui bordoit la rue d'ung costé et de l'aultre, depuis le logis de M. Gally (où il avoit esté mené le jour precedent) jusques à la porte.

Depuis, ceulx de l'assemblee des eglises de Languedoc, teneue à Nismes au mois de janvier, ayant en-

tendeu ces desordres, tant par le recit qu'en feit M. de Chastillon, que par le tesmoignage du sieur de Sainct Auban, lieutenant de sa compagnie, et d'aulcuns gentilshommes, capitaines et aultres personnages dignes de foi, qui se trouverent dans la ville de Millau au temps de la sedition, mesmes le capitaine Saurin, le capitaine Fevre, son lieutenant et aultres de sa compagnie, ils feurent tellement offensés et scandalisés, qu'ils deputerent les sieurs de Rudanelle et Villette pour se transporter vers lesdicts de Millau, pour leur remonstrer combien l'assemblee avoit trouvé la faulte qu'ils avoient commise injurieuse et de mauvaise consequence, et leur escrivit l'assemblee des lettres par lesquelles les eglises leur remonstroient qu'elles ne pouvoient interpreter aultrement la fin des susdicts advertissemens que lesdicts de Millau leur avoient envoyés auparavant, qu'à ung desseing et propos jà deliberé de venir à la voye de faict dont ils avoient usé à l'encontre dudict sieur de Chastillon, les pryant de lui faire raison de ce qui lui estoit deu, lui rendre tout ce qu'ils lui avoient pris et reteneu, et, au surplus, se conformer, pour le bien, aulx sainctes exhortations et bons conseils desdicts sieurs Rudanelle et Villette, deputés, selon qu'il est plus particulierement porté par les lettres de l'assemblee du 18 janvier 1587.

LXXXVIII. -- * MEMOIRE

De M. de Buzanval, pour le faict de M. d'Espernon.

Le corps de la France est en tel estat, qu'il est besoing que les membres particuliers pensent à se saulver. puisque le chef veult perir : mais d'autant qu'ung corps ne peult, par ordre humain, vivre sans chef, ce sera prudence aulx membres de s'adjoindre à ung qui veuille, en se maintenant, saulver toutes les parties, et, si faire se peult, le chef mesmes qui veult perir.

On ne peult saulver ce corps en s'adjoignant à la Ligue; car il n'y a celui (s'il y veult regarder de pres) qui ne voye que toute ceste liaison reussira enfin en ung monstre hideux et sans teste, ou bien en une infinité de corps nains esquels ne paroistra que la teste, qui se grossira quelque peu de la pasture de ses corps.

Le roy de Navarre, aujourd'hui, est le principal rejetton qui germe naturellement sur ce miserable corps et tige de la France; et de ce seul sang peult estre animé et ramené à sa vigueur naturelle ce jadis tant florissant royaume, et de celui seul se peult faire le ciment propre pour rallier tant de pieces disjoinctes.

Il est donc necessaire que les plus nobles parties, qui ont esté jusques à ceste heure pres du roy, et desquelles quelques unes l'ont quitté, le voyant perir sans se voulloir aider ou permettre d'estre aidé, se repreignent au second chef de l'estat, qui est contrainct de se monstrer et hausser à mesure que le principal et premier se baisse, et auquel la necessité impose ceste loi, d'emprunter pour ung temps l'auctorité du susdict chef, que les ennemis d'icelui preignent par force pour se l'approprier, et en frustrer à jamais ceulx qui en sont vrais successeurs.

Une grande partie des personnes d'honneur et d'entendement de la France, en ceste maladie critique et comme prognostique de la dissolution du corps, ont jetté l'œil sur M. le duc d'Espernon, esmerveillés de ce qu'il a laissé ou esté delaissé de son maistre.

Car, d'autant qu'il a esté, jusques à present, le plus

pres du chef et le plus honoré du roy, les plus élairvoyans jugent assés que sa retraicte (quelque deguisement qu'on y fasse) est l'acces de la Ligue pres de la personne du roy, et que cest acces est ung deces de l'estat.

Ce qu'estant plus que vraisemblable, il est certain que ce seigneur ne se peult plus saulver avec son prince, puisque son prince cherche son salut à la merci de ceulx qui poursuivent sa ruyne; et ce, d'autant plus que le principal pretexte, duquel ils se servent pour accabler le roy, est la haine et calomnies qu'ils mettent sur ledict sieur d'Espernon, par la ruyne duquel ils esperent tant d'advancement en leurs affaires et à l'aneantissement du roy; qu'ils donnent par là assés à cognoistre combien ils estiment la fidelité et courage dudict sieur d'Espernon importer à la conservation de son maistre, puisque, par la ruyne de ce seul seigneur, ils estiment avoir levé toutes les difficultés qui les empeschoient de parvenir à la dissipation de l'estat.

C'est donc à M. d'Espernon à prendre parti, tant pour se garantir en particulier, puisqu'on s'attaque particulierement à lui, qu'aussi pour aider à garantir le public, puisqu'en sa ruyne on cherche la ruyne de l'estat.

Celui est mal advisé qui, pouvant passer la mer dans ung grand et principal vaisseau, le laissant, se jetteroit dans l'esquif, ou qui, ayant le vent en pouppe, et se pouvant servir des voiles, les lairroit pour voguer avec les rames : mais celui qui voit le grand vaisseau dans lequel il est porté, echouer sur la vase ou sur quelque banc, ou le vent faillir à ses voiles, sera tousjours estimé prudent s'il se jette dans l'esquif, et se sert de la rame pour parvenir au port du salut.

le veulx dire que, puisque le roy s'echoue au bour-

bier de la Ligue, et que le vent fault à M. d'Espernon, qu'il est besoing qu'il saulve l'esquif en se saulvant, et qu'il donne de la rame au travers des vagues, se jettant au parti du roy de Navarre, qui est à vrai dire petit au respect du grand, mais grand au respect de, celui qui se perd en sa grandeur. Je dis plus que tous les conseils et desseings que prendra doresnavant M. d'Espernon, hors du roy de Navarre, et sans icelui, lui reussiront mal, et ce, d'autant que, ne pouvant avoir en France que deux partis qui ayent vraie et solide subsistance, et l'ung lui estant fermé, il est necessaire qu'il s'adjoigne à celui qui lui est ouvert; car il est comme impossible de s'en imaginer quelque tiers qui ne depende du tout ou en partie de l'ung ou de l'aultre, et soit que dedans ou dehors du royaume il veuille faire quelque parti à part, il y trouvera les difficultés qui s'ensuivent.

Dans le royaume il peult considerer qu'estant hors du parti royal, lequel est comme englouti par celui de la Ligue, il ne lui reste que celui du roy de Navarre, où il y ait et de la justice et de la force pour se maintenir et conserver l'estat, et de la fermeté et interest pour se venger dè ses ennemis, desquels tout homme courageux doibt chercher la ruyne, puisqu'ils ont attenté à sa vie et à son honneur.

M. de Montmorency lui en monstre le chemin, lequel, encores qu'il n'eust rien de si particulier et si sanglant avec ceulx de Guise, comme M. d'Espernon, et que par le moyen des princes catholiques voisins, qui l'aimoient et soubstenoient en plusieurs façons, il se feust peu accorder et maintenir avec eulx, si est ce qu'il n'a estime ni honneur, ni seureté pour sa personne, qu'au parti du roy de Navarre.

Quant aulx estrangers, si on considere et leur estat et leur humeur, on verra assés combien on se peult arrester sur leurs belles apparences; car, quant aulx princes catholiques estrangers, M. d'Espernon a cela de desadvantageux sur M. de Montmorency, que tous lui sont ennemis, à cause qu'ils ploient tous aujourd'hu soubs le joug espaignol, et par consequent sont ligués; M. de Montmorency avoit tousjours M. de Savoye fort ami, et quelques aultres particuliers.

Quant aulx protestans, il y a vingt et cinq ans et dadvantage que nous apprenons à les cognoistre, et on peult faire en gros ce jugement asseuré, que tous leurs conseils tendent à se conserver et vivre pour soi et en repos; que nul aiguillon de pitié, nul de magnanimité, nul d'ambition, ne les a peu encores poindre si avant, qu'ils en ayent monstré quelque signal à leurs voisins, affligés et requerans leurs secours.

Que si ung ou deux, pour leur particulier ou pour quelque chose de plus humain (comme nous sommes teneus de bien juger d'eulx), ont faict quelque assistance par ci devant, ça esté avec tant de respects, considerations et reserves, qu'on ne doibt rien fonder de certain sur des actions si incertaines, si peu continuees et si souvent interrompeues.

Cependant ils en ont eu de tres grandes occasions; car nos troubles de France les ont mille et mille sois appellés, et reveillé ceulx des Pays Bas, où ils ont tant d'interests de mesmes, et tout fraischement la guerre de Coulongne, et à ceste heure presente le siege de Bonne.

On me repliquera que ce default n'est veneu d'eulx, mais de ceulx qui en ont eu à faire, et qui n'ont peu les satisfaire quand il les a falleu practiquer. A cela je

responds que si le commun interest ne les faisoit entrer en parti, il y auroit peu de moyens d'ailleurs de les y pouvoir induire, nous n'ayant pas moyens suffisans pour les y embarquer.

Car de deniers nous en avons tousjours esté assés depourveus; quant à places pour engager, aultresfois, en France, la necessité nous a reduicts à ceste extremité, mais avec si peu de succes, que nous n'en avons esté gueres plus soulagés, et que nos amis, es mains desquels nous les avions mises, en sont demeurés tres mal satisfaicts de nous; et je dirai si mal, que, quand nous aurions aujourd'hui de quoi les contenter derechef pour ce regard, il y a peu d'apparence qu'ils voulleussent rien prendre de nous de œste nature et qualité.

Et pour plus particulierement eplucher ce faict, je dirai que nous n'avons aujourd'hui que deux princes voisins es mains desquels nous puissions mettre quelques places; l'ung est la royne d'Angleterre, l'aultre M. le duc Cazimir.

Quant à la royne d'Angleterre, oultre ce que j'ai dict ci dessus du Havre, ceulx qui cognoissent quelque peu son humeur et la façon du gouvernement de son estat, jugeront assés qu'elle ne s'embarrassera poinct d'aulcune de nos places, eussions nous Calais ou Boulongne, qui sont à sa porte. Son gouvernement, jusques à ceste heure, a esté fort paisible, resserré en ses limites, et n'a jamais cherché de briser ou rompre l'estat de ses voisins pour en avoir des pieces, ains s'est contenté du sien et d'employer tous ses moyens pour le rendre plus florissant.

Que si elle a accepté quelques villes en Irlande et en Hollande, ça esté avec une si grande contraincte, qu'elle ne les pouvoit refuser sans mettre son estat en ung danger imminent par l'accroissement imminent qu'eust faict le roy d'Espaigne de forces maritimes tres grandes et trop voisines d'Angleterre, en conquestant les susdicts pays, veu mesmes les practiques qu'elle decourage de jour à aultre, qui se brassoient en Espaigne contre elle.

Et ceulx qui sont quelque peu practiqués des affaires d'Angleterre, jugeront assés que le faix que cedict royaume a pris sur soi, en prenant la protection des estats, est suffisant pour sa force et ses espaules; qu'ils n'ont moyens ou volonté d'embrasser plus avant pays; qu'ils ont serré les bras en la reception de deux ou trois places, les refusans à tant d'aultres qui les appelloient de mesmes; aussi que le pacifique naturel d'une princesse, tres bonne et tres sage, n'est pour entreprendre ce qu'eust faict jadis le desireux et belliqueux esprit d'ung Henry VII ou VIII.

l'Allemaigne, chacung cognoist combien on peult esperer de leur long et profond sommeil; car si les armes du prince de Parme, qui sont ordinairement dans leur entrailles, ne les ont encores peu esveiller pour songer aulx affaires des Pays Bas, et à y borner de telle façon l'empire espaignol, qu'il ne peust si apres deborder sur eulx, quelles veilles feront ils pour la France, qui est plus esloignee d'eulx? Nous debvons cependant recognoistre que monseigneur le duc Cazimir, et principalement feu monseigneur l'electeur son pere (à la memoire duquel nous debvons infiniment), ont souvent secoureu nostre miserable estat, et que si l'occasion se presentoit encores, il ne manqueroit pas à son genereux courage.

Mais si nous considerons ce qu'il peult, seul et abanlonné, et mesmes envié des aultres princes allemans, nous dirons certainement qu'il n'a moyen de soustenir ung si pesant fardeau, et de relever la ruyne de nostre estat. Il a eu le faix de la guerre de Coulongne sur les bras, et il a esté contrainct d'y succomber; il a eu en gage de ses frais et mises la ville de Bonne, situee sur le Rhin et fort en sa bienseance, il ne l'a peu conserver, ains presque a esté rendeue par ceulx de dedans à la premiere sommation. Voilà pourquoi il n'y auroit pas grande esperance d'Allemaigne pour les affaires de la France, quand mesmes on lui mettroit Metz entre les mains, laquelle il n'auroit moyen de mieulx garder que celles qui lui sont eschappees; que si quelques aultres princes s'en mesloient, et qu'ils receussent ceste place, il leur seroit bien aisé d'en faire leur accord avec ceulx de la Ligue, laissant le reste de la France au bourbier.

Quelqu'ung me dira pourquoi nous sommes comme reduicts aux abois dans le corps de la France; au dehors il n'y a rien qui nous puisse bien faire esperer: que reste il plus, sinon de ceder et s'accommoder prudemment aulx volontés de la Ligue? ce n'est pas à quoi tend ce discours, et jà à Dieu ne plaise que jamais ung courageux François commette une telle lascheté et perfidie à sa patrie, que de l'abandonner à la domination des estrangers usurpateurs.

Mon but est de retirer les yeulx et pensees d'ung chacung des lieux où la pluspart les ont eu trop fixés, et tendeus ci devant (et plusieurs en font comme ung voile et manteau à leur nonchalance), et les tourner dans eulx mesmes; cas c'est à la verité imprudence et lascheté d'attendre de nos voisins le secours que nous nous pouvons donner nous mesmes; et il est mesmes

temps de n'estre plus ung an ou deux tout entiers auls escoutes pour sçavoir si l'Angleterre debourse, si l'Allemaigne leve : levons nous les premiers, comme il est raisonnable; et puis, quand ils nous verront bien esveillés et prests à nous aider, ne faisons doubte qu'ils ne s'employent tres alegrement.

Il est donc à desirer qu'on dresse dans la France ung bon estat de toutes les forces qui se doibvent et peuvent opposer à la Ligue; que tous ceulx qui sont interessés à la grandeur d'icelle, se joignent et apportent ensemble tous leurs moyens, pour faire ung bon et solide corps.

La Rochelle et le pays des environs, s'entend la Guyenne, en est aujourd'hui la teste, puisque le chefy est; le Languedoc, le Dauphiné et les pays voisins sont comme les pieds. Il nous fault des bras qui nous servent à embrasser le reste de la France, qui est esloignee de nos forces, et qui nous donnent moyen de frapper et infester nostre ennemi dans les pays et provinces qu'il estime siennes.

Et c'est ce que peult et doibt apporter M. d'Espernon à ce corps, lequel il peult si bien affermir et avec de si solides joinctures, qu'au lieu de parer aulx coups, comme il a faict jusques à ceste heure, il se rendra assaillant.

C'est à sa devotion et pour ce seul respect. Elle est, il y a si long temps, incommodee de siege aussi, que rien ne peult plus fascher les Ligueurs que ceste place, si on lui faict jouer le personnage qu'elle doibt.

Quand donc M. d'Espernon la mettra en la devotion du roy de Navarre, commander au sieur d'Yvry qui lui est tres fidèle et tres affectionné, d'y recevoir ung bon secours des lors qu'on lui pourra envoyer de Dannemark et Suede, où il y a pres de deux mille bons sollats, la pluspart François, et quelques Wallons, quel eu allumera il au dedans, et petit à petit il jettera dans a ville ung renfort; et pour ce faire plus aisement, il era besoing d'admettre dans la susdicte place (de laquelle le sieur d'Yvry demeurera nonobstant gouverneur) ung bon chef de guerre qui commande aulx irmes et soit comme lieutenant general de la province pour le roy de Navarre. M. de Dureil est tout porté en Dannemark; il est vraisemblable qu'il s'employera voontiers en ce lieu, si M. d'Espernon le trouve bon, comme, sans doubte, le roy le gouste et goustera touspours infiniment; car il a une grande creance au pays, pù la pluspart de la noblesse lui est ou sera alliee ou amie, aussi qu'il y a une bonne partie de son bien.

Il est à presupposer que ceulx de la noblesse, voyant ung bon chef et agreable, ung siege de guerre si commode, s'y rangeront tres volontiers; et les soldats, qui n'attendent qu'occasion d'estre employés en leurs provinces, y accourront de tous costés. Il sera aisé d'eslargir incontinent apres ses limites, et dresser ung tel parti en ces quartiers là, que la Ligue payroit bientost les frais de la guerre qui s'y feroit; qui plus est, par les commodités de la mer et les espaules des Pays Bas et d'Angleterre, on pourroit, au commencement, mettre dix ou douze bons vaisseaux en guerre, qui apporteroient de grandes commodités pour l'entretenement des garnisons, en dressant une admirauté qui seroit au moins d'aussi grand rapport que celle de La Rochelle, et puis, les entreprises seroient bien aisees, qui s'y feroient par mer, et est sommairement ce qui se peult dire des commodités de ceste place bien mesnagee, qui seront tousjours plus grandes et fructueuses que toutes celles qu'on pourroit jamais esperer, si elles

estoient entre les mains des ennemis. Quant à Metz, nous en pouvons dire ce que disoient anciennement les gens de Corinthe, que c'estoit l'œil et la clef du Peloponnese; c'est la patte de la Lorraine et joincte à Sedan; il n'y a celui qui ne voye qu'on y peult dresser une telle milice, que journellement les principales villes s'en ressentiroient. C'est la clef de nos armees estrargeres; c'est le leurre qui les y attirera, qui leur en sen trouver l'entree doree, et esperer la sortie aisee.

Il fault donc retenir ung si precieux gage et le mettre en telles mains, qu'elle puisse journellement servir au bon parti, et incommoder le contraire; faire de ceste fille des gendres en Allemaigne, mais ne la laisser jamais partir de la maison.

Quand le parti du roy de Navarre, qui est le parti du salut de la France et celui de tous les bons François en particulier, sera renforcé et affermi en la façon susdicte, il ne fault faire doubte que nos amis estrangers ne nous soient tres favorables; ils se viendront lors mesmes offrir à nous non plus ne moins que ceult qui se chatouilleront de nostre prosperité, et qui travailleront à qui mieulx mieulx, pour y participer.

Nous concleurons donc que, puisque M. d'Espernon peult apporter tant d'advancement au bon parti, et que, ce faisant, il asseure l'estat et asseure le sien en particulier, coupe et traverse, comme par la racine, les esperances de ses ennemis et de ceulx de son estat, que comme bon François, et qui a tant d'obligations à ceste couronne, il doibt prendre le parti du roy de Navarre, et faire jouer si à propos tout ce qu'il tient en mamque ses ennemis en restent confeus, lui honoré des François et respecté de tous les princes estrangers. Amen, amen, amen.

LXXXIX. -- * DISCOURS

Sur l'excessive cherté, presenté à la royne mere (1), mere du roy, par ung sien fidele serviteur.

La cherté de toutes les choses qui se vendent et debitent en France, est aujourd'hui si grande et si excessive, que, depuis environ quattre vingts ans, les unes sont rencheries de dix fois, les aultres de quattre, cinq et six fois autant qu'elles se vendoient dons ce temps là, ce qui est aisé à prouver et à verifier, soit par la vente des terres, maisons, fiefs, vignes, bois et prés, soit par les viandes, laines, draps, fruiets et aultres denrees necessaires à la vie de l'homme.

Pour parvenir à ceste preuve, il fault commencer par les vivres, et il ne s'agit pour cela que de parcourir les coustumes de toutes les provinces de la France; on y trouvera, et par la verification des aveux, que la charge de metail, de seigle, d'orge et de froment, est evaluee et taxee à moindre prix que l'on ne vend aujourd'hui la dixiesme partie de ces grains. On y verra qu'ung chapon, une poule, ung chevreau et aultres choses deues par les vassaulx aulx seigneurs, sont evalués au dixiesme, et voire mesmes au quinzie, me à meilleur compte qu'on ne les vend aujourd'hui. Les coustumes d'Anjou, de Poictou, de la Marche, de Champagne, de Bourbonnois et aultres evaluent la poule à six deniers, la perdrix à quinze deniers, le mouton gras avec la laine à un sol, le cochon à dix deniers, le mouton commun et le veau à dix sols, le chevreau à trois

⁽r) Catherine de Medicis.

sols, la charge de froment à trente sols, la charge de foin pesant quinze quintaulx, à dix sols, qui sont dix botteaux pour ung sol, le botteau pesant quinze livres.

Par la coustume d'Auvergne et Bourbonnois, les douze quintaulx estoient estimés dix sols, le tonneau de vin trente sols, le tonneau de miel trente cinq sols, l'arpent de bois deux sols six deniers, l'arpent de vigne trente sols de rente, la livre de beurre, huile de noix et de suif, quatre deniers.

En plusieurs aultres coustumes, la charge de metal est de vingt cinq sols, celle de seigle vingt deux sols six deniers, celle d'orge à quinze sols. En d'aultres coustumes, le septier de froment est à vingt sols, le seigle à dix sols, l'orge à sept sols, l'avoine à cinq sols, la charretée de foin de douze quintaulx, à dix sols voituree, et cinq sols prise sur le pré, la charretee de bois douze deniers, l'oie à douze deniers, la chair entiere du mouton sans laine, à trois sols six deniers, le mouton gras avec sa laine à cinq sols, le chevreau à dix huict deniers, la poule à six deniers, le lapin à dix deniers, l'oison à six deniers, le veau à cinq sols, le paon (1) à deux sols, le pigeon à ung denier et le faisan à vingt deniers. Voilà, quant aulx vivres, ceulx qui sont aujourd'hui douze et quinze fois plus chers.

Quant aulx corvees et journees des ouvriers, nous voyons par les coustumes arrestees et corrigees depuis soixante ans, que la journee de l'homme en été est taxee à six deniers, en hiver à quatre deniers; et avec une charrette à bœufs à douze deniers. Peu auparavant la journee de l'homme estoit à douze deniers, celle de la femme à six deniers.

⁽¹⁾ Cet oiseau étoit anciennement fort recherché et fort exquis.

Quant aulx terres, la meilleure terre roturiere n'estoit estimee qu'au denier vingt, ou au plus au denier vingt cinq, la maison au denier cinquante: l'arpent de la meilleure terre labourable, au plat pays, ne coustoit que dix ou douze escus, et la vigne trente escus; et aujourd'hui tous ces biens se vendent quatre fois autant; à quoi il fault encores adjouter, par observation importante, que les escus, il y a trois cens ans, pesoient ung dixiesme de plus que ceulx d'à present.

Par là, on peut cognoistre combien les choses sont augmentees de prix depuis soixante ans : ce qui, en oultre, se peult verifier aisement par la recherche des aveux qui sont en la chambre des comptes, et par ceulx du thresor des chartes, par lesquels on verra que les baronies, comtés et duchés qui ont esté annexés et reunis à la couronne, valent aujourd'hui autant de revenu qu'ils avoient cousté anciennement en fonds. Il y a plusieurs historiens qui disent que Humbert, Dauphin de Viennois, environ l'an 1349, vendit le Dauphiné à Philippe de Valois, lors regnant, pour la somme de quarante mille escus, une fois payee, et dix mille florins, sa vie durante, avec quelques aultres conventions, et à la charge surtout que le premier fils du roy et l'heritier presomptif de la couronne porteroit le nom de Dauphin. Les aultres disent, et il est assés vraisemblable, que ce mesme Humbert donna le Dauphiné en pur don au roy Philippe, sous la mesme condition que l'héritier presomptif de France porteroit le nom de Dauphin, et avec reserve de quelques reveneus pendant sa vie; mais en supposant qu'il l'eust vendeu ceste somme de quarante mille escus, il fault convenir que c'estoit ung prix bien modique, eu esgard au temps present?

puisque le Dauphiné vault de reveneu plus que le principal.

Le mesme roy, Philippe de Valois, acheta du roy Jacques de Majorque la ville de Montpellier, moyennant la somme de vingt cinq mille florins d'or; et dans cette ville, il y a aujourd'hui cinquante maisons, dont la moindre se vendroit presque autant, ou pour le moins cousteroit autant à bastir.

Herpin, comte de Berry, voulant aller à la guerre de la Terre Saincte, avec Godefroy de Bouillon, ven dit son comté au roy Philippe I^{er}, pour la somme de cent mille sols d'or (1); et aujourd'hui cette province, erigee en duché par le roy, en faveur de Jean, son troissiesme fils, qui en a esté le premier duc, vault presque autant de reveneu.

Guy de Chastillon, comte de Blois, second du nom, l'an 1391, vendit à Louis, duc d'Orleans, frere du roy Charles VI, le comté de Blois, pour cent mille florins d'or. Il y en a qui disent que ce feut Marie de Namur, sa femme, qui, aimant d'ung amour deshonneste le duc d'Orleans, lui donna ce comté; mais que, pour couvrir son amour et sa donation d'ung pretexte horneste, elle fit passer ung contract de vente.

Qu'on examine plusieurs maisons, terres, fiefs, set gneuries, terres labourables, prés, vignes et aultres biens auxquels on n'a rien augmenté depuis soixante ans, on verra qu'elles se vendent aujourd'hui six soix plus qu'elles ne se vendoient auparavant. Une maison dans une ville, à laquelle il n'y a ni rentes ni revenus attachés, qui se vendoit mille escus il y a soixante ans, se vend aujourd'hui quinze à seize mille livres, quoi-

⁽¹⁾ Sous d'or, ou salus d'or, valant 22 sous pièce.

qu'on n'y ait faict depuis aulcunes reparations, ni aulcuns embellissemens. Une terre qui alors se vendoit vingt-cinq ou trente mille escus, se vend aujourd'hui cinquante mille escus.

Il est bien vrai qu'on pourra me dire, qu'alors ceste terre ne valloit que mille escus de ferme, mais qu'à present elle vault six mille escus; mais je respondrai à cela: Il est vrai; mais avec six mille escus, aujourd'hui, on ne faict pas plus que l'on faisoit alors pour mille, attendeu que ce qui coustoit alors ung escu, en couste aujourd'hui six, huit, dix et douze.

Chacung voit ceste excessive cherté, chacung en reçoit une grande incommodité, personne n'y remedie. Il y a plusieurs causes de ce mal, dont la principale, qui est la source des aultres, est le mauvais ordre qui regne dans les affaires, et la mauvaise police qui s'exerce en France. La premiere cause de celles qui sont engendrees de celle là, est l'abondance de l'or et de l'argent qui est dans ce royaume. Cette abondance produit le luxe et la depense excessive que l'on faict en vivres, en habits, en meubles, en bastimens et en toutes sortes de délices. Le degast et la dissipation des choses sont encores une aultre cause de l'excessive cherté, et qui procedent de ceste abondance; car, là où est l'abondance, là y est le degast. Les monopoles des fermiers, marchands et artisans, est la troisiesme cause. Quant aulx fermiers et marchands, on voit clairement que tous les blens du roy, et ceulx des particuliers, estant donnés à ferme, ces fermiers et marchands arrhent, achettent les fruicts avant qu'ils soient recueillis; ils les serrent et en font des magasins qui engendrent la disette, et par consequent la cherté; et les vendent ensuite aulx prix qu'ils veullent. La quatriesme cause est la liberalité dont

nos roys ont usé en accordant les traictes des bleds, et des vins, et autres marchandises, pour les transporter hors du royaume; car les marchands advertis de l'extresme cherté qui est ordinairement en Espaigne et en Portugal, et qui souvent arrive dans d'aultres royaumes, obtiennent, par le moyen des favoris de court, des traictes pour y transporter les bleds, le transport desquels nous produict la cherté. La cinquiesme cause est le prix que les roys et les princes ont donné aulx choses de plaisir, comme aulx peintures et aulx pierreries, qui ne s'achettent qu'à l'œil et au plaisir, lesquelles se vendent aujourd'hui dix fois plus qu'elles ne se vendoient au temps de nos anciens roys, qui n'en tenoient auleun compte. La sixiesme sont les impositions et maltostes mises sur toutes les denrees, et les tailles exeessives imposees sur les peuples. La septiesme, sont les guerres civiles de la France, qui ont mis le feu partout, ont produict l'insolence et l'impunité, en saccageant et dissipant tout. La huictiesme est l'augmentation du prix des monnoies. La neuviesme est la sterilité de cinq ou six annees que nous avons eue consécutivement, qui, joinct aulx ravages de la guerre, sont deux fleaux dont nous sommes affligés depuis long temps.

Voilà toutes les causes, ou du moins les principales qui nous ont produict l'excessive cherté que nous souffrons, lesquelles nous discuterons particulierement l'une apres l'aultre.

La premiere cause de ceste cherté est donc l'abondance de l'or et de l'argent qui est dans ce royaume, plus grande qu'elle n'a jamais esté, dont plusieurs s'estonneront, attendeu l'extreme povreté qui est parmi le peuple: à quoi on peult adapter l'ancien proverbe:

il y a beaucoup d'or et d'argent, mais il est mal partagé. Pour prouver ce que j'avance, il ne fault que considerer qu'il n'y a que cent vingt ans que la France est aussi estendeue qu'elle l'est à present; et si on veult remonter au temps de Sainct Louis, et quelques siecles apres, on verra que les roys n'avoient aulcunes provinces maritimes; qu'ils ne possedoient, pour ainsi dire, que le nombril de la Gaule, encores avoient ils guerre avec les Anglois et plusieurs seigneurs particuliers, leurs voisins. Les duchés de Guyenne et de Normandie, le costé du Poictou et celui de Picardie estoient possedés par les Anglois. La Provence avoit son comte, la Bretaigne son duc, le Languedoc estoit deteneu par les roys de Majorque. Voilà, quant aulx pays maritimés. Les aultres pays loing de la mer, comme la Bourgongne, avoit son duc particulier; le Dauphiné, son dauphin; l'Anjou, le Poictou, la Touraine, le Maine, l'Auvergne, le Limozin, le Perigord, l'Angoumois, le Berry et aultres, estoient à l'Anglois; les aultres duchés et comtés de la France estoient possedés aussi par les Anglois et aultres seigneurs particuliers, qui ne permettoient pas que les roys prissent dans leurs terres aultres choses que les debvoirs ordinaires; et encores quelques ungs de ces seigneurs leur contestoient ils ces mesmes debvoirs. Il n'y avoit donc alors nul trafic sur mer qui nous apportast l'or et l'argent des pays estrangers, et les François estoient contraincts de consommer leurs vivres, et d'user entre eulx de la premiere coustume des hommes, qui estoit de permuter avec leurs voisins les choses qu'ils avoient pour les aultres choses qu'ils n'avoient point, comme de donner du bled pour du vin.

Mais, pour revenir à ce que nous avons desjà diet, qu'il n'y a que cent vingt ans que la France est aussi

grande qu'elle est aujourd'hui, nous ne remonterons pas plus hault, et nous dirons qu'avant ce temps les provinces ci devant nommees n'estoient poinct aulx roys de France, mais estoient possedees, comme nous l'avons dict, par des seigneurs particuliers, et celles qu'ils avoient en leur puissance, estoient si agitees par les guerres continuelles des Anglois, des Bretons, des Flamands, et par les divisions qui estoient entre les maisons de Bourgongne et d'Orleans, qu'il n'y avoit aulcung trafic ni commerce qui nous apportast l'or et l'argent. L'Anglois, qui tenoit les ports de la Guyenne, de la Normandie et de la Picardie, et qui avoit les ports de Bretagne à sa devotion, nous fermoit toutes les adveneues de la mer et les passages d'Espaigne, de Portugal, d'Angleterre, d'Escosse, de Suede, Dannemarck et Allemaigne; les Indes n'estoient poinct encores cogneues, l'Espaignol ne les avoit poinct encores descouvertes. Quant au Levant, les Barbares et les Arabes, que nos anciens appelloient Sarrazins, tenoient tellement la mer Mediterrance en leur subjection, que les chrestiens n'osoient y aller sans estre en danger d'estre mis à la cadene : nous n'avions aulcune intelligence avec le Turc, comme nous l'avons eue depuis le roy François I^e. L'Italie nous estoit interdicte par les divisions et querelles des maisons d'Anjou et d'Arragon; nous n'avions donc entre nous d'aultre trafic et d'aultre commerce que de marchandise à marchandise, comme de bled à vin, à bois et aultres especes; car d'or et d'argent, il n'en estoit poinct question; nous n'avions d'aultres mines d'argent que celles d'Auvergne, et cest argent coustoit plus à affiner qu'il ne valloit.

Aussi le François ne s'amusoit il poinct alors au commerce, mais il s'appliquoit à cultiver ses terres, à nourrir des bestiaulx, et à tirer pour sa subsistance tout ce qui lui estoit necessaire, comme le bled, le vin, les animaulx propres pour sa nourriture, les laines pour faire ses habits, les lins et les chanvres pour faire les toiles.

Mais considerons quelles commodités sont veneues à la France depuis cent vingt ans. L'Anglois a esté chassé des Gaules; nous sommes deveneus maistres de toutes les terres qu'ils tenoient en deçà de la mer. La Bourgongne, la Bretaigne et la Provence ont esté reunies à la couronne, ainsi que plusieurs aultres provinces. Les chemins nous ont esté ouverts pour trafiquer en Italie, en Angleterre, en Escosse, en Flandres et dans tout le septentrion. L'amitié et l'intelligence entre le grand seigneur et nos roys ont frayé le chemin du Levant. Les Portugais et les Espaignols, qui ne peuvent vivre sans venir en France mandier leur pain, sont allés chercher le Perou, le golfe de Perse, les Indes, l'Amerique. Là ils ont fouillé les entrailles de la terre; ils en ont tiré l'or pour nous l'apporter en beaux lingots, en portugaises, en doubles ducats, en pistoles et aultres especes, pour avoir nos bleds, nos toiles, draps, pastels, papiers et aultres marchandises. L'Anglois, pour avoir nos vins, nos pastels et nostre sel, nous apporte ses beaux nobles à la rose, à la nau, et ses angelots (1). L'Allemand nous apporte l'or dont nous faisons nos beaux escus, et toutes les aultres nations de l'Europe nous apportent de l'or et de l'argent pour avoir les commodités de la vie que nos terres produisent, et qu'ils n'ont pas, et principalement le sel que nous avons en Xaintonge, qui est le meilleur pour saler, et qui passe en bonté, en valeur

⁽¹⁾ Espèces d'Angleterre marquées à une rose, à un navire et à un ange.

et en longue garde, celui de Lorraine, Bourgongne, Provence et Languedoc.

Oultre ceste cause de l'abondance de l'or et de l'argent, qui procede de l'accroissement du royaume de France et du trafic avec les estrangers, il y en a encores une aultre, qui est la multitude du peuple qui s'est considerablement multipliee, depuis que les guerres civiles d'entre les maisons de Bourgongne et d'Orleans ont esté assoupies, et que les Anglois ont esté rencognés en leur isle. Pendant ces guerres, qui ont duré plus de deux cens ans, le peuple estoit en petit nombre, les champs par consequent deserts, les villages depeuplés, les villes inhabitees et presque desertes. Les Anglois les avoient ruynees et saccagees, bruslé les villages, tué et massacré la plus grande partie du peuple, ce qui empeschoit l'agriculture et le trasic. Mais, depuis que la paix dure, le royaume s'est peuplé considerablement; les peuples se sont mis dans la teste de trafiquer, et de chercher les moyens d'avoir de l'or et de l'argent.

De là est veneue l'abondance de l'or et de l'argent, et ce qui a causé la cherté des denrees; car, comme l'or et l'argent est veneu nous enlever ces denrees et marchandises par la commodité de la mer, ce qui en a occasionné la rareté, et par consequent la cherté; il est certain que l'abondance de l'or et de l'argent rend les hommes plus liberaulx, et faict qu'ils achetent plus facilement, et que là où l'or et l'argent sont moins abondans, les marchandises sont moins cheres : c'est ce que l'on voit dans les pays où il n'y a poinct de commerce, où le peuple n'est pas en grand nombré, les habitans faulte de trouver à qui vendre leurs fruicts, soit faulte de ports et de rivieres, ou parce que chacung

en a pour soi, sont contraincts de les donner à vil prix; mais où il y a abondance d'or et d'argent, de peuple, et où le commerce fleurit, comme à Paris, Venise et Gesnes, tout se vend cherement, comme les vivres, les estoffes et habits, les parfums, les soyes et aultres babioleries de mercerie, qui font vivre une infinité d'artisans, lesquels artisans mourroient de faim dans des pays barbares, comme en Basque, Gascongne et Basse Bretagne, parce que personne n'acheteroit de ces babioles faulte d'argent. C'est donc l'abondance d'or et d'argent qui faict que tout se vend, et qui cause la cherté de toutes choses.

Mais, apres avoir allegué plusieurs raisons peremptoires de la cherté, procedant de l'abondance de l'or et de l'argent, venons à d'aultres qui feront cognoistre combien jadis la France estoit denuee de ces metaulx.

Nos anciens roys se sont si souvent trouvés en telle necessité d'argent, que, par ce default, ils ont manqué de tres belles entreprises et occasions. Quelquesfois ils ont voulleu lever sur leurs subjects le centiesme et le cinquantiesme en argent; mais le peuple estoit si povre, que l'on estoit contrainct de vendre leurs biens pour fournir à une si modique taxe.

Le roy Jean ayant esté faict prisonnier à la bataille de Poictiers, et mené en Angleterre, son fils Charles, duc de Normandie, et depuis roy, soubs le nom de Charles V, assembla à Paris les trois estats pour avoir de l'argent pour la rançon de son pere. Le roy, voyant que son fils ne pouvoit obtenir ni recouvrer une somme d'argent pour sa rançon, y veint en personne; mais, voyant par lui mesmes qu'il estoit impossible de lever ceste somme, attendeu la povreté de son peuple, il feut contrainct de retourner en Angleterre pour solliciter

une diminution de ceste rançon, et feut obligé de rester long temps prisonnier, faulte d'avoir peu trouver ceste somme. Le mesme roy, avant qu'il feust prisonnier, dans ung besoing urgent, ne peut jamais trouver dans tout son royaume une modique somme de soixante mille livres, dont il avoit extremement besoing.

Aussi nous lisons en nos histoires qu'anciennement, faulte d'argent, on faisoit de la monnoye de cuir avec ung cloud d'argent au milieu. Et si on faict reflexion au temps present, on trouve qu'en six mois on a trouvé dans Paris plus de quattre millions de livres, et que chaque annee on tire plus de reveneu de ceste ville que l'on en tiroit aultrefois en six ans. L'annee 1556 produisit au roy Henry quarante millions, lorsqu'il feit tous ses officiers alternatifs. Il n'y a en France aulcune recette generale qui ne produise cinq fois plus qu'elle ne produisoit aultresfois. La Bretaigne n'a jamais valleu à ses ducs que trois cens mille livres de rente; elle produict aujourd'hui plus d'ung million, sans compter les aides et les deniers qui proviennent de la vente des offices de ceste province. On peult juger des aultres provinces à proportion. Le comté d'Angoumois ne feut donné au comte Jean, fils puisné de Louis, duc d'Orleans, que pour quattre mille livres de rente; aujourd'hui il vault plus de soixante mille livres. Le mesme duc d'Orleans eut pour son appanage le duché d'Orleans, le comté de Valois et d'Angoumois pour douze mille livres de rentes; ils rapportent aujourd'hui plus de dix fois autant. Charles VII ne feit jamais valloir son royaume plus d'ung million et sept cens mille livres de rente. Son fils, Louis II, ayant augmenté son royaume des duchés de Bourgongne et d'Anjou, et des comtés de Provence et du Mayne, a receu trois millions plus que

son pere. Ce qui feit que le peuple se trouva si foullé, qu'à l'avenement de Charles VIII son fils à la couronne, il feut ordonné, à la requeste et instance des estats, que la moitié des charges seroit retranchee. Depuis ce temps, la Bretaigne ayant encores esté reunie à la couronne, on a mis de nouvelles impositions et augmenté les anciennes, ce qui est encores une preuve d'une tres grande abondance d'or et d'argent.

Il y a encores deux aultres causes de ceste abondance, dont l'une est la banque de Lyon, du profict de laquelle les Luquois, Florentins, Genevois, Suisses et Allemands, estant affriandés, apportent beaucoup d'argent en France. L'aultre cause est l'invention des rentes constituees sur la ville de Paris, lesquelles ont engagé ung chacung à y mettre son argent. Il est vrai qu'elles ont faict cesser le trafic et la marchandise, qui auroient ung bien plus grand cours, s'ils n'estoient diminués par le trafic d'argent que l'on faict.

Le degast et la dissipation est la seconde cause de la cherté des vivres et aultres denrees, et ceste dissipation vient premierement des despenses de table; on ne se contente plus à ung disner ordinaire de trois services, consistans en bouilli, rosti et fruict, il fault d'une viande en avoir de cinq ou six façons, des hachis, des pastisseries, salmigondis et aultres exces: et quoique les vivres soient plus chers qu'ils ne feurent jamais, rien n'arreste; il fault de la profusion, il fault de la delicatesse, il fault des ragouts sophistiqués pour aiguiser l'appetit et irriter la nature. Chacung veult aujourd'hui aller disner chez le More, chez Samson, chez Innocent et chez Havart (1), ministres de volupté et de profusion,

⁽¹⁾ Fameux traiteurs en 1586.

qui, dans ung royaume bien policé, seroient banis et chassés comme corrupteurs de mœurs.

Il est certain que si ceulx qui tiennent les grandes tables, et font festins et banquets, retranchoient le superflu, les denrees ne seroient pas si cheres, et toul le monde y participeroit ung peu. On en peult dire de mesmes du vin, l'usage duquel, ou, pour mieulx dire, l'abus est plus commun en ce royaume qu'en tout aultre. On blasme les Allemands pour leurs carroux (1) et grand excès en leur maniere de boire; neantmoins ils sont mieulx reglés que nous: il n'y a que les chess des maisons qui boivent du vin. Les Flamands, les Anglois, les Escossois, ne boivent que de la bierre: le vin est interdict en Turquie, par la relligion mesmes; aussi ces peuples sont ils forts et robustes; et, au contraire, nous voyons en France le vin commun aulx enfans et aulx domestiques, et ne les rend pas plus robustes et plus forts: de là il est arrivé que, par ceste grande consommation de vin, il a falleu multiplier les vignes, et employer des terres labourables à cest usage; ce qui dimineue la quantité des grains.

Venons aulx bastimens de ce temps, et aulx meubles dont ils sont garnis; il n'y a que trente ans que ceste superbe façon de bastir est veneue en France. Nos peres se contentoient de bastir ung bon corps d'hostel, une basse cour, une mesnagerie; aujourd'hui il fault des corps d'hostel, des pavillons, des galleries, des salles, des portiques, des balustres: on negligeoit tous ces beaulx ornemens d'architecture; on se contentoit du necessaire. Les meubles estoient simples, on ne sçavoit ce que c'estoit que tableaux et sculptures;

⁽¹⁾ Assemblées de table.

on ne voyoit pas une immensité de vaisselle d'argent et d'or, poinct de chaisnes, bagues et joyaux, comme aujourd'hui; tout cela ne servoit qu'à rendre les especes rares, et à encherir les denrees et choses necessaires à la vie. Pour entretenir ces excessives despenses, il fault jouer, emprunter, vendre, et se desborder à toutes sortes de voluptés; et enfin payer ses creanciers par des cessions et faillites. Voilà comment la cherté nous provient du degast.

Les monopoles des marchands, fermiers et artisans sont la troisiesme cause de la cherté. Les artisans s'assemblent en leurs confrairies pour asseoir ung prix aulx marchandises; ils encherissent tout, tant leurs journees que leurs ouvrages; ce qui debvroit estre defendeu expressement. Les fermiers et marchands vont achetter les bleds encores pendans par les racines; sont ils recueillis, ils en font des amas; ils deviennent chers, et les vendent ung prix exhorbitant; en sorte que souvent le laboureur n'a pas de quoi faire ses semailles.

La quattriesme cause de la cherté sont les traictes, desquelles cependant nous ne pouvons nous passer; mais il seroit necessaire d'aller plus moderement, lorsqu'on les permet. Chacung sçait que le bled en France n'est pas sitost meur que l'Espaignol l'emporte, d'aultant que l'Espaigne, excepté l'Arragon et Grenade, est fort sterile; ce qui, joinct à la paresse des peuples de ce royaume, faict qu'ils n'ont poinct de bleds pour vivre. D'ung aultre costé, le Languedoc et la Provence en fournit la Toscane et la Barbarie; ce qui cause l'abondance d'argent et la cherté des grains; car nous ne tirons d'aultres marchandises de l'Espaignol que les huiles, espiceries, avec des oranges; encores les meilleures drogues nous viennent elles du Levant. La paix

avec l'estranger nous donne les traictes, et par consequent la cherté: ainsi les traictes nous sont necessaires; elles nous sont aussi prejudiciables par les malversations qui s'y commettent: ainsi il seroit tres utile de remedier à ces abus.

La cinquiesme cause de la cherté provient du plaisir des princes, qui donnent le prix aulx choses; ils aiment les pierreries et les bijoux; les peuples veullent les imiter; ils en achettent, et se ruynent. On a veu que François I^{er} aimoit fort les pierreries, imitant en cela Henry, roy d'Angleterre, et le pape Paul III: tous les François en portoient. Henry II les mesprisa; on ne veit jamais rien à si bon marché; maintenant qu'elles sont aimees et cheries de nos princes, tout le monde en veult avoir, et sont d'ung prix excessif.

La sixiesme cause de la cherté des vivres provient des impositions mises sur le peuple; mais il fault excuser et considerer la calamité du temps, et les guerres que les rebelles ont suscitees au roy.

La septiesme cause est le default de culture; et, par ceste raison, les terres n'estant poinct ensemencees, on ne peult poinct recueillir de grains; celles qui le sont n'estant qu'imparfaitement labourees, à cause de la povreté des laboureurs, on recueille peu.

La huictiesme cause est la sterilité de cinq ou sir annees consecutives dont le royaume a esté affligé.

Voilà les huict causes principales de nostre cherte. aulxquelles nous pouvons adjouster l'augmentation du prix des monnoyes, et les changemens particuliers qui ordinairement arrivent, et qui font encherir les chose de leur prix ordinaire, comme les vivres en temps de famine, les armes en temps de guerre.

Apres avoir parcoureu les causes de la cherté, il rest

maintenant à trouver les moyens d'y remedier au moins mal qu'il sera possible, sans voulloir blasmer aulcunement ce que les magistrats ont faict jusques ici, pour trouver quelque remede à ceste cherté, ni sans voulloir imputer ce mal à la mauvaise police de la France.

Nous commencerons par l'abondance d'or et d'argent, laquelle, quoiqu'elle soit cause du grand prix et encherissement des choses, neantmoins c'est la richesse d'ung pays.

Quant au degast et à la dissipation, tant des biens que des habits, on a beau faire et reiterer tant de beaulx edicts sur les vivres, et principalement sur les habits, ils seront inutiles, si on ne les faict estroictement observer; car plus on faict de defenses, et plus on en porte, et jamais elles ne seront bien observees, si le roy ne les faict garder aulx courtisans, car le reste du peuple se gouverne à son exemple; mais ce degast n'est rien en comparaison de celui que font les soldats françois qui pillent et ravagent les campagnes, rançonnent les peuples, et enlevent tout aulx povres laboureurs, en leur prenant leurs grains, volailles, et bestiaux servans au labourage; ce qui faict que ces laboureurs quittent et abandonnent leur patrie, et les terres restent sans culture.

Quant aulx monopoles des marchands et des artisans qui s'assemblent dans leurs confrairies pour fixer le prix des marchandises et ouvrages, il fauldroit defendre ces sortes d'assemblees, et suivre en cela ce qui feut ordonné aulx estats d'Orleans. Et, pour parler des monopoles des fermiers et marchands qui causent la cherté du bled, nous suivrons sur cela ce qui est compris en la docte remonstrance que M. de Bailly, second president en la chambre des comptes de Paris, a depuis

quelques annees faicte au roy, et dirons que, pour eviter la cherté du bled, et empescher que les marchands et fermiers ne le gardent trop long temps dans leurs greniers, attendant le temps cher pour le vendre à leur advantage, les ventes s'en feront dans ung an, et au temps porté par l'ordonnance; et qu'à ce faire seront lesdicts fermiers contraincts par les juges et officiers des lieux, afin que le povre peuple, qui a tant de peine et de travail à labourer et cultiver la terre, et duquel le roy tire ses tailles, aydes et subsides, en puisse estre secoureu pour son argent, et au temps porté par l'ordonnance, auquel le bled est volontiers le plus cher.

Que, suivant les anciennes ordonnances des roys, nul estranger ne soit admis à encherir et prendre les fermes du domaine, aydes et gabelles, ni en estre associé, afin que le profict qui en pourra provenir ne sorte poinct hors du royaume; comme il se voit qu'il en sort plusieurs deniers par le moyen des annates, banques, draps de soye, subsides de proces, impositions foraines, la douane de Lyon, fermes d'eveschés, abbayes et prieurés, et aultres moyens qui passent tous par la main des estrangers. Il arrive encores, comme nous l'avons desjà dict, que, des que les bleds et les vins sont recueillis, quelquesfois mesmes avant, les marchands vont par les champs, arrhent tous les fruicts, et les achettent à beaulx deniers, ou les prennent en payement de ce qui leur est deu par le povre paysan: ils les serrent, et, en les serrant ainsi, ils engendrent la disette; apres cela, ils les vendent, estant deveneus fort chers, et quand ils voyent que l'on ne peult plus vivre sans passer par leurs mains: à quoi il fauldroit remedier par rigoureuses ordonnances, defenses et

arrests, et empescher telles monopoles qui portent ung prejudice inestimable.

Les fermes seules, sans les monopoles de ceulx qui les tiennent, auroient bien peu occasionner aussi la cherté; il n'y pas cinquante ans qu'en France il n'y avoit gueres de gens qui donnassent leurs biens à ferme, chacung les faisoit valloir, et surtout les roys ne donnoient pas leurs domaines et aultres droicts, à ferme, de la façon qu'on le faict aujourd'hui. Et, quelques ordonnances qu'ayent ci devant faict les roys sur le faict de leurs finances, jamais ils n'ont voulleu donner tout le corps des receptes de leurs domaines, mais seulement le domaine muable et casuel, pour trois, six ou neufannees, ainsi qu'il a esté avisé pour le mieulx, mais les ont faict exercer et manier dans les receptes pour la conservation de leurs droicts, qui ne gisent en daces ni intrades, comme dans les aultres pays, mais en cens, en rentes foncieres, terres, prés, etc. Pour la conservation desquels droicts a esté trouvé utile et necessaire qu'il y eust receveurs particuliers pour en compter le meneu, et tenir registre fidele; asin aussi que les procureurs generaulx ayent recours aulxdicts comptes, qui sont les seuls tiltres du domaine, pour conserver ces droicts, à l'occasion desquels il y a souvent des proces, parce que chacung s'efforce d'entreprendre sur les domaines du roy; ce que la chambre des comptes, à Paris, a remonstré tres clairement au roy et à son conseil, et les inconveniens qui peuvent arriver en donnant à ferme les domaines, dont il semble estre raisonnable que, pour le bien de ce royaume et commodité des subjects du roy, son bon plaisir feust d'ordonner, en faisant les haulx à ferme du domaine, ce que nous venons de dire ci-dessus.

Quant aulx traictes, elles nous seroient tres profictables, si on y alloit plus modestement que l'on ne faict. Chacung sçait que le commerce consiste en permutation; et, quoi que veuillent dire plusieurs grands personnages qui se sont efforcés de retrancher entierement les traictes, croyans que nous pouvions nous passer des estrangers, cela ne peult estre, car nous avons besoing d'eulx, et ne pouvons nous en passer. Et, si nous leur envoyons du bled, du vin, sel, saffran, et aultres marchandises, nous avons d'eulx en contre eschange tous les metaulx, excepté le fer, et aultres marchandises et excellens ouvrages de main. Et quand bien mesmes nous pourrions nous en passer, encores debvons nous faire part à nos voisins de ce que nous avons, tant par la charité, qui nous commande de faire part à nos voisins de ce que nous avons, et qu'ils n'ont pas, que pour entretenir une bonne amitié et intelligence avec eulx: à la bonne heure, defendre le trafic des choses inutiles, et qui ne servent qu'à la volupté; mais il fauldroit, quant aux traites de bled, aulcunes ne seussent accordees aulx fermiers et marchands, et leurs associés, pendant le temps de leurs fermes, afin que, par le moyen desdictes traictes et intelligence des fermiers et marchands, les bleds ne peussent estre transportés hors du royaume; et, de plus. faire en sorte que les traictes ne feussent si liberalement accordees, comme elles le sont, aulx favoris de la cour, mesmes deurant l'extresme cherté qui regne. afin que le transport de nos bleds ne nous amene une cherté excessive et dommageable au public.

Pour toucher le moyen de remedier à la cherté du prix des choses aulxquelles les princes prennent plaisir, comme aulx peintures et pierreries, cela consiste en

eulx mesmes. Et, pour le moins, s'ils en veullent avoir beaucoup, et se faire voir tous luisans en pierreries, ils doibvent faire defense à leurs subjects d'en porter. Mais c'est la coustume de France, que le gentilhomme veult faire le prince; et, s'il voit que son maistre se pare de pierreries, il en veult avoir aussi, deust il vendre sa terre, ses prés, ou s'engager chez le marchand. Les princes ne debvroient paroistre que par leurs vertus, sans chercher à briller par de vains ornemens; ils sont assez cogneus et respectés par leur rang et par leur auctorité, sans desirer d'estre veus brillans de pierreries: ce n'est poinct absolument ung mal que les roys et les princes brillent par l'esclat des pierreries; et cela seroit bon, si les petits compagnons ne voulloient les imiter dans ceste despense, laquelle il fauldroit defendre tres expressement.

Les impositions excessives mises sur le peuple, et les tailles, contribuent beaucoup à la cherté des vivres : le remede à ce mal consiste en la benignité du roy, en laquelle nous debvons tout esperer; que, cessant les causes pour lesquelles elles sont imposees, qui sont les guerres civiles et le payement de ses debtes, il en dechargera son povre peuple. Et, quant aulx guerres qui ont enseigné au soldat l'insolence, pour brusler, piller, ravager, tout cela requiert des ordonnances militaires sur le reglement de la vie des gens de guerre.

Six annees steriles et consecutives que nous avons eues, causees par les moyens ci dessus, c'est à dire par le default de culture des terres, ont causé une grande cherté qui peult estre corrigee, et peult y estre remedié par bonnes ordonnances sur la distribution, ordre, reserve, vente et taux des vivres, lesquels suppleeront à ceste sterilité, et nous apporteront, sinon

ung grand marché de toutes choses, au moins meilleur que nous ne l'avons; car il n'y eut jamais si grande sterilité ni disette de biens, qu'une bonne police n'y ait suppleé; mais où elle manque, auroit on des vivres en abondance, la disette y seroit tousjours. Il y a ung moyen, lequel, quand tous les aultres cesseroient, nous peult seul oster la cherté, et couper cours à toutes monopoles: c'est qu'aulx principales villes de chacune province, on erige ung grenier public, dans lequel on pourra ramasser une telle quantité de bled que l'on jugera necessaire pour partie de la nourriture des habitans de ceste province, lesquels greniers seront ouverts, et le bled distribué au peuple à mesure que l'on verra la necessité, et que le marché ordinaire ne fournira plus, ou que le bled y sera trop cher par les monopoles des marchands. Et où une ville se trouvera en necessité, les aultres villes seront teneues de la secourir, et se pourront les echevins, ou ceulx de ces villes qui auront esté chargés de la police, advertir souvent les ungs et les aultres de la quantité et prix de leurs grains, et pourront contraindre tous gentilshommes, fermiers, marchands et aultres de vendre leurs bleds, et n'en faire aultre reserve que pour leur provision. · Et si auleung marchand veult acheter des bleds en une province pour les transporter en l'aultre, il sera teneu d'advertir les officiers de la police de la quantité qu'il veult acheter, et du lieu où il le veult transporter, afin que ces officiers puissent donner advertissement aulx aultres de l'achapt, quantité, prix et transport desdicts bleds. Par ce moyen, le gentilhomme, l'abbé et le fermier seront contraincts de vendre leurs bleds au mesme prix qu'il se tendra au grenier public; le marchand ne pourra monopoler; les bleds seront conservés dans

les greniers publics, bien menagés et changés dans ung an. Tellement que si les moyens ci dessus proposés sont practiqués, nous pouvons esperer une prompte abondance de toutes choses en ce royaume, que nous verrons florissant, remis en sa premiere splendeur, Voire mesmes en plus grande qu'il ne feust jamais. Voilà ce que nous pouvons dire des causes de la cherté, et des moyens d'y apporter ung remede efficace, apres ce que, depuis cinq ans, en a bien doctement, et encores plus amplement traicté M. Jean Bodin, advocat en la cour, en ung excellent ouvrage qu'il a faict, duquel nous avons extrait partie de celui-ci, avec quelques articles de la Remonstrance du president Bailly, y ayant mis du nostre ce qui nous a semblé convenable et propre à la matiere que nous avions entrepris de traicter.

XC. - LETTRE DE M. DUPLESSIS

A M. le prince de Condé.

Du 21 janvier 1587.

Monseigneur, je desire la paix, et Dieu le sçait; mais j'ai esperé fort peu de ce traicté, me representant qu'ung edict extorqué par la force ne pouvoit estre rompeu que par ung contraire, j'entends qui rende a leurs majestés, avec la liberté, leur premiere intention et volonté. Vos ennemis ont jetté leur feu, et vous avés mesnagé le vostre. Ils sont tous recreus et harassés, et vous sur le bord d'une grande esperance, qui vous rafraischit. Dieu a soufflé sur les grands efforts de six ou sept armees pour leur faire entendre qu'il estoit seul suffisant de vous defendre, et maintenant vous envoye ung secours grand et fort, afin qu'ils cognoissent

que vous avés tost ou tard de quoi les offenser. Il fault que vostre prudence mesnage ceste force, et qu'elle en tire une paix qui ne se puisse rompre, au moins telle, que, quand ils la vouldront rompre, ce soit à leur dommage et non le nostre; cependant, je trouve que le roy, vostre cousin et vous, avés faict sagement de prester l'oreille aulx paroles de paix. Deux proficts vous en seront veneus; que la France aura cogneu qu'il ne tient poinct à vous qu'elle ne l'ait; que vous aurés veu aussi que vous ne la pouvés attendre d'eulx, si vous ne la vous faictes en partie. Je n'ai rien obmis à escrire en Allemaigne et en Suisse pour vostre service, et service entendre en ces quartiers soigneusement tout ce qui s'est passé. Quant à nos affaires, on nous dict que M. le mareschal de Matignon vient assieger Leirac, et je vous jure, monseigneur, que nous vouldrions qu'il y feust desjà, pour lui donner de la peine et à nous de l'exercice; cependant j'attens les commandemens du roy de Navarre et vostres, et demeurerai, s'il vous plaist, à jamais vostre, etc.

De Leitoure.

XCI. — LETTRE DE M. DUPLESSIS

A MM. de Montauban.

Du .. janvier 1587.

MESSIEURS, j'ai veu la copie des lettres que vous à escrites M. du Claux, tost apres mon partement de vostre ville, ce que je vous prye de remarquer; je serai tous jours tres aise que tous vos voisins vous soient amis, et n'ai poinct d'interest au contraire. Cependant, puisqu'il pretend qu'on l'accuse faulsement d'avoir en

trepris sur vostre dicte ville, l'advertissement, puisqu'il a pleu à Dieu, estant veneu par moi, je me sens teneu et obligé de le cautionner; je vous pryerai donc, messieurs, de vous resouvenir, sans prendre les choses de plus hault, que vous avés veu ses lettres au feu sieur de Cornusson et au sieur du Cayla, que vous trouverés en vos registres; et pour la verification d'icelles, qu'elle a esté faicte sur une vingtaine d'aultres siennes, addressees aulx plus notables habitans de vostre ville, comparees avec l'original, par lesquelles il est appareu des dessusdictes, qu'elles sont escrites et signees de sa main propre, et cachetees de son cachet. Et de ce faict foi le proces verbal qui en a esté faict par M. de Grateins, chancelier du roy de Navarre, M. Constans, premier consul de vostre ville, M. de la Roche Chandieu, ministre de la parole de Dieu, et moi, qui l'ayons tous signé de nos mains. Peult estre que maintenant que M. de Cornusson est decedé, qui debvoit executer ceste entreprise, il sera bien aise de vous faire croire qu'il est vostre ami et l'a tousjours esté. Dieu doint que l'entreprise soit morte tout ensemble, et sa volonté changee en mieulx en vostre endroict, et vous doint, en attendant meilleurs effects de lui, prendre garde de bien pres à vos affaires; quant à moi, je n'y pretens aultre interest que vostre conservation. Tout ce qui est bon pour vostre ville est bon pour moi. Si j'ai eu de la passion, comme il pretend, elle a esté ou publicque ou vostre; car il estoit question d'une personne que je ne vis onques, et je ne suis pes, graces à Dieu, cogneu pour homme qui me cree des ennemis pour mon plaisir. Vous sçavés au reste le jugement qu'en a faict le roy de Navarre, et ce qu'il en a escrit à M. de Terride et à vous mesmes, lequel, si je me

suis efforcé d'effectuer comme il m'estoit recommandé, j'en ai bon garant contre mes ennemis qui sont les vostres. Il vous dict que vous demeurerés voisins, et que ceulx qui auront abusé de vos moyens iront quester au loing. S'il a dict cela pour moi, il est hors de propos; car vous m'estes tous tesmoings que je ne vous ai jamais esté en charge; et peult estre adjousterés encores qu'en ce peu qui a esté en moi, j'ai tasché de vous estre à soulagement. Au moins vous ferai je voir, s'il plaist à Dieu, que s'il vous est assés proche voisin pour nuire, je ne suis pas trop loingtain ami pour vous servir. Des aultres particularités dont il escrit, je n'y veulx poinct toucher, car je ne sçais que c'est; me suffit d'avoir touché ce qui me touche, et qui ne me touche toutesfois aulcunement s'il ne vous touche. Et pour la fin vous dirai, messieurs, que vous n'avés ne aurés jamais ami plus desireux de vostre bien, et du repos et conservation de vostre ville, que vostre, etc.

XCII. — LETTRE DE M. DUPLESSIS

A M. de Valsingham.

Du .. janvier 1 587.

Monsieur, j'ai sceu la triste nouvelle de la mort de M. de Sidney. J'ai eu des travaulx et des traverses en ce miserable temps, mais rien qui m'ait tant pesé ni tant percé le cœur, rien qui m'ait plus vivement touché ni en particulier, ni en public; je l'ai ressentie en moi pour vous et pour moi mesmes; je le pleure encores et le regrette, non pour l'Angleterre seulement, mais pour la chrestienté. Dieu le nous a plainct, monsieur; et peult estre parce qu'il eust merité ung meilleur siecle;

mais, certes, à nul ne pouvoit il mieulx convenir qu'à cestui ci, si la volonté de Dieu estoit de l'amender. C'est ce qui me faict desesperer de mieulx quand le bon s'en va, et la lie nous demeure; et c'est trop aussi en une annee d'en avoir perdeu deux, je dis feu M. le comte de Laval et M. Sidney, tels en leurs personnes, tels à leurs amis, tels au public. Desormais je suis tenté ou de n'aimer personne, ou de haïr moi mesmes; toutesfois je me resouls enfin de les aimer et honorer en tout ce qui les touche, et veulx redoubler particulierement vers vous en affection, en honneur, en service. Faictes moi donc cest honneur, monsieur, de faire estat de moi de plus en plus, et concluons par ce mot: La volonté de Dieu soit faicte, lequel je supplie, etc.

XCIII. - * HISTOIRE

De la mort de la royne d'Escosse, executee le 19 febvrier 1587, envoyee d'Angleterre à la feue royne Louise de Lorraine, espouse de Henry III, roy de France.

Les actions des personnes demonstrent, tousjours quels ils sont; or la royne d'Angleterre ayant exercé, à l'endroict de la royne d'Escosse, la cruauté ci apres exprimee, faict voir à ung chacung comme elle est tres cruelle et inhumaine.

Apres qu'elle a deteneu prisonniere la royne d'Escosse l'espace de dix neuf ans, injustement et sans raison, l'a condamnee à perdre la vie, soubs pretexte de quelque faulse accusation que l'on a practiquee contre elle.

La sentence de mort lui ayant esté prononcee, au

lieu de la faire mourir incontinent apres, comme c'est la coutume, on l'a laissee sur ce bon appetit l'espace de trois ou quattre mois, et cependant elle demeuroit en tel estat, qu'elle n'attendoit que l'heure que l'on la veinst prendre pour mener au supplice: je laisse à penser si ce n'estoit pas la faire vivre et mourir ensemble, et si jamais on a veu exercer telle cruauté, voire à l'endroict du plus criminel du monde.

Ensin, la royne d'Angletere, le dix huictiesme (1) jour du mois de sebvrier dernier 1587, pour le comble de toute cruauté, le soir, envoya vers ladicte royne d'Escosse ung mylord lui signisser que le lendemain, sans saulte, à dix heures du matin, elle seroit executee.

Alors ceste povre royne lui dict qu'elle ne pouveit pas penser qu'une telle cruauté feust entree au cœur de la royne d'Angleterre, sa bonne sœur; que toutesfois, puisque, depuis dix nœuf ans en çà, elle l'avoit injustement deteneue prisonniere, elle n'en pouvoit pas esperer aultre chose.

Là dessus ledict mylord s'estant retiré, la povreroyne, demeurant seule avec ses damoiselles en sa chambre, se resoleut de souffrir et endurer constamment la mort, disposant des lors de ses actions; et des apres, elle et ses damoiselles ne cesserent de vacquer à pryeres et oraisons jusques au lendemain, sur les neuf heures au matin, que l'en la veint trouver.

Ceste nuict là mesmes se communia elle mesmes avec ses damoiselles, et de cela y a beaucoup d'apparence pour le croire; car, comme la royne d'Angleterre ne lui permettoit d'avoir ung presbtre pour la commu-

⁽¹⁾ Son martyre porte que ce feut le 17 que la mort lui seut signifiee.

nion, à elle qui neantmoins n'avoit rien en plus grande recommandation que la saincte communion, conduicte d'une grandissime pieté et devotion, faisoit en telle sorte que tousjours elle avoit par devers elle plusieurs hosties consacrees, qui ordinairement lui estoient presentees en une boeste dans ung mouchoir, par ung presbtre habillé comme ung gentilhomme, ayant mesmes l'espee au costé, à celle fin que l'on ne s'apperceust de rien, qui faict croire qu'elle n'auroit oublié une si precieuse chose et tant necessaire pour son salut, dont elle estoit tres soigneuse, sa vie tres chrestienne l'ayant manifesté assés.

Ledict lendemain veneu, ledict mylord, avec quelques aultres, estans entrés en sa chambre au lieu qu'ils estimoient la trouver encores au liet, la jugeant du nombre de ceulx qui se font tirer l'oreille pour ventr au supplice, la trouverent à genoux, encores pryant Dieu, et tellement preste d'endurer le martyre, qu'elle leur dict qu'ils venoient bien tard, paroles qui rendent grand tesmoignage de sa constance.

Mais auparavant que sortir de sa chambre, elle prya ce mylord (puisque elle despendoit de sa puissance) lui accorder deux choses; l'une que le testament qu'elle avoit faict depuis quelque quinze jours en çà (1), par lequel elle disposoit de quelque peu de meubles au profict de ses serviteurs, feust executé; l'aultre, qu'attendeu sa qualité de royne, comme elle estoit, que ses deux damoiselles lui feissent compagnie jusques au supplice, ce qui lui feut accordé.

Et comme elle estoit sortie de sadicte chambre, on

⁽¹⁾ Son martyre porte qu'elle feit son testament fa nuict suivant le jour que l'on l'avoit advertie de mourir le lendemain.

voulleut la lier et garotter comme ung larron ou meurtrier; elle remonstra qu'il n'en estoit de besoing, veu que si allegrement elle alloit au lieu où on la desiroit, qui feut cause que l'on ne passa oultre.

Ceste povre royne seut menee en une salle du lieu où elle estoit prisonniere, distant de Londres d'environ dix lieues, où estant entree, elle la trouvatendeue de drap noir, au milieu de laquelle estoit l'eschaffaud et ung tapis de velours noir, et le carreau de mesmes, où seut executee la plus grande cruauté des cruautés, et trouva aussi en ladicte salle bien environ quature cens personnes.

Estant proche de l'eschelle ou montoir, elle dict à celui qui l'avoit gardee pendant sa prison, et depuis quelque temps l'avoit traictee avec toutes les rigueus dont il s'estoit peu adviser : Vous sçavés bien comme vous m'avés traictee; maintenant que je sors hors de vostre puissance, pour la derniere peine que je vous donnerai, aidés moi à monter; ce qu'il feit, et Dieu sait de quelle affection.

Comme elle feut montee, elle se tourna vers son maistre d'hostel, et lui dict tout haultement: Je recognois que m'avés bien et fidellement servie, et suis bien faschee que je n'ai le moyen de vous recompenser; allés vers mon fils, dites lui que je lui envoye la benediction, fassant le signe de la croix au nom du Pere, et du Fils, et du Sainct Esprit; il vous prendra; servés le avec la mesme fidelité que m'avés servie, il vous recompensera, tant du service que m'avés faict, que de celui que lui ferés.

Cela faict, on lui presenta ung evesque et ung ministre de leur relligion pour l'admonester, lesquels ne voullant voir, ouïr ni escouter, elle se meit à genous,

disant à haulte voix sa confession de foi, et entre aultres choses, qu'elle estoit nee royne chréstienne; que, pendant sa vie, qu'elle avoit tousjours vescu catholiquement, et qu'elle y voulloit encores mourir. Et apres avoir faict plusieurs pryeres et oraisons, qu'elle lisoit en latin dans ses heures, on lui dict : Il est temps.

Soudain elle se leva et veint à une de ses damoiselles, se bouchant les yeulx elle mesmes de deux de ses doigts, et lui dict: Bandez moi; ce que ceste povre damoiselle feit, je laisse à penser avec quel desplaisir.

Apres que ladicte povre royne se feust mise à genoux et qu'elle eust declaré (non poinct pour s'exempter de mourir, mais pour la verité) que jamais elle n'avoit entrepris ni conspiré contre ladicte royne d'Angleterre, par ainsi qu'elle mouroit innocente, et qu'elle eust elle mesmes presenté son col sur le poteau, attendant le coup de la mort; ledict coup lui feut donné, ce qui apporta ung tel crevecœur aulx assistans, qu'ils fondirent presque tous en larmes.

Ceste povre princesse endura la mort avec la plus grande constance qu'il est possible de dire, sans s'estonner et sans jamais changer de couleur; au contraire, avec le visage le plus beau, et le plus serein, et le plus net qu'elle eust oncques en sa vie, qui demonstroit assez qu'elle se soulcioit bien peu de perdre ceste vie temporelle, et qu'elle esperoit bien d'entrer en une meilleure, qui est l'eternelle, où ses afflictions, vertus et merites, des long temps, comme mareschaulx, y ont reteneu sa place et son estre.

Sa teste feut monstree au peuple par une fenestre, et son corps porté par les siens en sa chambre, où ilfeut ouvert et embaulmé.

Le jour de ceste execution, dedans la ville de Lon-

dres, lés cloches sonnerent bien vingt quattre heurs durant, et plusieurs feux de joie feurent faicts comme en signe de triomphe et de victoire, chose tres malà propos faicte; mais c'est la coustume des meschans de se resjouir du mal. Et feut mandé à l'ambassadeur de France qu'il eust à envoyer du bois pour mettre auldict feu, qui demonstre bien le peu d'estime qu'or faict par de là du roy et des François; et quant à la royne d'Angleterre, elle se promenoit par la ville avec celui qui se dict roy de Portugal.

XCIV. — LETTRE DE M. DUPLESSIS

A M. le mareschal de Matignon.

Mars 1587.

Monsieur, je ne puis oublier que je suis François. quelque mal qu'on tasche à nous faire. Il m'a esté en voyé ung paquet d'Espaigne pris es Landes, que ju dechiffré; nous avons appris par là qu'il se prepare une armee en Espaigne, qui est preste d'embarque. laquelle doit faire descente en ce royaume en saveur de la Ligue, et portent les lettres qu'elle sera com posee de vingt et deux à vingt et cinq mille hommes. Nous avons ung peu trouvé estrange qu'ung si grand nombre peust partir d'Espaigne tout à une fois. Il nous semble qu'elle sera pour fondre en Bretaigne, parce que, par les mesmes lettres, nous avons appris que k roy d'Espaigne continue en ses pretentions sur ladicte province, mesmes qu'il a donné pension, depuis deu mois, à deux jurisconsultes de son royaume pour dis puter par traictés le droict qu'il y pretend, choses. comme vous le sçavés, monsieur, qu'on a accoustume

de publier à l'entree d'une guerre; afin de la justifier, Ceste conjecture ne doibt pourtant empescher que l'on ne mette ordre aulx aultres costes. Vous prendrés, s'il vous plaist, cest advertissement en bonne part, et ne l'imputerés poinct à apprehension particuliere que nous ayons pour les affaires de nostre parti; mais à celle qui nous est ou doibt estre commune avec tous François, de la ruyne de ce royaume. Monsieur, je supplie le Createur, etc.

XCV. — LETTRE DE M. DUPLESSIS'

A M. de Beze.

Mars 1587.

Monsieur, il y a quelques mois qu'il feut pris ung courrier es Landes de Bourdeaux, qui venoit d'Italie et s'en alloit en Espaigne. Il estoit chargé de plusieurs lettres en chiffre, qui feurent envoyees au roy de Navarre à La Rochelle, lequel les m'envoya à Montauban, où lors j'estois, pour les dechiffrer, ce que j'ai aict, comme vous pourra tesmoigner M. de la Roche Chandieu, qui en a veu les alphabets tous dressés; et parce qu'il y en avoit du duc de Savoye à son Amassadeur en Espaigne, qui concernent l'entreprise sur Zeneve, laquelle y est manifestement practiquee comme rerrés, j'ai pensé de leur envoyer le dechiffré, sauf à nessieurs de Geneve à requerir du roy de Navarre de eur envoyer l'original qui est demeuré en ses mains ils en ont besoing; car peult estre vouldront ils veisier ladicte entreprise en une assemblee des cantons, a quoi ceci leur servira. Et j'entends aussi que M. de Savoye l'a tousjours niee pour ne perdre le vidamat de

496 , LETTRE DE M. DUPLESSIS

Geneve, qu'il prend à cause qu'il meut en sief de la souveraineté, et que par ce moyen, s'il estoit prouvé qu'il eust entrepris sur ladicte souveraineté, il s'ensuivroit qu'il auroit perdeu au profict de messieurs de Geneve ledict vidamat. Vous, qui entendez mieulz la particularités, sçaurés aussi mieulx cognoistre le profict qui s'en peult tirer, et verrés d'abondant jusque à quoi et comment les voisins s'en accordent ensemble, et les jalousies qui en procedent, par lesquelles Dieu opere pour vostre conservation. Au reste, nous avons deçà l'armee de M. le mareschal de Matignon sur le bras; il y a deux mois qu'il est en campagne, et n'i encores rien gaigné sur nous. Si nos amis estrangers tiennent promesse, nous respirerons ung peu apres tant de travaulx; mais, comme je vous disois par mo dernieres, nous n'avons que faire d'esperance pour nous nourrir le courage; car, graces à Dieu, nous sommes resoleus en tous evenemens de nous defendre à pied. Mais bien serons nous bien aises, apres une longue et penible defensive, de pouvoir ranger nos ennemb à mesme poinct. M. le mareschal de Matignon a toute son armee à une canonnade de Leyrac, petite plat proche de Garonne, à trois lieues d'ici. Il s'y est attàqué quelques escarmouches, mais elle n'est encore attaquee; c'est peu de chose du lieu, mais il est bien pourveu d'hommes, et ferons tout ce que nous pour rons pour ne les laisser perdre. Dieu nous aidera, le quel je prye, etc.

De Leitoure

XCVI. — LETTRE DE M. DUPLESSIS A M. Du Fay.

Du 21 avril 1587.

Monsieur, M. de Turenne arriva seulement le 19 le ce mois en ce lieu. Et des le mesme jour je m'enquis lu faict dont vous requeriez mon advis. Puisque vous 'avez agreable, je le trouve tres bon; et me semble que æ sera le service du maistre et vostre contentement. A ceste fin je dresserai les instructions selon la cognoisance que j'ai des lieux, et les envoyerai au premier our, si vous ne les prevenés. Je n'appelle poinct amvition le desir de servir; non pas mesmes le desir de commander, quand on le sçait, et où on doibt. C'est au contraire stupidité, de sentir en soi de quoi bien faire, et n'en rechercher les moyens. Ce qui donne le nom à este passion, c'est, à mon advis, quand ce desir tend 1 soi, et non au public. En toute aultre chose que je çaurai vous estre agreable, vous me trouverez de tres onne affection; et sur ce je saluerai vos bonnes graces, t pryerai, etc.

A Nerac.

XCVII. — LETTRE DE M. DUPLESSIS

A M. de Guitry. (1)

Du 29 avril 1587.

Monsieur mon cousin, il sera pourveu aulx affaires ue m'escrivés, et ne recevés en la conduicte de vos

⁽¹⁾ Il estoit en Allemaigne, travaillant pour la levee des Reystres.

Mém. DE DUPLESSIS-MORNAY. Tome III.

32

desseings auleun trouble de celle part. Le maistre y a esgard, et sera en personne, et nul ne le previendra. Nous attendons en bonne devotion le fruict de vos labeurs. Dieu nous a faict beaucoup de graces jusques ici en nostre defense, de laquelle les plus grands coups semblent rués. Et en voici une seconde, quand il nous donne le moyen d'y reduire nos ennemis à nostre tour. Faictes estat qu'en toutes nos provinces nous tenons aujourd'hui la campagne; qu'en chacune nous avons mieulx recouvré que nous n'avons perdeu; que nos ennemis sont recreus, et nous encores frais; et conclués de là où ils en seront quand nous serons joincts à nostre armee. Or, il en fault sçavoir gré à Dieu, qui nous a benis oultre nature; et je le prye, etc.

De Nerac.

Vous-aurez sceu la reprise de Castillon par M. de Turenne, qui a enseveli toute la gloire de M. de Mayenne.

XCVIII. — LETTRE DE M. DUPLESSIS A M. de Segur.

Du 29 avril 1587.

Monsieur, ne plaignés poinct les longueurs; Dieu les a conduictes pour sa gloire et pour nostre mieulx. Nos ennemis ont cogneu que nous estions capables de nous defendre, quoiqu'en une annee ils ayent faict l'effort de quattre. Nous avons deu aussi appercevoir que c'est que d'esperer en Dieu contre toute apparence. Et maintenant il nous donne les moyens asses prompts de faire voir à nos ennemis que nous leur pouvons nuire. Toutes les armees sont en fumee, les hommes recreus et leurs finances epuisees. Nous som-

mes encores frais de volonté et de courage, plus forts de beaucoup qu'avant la guerre, et tenons la campagne en toutes nos provinces. Venés et vous ferés une paix qui durera. Et sur ce, etc.

De Nerac.

XCIX. — LETTRE DE M. DUPLESSIS

A M. de Clervant. (1)

Du 29 avril 1587.

Monsieur, je loue Dieu du bon estat des affaires de delà. Il en fault presser l'effect. Et je sçais que vous n'y perdés le temps, ni plaignés vos moyens. Le maistre s'en apperçoit, et le cognoistra de plus en plus. J'ai esté absent de lui par son commandement; mais plus utilement et honorablement pour la saison, que je n'eusse esté aupres de lui. Car, quant aulx traictés, ils ne pouvoient rien produire sans la force. Je vous ai mandé souvent que l'Allemaigne doit servir de sage femme pour faire enfanter la paix. La longueur de la negotiation en a peu ennuyer aulcungs; mais si crois je que le secours nous vient plus à propos qu'il n'eust faict l'an passé. Nous avons eu le loisir d'esprouver l'assistance de Dieu; le roy, d'essayer la vanité des promesses de la Ligue; le clergé, le peuple et la noblesse, de rabattre de la reputation qu'ils leur donnoient; les ennemis mesmes, de sentir que nous estions à preuve de tous les efforts de ce royaume, qu'ils ont quadruplés en une annee; et au bout de tout cela sont pres de voir qu'apres avoir bien sceu resister au mal, nous ne sommes pas depourveus de moyens de leur en faire.

⁽¹⁾ Il estoit en Allemaigne.

Advertissés promptement, et par expres, de toutes choses. Car ce prince dispose tous ses affaires à vous approcher. Et vous sçavez combien il importe de laisser ung ordre en ces 'pays. Dieu, en somme, aura la gloire, s'il lui plaist, de ceste fin, comme du milieu et du commencement, etc.

C. — LETTRE DE M. DUPLESSIS

A M. Vacquiere, lieutenant general à Leytoure.

Monsseur, j'ai veu la lettre que vous avés escrite à M. de Cornay, concernant la ville et archevesché d'Auch; et ne fauldray de faire entendre au roy de Navarre les bons services que vous lui faictes en cest endroict Vous sçavez la promesse qu'il en a de long temps, tant en faveur de mariage, qu'en recompense de pertes et services. S'il y a quelque equité, je pense qu'il en doibt jouir, mesmes les choses se disposant à une paix, comme elles en prennent le chemin. C'est pourquoi je pense que vous pouvez remonstrer à messieurs d'Auch le tort qu'ils se feroient de recevoir M. de Nemours ou aultre; car il n'y a poinct de doubte que le roy de Navarre ne s'efforce d'en jouir, selon le droict qui lui est acquis par la promesse de nos roys; et en recevant ung aultre, ils envelopperoient, par ce moyen, leur ville et tout le voisinage en une calamité et misere telle que telles contentions ont accoustumé d'apporter. Vous pouvés penser aussi que le roy de Navarre ne prendra pas plaisir de voir loger au milieu de ses maisons, affaires et pays patrimoniaulx, ung ennemi mortel de lui et de sa maison, s'estant, ceulx de la maison de Lorraine et tous ceulx qui les touchent, formalisés si &-

trangement contre lui. Qui sont des considerations qui doibvent entrer au cœur de messieurs d'Auch, soit qu'ils ayent esgard au bien et repos de ce pays, et au leur, soit qu'ils regardent à l'honneur et respect qu'ils doibvent au roy de Navarre, estant ses subjects. Je m'asseure que vous n'y obmettres rien. Comme aussi vous vous pouvés asseurer que je n'oublierai pas les bons offices que vous y ferés; et pour ce, ne ferai ceste plus longue, etc.

CI. — ADVERTISSEMENT

Aulx bons catholiques de Guyenne, soubs le nom d'ung catholique.

Juin 1587.

It est evident, qu'au commencement que la Ligue s'esmeut, le roy ne desiroit que la paix, et receut grand deplaisir de ce qu'elle le jettoit en guerre.

Les declarations qu'il en feit alors en faisoient foi; les lettres qu'il escrivit aulx courts de parlement, gouver neurs, seneschaulx, etc. Quelques executions aussi s'en ensuivirent, comme nommeement celles de Marseille, l'Agen, et du chasteau Trompette.

Et consequemment aussi, pour la crainte plus de eurs menees que de leurs armes, il feut conseillé d'accorder avec eulx, et cherchoit, comme nous sçavons ous, une paix generale. Mais, pour eviter les inconveniens, iceulx voulant retenir les armes, feut conrainct de les accommoder mesmes des siennes; et au ieu d'esteindre et amortir la guerre, de la convertir contre les huguenots.

Son intention estoit de donner le loisir aulx bons

subjects de ce royaume, que le zele de relligion pouvoit avoir seduicts, de cognoistre que rien moins que la relligion n'armoit les aucteurs de la Ligue. Et de faiet, il appareut incontinent aulx clairvoyans qu'il n'y alloit rien du faict du roy en ceste guerre, et qu'il y portoit ses mains à contre cœur. Car les executions traisnoient evidemment, les moyens n'estoient fournis qu'en retenant; et pour doulcement leur soubstraire les forces, diverses armees feurent creées en diverses provinces; le roy proprement ne voullant pas exterminer les huguenots ni le roy de Navarre; mais si on estoit contrainct d'en venir là, le voullant plustost, ou par sa propre main, ou par toute aultre, que par celles de ceulx de la Ligue.

Tous ceulx qui ont quelque part au maniement de ce royaume; tous ceulx qui, à cause de leurs charges, soit en la justice, soit aulx armes, peuvent ressentir sa volonté par ses commandemens; les ungs plus, les aultres moins, ont recogneu ceste intention.

Mais deux especes de gens dessus tous aultres, aultquels elle ne pouvoit estre cachee, les chefs de la Ligue, et entr'eulx M. de Mayenne mesmes, qui se plaignent que le vent les a abandonnés à mi voyage; les confidens de sa majesté aussi, qui ont eu le mot d'alentir leurs desseings; estant tout presupposé que leur prospenté estoit ruyneuse au roy et au royaume.

Secret qui lors meritoit d'estre secret, parce que plusieurs estoient charmés du faulx pretexte de relligion, comme les hommes pour la pluspart ne cognois sent la malice que quand elle a produict fleur ou fruictet non, comme les plus advisés, en graine; mais qui au jourd'hui se doibt manifester, quand les aucteurs de la Ligue se sont declarés contre le roy, font la guerre en

ses provinces plus paisibles, ont saisi ses villes catholiques, esquesses n'y a aulcung, et n'y eut oncques de la relligion contraire.

C'est ce qui a faict blasmer plusieurs bons serviteurs du roy en diverses provinces, qui, cognoissans son intention, ne pouvoient pas s'habiller des couleurs de la Ligue. On se fondoit sur des ordonnances rigoureuses, des proscriptions, des bannissemens, des subhastations, qu'on crioit au palais. Eulx avoient le retentum pour regle de leurs actions; ils lisoient au cœur du roy, qui leur servoit de commentaire.

Nous avons le mareschal de Matignon en ceste Guyenne, duquel chacung s'est licentié de dire ce qu'il a voulleu. M. de Mayenne se plainct qu'il l'a mal assisté en ses conquestes : nous aultres disons qu'il eust beaucoup plus faict s'il eust voulleu. Si sçavons nous tous qu'il est bon capitaine; qu'il ne s'est poinct epargné en Normandie contre les huguenots; qu'il n'a pas fort recherché la bonne grace du roy de Navarre, mesmes en pleine paix; qu'il sçait au reste la volonté du roy, si personne la sçait. De là donc, que devons nous conclurre, sinon qu'il faict ce qu'il sçait estre de son intention? Et par consequent, s'il faict la guerre froidement, que le roy la veult plus froidement encores?

Le roy, sans doubte, vouldroit que nous devinissions sa volonté; et nous peult estre vouldrions qu'il devinast la nostre; tous deux aussi las de ceste guerre l'ung que l'aultre. Il commande à la noblesse de s'armer, il demande au peuple de contribuer, et vouldroit en estre refusé. Cependant, povres idiots que nous sommes, nous nous escarmouchons en la guerre, nous espuisons tout le fonds de nos moyens; et le roy ne nous en sçait nul gré; le roy de Navarre ne nous en pourra voulloir

que mal. Qui perdra sa bourse, et qui sa maison, et qui son fils, qui, faisant chose agreable au roy, s'en consoleroit en l'espoir d'une recompense; là où estant assés evident qu'il n'y prend poinct plaisir, on ne peult attendre qu'ung Nescio vos. Qui avoit requis, nous dira il, ces services de vous? Vous ai je pas faict paroistre mon intention? ne l'avés vous pas assés leue, soit en mes actions, soit en celles de mes serviteurs plus speciaulx?

Les premiers mois de la guerre, nous eussions pen dire que ce nous estoient ou chiffres, ou enigmes; mais qu'y a il plus qui ne nous soit interpreté et dechiffre trop clairement? Le roy de Navarre tient la campagne en Poictou, mene le canon, y prend les meilleures villes; ses forces ne sont si grandes, que de huict armees que nous voyons l'annee passee, on n'en peult bien faire une. Qu'est ce donc cela, que personne ne lui resiste? et si la force ne manque poinct, qui peult donc marquer que la volonté seule? Le roy nous voullant monstrer que ceste guerre n'est la sienne; qu'il vouldroit la paix, mais que c'est à nous à la lui demander.

Par deça M. le mareschal a teneu une armee, il a des Suisses et des Lansquenets, il a eu cinq regimens françois, la noblesse du pays en tres grand nombre et bien armee, quelques Albanois, les villes devotieuses à tout faire. En six mois entiers qui nous ont tant cousté, qu'il n'y avoit poinct de chef qui lui feist teste en ce pays, qu'a il attaqué? Et qui niera volontiers qu'il ne l'eust bien peu faire? Puis, nous sçavons que le roy se rit de Castillon repris; de M. de Guise qui perd son manteau en sa retraicte de Sedan: leur honte le rejouit, et leur gloire le picque. Et qui pourra donc penser que qui les sert ne lui fasse beaucoup de des-

plaisir; qui leur nuit, ne lui fasse service? Ces choses parlent assés, si nous ne sommes sourds; et nous avons interest à les entendre. On veut que nous refusions les moyens de la guerre; on veut que nous presentions requeste aulx fins d'avoir la paix; on nous mange jusques aulx os, afin que nous crions; on nous faict sentir la guerre en toutes ces miseres, afin que nous apprenions à la maudire, et ceulx qui l'ont esmeue.

Et pensés que nous serions bien sages de nous animer quand le roy ne l'est poinct; nous formaliser, quand il ne le veult poinct; nous charger de haine, de misere et de ruyne, pour ruyner le roy de Navarre, que peult estre, dans trois jours, nous verrons uni avec le roy contre la Ligue.

CII. — INSTRUCTION

Au sieur du Perron (1), s'en retournant trouver M. le duc de Montpensier.

Juillet 1587.

Le roy de Navarre auroit toujours infiniment desiré de se voir conjoinct avec mon dict sieur de Montpensier, comme il avoit esté traicté entre eulx, non seulement en volonté, mais en personne. Toutesfois, sur les raisons qui lui ont esté representees de sa part par le sieur du Perron, il desire tant à son bon jugement, encores qu'avec son tres grand regret, qu'il trouve bonne l'acceptation qu'il a faicte de l'avant garde de l'armee à lui presentee par sa majesté, ne doubtant aulcunement ledict seigneur roy de Navarre, que ledict sieur n'emploie tout ce qu'il aura d'auctorité, de creance

⁽¹⁾ C'estoit ung chambellan de M. de Montpensier.

et de moyens pour l'establissement de sa maison et ruyne de leurs ennemis communs; ce qui faict que tant plus aisement ledict seigneur roy a ployé le desir naturel de se voir joinct avec lui, à la raison proposee du bien et prosperité de leur dicte maison.

Est d'advis nonobstant ledict seigneur roy, que ledict seigneur duc dilaye de s'acheminer en l'armee le plus qu'il pourra, prenant tantost une excuse et tant ost l'aultre, telle toutesfois qu'il fasse tousjours paroistre qu'il est tout resoleu d'y aller, afin que par ce moyen les capitaines et chefs, et les compagnies par consequent, prenent occasion de retarder; chose qui peult apporter beaucoup de bien et d'advantage aulx affaires communs.

Desire nonobstant ledict seigneur roy de Navarre, que M. le prince de Conti, son cousin, prenne parti directement avec lui, avec tout ce qu'il pourra mettre ensemble d'amis et serviteurs, soit pour faire ung passage sur la riviere de Loire, si tant est qu'il s'en presente occasion, soit pour se saisir de quelques places au lieu plus commode pour faire assemblee des serviteurs de leur maison, mesmes à present qu'il se peult faire sans danger, attendeu que les Reystres sont sur la frontiere. Ce qu'il s'asseure que mon dict sieur de Montpensier trouvera tres à propos, d'autant plus qu'il y a nombre de gentilshommes, tant d'une relligion que d'aultre, qui ne prennent pas plaisir de se jetter dans l'armee de sa majesté.

Quant à M. le comte de Soissons, ledict seigneur roy pour l'affection qu'il huy porte, et qu'il luy vouldroit de monstrer par effect, auroit grant desir de l'avoir pres de soy. Toutesfois, considerant qu'il est ancré dedans la court, dont peult reussir grande commodité à leur maison,

et particulierement de l'assistance audict seigneur de Montpensier, en la direction des affaires qui se presentent, est d'advis ledict seigneur roy, qu'il n'en bouge pour le present; qu'il y fonde ung bon parti, et y jette les racines le plus profond qu'il pourra; qu'il gaigne creance dans les armes pour la soubstraire à leurs ennemis; sauf en toute occasion qui s'offrira d'embrasser avec affection et generosité l'establissement entier de leurdicte maison, et l'extermination de leursdicts ennemis; c'est à dire le bien et repos de cest estat, qui ne peult estre affermi qu'en leur ruyne.

Auroient esté ci devant imbeus les princes estrangers, amis et alliés de leur maison, par les traictés qui se sont faicts, que ledict seigneur duc se seroit resoleu, le secours estranger entrant en ce royaume, de se declarer contre les aucteurs de la Ligue, et prendre les armes avec le roy de Navarre; et pourtant pourroient trouver estrange que ledict seigneur duc eust pris charge en l'armee du roy, preparee contre ledict secours, et par consequent, comme ils peuvent juger, contre ledict seigneur roy de Navarre.

Pourtant est d'advis ledict seigneur roy, que ledict seigneur duc depesche ung gentilhomme de qualité, et bien instruict de son intention, vers M. le duc de Bouillon, son nepveu, pour luy faire entendre les raisons dont il a esté meu à ainsi le faire; à sçavoir, pour empescher que les armes du roy ne tombassent es mains de ceulx de Guise, et pour estre aussi tant plus auctorisé à advancer le bien de sa maison, afin qu'icelui le fasse bien comprendre aulx princes d'Allemaigne et aultres, qu'il sera besoing. Ce qu'aussi fera ledict seigneur roy par ses serviteurs, en Angleterre, Allemaigne, Suisse et ailleurs, où il appartiendra.

Pour conclusion, ledict seigneur roy s'asseure de plus en plus que la resolution que ledict seigneur duc a prise d'accepter la charge à lui presentee par sa majesté n'est poinct ung changement de celle qu'il auroit prise paravant; ains plustost une continuation et confirmation d'icelle, qui se monstrera par les effects. et se fera sentir en la saison.

Comme aussi, il prye de tout son cœur de s'asseurer qu'il aura en singuliere recommandation, oultre le bien general de leur maison, la dignité speciale dudict seigneur duc, et de monsieur le prince son fils, comme il verra par effect, selon les moyens que Dieu luy donnera.

Faict à La Rochelle.

CIII. — PROTESTATION

Et declaration du roy de Navarre sur la veneue de son armee en France.

Du 4 juillet 1587.

Comme nous avons, des la premiere revocation de l'edict de paix, assés particulierement faict cognoistre par nostre dicte declaration et protestation à tous ceulx qui sont de sain et entier jugement, et qui ne sont preveneus d'aulcune passion, que le subject de la prise de nos armes n'a esté que pour garantir et deffendre le roy, nostre souverain, seigneur de nostre maison, et tous les bons François, de l'oppression des ennemis conjurés de ceste couronne et de l'estat, et que nos actions et deportemens contre les assaults et les orages de quattre ou cinq armees que nous avons eues sur les bras pendant l'espace de huict mois et plus, nous ser-

510 DECLARATION DU ROY DE NAVARRE

lui demander Angers et Valence qu'ils se plaignent qu'on leur a enlevés, comme s'ils y avoient quelques droicts: c'est ainsi que sa majesté s'est veu forcee, pour acquerr leur amitié, de leur abandonner les places qu'ils lui ont prises en Picardie, et de leur rendre les prisonniers qui avoient attenté sur Bologne, au lieu d'en faire une punition exemplaire, ainsi que des aucteurs de ces troubles, telle que la meritoient des criminels de lese majesté. Par quoi,

Nous Henry roy de Navarre, premier prince et pair de France; Henry de Bourbon, prince de Condé, et Henry de Montmorency, premier officier de la couronne et mareschal de France, craignans que l'ambition demesuree des Ligueurs n'apporte enfin la ruyne totale de cest estat, dont la conservation nous est en singuliere recommandation; à laquelle nostre debvoir et le rang qu'il a pleu à Dieu nous y donner, nous oblige. Contraincts, à nostre tres grand regret, d'employer la force comme le seul remede et moyen extraordinaire, qui puisse apporter quelque soulagement à la France, accablée et gemissante soubs le poids de la tyrannie des Ligueurs, declarons et protestons que les armees que nous sommes determinés à mettre en campagne, et joindre aulx secours des alliés et confederes de ce royaume, tous affectionnés au repos et au bien d'icelui, ainsi qu'ils en ont donné des temoignages certains et asseurés, par les ambassadeurs qu'ils ont depeschés vers sa majesté, ne sont poinct pour nous opposer à sa majesté, de laquelle nous ferons tousjours cognoistre, par des effects reels, combien nous somme ses tres humbles, tres obeissans et tres fideles subjects et serviteurs: mais pour le delivrer de l'oppression et de la tyrannie des Lorrains, ses plus cruels ennemis et les nostres, lui faire cognoistre l'auctorité qu'ils ont usurpee et qu'ils usurpent encores tous les jours. Remettre le roy en estat d'estre obei de tous ses subjects, retablir les princes, seigneurs et gentilshommes françois dans les preeminences, le credit, les honneurs et les dignités deues à leur rang et à leur naissance; pourvoir, par une assemblee generale et libre de ce royaume legitimement convoquee, au soulagement du peuple par l'abolition des imposts dont il est accablé, à detruire une auctorité estrangere, et par là establir une paix ferme et solide dans le royaume.

Supplions sa majesté d'avoir pour agreable la prise de nos armes, et de croire que nous ne les prenons que pour lui, pour sa liberté et pour son service; que nous sommes prests d'aller le trouver dans ung tel endroict qu'il lui plaira nous commander. Pryons aussi tous roys, princes, seigneurs, gentilshommes, cours de parlemens, bourgeois, villes et communautés, tant voisins, alliés que subjects de ceste couronne, de nous voulloir assister et secourir dans une aussi saincte et aussi louable entreprise, soit de leurs personnes, vivres, armes ou aultres moyens, afin que nostre desseing ne demeure poinct sans execution, et que la paix si necessaire la France ne soit poinct retardee par leur negligence.

Declarons tous ceulx qui s'y opposeront directement ou indirectement, tant ecclesiastiques qu'aultres cathoiques, ennemis conjurés de cest estat et de la tranquillité le ce royaume: protestans les prendre en nostre proection et saulve garde, et les voulloir maintenir et conserver dans le mesme estat et relligion qu'ils sont à present, ainsi que dans tous leurs biens, privileges et ibertés, sans rien innover ni alterer en aulcune façon,

512 DECLARATION DU ROY DE NAVARRE, etc. ainsi que nous agissons en Guyenne, Languedoc et Dauphiné.

Signé Henry; et plus bas l'Huillier.

Donné à Fontenay le Comte.

CIV. — LETTRE

Interceptee et dechiffree, escrite à M. de Joyeuse.

Du 11 aoust 1587.

Je vous ai escrit par Des Noyers tout ce qui se passoit par deça. Depuis il n'est rien surveneu. M. de Guise escrit toutes les heures pour estre secoureu, et donne les meilleures esperances du monde de pouvoir combattre les estrangers, qui sont fort pietres, comme il dict, et fort divisés. Leur nombre est seulement de six mille Reystres, six mille lansquenets, et douze mille Suisses. M. de Bouillon veult qu'ils passent par Sedan et par la Champagne; Guitri et Clervant sont d'advis contraire, et les veullent faire passer par la Bourgongne. M. d'Andelot escrivit hier que les quattre mille qui sont ordonnés pour le Languedoc, ne sont pas encores en Dauphiné; mais on tient que M. de Chastillon est passé le Dauphiné avec 800 arquebusièrs pour les aller querir. Voila comment toutes choses La royne mere s'est 747 a 104 ph 14 sont encores en la balance. le roy, avec + et crie maintenant des plus hault contre la Ligue. Vous en cognoissés l'humeur. 4:4 R4 : qh74

toutesfois de se monstrer tousjours plus affectionnee vostre endroit que de tout autre. Vous en 4 A A 105 h B 64 q B 59 B q 9 B 10 4 V verrés vous veut 94 10 47 par ceste depesche comme on V 949 I

embarquer Fontenay. de 4p11q106410 q \$5R □ 4Rq5. Je croy que c'est que pour les occasions que je vous ai mandées. + cognoissés l'humeur, dont $\sqrt{585h747}$... $\diamond 9p4910$ fait tousjours haine contre la Ligue, assés cognoistre 7q oqhR4 5 5R 🗆 104 mal, si affaires vont on 7 h ∴49107 qøqh1047 95R□ pq.: 5R 74 de costé ; l'autre 104Ry4104 q .: q9 🗆 104 🕇 57 🗆 4 mais si 4:: 47 succedent 79 5 4 △ 4R □ on fera le contraire. Tant y a que toute nostre conduite et nostre prudence est appuyee sur les nouvelles et le succes des affaires d'aultrui, et de ceux qui ne debattent que de notre robbe. Vous. estes fort en la bonne grace de ceste ville universellement, et y pouvés maintenant plus par le nom et la faveur que toute la Ligue ensemble. C'est un vent populaire qui passe en ung instant, et duquel il ne se fault resjouir sinon d'autant que vos actions sont approuvees de tout le monde. 5R R4 949 mq7 comme suiviés le roi de Navarre. desjà je vous ai mandé, que $\sqrt{79h9h47}$ Mais si me semble il que cela feust veneu fort à propos, pour la continuation de vostre reputation. Joinct que pour vostre particulier avec vos forces et celles de M. d'Andelot, vous eussiés peu empescher aulx quatre mille Suisses qui vont en Languedoc. C'est à vous à resouldre ce que vous cognoistrés pour le mieulx pour fortune, pour vostre le service du roy et - 2/ \$510 19R4 sans de de ça, vous arrester aulx resolutions q q 5 q car 4:41 viennent de personnes qui vous portent 9h4R4R 🗆 q m41075R47 6h V m510 🗆 4R 🗆 33 MÉM. DE DUPLESSIS-MORNAY. TOME III.

envie, qui seroient bien 4R9hq 6h 74105h4RO 11h4R qh747 attacher à quelque √ q□q t ♦ 410 q 64...64 difficulté 6h √ trois deux OU q1047 0 q7 0 4497 59 0 105h7 p5h7 Considerés, s'il vous plaist, la resolution que vous prendrés, qui sera tousjours trouvee bonne ou mauvaise par le succes, et ne vous arrestés à rien du monde qu'à la raison et au service du roy, 4 🗆 R5R **q**9/ qui vous sont faits, commandemens 55pqR △4pqR7 6h √ 75R□ pqh□7 car tout Le Roy aime furieusement cela n'est que drollerie. + qhm4 øg 104974pqRD bastard. petit ...4 m4 \(\text{h} \) \(\text{II} \) \(\text{II} \) \(\text{O} \) \(\text{chose cogneue de } \) toute la faveur médecin D'Espernon n'en Chonaillet le \$\$4Rqh47 ∴4 p4s4 thR et cetera. 107 R4R fascherie guerir sa m490 o59910h10 7q pq t \$410h4 40 95h0 bien que 11h4R 64 la maladie est incurable. Toutes ces occurences vous doibvent e faire penser à vous, et à menager bon escient, et m4Rqy410 desormais pour vous. ø510□9R4 — ✓ Il en est temps, je vous asseure. chancelier; Guepeau a veu de nouveau :. 4 \$ QR \$ 4.: h410 il vous escrira, comme il m'a dict, toutes nouvelles. Les fiançailles de M. de Nemours sont remises à jeudi. Je vous baise bien humblement les mains. Je vous ai desjà escrit comme M. de Montpensier avoit la charge de l'avant garde en l'armee du roy.

CV. — INSTRUCTION

Envoyee en Allemaigne par le moyen du sieur de Morlas; dressee par M. Duplessis.

Du 15 septembre 1587.

Le roy de Navarre n'a rien tant desiré que de voir l'armee estrangere à cheval, pour le secours des eglises de ce royaume, et des gens de bien qui assistent son parti; n'a rien aussi eu plus à cœur que de chercher et embrasser tous les moyens de s'y joindre au plustost, pour en retirer le fruict que chacung en espere.

Auroit toutesfois esté ledict seigneur roy ung long temps en incertitude dudict secours pour les difficultés y surveneues, tant que le sieur de Monglat lui auroit rapporté, environ la fin de juillet, qu'elles auroient enfin esté surmontees par l'industrie et labeur de ses serviteurs.

En telle sorte neantmoins, que ledict sieur de Monglat, depesché vers lui par eulx, ne lui auroit poinct rapporté plusieurs particularités requises; nommeement le chemin qu'ils resolvoient de prendre pour s'acheminer vers lui, moyennant quoi ledict seigneur roy peult addresser le sien pour se joindre à eulx; remettant, par la veneue de Beauchamp, à en informer et esclaircir ledict seigneur roy, lequel toutesfois n'est arrivé, ni aultre quelconque de leur part, depuis le temps susdict.

Laisse donc ledict seigneur roy à juger aulxdicts sieurs qui ont charge de ses affaires, et à tous ses amis et serviteurs de delà, s'il estoit pas necessaire qu'il en feust esclairci premier que s'esbranler; car quel chemin eust il pris, ne sçachant poinct le leur, et les voyant en election de deux si differens?

Pendant ces incertitudes, seroit veneu M. de Joyeuse avec une armee, en Poictou, lequel ledict seigneur roy auroit à la verité bien jugé ne s'y estre pas tant acheminé pour y faire la guerre, que pour l'occuper et divertir de la conjonction du secours estranger.

Auroit esté neantmoins contrainct de s'arrester en s'opposant à ceste armee, encores que son cœur tournast tousjours vers son secours, et qu'il en cogneust la consequence, attendant plus certaines nouvelles d'eulx, pour la direction de son chemin; ne sçachant pour lors aussi s'ils estoient en campagne, comme encores il ne sçait pas ni quel chemin ils tirent, ni quel chemin il eust deu tirer les voullant rencontrer.

Et peuvent penser lesdicts sieurs, s'il n'eust pas mieulx aimé s'aller conjoindre à eulx utilement et honorablement, que d'attendre de pied coi les effects d'une armee qui croissoient de reputation par sa presence, et lesquels Dieu toutesfois a moderés en telle sorte, qu'elle n'a pris par tous ses efforts que de mauvaises places qui, ung mois auparavant, s'estoient d'arrivee rendeues à lui et sans canon; les meilleures qu'il a acquises en ceste guerre lui estans restees en fin de compte entre les mains, Fontenay, Talmont, Royan et quelques aultres.

Consideroit ledict seigneur roy combien il importoit à la reputation de ce parti que ceste armee ne s'en allast pas sans atteinte; voyoit aussi que la laissant dans le pays, il estoit frustré des plus claires forces qu'il eust peu mener auec lui, à sçavoir de la noblesse de Poictou et Xaintonge; qui ne feust pas volontiers partie laissant l'armee dedans leur pays, et leurs maisons en proye.

Pour ce se resoleut ledict seigneur roy de les en delivrer et la mettre hors de Guyenne; assemblant à ceste fin les forces de Xaintonge et de Poictou, et appellant le sieur de Turenne avec tout ce qu'il pourroit tirer des pays de delà Dordongne et Garonne.

Mais voyant l'armee dudict sieur de Joyeuse se diminuer, se seroit resoleu, attendant le surplus avec ce peu qu'il avoit pres de lui, de la costoyer et poursuivre. En quoi Dieu l'auroit tellement assisté, que ledict sieur de Joyeuse, prevoyant à peu de jours de là plus grand orage, auroit quitté son armee; ledict seigneur d'aultre part, suivant l'occasion, l'auroit poursuivie jusques dehors la Guyenne, lui auroit defaict deux compagnies de gensdarmes, celle nommeement dudict sieur de Joyeuse, les drapeaux pris, enseigne et guidon, dessus les bords de Loire; depuis, se seroit veneu presenter devant la Haye, en Touraine, où estoit enfermee l'armee; y auroit mesmes esté tout ung jour en bataille, laquelle n'auroit voulleu venir au combat.

Quoi entendant monseigneur le prince, se seroit veneu joindre avec tout ce qu'il avoit peu audict seigneur; s'y seroit aussi rendeu ledict sieur de Turenne, à grandes journees, avec les forces de Gascongne, non moins de six cens bons chevaulx et deux mille arquebusiers à cheval; et auroient tous ensemble pris logis tout autour de la Haye, pour attirer au combat l'armee dudict sieur de Joyeuse; non sans grand estonnement des provinces circonvoisines qui l'avoient veue auparavant enflee de quelques petits succes; dont toutesfois se sont departis au bout de quelques jours, tant pour n'avoir conduict avec eulx artillerie pour les forcer dedans la ville, munie d'ailleurs de vivres pour ung long temps, que pour se venir loger sur les bords de

Loire, convier à soi de toutes parts et de plus pres, tous ceulx qui ont le zele de bien faire; et nommeement recevoir messieurs les princes de Conti, et comte de Soissons, desireux et resoleus de se joindre avec lui.

Estans tous ensemble, resouldront par ung commun conseil de leurs affaires, et nommeement des expediens de joindre l'armee estrangere, qui pourroient estre plus clairs s'ils se pouvoient asseurer de quelques places, ou s'ils amenoient notables forces avec eulx.

Toutesfois, ne voit ledict seigneur roy, la chose bien debatteue et meurement deliberee, et selon la cognoissance aussi qu'il a des moyens tant siens que des susdicts princes, et aultres de delà Loire, que passer presentement et de ce pas ladicte riviere de Loire, pour aller recevoir l'armee estrangere, soit ou utile ou faisable; et les raisons qu'il desire estre pesees, sont telles qu'il ensuit.

N'a receu ledict seigneur roy aulcune depesche depuis la veneue du sieur de Monglat, au partement duquel l'armee n'estoit encore preste; ne sçait par consequent l'intention d'icelle; si elle s'arreste en Lorraine pour quelque temps, si elle prend le chemin à costé de Sedan, si elle tire en Bourgongne; chose qu'il sçait avoir esté en dispute entr'eulx, nonobstant que son desir par toutes ses depesches ait tousjours esté qu'elle ait pris le chemin de Bourgongne pour s'y aller joindre. Or peult on juger en quel labyrinthe ledict seigneur roy se trouveroit, si, soubs esperance de les trouver en ung lieu, il s'y acheminoit, et qu'ils feussent en l'aultre.

Ne pense ledict seigneur roy, quand bien les forces qu'il a seront joinctes avec celles qu'il espere de delà Loire, qu'elles soyent suffisantes pour traverser la France par le plus court chemin, pour aller joindre les

Reystres; parce qu'il est evident que toutes les forces de la France viendroient tout à coup de toutes parts à fondre sur lui; les forces qui se preparent à Gien et à Montereau, celles qu'a en main M. de Guise, les restes de celles de M. de Joyeuse, etc., lesquelles penseroient avoir bien meilleur compte de combattre ledict seigneur roy que l'armee estrangere, parce que son armee ne sera pas si forte; parce qu'en la defaisant ils renvoyent les Reystres; parce qu'ils defont tout en ung jour la fleur de toutes nos provinces, parce aussi qu'ils se mettent au hasard de se defaire de nos princes mesmes, qui, en ceste armee, combattront en personne; au lieu que, combattant les Reystres, ils pensent jouer leurs partisans contre des estrangers, s'affoiblissent fort, et ont neantmoins à nous combattre apres; combattent en somme plus douteusement, et vainquent avec moins d'utilité, et plus de dommage.

N'est à alleguer ici au reste que ledict seigneur roy, à la faveur des guais, et par une grande celerité, les puisse joindre sans qu'on le puisse combattre; car nous sommes en automne, qui desormais grossit les rivieres; tesmoing la route d'Angers qui feut en mesme temps. Et n'est conseillable de commettre au sort du temps tout le succes de nos affaires; et puis il n'est pas aisé de faire ung long voyage sans quelque sejour; joinct qu'il ne peult eschapper qu'il n'y en ait de blessés par les meneus, d'aultres aussi qui tombent malades, pour lesquels il n'y a poinct de retraicte.

Est à considerer consequemment que M. de Turenne, partant des susdictes provinces, ne s'est proposé que de venir au plus loing en Xaintonge, et n'a laissé ordre dedans icelles que pour l'espace de six sepmaines; en ayant cependant tiré les gouverneurs et capitaines, et la principale force et conduicte; non sans evident danger esdictes provinces, si promptement on n'y pourvoit en leur rendant partie de leurs forces; mesmes y estant M. le mareschal de Matignon, qui se sçaura prevaloir de cest esloignement; lequel a ung corps d'armee de deux mille hommes de pied François, sept cens Suisses, sept cens Lansquenets, cinq cens bons chevaulx du pays, et dix canons en sa disposition.

Ce sont les raisons qui meuvent ledict seigneur roy, ou plustost les causes qui lui ostent le moyen de passer presentement la riviere de Loire, aulxquelles s'en peult adjouster une en ung mot; qu'il est tout certain que, venant à estre combatteu sur ce chemin, la perte seroit sans ressource. Cependant, considerant bien ledict seigneur roy combien il importe qu'il se joigne promptement à l'armee estrangere, combien sa presence y peult apporter de bien et son absence de mal; et n'ayant perpetuellement aultre chose devant les yeulx que d'en tirer le fruict tant attendeu, pour sortir tous une bonne fois de ces miseres, par l'advis des plus sages, advisés et experimentés, s'est resoleu à ce qui ensuit.

Faict estat dedans huict jours d'avoir recueilli à soi messieurs ses cousins; tous ceulx aussi des provinces de delà Loire, qui auront bonne volonté, lesquels il convie de toutes parts, et leur tend les mains dessus le bord.

Cela faict, prendre son chemin avec son armee pour aller joindre l'armee estrangere tirant en Bourgongne. où il desire et entend (toutes difficultés et aultres considerations cessantes) qu'elle s'achemine comme jà il leur a mandé par le sieur de Monglat.

Et suivra, pour cest effect, la mesme brisee que prit seu monseigneur pour aller joindre le duc Cazimir, ou à peu pres, s'il ne survient nouveau accident dont il ne fauldra de les advertir.

Sadicte armee marchera tousjours, et sans sejourner que par necessité, sauf à sa personne, passant sur les ailes des provinces, sans retardement de sadicte armee, ni de son voyage, d'y laisser ung ordre pendant son absence, lequel il commence des ceste heure à minuter et establir, pour n'avoir rien qui le retienne.

Donnera ses rendés vous aulx forces des provinces qui pourront sortir sans inconvenient d'icelles, les plus à propos qu'il se pourra, pour le venir trouver sur son chemin.

Nommeement se promet d'estre assisté en personne de M. de Montmorency, en la conduicte de ceste armee, vers lequel il depesche presentement, pour le tenir tout preparé à se conjoindre à lui.

Espere, moyennant cela, se fortifier de belles forces, passer seurement à la faveur des provinces amies, n'y laisser rien en danger par son absence, recueillir quelques moyens pour donner quelque contentement à ses Reystres, à son arrivee; faire au reste telle diligence qu'il sera bien pres de la Bourgongne quand ils entreront.

Alors ils adviseront ensemble ce qu'ils debvront faire; et Dieu leur fera la grace, s'il lui plaist, de leur inspirer ung bon conseil.

En attendant, parce que du retardement que faict l'armee, les ennemis inferent une division entre eulx, et s'en promettent par consequent la dissipation, ledict seigneur roy les prye de tout son cœur de les en dedire par effect; à sçavoir, tendant à mesme but, et par mesmes moyens, sans qu'aulcune consideration particuliere les en divertisse. Et le but qu'il leur desire et

522 INSTRUCTION AU SIEUR DE MORLAS.

leur prescrit, c'est de bander tous à faire acheminer l'armée droict en Bourgongne, où il espere la voir, comme dessus, et plustost (comme il espere en Dieu) qu'ils n'osent esperer.

Entend que M. de Bouillon, son cousin, soit repecté, obei et honoré de tous, comme sa propre personne; s'asseure qu'il rapportera toute son auctorité à
l'effect de ses intentions; que Dieu lui est temoing n'avoir aultre desseing que son service. Prye aussi, s'il y
a quelques differends particuliers entre quelques ungs,
pour quelque cause que ce soit, qu'ils cessent; qu'on
les donne à la gloire de Dieu et à la necessité public
que; que, pour le moins, ils dorment et soient sursi
jusques à sa presence; esperant, par la grace de Dieu,
leur donner contentement à tous.

Pour le regard des chefs, seigneurs, colonels, capitaines, gentilshommes, gens de guerre estrangers, tant Allemans que Suisses, recognoist ledict seigneur roy, la grande obligation qu'il leur a de l'affection dont ils procedent envers lui pour ce secours; et lui tarde infiniment qu'il ne les en remercie, present et par éfect; les pryant de tout son cœur perseverer en ceste volonté, afin qu'ils en ayent le gré entier; et lui, par leur aide, plus de moyen de leur faire voir une jour qu'il est prince qui sçait bien cognoistre et recognoistre ceulx qui font pour lui.

De Montsoreau.

CVI. — LETTRE

De M. le comte de Soissons au roy Henry III, dressee par M. Duplessis.

Octobre 1587.

Monseigneur, n'ayant jamais rien plus desiré que d'approuver toutes mes actions à vostre majesté, j'ai pensé estre de mon debvoir de vous rendre compte de ceste derniere, que j'estime toutesfois vous estre assés justifiee, monseigneur, qui cognoissés ma sincere volonté, à l'endroict de vostre-service, et n'ignorez poinct l'intention contraire de ceulx auxquels j'ai pensé me debvoir opposer, en ce peu que je puis. L'honneur de vos bonnes graces, monseigneur; l'heur, le bien et le contentement que j'en puis recevoir, m'ont esté de grandes tentations, pour n'esloigner vostre presence. Et la cause principale qui a combatteu ou suspendeu ma resolution assés long temps, est celle là. Le debvoir que j'ai à vostre majesté, le serment qui est né avec moi, puisqu'il a pleu à Dieu, envers vostre personne et vostre estat, ont vaincu et surmonté toutes considerations; je dis la necessité publicque et vostre service, ces esgards et interests particuliers, quand j'ai veu vostre personne en danger evident, recogneu d'ung chacung; quand j'ai veu les entreprises et surprises de vos villes, mesmes catholiques, et plus esloignees de leurs pretextes; le visage en somme de nos ennemis, si nud et decouvert, qu'ils ne me laissoient aulcune excuse qui couvrist ma patience; au contraire, me chargeoient d'ung blasme et d'ung reproche inevitable envers tous gens de bien et tous subjects de ce royaume,

qui sçauroient tres bien peser, sans doubte, ce que requiert mon debvoir de moi en telle occasion; et d'autant plus, monseigneur, qu'ils ont à pastir des inconveniens d'une trop longue patience. J'adjoustern, monseigneur, la ruyne de ceulx de Bourbon qu'ils brassent tout ensemble, dont il faust que naturellement je me ressente, n'estoit que je sçais que vostre majesté cognoist assés que nature les a tellement interessés et attachés à l'heur de vostre majesté et bien de vostre estat, que leurs ennemis et vostres ne peuvent pas parvenir à leur ruyne, sans la dissipation de ce royaume; non plus qu'à la dissipation de ce royaume qu'ils machinent, que par leur ruyne entiere. Je me suis donc, monseigneur, pour ces occasions esloigné de vostre personne, et à mon grand regret; mais pour. en effect, m'approcher de vostre service, en telle sorte que je ne fais poinct de doubte qu'enfin vostre majesté ne m'en sçache bon gré. Dieu, qui cognoist la sincerité de mon intention, la favorisera; et vostre majeste en jugera par les effects. Et cependant, monseigneur, me ferés cest honneur de me continuer l'heur de ses bonnes graces, comme à celui qui ne peult, ni ne veult jamais estre aultre que vostre, etc.

De La Rochelle.

CVII. - DECLARATION

Des causes qui ont meu monseigneur le comte de Soissons de prendre les armes.

Octobre 1587.

Monseigneur le comte de Soissons, quand ceulx de la Ligue troublerent la paix de ce royaume, apperœvant bien que leur intention estoit pernicieuse, et DECLARATION DU COMTE DE SOISSONS. 525 contre sa majesté et contre son estat, toutesfois voyant que sa majesté le cognoissoit tres bien, comme il appareut par ses lettres patentes, declarations, edicts et ordonnances, par les propos qu'il en teint en ses paremens, et qu'il feit tenir par ses ambassadeurs, vers les princes chrestiens, mesmes par les executions qui s'en feirent en divers lieux, il esperoit qu'elle y donneroit quelque remede.

Cela le faisoit patienter plus aisement, surtout quand l venoit à considerer le pretexte de la relligion qu'avoient pris les perturbateurs, dangereux de prime face, et subjects à estre supportés par une nation devotieuse; mais aussi qu'il ne peult pas estre couvert bien longuement quand on le prend à face, n'y ayant rien qui, plus directement, touche l'honneur de Dieu que ce genre d'hypocrisie; rien, par consequent, qu'il souffre moins, ou laisse moins caché; rien aussi plus detesté des gens de bien, et vraiment amateurs du service de Dieu, que lorsqu'ils se voyent abusés soubs son nom; et ce qu'ils ont de plus sainct et plus cher en leur ame, employé pour instrument de tromperie.

Dieu donc, comme il avoit esperé, a demasqué enfin les perturbateurs, et decouvert les desseings de la Ligue. Comme du commencement ils ont manqué de leur parole au peuple, à la noblesse et à l'estat, ayant contracté sans se soubvenir d'eulx; ils n'ont pas mieulx faict depuis, en faveur de l'Eglise. Le clergé n'en a senti aulcun allegement, ains nouveaulx faix; mais, qui plus est, on les a veu attenter evidemment contre l'estat, monopoler contre la personne de sa majesté, practiquer au dedans de ses villes, surprendre ses places, loin de tout souspçon, ou de rebellion, ou de relligion contraire. Tout cela, sans que sa majesté leur ait donné aulcune occasion, lors mesmes qu'à leur suggestion elle menoit la guerre en diverses provincs. contre ceulx de la relligion contraire.

Cela a ouvert ou deu ouvrir les yeulx à tous les boss subjects de ce royaume, a touché aussi le cœur des vrais catholiques, et particulierement a deu frapper le conscience dudict seigneur comte; les choses estant si claires à ung chacung, qu'il auroit les yeulx de tous les bons François pour tesmoings et juges, contre lui, de sa tardiveté, comme il les avoit jusqu'ici de sa grande patience, s'il ne prenoit les armes en main, pour s'op poser, en ce peu qu'il pourroit, à si pernicieux des seings; si au moins en se faisant partie, il n'accourageoit tous ceulx qui ont le cœur françois à faire le semblable.

Les prye, ledict seigneur comte, de considerer qui pouvoit mouvoir les aucteurs de la Ligue à telles actions, veu qu'en mesme temps qu'ils les brassoient, le roy employoit tous ses moyens contre ceulx de relligion contraire, mesmes avec plus de rigueur et d'éfficace qu'eulx, si ce n'est ceste vieille action de si long temps instituee sur ce royaume, qui n'a fondement qu'en leur temerité ou nostre nonchalance, et ne peult venir à la fin pretendue que par nostre ruyne.

Et par consequent, quel tort il se feroit à ce qu'il est, quel à ce royaume et à eulx tous, si, en ung peris si evident et eminent, il venoit à defaillir à son debvoir, c'est à dire à Dieu premierement, auquel, naissant, il a faiet serment pour la defense de l'estat; à la nature, qui l'y oblige par le sang; au roy, duquel il est né subject et serviteur; à tous les ordres de ce royaume, qui ont à redemander leur misere et calamité de ceulx que Dieu a colloqués en son degré, quand, par leur default,

l'estat viendra en dissipation, et ceulx qui sont nés soubs icelui, es inconveniens qui en dependent.

Leur declare qu'il est tres content de l'honneur et traictement qu'il a receu de sa majesté. Que si l'obligation, qui naturellement le lie, se pouvoit augmenter, il en a de grandes occasions par la faveur qu'il en a ressentie; qu'il s'asseure aussi qu'il lui continuera sa bonne grace, ne pouvant avoir plus favorable juge ou interprete, soit de son intention, soit de ses actions. Mais que c'est aussi ceste obligation qui l'a deu esmouvoir à son debvoir, auquel defaillant, il se voyoit chargé de trop notoire inglatitude.

Sçavent, tous ceulx qui l'ont peu cognoistre, la profession qu'il faict et a tousjours continuee de la foi catholique, en laquelle aussi il est tres resoleu de persister jusqu'à la fin. Mais que c'est ung sacrilege trop enorme d'abuser d'ung tiltre si sacré, pour la ruyne d'ung estat, qui comprend en soi ung million de parricides; que plus ung homme est atteint au vif du sentiment de la relligion, et plus doibt il estre impatient de la voir employee à faulseté; qu'il lui est insupportable que la foi qui maintient les estats, et par laquelle les princes regnent, serve de pretexte à ceulx qui les ruynent.

S'asseure au reste, ledict seigneur comte, comme leurs buts sont contraires, que Dieu aussi les remarquera par contraires effects, lui faisant la grace (par la benediction qu'il espandra sur ses labeurs) qu'il soit instrument utile et salutaire pour le service du roy, restablissement de son estat, et repos de son peuple; au lieu que notoirement sa malediction est sur les armes de la Ligue, qui n'a produict qu'ung mespris et desobeissance de sa majesté, profanation de toutes bonnes lois, combustion en somme et ruyne.

CVIII. - LETTRE

De monseigneur le comte de Soissons à M. le cardinal de Bourbon.

Octobre 1587.

Monsieur, je suis parti de la court, vous l'aures trouvé peult estre estrange; mais je ne me sens coulpable que d'avoir trop tardé à le faire. J'ai receu de la faveur du roy, et n'ignore poinct combien est grand l'heur de ses bonnes graces; aussi ne pense je poinct plus seurement les acquerir qu'en les bien meritant. ni plus loyaulment les meriter qu'en m'opposant à ceulx qui le ruynent. Je sçais bien aussi, monsieur, l'honneur que je vous doibs, et n'y vouldrois manquer; aussi porte je impatiemment le tort qui vous a esté faict quand on a couvert la conspiration contre l'estat de vostre nom, quand de vostre propre main on vous a faict signer vostre ruyne. Or, monsieur, vous estes trop prudent pour ne l'avoir cogneu, et plus vous avés esté circonveneu, plus avés vous de raison de vous en ressentir. Trouvés bon, monsieur, puisque l'aage ne le vous permet, d'estre servi de nous à ceste fin, et que les aucteurs de ces pernicieux desseings cognoissent combien il est perilleux de supplanter les princes. Au reste, monsieur, je suis certain que Dieu me benira qui cognoist mes intentions. La relligion qu'ils prennent pour escorce, je l'ai dans le cœur, et y persisterai jusques à la fin, et sera cogneu par nos deportemens et leurs succes, qui procede plus sincerement au service de Dieu, du roy et de l'estat. Je prye Dieu, etc.

De La Rochelle.

CIX. — LETTRE

De monseigneur le comte de Soissons à M. le premier president de Paris.

Octobre 1587. -

Monsieur le president, je ne doubte poinct que ma soudaine departié ne donne à parler à beaucoup de gens, qui deussent plustost s'esmerveiller que j'aye tant attendeu. Vous qui cognoissés la juste cause qui me meut, et l'affection sincere que j'ai au service de leurs majestés et bien de cest estat, ne l'aurés interpretee, à mon advis, qu'à mesme fin. Vous sçavés les aucteurs de ces troubles, et n'ignorés poinct à quoi ils tendent. Vostre prudence est trop grande, leur malice aussi trop descouverte pour ne penetrer l'escorce de leurs vains pretextes et pretentions; j'ai patienté tant que j'ai peu, je me promettois d'y voir quelque remede, la bonne grace du roy me retenoit d'aultre costé, et fault que je die, me faisoit moins examiner mon debvoir. Enfin, j'ai veu attenter evidemment à son estat, mesmes à sa personne, surprendre ses villes catholiques soubs pretexte de relligion; j'ai pensé qu'il falloit rompre mon silence si je ne voullois estre coupable de ces maulx, et me rendre non moins criminel à les souffrir, qu'eulx à les faire. La consideration de la maison dont je suis né m'auroit peu esmouvoir, et n'y a rien plus naturel; mais je n'ai jamais pensé qu'on en deust faire ung faict particulier, ne pouvant icelle ni perir ni estre conservee qu'avec ceste couronne, en l'heur et malheur de laquelle (en estant sortie), elle est naturellement et enclose et comprise. Or, mes actions, comme j'espere, justifieront mon intention, et n'en veulx aultre 530 LETTRE DU COMTE DE SOISSONS, etc.
preuve; et vous cognoistrés, monsieur le president,
que je suis sorti pour le service de leurs majestés, bien
de leur estat, repos de leur peuple et contentement

de tous les gens de bien, dont je vous prye de vous asseurer, et faire estat que je suis vostre, etc.

De La Rochelle.

CX. - LETTRE DU ROY DE NAVARRE

A la royne d'Angleterre.

Octobre 1587.

MADAME, j'ai esté quelques jours sans vous escrire. m'estant advancé sur la riviere de Loire pour y recevoir mon cousin le comte de Soissons avec une bonne trouppe de noblesse des pays de Beauce et Normandie Dieu m'y a donné quelques petits succes, qui nous seront arrhes de plus grands à l'advenir. Je pars maintenant, madame, pour aller rencontrer mon arme estrangere, et espere que de nos labeurs il reussira du bien, non à nous seulement, mais à toute la chrestienté. Cependant j'y vois deux difficultés: l'une est de la joindre, veu les sorces qui semblent s'y opposer: mais Dieu nous fera la grace, s'il lui plaist, et dedans peu de jours, de nous fendre la voye. L'aultre est de la contenter de quelque somme en la joignant, chose à quoi je n'obmets rien de mes moyens, mais malaisement y puis je atteindre, si je ne suis secoureu à bon escient des vostres. A vous appartient, madame. d'achever ceste œuvre, et non à aultre; à nous aussi seroit il mal à propos d'en estre teneus qu'à vostre majesté, à laquelle, comme nous sommes tous dedies. aussi desirons nous tout debvoir. Vostre prudence.

madame, juge assés de l'importance du succes de ceste armee, qui tient tous les princes qui nous peuvent nuire suspendeus en leurs desseings et balancés; mais comme estant reteneue en bonne volonté, elle peult faire grands effects; venant aussi à la perdre ou à se dissiper, vous voyés assés les inconveniens qui en dependent. Voici la troisiesme annee que je travaille, attendant ce secours, et ne me lasse poinct. J'ai vaincu de grandes difficultés; et plus qu'il n'est à croire; je m'asseure que vous m'aiderés à vaincre celle ci, et ne permettrés que, si proche du port, nous fassions ung naufrage qui nous reduise à prendre conseil de là necessité et non de la raison. Le surplus, madame, vous sera dict par le sieur de Buzanval, que je vous prye de croire, et de certaines particularités auxquelles vostre majesté doibt prendre garde, qu'il lui sera voir par les originaux. Je prye Dieu, madame, etc.

De La Rochelle.

CXI. — LETTRE DE M. DUPLESSIS

A M. de Valsingham.

Du 11 octobre 1587.

Monsieur, j'ai receu vos lettres par ung gentilhomme anglois, lequel, sur vostre recommandation, recevra toute courtoisie en ceste court, car vous y avés des amis qui vous honorent, et entre ceulx là je cede à la plupart en moyens; en volonté, certes, de vous servir, à nul. Enfin nostre armée estrangere marche, et nous vers elle avec de belles et gaillardes trouppes. Il se presentera du combat sur le chemin, et peult estre à trois journées d'ici, veu les preparatifs; mais Dieu

nous fera la grace, s'il lui plaist, de nous fendre la voye. Ce que nous apprehendons le plus, c'est qu'apres avoir vaincu tant de difficultés, et depuis si long temps, nous ayons, faulte de somme suffisante, à contester avec nos estrangers, dont je prevois de grands inconveniens, et y vois peu de remede sans vostre moyen, quoi que nous puissions faire. Vous avés raison de dire que vous avés faict beaucoup pour nous, et nous serions trop ingrat de le nier; mais souffrés aussi que nous dions qu'il n'appartient d'achever ceste œuvre qu'à vous mesmes, aulxquels aussi nous voullons debvoir le tout, puisque nous vous sommes jà teneus de moitié. Vous dirés aussi qu'il seroit bien seant que nous feissions effort de nos moyens pour y fournir; mais pensés, si nous nous sommes espargnés depuis trois ans que ceste guerre dure, que nous avons eu le faix de dix armees à supporter, nos biens ou saisis ou confisqués, nostre credit engagé jusques au bout, etc. Et puis venés à considerer, monsieur, la consequence du succes de ceste armee qui tient les desseings de tous les princes de la chrestienté, ou suspendeus, ou contrepesés, qui entretient ou l'esperance des ungs ou la crainte des aultres, en laquelle sont ou victorieux ou abatteus, au moins reçoivent gain ou dommage tous ceulx qui font la profession de servir Dieu, telle que nous faisons, et je suis certain que vous serés d'advis que, pour cent mille escus ou plus ou moins, elle ne doibt estre abandonnee. Or, monsieur, quoi qu'il en soit, Dieu nous conseillera et ne permettra que nous nous soubmettions à rien oultre sa gloire; mais il importe beaucoup de prendre advis ou de necessité ou de raison. Ce prince est tres resolleu, assisté de gens d'honneur et de valeur, qui ne cederont pas legerement

aulx longs et grands travaulx qu'il convient supporter; mais jugés, monsieur, que ce seroit; quelle defaveur à ses affaires, et quel orgueil à ses ennemis si, estant joinct à ceste armee, elle venoit à se dissiper à faulte de moyens; quelle resolution il seroit contrainct de prendre en ung tel accident, se trouvant au milleu du royaume, delaissé de ses amis et en proye à ses ennemis. Je le dis afin que vous pesiez et le faict et la consequence par vostre prudence, et que, selon vostre zele, aussi vous pensiés aulx remedes, lesquels, certes, vous seront aisés avant le coup, impossibles apres. M. de Buzanval, sur lequel je me remets, vous en dira dadvantage. Et sur ce, monsieur, je prye Dieu, etc.

A La Rochelle.

CXII. — LETTRE DE M. DUPLESSIS

A M. de Buzanval.

Du 11 octobre 1587.

Monsieur, je vous ai envoyé Memoire de tout ce qui s'est passé en sept sepmaines que nous avons esté en campagne. Pour repeter en monosyllabes, nous avons defaict les marquis de Reisnel et sieur de Vignes; la compaignie de M. de Joyeuse et le drapeau pris; joinct les forces de la Gascongne, conduictes par M. de Turenne; bloqué l'armee de M. de Joyeuse dedans la Haye, en Touraine; fortifié ung passage sur la riviere de Loire, au droict de Montsoreau delà l'eau, pour recueillir ceulx qui vouldroient venir à nous; defaict une compagnie de gensdarmes du duc de Mercœur, et pris tout son bagage; joinct, à la face des ducs de Joyeuse et Mercœur, M. le comte de Soissons, nonobstant qu'ils se feussent logés sur nostre chemin; recueilli et amené

trois cens gentilshommes de Normandie et de Beauce. et resveillé pareil nombre qui a pris chemin par delà l'eau vers les Reystres. Tout cela sans perdre qu'ung seul homme; mais certes, de prix et de poids; c'est M. d'Alain, auquel, en sa profession, je ne cognois k semblable. Maintenant nous nous acheminons vers nostre armee estrangere, prenant nostre chemin par k bord de nos provinces, tant parce que c'est nostre plus seur, et que nous irons par ce moyen grossissant, que pour y laisser quelque ordre. Mais à peine, à mon advis, gaignerons nous ce poinct sans combattre, et de dans peu de jours, parce que le duc de Joyeuse semble y voulloir faire obstacle; lequel le roy a fortifié de douze compagnies de gensdarmes, et de quelques regimens, oultre ce que le mareschal de Matignon le doils joindre. Tous nos hommes sont fort disposés, et aquales numero, vincimus causa et animo. Et puis, is οίωνος άρις ος άμυναθαι περι πάτρας. Ce que nous craignons (et vous verrés ce que j'en escris à M. de Valsingham), c'est qu'ayant eu beaucoup de peine à joindre ceste armee, nous ne la trouvions pleine de mescontentemens, à faulte de lui avoir baillé argent en France. A quoi tous les remedes que nous pouvons rechercher deçà se trouveront trop courts; et n'y a moyen d'y alteindre, que par vos diligences. N'est besoing que se vous die ce que vous pouvés remonstrer là dessus; car la chose parle et donne à parler. Il importe que la royne fomente ceste armee, laquelle, venant à se dissiper, se dissiperoit à son dommage; car pensés si nos ennemis lui en sçavent bon gré. Il importe, afin que nous la debvions à elle toute entiere, comme desjà nous lui en debvons la moitié, et que la fin et le milieu soit d'elle comme le commencement. Mais il importe encores plus,

parce que toute la chrestienté, partie en craincte et partie en esperance, en attend le succes; parce qu'elle tient en eschec tous les ennemis de la relligion et tous leurs desseings ou suspendeus ou balancés; parce aussiqu'en sa victoire, ou en sa ruyne, tous ceulx de mesme profession sont ou affoiblis ou renforcés. Adjoustés nostre interest particulier, qui, graces à Dieu, est general à tous, en ce que ce prince, se trouvant au milieu du royaume, venant ceste armee à se defaire et dissiper à faulte de moyens, se trouve reduict en grande necessité avec peu de ressource. Inconvenient evitable par moins de cent mille escus venans à temps; non rachetable de millions, lorsqu'il sera veneu. Et certes, qui seulement aura consideré le poids de sa personne, pensera ceste petite somme tres bien employee, estant le seul prince aujourd'hui qui faict teste pour tous aulx ennemis communs; le seul qui a les armes en main contre les monopoles, soit du pape, soit du roy d'Espaigne, et duquel on sentiroit bien le default, si Dieu nous avoit tant affligés de nous l'oster. Sa majesté a trouvé tres bon que vous ayés depesché en l'armee, et recognoist bien l'effect de vos labeurs. Si on vient en matiere, je ne fauldrai de me soubvenir de vous, non moins que de moi mesmes, et espere qu'il y aufa peu de peine envers lui pour vostre regard. Nous avons nouvelles que les Wallons, qui avoient esté envoyés au secours de M. de Guise, l'ont laissé. Certes, vous verrés, par les lettres originelles que je vous envoye, que j'ai dechiffrees, de l'ambassadeur qui est en Espaigne, que si la royne d'Angleterre n'occupe à bon escient le roy d'Espaigne et aultres princes de la Ligue, il lui taillera de la besongne en son estat. Et pour ce, vous ne faictes pas peu, mesmes pour son service, d'empescher que

ces traictés de Flandres ne passent plus avant. Voyés aussi si vous pourrés faire quelque chose pour M. le comte de Soissons; c'est un gentil prince, quoiqu'on vous ait faict entendre par delà, et qui promet beaucoup; et nostre discipline athletique lui profictera. Aussi, si vous obtenés ce que vous travaillés, je vous prye, faictes en sorte que nous n'ayons à passer par les mains de..... C'est ung marchand qui nous a teneu de si grandes rigueurs et si prejudiciables, je dis au public de nos affaires, qu'il n'y a moyen, si on s'en peult passer, d'avoir affaire avec lui. Croyés moi, car à peine en pourrés vous croire la moitié; mais patience, puisqu'il plaist à Dieu, il fault que chacung tire commodité de nos miseres. J'ai envoyé à M. de Baccons ce que vous desirés par vos lettres; s'il y a raison en lui, vous n'en orrés plus parler. Je vous en plains; mais plaignés m'en aussi. Nous laissons ici M. de la Marsilliere pour la direction de nos affaires de deça. Vous ferés bien d'avoir bonne correspondance avec lui. Ceste lettre est faicte à mille fois; et pensés que nous partons demain matin, y ayant esté dix huict mois, et droict vers l'ennemi. Je salue bien affectionneement vos bonnes graces, et prye le Createur, etc.

CXIII. — MEMOIRES

Envoyés en divers lieux de ce qui se passa depuis le 24 aoust, que le roy de Navarre sortit de La Rochelle, jusques à la bataille de Coutras; dressés par M. Duplessis.

Du 20 octobre 1587.

Le duc de Joyeuse estant en Poictou avec son armee, le roy de Navarre assembla le plus de noblesse qu'il peut à Sainct Jean d'Angely, en intention de le combattre, et, par ce moyen, en descharger le pays; voyant d'une part qu'il lui estoit necessaire d'aller joindre l'armee estrangere, et de l'aultre qu'il ne lui estoit bien seant d'abandonner ces pays en proye à l'ennemi, ni mesmes possible ni raisonnable d'en tirer les forces, tandis que ceste armee y demeureroit; comme ainsi feut toutesfois, qu'il ne pouvoit tirer d'aulcune province, pour l'accompaigner en son voyage, plus grand nombre de noblesse que de celle là.

Il ne feut pas toutesfois trouvé bon de la pluspart qu'on veinst à ung combat, dont lui feurent alleguees plusieurs raisons; qui feut cause qu'il se retira à La Rochelle; tant qu'il veit que l'armee dudict sieur de Joyeuse commençoit à fondre et se diminuer; sur quoi il se resoleut de la costoyer de pres, avec ce qu'il pouvoit mettre promptement ensemble, pour observer les occasions de l'endommager par les menus.

Il partit donc de la Rochelle le 24 d'aoust avec une legere trouppe, et sans bagage, prenant son chemin par Marans, Fontenay, la Chastaigneraie, Amaillou, Sainct Generoux, laissant l'armee dudict sieur de Joyeuse sur la main droicte. Ayant passé la riviere de Thoué à Sainct Generoux, il eut langue d'une trouppe de l'armee qui tiroit vers Saumur; il la suivit de si pres, que ses coureurs l'attraperent à trois lieues de là logee. C'estoient le marquis de Reisnel et le sieur de Vignes, avec trente gentilshommes et cinquante arquebusiers à cheval, qui feurent tous ou tués ou pris. Ce feut le 28 d'aoust.

Ce mesme jour il eut advis que la compagnie de gendarmes dudict sieur de Joyeuse s'en retournoit en France; ledict sieur duc (ce qui est à noter) ayant quitté son armee, soubdain qu'il sentit ledict seigneur roy hors de La Rochelle. Il la poursuivit le lendemain avec telle diligence, qu'il la trouva sur la minuict logee deux lieues au delà de Chinon (1), ayant passé la Vienne, dont elle se pensoit hors de tout danger. Ceste compagnie, qui estoit de soixante et dix maistres, seut defaicte, partie prisonniers, partie tués; le sieur de Mailly, enseigne dudict sieur duc qui la commandoit, pris, et son drapeau et plusieurs tres beaux equipages. Ce fut le 29 d'aoust. Tout ce que dessus, sans perte ni blesseure d'ung seul homme du costé dudict seigneur roy; aussi fault il confesser qu'ils ne rendirent auleung combat.

Le sieur de Laverdin, qui commandoit à l'arme dudict sieur de Joyeuse en son absence, voyant ce succes, s'enferma dans la ville de la Haye en Touraine, sur la Creuse. Le roy de Navarre, avec ce peu qu'il avoit, se va presenter en bataille à une arquebusade dudict lieu, et y demeura huict heures, pensant l'y convier. Il s'y attaqua pour tout une escarmouche, qui ne feut pas recueillie fort chauldement; et pendant icelle leur feut tué ou pris plus de cent cinquante hommes par les champs. C'estoit le troisiesme de septembre. Et par ainsi eut cest heur, ledict sieur royavec une fort petite et inegale trouppe, d'avoir me ledict sieur de Joyeuse et son armee hors de son goit vernement de Guyenne.

Est à noter que ledict seigneur roy, quelque temps auparavant, avoit mandé M. le vicomte de Turenne, pour le venir trouver en Xaintonge avec tout ce qu'il pourroit tirer de delà la riviere de l'Isle, sans danger el

⁽¹⁾ Au lieu de Vismes.

l'assister à chasser ledict sieur de Joyeuse, soit pour le recueillir sur son chemin de Gascongne, si jà il en estoit veneu à bout. Ce que ledict sieur de Turenne feit avec tant de dexterité et de creance, qu'il en tira six cens bons chevaulx et deux mille arquebusiers à cheval, l'eslite de tous les regimens, laissant toutesfois les villes suffisamment garnies pour le peu de temps qu'il pensoit estre absent; et nonobstant que M. le mareschal de Matignon eust une armee au pays non incapable d'entreprendre.

Ces forces n'avoient esté requises que pour s'advancer jusques au devant du roy de Navarre. Toutesfois ledict sieur vicomte, entendant ledict seigneur roy si advancé, les lui mena jusques en Touraine. Monseigneur le prince, d'aultre part, qui estoit demeuré à Sainct Jean d'Angely, monta à cheval avec la noblesse de Xaintonge; tellement qu'ils se joignirent tous devant la Haye, où ils teinrent l'armee dudict sieur de Joyeuse enfermee quattre ou cinq jours; mais ils n'avoient pas mené d'artillerie pour la forcer.

Là, ledict seigneur roy receut nouvelles que monseigneur le comte de Soissons, son cousin, estoit resoleu de passer Loire pour se joindre à lui, avec ung bon nombre de noblesse et gens de guerre de Normandie, Beauce, etc. Et considerant combien il estoit important, se resoleut de les aller recevoir au bord de Loire; et, pour cest effect, s'alla loger à Montsoreau, et ses forces es environs; y dressa ung passage de bateaux, fortifia la levee et le costé de delà l'eau de bonnes tranchees et barricades, et disposa les choses en sorte qu'il y peust avoir loisir de les attendre.

Il les y attendit onze jours, nonobstant qu'il feust

bien adverti que les forces du roy estoient mandees de toutes parts pour empescher ceste conjonction, et qu'il s'acheminast en personne. Mais, pour recevoir ledict seigneur comte de Soissons, et le favoriser en son chemin, il lui envoya au devant M. de Turenne avec deux cens gentilshommes et cinq cens arquebusiers à cheval, qui le feurent prendre jusques au Lude sur le Loir. Ledict sieur vicomte defeit, en allant, une compaignie de lances du sieur de Haulbois la Saulaye, qui mesmes y feut tué, et prit tout le bagage du duc de Mercœur et de toutes ses trouppes, qu'ils avoient laissé au bourg de Rosiers avec quelques arquebusiers de garde, s'estans retiré dedans Saumur, non sans quelque frayeur.

Pendant qu'il s'acheminoit au Lude, les ducs de Mercœur et de Joyeuse, avec tout ce qu'ils peurent mettre ensemble, se veinrent loger à Bourgueil, droict sur le chemin où ils debvoient passer; lieu tres à propos pour les combattre, à cause de l'incommodité d'une riviere mal guaiable que proche de là ils avoient à passer. Ils ne leur donnerent toutesfois aulcung empeschement, non pas mesmes une allarme; de sorte qu'ils arriverent sans perte d'aulcung bagage sur le bord de Loir. Il y avoit trois cens gentilshommes et mille arquebusiers à cheval; et estoient montees à cheval en divers lieux diverses trouppes, qui ne peurent s'y rendre si tost, et feurent contrainctes de tirer tout droict vers l'armee estrangere.

Là feut mis en deliberation, avec les principauls chefs de l'armee, si on iroit rencontrer ladicte armee par le plus droict chemin ou non, et en feurent proposees les ouvertures, selon le desir commun à la pluspart. Toutesfois ne feut trouvé ni possible, ni expedient.

ains tres perilleux et dommageable. Et feurent les raisons: que le roy de Navarre n'avoit poinct suffisantes forces pour traverser tout le royaume sans evident hazard de ses affaires; que les armees du roy, qui auroient esté dressees en lieux tres à propos pour cest effect, à sçavoir, à Gien et à Montereau; les forces du duc de Joyeuse, celles mesmes du sieur de Guise, fondroient toutes sur lui, tous aultres desseings cessans; estant tout certain qu'ils penseroient, en le desaisant, avoir defaict l'armee estrangere, et bien esbranlé l'estat de nos provinces; qu'on estoit sur le bord de l'automne, qui grossiroit les rivieres, et redoubleroit les difficultés des chemins; qu'on estoit encores incertain du chemin que tenoit ladicte armee, et par consequent de celui qu'on auroit à tenir pour la joindre. Feut aussi consideree l'importance des personnes du roy de Navarre, de monseigneur le prince et de monseigneur le comte de Soissons, n'ayans rien plus à desirer les ennemis de leur maison, qu'une occasion de les mettre en hazard tous ensemble. Oultre ce que l'estat des provinces requeroit, qu'il y feust mis et laissé quelque ordre premier que s'en esloigner.

Et pourtant feut resoleu, pour le meilleur, de prendre le chemin plus asseuré, à sçavoir, passant par la Guyenne, et costoyant les provinces et villes où le roy de Navarre et son parti a de la faveur; partie pour y laisser de l'ordre, partie pour se fortifier tousjours d'hommes en chemin faisant, sans toutesfois, pour ce, retarder de beaucoup le voyage, attendeu le pays où ledict seigneur roy se seroit tousjours attendeu de joindre son armee, à sçavoir, vers la Bourgongne; par mesme moyen qu'il pourroit prendre lieu avec monseigneur de Montmorency, tant pour se voir que pour

marcher ensemble vers ladicte armee; lui estant sa presence tres necessaire pour la conduicte d'une si grande force, vers lequel auroit esté expres depesché; et lequel aussi, en effect, se seroit jà approché à ceste sin. Et de tout ce que dessus seut faicte une depesche à monseigneur de Bouillon, commandant à l'armee estrangere, et aultres chefs, tant François qu'estrangers.

Le roy de Navarre donc partit de Montsoreau, et reprit son chemin vers la Guyenne, tirant vers la Charente; ses logis feurent Moncontour, Sainct Loup, Coulonges les Reaux, Chefboutonne. De Coulonges les Reaux envoya M. de Turenne et le sieur Duplessis à La Rochelle pour y abreger ses affaires, ann que rien ne le reteinst; considera aussi l'incommodité qu'il auroit de loger son armee, s'il n'avoit de l'artillerie, ayant à passer par des provinces où toutes maisons se defendent; et pour ce donna charge audict sieur de Turenne d'en amener de La Rochelle; ce qu'il feit. Donna, puis apres, lui mesmes ung petit tour de deux jours jusques là, tant pour leur dire adieu, les laisser bien disposés à tout bien, que pour obvier aussi à quelque nouvelleté qui y estoit nee. Le tout nonobstant, sans retardement de son armee, laquelle cependant passa la Charente sur le pont de Taillebourg, et marcha jusques vers Pons en Xaintonge, où il la veint retrouver.

Le duc de Joyeuse, cependant, avoit esté trouver le roy en poste, pour avoir nouvelles et plus grandes forces; et de faict les avoit obteneues; et sur l'importance et facilité qu'il avoit representee, avoit receu commandement tres expres de sa majesté d'empescher le roy de Navarre sur son chemin, mesmes de le combattre à quelque peril que ce feust; avoit aussi, sa majesté, mandé à M. le mareschal de Matignon de se

joindre avec son armee et toutes les forces qu'il pourroit assembler de Gascongne, Querci, Agenois, Perigord, Limozin, etc., audict sieur duc de Joyeuse; et estoit leur intention de se joindre ensemble vers Coutras et Guitre, où les rivieres de Drone et de l'Isle se rendent l'une en l'aultre, pour empescher ou combattre ledict seigneur roy d'une commune main; lieu tres à propos et tres advantageux pour leur desseing.

Cela feut cause que le roy de Navarre, prevoyant que difficilement pouvoit il passer sans combattre, et pesant l'importance de ce combat, prya monseigneur le prince et toute la noblesse de Xaintonge, Angoumois et Poictou, de l'accompagner jusques à la riviere de l'Isle, laquelle le feit tres volontiers, voyant le besoing, et pour participer à ceste occasion, nonobstant que ledict seigneur roy les eust licentiés quelques jours paravant, pour redresser leurs equipages, et pourvoir à leurs affaires, soubs promesse de le revenir trouver avec monseigneur le prince dedans trois sepmaines, à certain lieu assigné, pour aller joindre l'armee estrangere.

Ledict seigneur roy donc prend son chemin par Taillebourg, Pons, Archiac, Monlieu; le duc de Joyeuse, costoyant sa main gauche et tenant tousjours les devans, par Chasteauneuf, Barbezieux, Chalais, et se passa des occasions de donner la bataille dans les plaines de Xaintonge; mais il esperoit tousjours joindre M. le mareschal de Matignon, premier que d'y venir, lequel l'asseuroit, par lettres du 17, que cinq jours apres, qui estoit le 22, il seroit à Libourne avec ses forces, et pour ce le conseilloit de se venir loger à Contras et à Guitre, sur le bord des rivieres de Drone et l'Isle, que le roy de Navarre avoit à passer. Mais ledict seigneur roy, nonobstant que son artillerie rendit son armee fort pesante, prit lui mesmes, sur le soir, le logis de Coutras le lundi 19 d'octobre, et prevint le sient de Joyeuse seulement d'une heure, lequel avoit envoyé ses chevaulx legers pour l'occuper, feit raccommoder le guai qu'on lui avoit rompeu, et toute la nuict passer la Drone à ses forces, laissant son artillerie à demi lieue de là jusques au matin, gardee par une partie de son infanterie. La prise de ce logis lui feit beaucoup de bien; car elle le logeoit entre le duc de Joyeuse et le mareschal de Matignon, les gardant de se joindre.

Le duc de Joyeuse se voyant preveneu, se logea à la Roche Alaiz, à trois lieues de Coutras, sur la mesme riviere et du mesme costé; et considerant le commandement qu'il avoit de combattre le roy de Navarre plustost que de le laisser passer, et l'asseurance qu'il en avoit donnee au roy; et se voyant eschapper l'occasion s'il ne l'anticipoit, marche le lendemain de grand matin droict vers Coutras avec toute son armee. Le sieur de la Tremouille et le sieur de Vivans, maistre de camp des chevaulx legers, en donnent advis au roy de Navarre, et feirent une belle retraicte. Ledict seigneur roy se resoleut incontinent de marcher au devant. prend sa place de bataille à deux mille pas de Coutras, dispose toutes ses forces, et en si bon ordre, que toutes pouvoient servir sans incommoder les unes les aultres, ni au combat, ni à la retraite, jette des files de gens de pied à la teste de tous ses escadrons ordonnés par M. de Turenne, colonnel general de l'infanterie, faict passer en diligence son artillerie, commandee par M. de Clermont, et la loge en lieu tres à propos, va de trouppe en trouppe encourageant ses forces, et faict faire la priere à Dieu à la teste de chacune; n'obmet rien en somme de ce qui pouvoit aider à la victoire.

Les deux armees se considererent environ une beure, chacune prenant ses advantages; l'artillerie du roy de Navarre commença à jouer sur les huict heures, qui endommageoit fort l'ennemi; celle du duc de Joyeuse ung peu apres, mais sans dommage. Ung peu devant neuf heures on veint aulx mains. L'arquebuserie du roy de Navarre seit ung grand effect, et seut employee fort à propos; ses chevaux legers feurent ung peu ebranlés, mais très bien soubsteneus de M. de Turenne. Le roy de Navarre, à la teste de son gros, les attendit à quinze pas, sans se mettre au galop, et les chargea en front; monseigneur le prince et monseigneur le comte de Soissons en flanc, l'ung sur la droicte et l'aultre sur la gauche, avec ceste mesme patience. Ils briserent, comme contre ung roc, de telle sorte que toutes leurs forces, au choquer, s'en allerent en pieces, et des lors feut la victoire asseuree, et n'y avoit plus qu'à la poursuivre.

En ce combat tous les chefs veinrent aulx mains; le roy de Navarre jusques à en colleter dedans la presse, et plusieurs coups de lances dans ses armes; monseigneur le prince, ung cheval tué et lui porté par terre et relevé; monseigneur le comte de Soissons sembloit n'avoir jamais faict aultre chose; M. de Turenne ung cheval tué, etc. Toutes les parties de l'armee y combattirent, et toutes feirent leur part de la victoire, qui feut poursuivie fort chaudement et sans s'amuser au butin, jusques à la Roche Alaiz.

Ceste victoire a esté qualifiee de toutes ses circonstances; les deux armees ont combatteu par desseing, non par inconvenient; elles ont eu le loisir de se deployer tout à leur aise; l'artillerie a joué des deux costés; toutes les parties ont combatteu, et mesmes les deux chefs. L'armee du sieur de Joyeuse toute defaicte. sans aulcung ralliement; l'infanterie toute taillee en pieces; l'artillerie prise, tous les drapeaux, tant de la cavalerie que de l'infanterie; le general tué sur la place; tous les chefs, sauf le sieur de Laverdin, ou morts ou pris; le roy de Navarre, maistre du champ, y feit rendre graces à Dieu publicquement au retour de la poursuite, et feit apporter les morts plus signalés dedans Coutras, et commanda d'enterrer les aultres.

Ce qu'il y a de plus admirable, et qui ne peult estre attribué qu'à Dieu, c'est que, de la part du roy de Navarre, il ne s'est perdeu ung seul chef, non pas seulement ung homme de commandement, soit à cheval, soit à pied; qu'il n'y a, pour tout, que deux jeunes gentilshommes morts, de mediocre qualité, et à peine trente hommes en tout; mais bien meurtre de chevaux et nombre de blessés.

On dira que le roy de Navarre hazardoit beaucoup en ce combat, et ses ennemis peu, et il est vrai en quelque sorte; mais est à considerer que le commandement du roy, et la resolution du sieur de Joyeuse, estant de le combattre, il ne pouvoit ni s'en empescher, ni choisir l'heure plus à propos; car il avoit, à une demi lieue de Coutras, la riviere de l'Isle à passer, une armée pesante d'artillerie et de bagage, l'ennemi prochain et epiant son occasion, les forces egales, qui l'eust combatteu moitié passé, avec une perte indubitable de partie de son armée. Mais d'ailleurs, quand il eust passé jusqu'en Gascongne sans combattre, le duc de Joyeuse et le mareschal de Matignon joignoient.

des le lendemain, leurs armees ensemble; celle du roy de Navarre se diminuoit et departoit, chacung voullant donner ung tour en sa maison, tellement qu'ils ne lui eussent jamais donné ni le loisir de recueillir ses forces, se logeans dans le milieu d'icelles, ni le moyen de prendre sa route vers son armee estrangere, ayant deux armees à combattre pour une. Est à adjouster que les forces n'en feussent pas volontiers sorties, laissant leur pays et leurs maisons en proye; tellement que ledict seigneur roy se trouvoit enfermé, au lieu que par ce moyen Dieu lui a de toutes parts fendeu la voye.

Quant à rebrousser chemin vers le Poictou pour eviter le peril du combat, c'estoit perdre le moyen de joindre les Reystres et la reputation de ses affaires; c'estoit emplir les villes de son parti d'estonnement et de confusion, c'estoit ruyner les pays qui lui sont favorables, n'ayant ni où retirer, ni où faire vivre ses forces, et, en somme, pis que tout ce qu'eust peu engendrer la perte d'une bataille.

Ce qu'il y avoit à craindre principalement, estoit le danger de sa personne, et que la victoire ne feust si sanglante de sa part, qu'il ne peust pas revoler incontinent; mais Dieu, auquel les plus sages et plus providens ont à commettre beaucoup de choses, ayant conservé les chefs, a ordonné du surplus oultre toute apparence: l'ennemi, de son costé, faisant la perte toute entiere, le roy de Navarre à peine autant qu'en la moindre escarmouche.

Ne se peult dire que ledict seigneur roy ait en rien abusé de sa prosperité; au contraire, il a honoré ses ennemis et leur memoire, il a traicté et renvoyé si humainement les prisonniers, qu'ils l'en admirent et à peine s'en peuvent croire. Il a regretté tant de sang respandeu, qui debvoit plustost estre employé pour la grandeur de cest estat; mais, particulierement, il a despesché incontinent au roy le sieur de la Burthe. l'ung de son conseil, lui declarant que rien ne le pouvoit reculer ni esloigner du desir qu'il avoit tousjours eu au bien de son service et repos du royaume; que plus d'advantage Dieu lui donneroit dessus ses ennemis, et plus ceste volonté augmenteroit; qu'au reste il lui deplaisoit de tant de sang qui se perdoit si miserablement, et qu'il seroit tousjours prest de l'etancher.

Restoit à user de la victoire et en tirer le fruict pour la poursuite de la guerre; ce qui se peult principale ment, se joignant à l'armee estrangere, comme c'est son principal but et desir. A ceste fin il a donné ung bref rendés vous à monseigneur le prince, à monseigneur de Montmorency, et à leurs forces, pour se retrouver sur le chemin toutes ensemble et dedans peu de jours, n'ayant pas esté, ni raisonnable, ni possible de leur faire prendre de ce pas, sans ung peu respirer, le chemin des Reystres; ceulx de Xaintonge, Poictou et Angoumois, n'ayans esté requis d'accompagner sa majesté que pour l'occasion instante jusques à la riviere de l'Isle; ceulx de delà l'Isle n'estans partis de chés eulx premierement pour la passer, et ayans toutessois depuis, avec beaucoup d'incommodités, faict tout et voyage, les ungs et les aultres n'ayans pourveu à leurs affaires que pour peu de jours, et ayans plusieurs hommes blessés, chevaux tués et leurs equipages à remettre. Et tous nonobstant, tres resoleus de se rendre au jour nommé en l'armee dudict seigneur roy pour le suivre où il lui plaira, laquelle cependant fera corps sur la Dordongne, soubs la conduicte de M. de Turenne, pour y recueillir et rallier toutes les susdictes trouppes et aultres qui y fondront de toutes parts. Adjoustés que ceste armee, partie es precedentes charges, partie en la victoire, avoit faict butin de plus de six cens mille escus vaillant, dont elle estoit tellement appesantie de carriages, qu'il lui falloit donner le moyen de s'en defaire.

FIN DU TOME TROISIÈME.

TABLE DES PIÈCES

CONTENUES DANS LE TOME TROISIÈME

I. — Lettre de M. Duplessis au roy de Navarre Page	I
II. — Lettre de M. Duplessis à M. de Saincte Aldegonde.	3
III * Lettre de M. Duplessis à M. de Passy	4
IV. — Lettre de M. Duplessis à M. d'Elbene	5
V Lettre de M. Duplessis à M. l'abbé Guadagny	6
VI. — Lettre de M. Duplessis à M. de Bellievre	7
VII. — Lettre de M. Duplessis à M. de Villeroy	8
VIII Lettre de M. Duplessis à M. de Cheverny, chan-	
celier de France	g
IX Lettre de M. Duplessis à monseigneur le duc de	
Montmorency	10
X. — Lettre du roy de Navarre au roy	11
XI. — Lettre du roy de Navarre à M. de Chassincourt,	
faicte par M. Duplessis	13
XII. — Lettre de M. Duplessis à M. Duranti, premier	
president au parlement de Thoulouze	16
XIII. — Lettre du roy de Navarre à la royne d'Angle-	
terre, faicte par M. Duplessis	18
XIV. — Lettre du roy de Navarre au roy Henry III, dressee	
par M. Duplessis	21
XV. — Lettre du roy de Navarre à la royne d'Angleterre,	
faicte par M. Duplessis	24
XVI. — Lettre du roy de Navarre à la royne d'Angleterre,	•
escrite de sa main.	26
XVII. — Lettre du roy de Navarre aulx seigneurs d'An-	-
gleterre, faicte par M. Duplessis	27
XVIII. — Lettre du roy de Navarre au roy d'Escosse,	-1
faicte par M. Duplessis	28
XIX. — Instruction à M. de Segur, allant de la part du	_
-	
roy de Navarre vers la royne d'Angleterre, dressee par M. Duplessis	30
XX. — Lettre de M. Dunlessis à M. Merlin, M. D. S. E.	58
- 42424 ACCLIC LIC III. IIIIIIIPSSIS 31 IVI - IVIPPIIII - IVI- II - 7. C., 1	~ -

TABLE DES PIECES, etc.	551
XXI Instruction à M. de Chastillon, pour le synode	
national de Nismes	38
XXII Lettre du roy de Navarre à M. le mareschal de	
Biron	42
XXIII Lettre du roy de Navarre à MM. les deputés des	•
Pays Bas	44
XXIV Lettre de M. Duplessis à M. le president Duranti.	46
XXV Lettre de M. Duplessis à M. le president Duranti.	47
XXVI. — Remonstrances à la France sur la protestation	
des chefs de la Ligue, faicte l'an 1585	49
XXVII Instruction à MM. de Clervant et de Chassin-	•
court	81
XXVIII Lettre du roy de Navarre au roy Henry III,	•
dressee par M. Duplessis	87
XXIX Declaration du roy de Navarre contre les ca-	
lomnies publices contre lui es protestations de ceulx de	
la Ligue, faicte par M. Duplessis	89
XXX. — Instruction à M. de Clervant sur la declaration	
ci dessus, dressee par M. Duplessis	126
XXXI. — Lettre du roy de Navarre à MM. de la court de	•
parlement, faicte par M. Duplessis	128
XXXII. — Lettre du roy de Navarre à la royne d'Angle-	
terre, faicte par M. Duplessis	129
XXXIII. — Les dangers et inconvenient que la paix faicte	
ceulx de la Ligue apportent au roy et à son estat	131
XXXIV. — * Lettre à M. le duc de Montmorency	140
XXXV. — Lettre du roy de Navarre au roy Henry III,	
faicte par M. Duplessis	141
XXXVI. — Lettre du roy de Navarre à MM. des Ligues	
de Suisse, faicte par M. Duplessis, et envoyee par M. de	
Calignon	145
XXXVII. — Lettre de M. Duplessis à M. d'Elbene	148
XXXVIII. — Instruction au sieur Constant, allant de la	
part du roy de Navarre vers M. de Montmorency,	•
dressee par M. Duplessis	151
XXXIX Lettre de M. Duplessis à M. le duc de Mont-	
TROTEDCY	156

•

.

55	TABLE DES PIÈCES	
X	L Lettre de M. Duplessis à M. de Walsingham, par	
•	M. de Merle	157
	LI. — Lettre de M. Duplessis à M. Sidney	
X	LII. — Declaration et protestation du roy de Navarre,	
	de monseigneur le prince de Condé, de M. le duc de	
	Montmorency, etc., sur la paix faicte avec ceulx de la	
	maison de Lorraine, chess et principaulx aucteurs de la	
	Ligue, au prejudice de la maison de France; dressee	
	M. Duplessis	
X.	LIII. — Lettre du roy de Navarre à divers princes,	
	mutatis mutandis, par M. de Clervant, sur la fin d'aoust	
	1585	
	LIV. — Protestation de M. le duc de Montmorency	
A.	LV Instruction à M. de la Vieuville, gouverneur de	
•	Mezieres	
Λ.	LVI. — Lettre de M. Duplessis au roy Henry III, envoyee	
	par M. de la Vieuville, gouverneur de Mezieres, veneu de la part de sadicte majesté vers le roy de Navarre	
¥	LVII. — Lettre du roy de Navarre à MM. de la Sor-	
2 %	bonne, faicte par M. Duplessis	
X	LVIII. — Lettre du roy de Navarre à MM. du parle-	
	ment de Paris, faicte par M. Duplessis.	
X	LIX. — Association de Bergerac	215
	. — Lettre du roy de Navarre au roy Henry III, dresset	
	par M. Duplessis	
L	I. — Lettre du roy de Navarre à la royne mere, faicte	
	par M. Duplessis	
\mathbf{L}	II. — Lettre escrite à ung cardinal, pour estre semee	
	Rome; faicte par M. Duplessis	
L	III. – Lettre de M. Duplessis à madame la duchesse	}
	d'Uzès	233
L	IV. — * Lettre à M. Stukius, professeur en théologie,	•0
	à Zurich	
F	V. — * Lettre dedicatoire à tres haulte, tres vertueuse	
	et tres excellente princesse Catherine de Navarre, sœur	
<u> </u>	unique du roy de Navarre	257
L	VI. — * Au roy	iola

.

LXIX. — Instruction pour le sieur des Reaux, allant de

la part du roy de Navarre en Suisse, Allemaigne et

Italie, dressee par M. Duplessis.....

LXX. - Lettre de M. Duplessis à Mme la duchesse d'Uzès... 315

LXXI. — Instruction au sieur de Lambert, allant de la	
part du roy de Navarre vers M. de Montpensier 316	ì
LXXII Minute de lettres pour monseigneur de Mont-	
pensier au roy, envoyee par le sieur de Lambert 318	}
LXXIII. — Minute de lettres pour monseigneur de Mont-	
pensier à la royne mere, envoyee par le sieur de Lam-	
bert)
LXXIV Minute de lettres pour monseigneur de Mont-	
pensier au Parlement, envoyee par le sieur de Lambert. 321	Ł
LXXV. — Instruction pour M. de Montmartin, allant	
vers le duc Cazimir	}
LXXVI. — Lettre du roy de Navarre à M. le duc Cazimir,	
faicte par M. Duplessis	,
LXXVII. — Lettre du roy de Navarre à la royne d'An-	
gleterre)
LXXVIII Lettre de M. Duplessis à M. de Walsin-	
gham, secretaire d'estat de la royne d'Angleterre 327	,
LXXIX. — Instruction pour M. Constans, allant vers	
M. de Montmorency	
LXXX. — Lettre de M. de La Noue à M. Duplessis 330	
LXXXI. — Lettre de M. Duplessis à madame de Laval. 332	
LXXXII. — Lettre de M. Duplessis à M. de Bellievre 333	
LXXXIII. — Lettre de M. Duplessis soubs le nom d'ung	
gentilhomme catholicque, contenant response aulx ca-	
lomnies d'ung livret d'ung certain pretendeu Anglois 335	
LXXXIV. — Response à un petit discours sur le voyage	
de M. de Mayenne en Guyenne	
LXXXV. — Memoire des deportemens de M. Duplessis	
à Montauban, l'an 1586 407	
LXXXVI. — Remonstrances aux trois estats de France	
sur la guerre de la Ligue ; faicte par M. Duplessis , soubs	
le nom d'ung catholicque romain, l'an 1587 415)
LXXXVII. — * Discours veritable des actions et compor-	
temens de M. de Chastillon pendant le temps qu'il	
a esté à Millau en Rouergue, et de la sedition que les	
consuls et habitans auroient esmeue à l'encontre de lui 434	Ł
LXXXVIII * Memoire de M. de Buzanval, pour le	

	•
CONTENUES DANS CE VOLUME.	555
faict de M. d'Espernon	452
LXXXIX. — Discours sur l'excessive chereté, presenté	1
à la royne mere, mere du roy, par ung sien sidele ser-	
viteur	463
XC. — Lettre de M. Duplessis à M. le prince de Condé.	485
XCI. — Lettre de M. Duplessis à MM. de Montauban	486
XCII. — Lettre de M. Duplessis à M. de Walsingham	488
XCIII. — * Histoire de la mort de la royne d'Escosse,	
executee le 19 febvrier 1587, envoyee d'Angleterre à	
la feue royne Louyse de Lorraine, espouse de Henry III,	
roy de France	•
XCIV. — Lettre de M. Duplessis à M. le mareschal de	
Matignon	_
XCV. — Lettre de M. Duplessis à M. de Beze	•
XCVI. — Lettre de M. Duplessis à M. Du Fay	3
XCVIII. — Lettre de M. Duplessis à M. de Guitry	
XCVIII. — Lettre de M. Duplessis à M. de Segur	-
XCIX. — Lettre de M. Duplessis à M. de Clervant C. — Lettre de M. Duplessis à M. Vacquiere, lieutenant	
general à Leitoure	
CI. — Advertissement aulx bons catholicques de Guyenne,	
sous le nom d'ung catholicque	
CII. — Instruction au sieur du Perron, s'en retournant	
trouver M. le duc de Montpensier	<u>.</u> .
CIII. — Protestation et declaration du roy de Navarçe	
sur la veneue de son armee en France	
CIV Lettre interceptee et dechiffree, escrite à M. de	•
Joyeuse	•
CV Instruction envoyee en Allemaigne par le moyen	
du sieur de Morlas; dressee par M. Duplessis	
CVI Lettre de M. le comte de Soissons au roy Henry III,	,
dressee par M. Duplessis	523
CVII. — Declaration des causes qui ont meu monseigneur	
le comte de Soissons de prendre les armes	
CVIII. — Lettre de monseigneur le comte de Soissons à	
M. le cardinal de Bourbon	
CIX. — Lettre de monseigneur le comte de Soissons à	

•

1

.

, ·

•

556 TABLE DES PIÈC	ES, etc.	
M. le premier president de Paris.		29
CX Lettre du roy de Navarre à la	royne d'Angleterre. 53	3 0
CXI Lettre de M. Duplessis à M	. de Walsingham 53	31
CXII Lettre de M. Duplessis à M	de Buzanval 53	33
CXIII Memoires envoyés en dive	ers lieux de ce qui se	
passa depuis le 24 aoust, que le 1	oy de Navarre sortit	
de La Rochelle, jusqu'à la bataille	e de Coutras ; dressés	
par M. Duplessis	5	3 6

. FIN DE LA TABLE DU TOME. TROISIÈME.



מ ש מים

•

1



